



بِسْمِ اللَّهِ الرَّحْمَنِ الرَّحِيمِ

جلد ثالث

# حیات الشیخون

سیر سنیہ جناب رسالتآب سید الانامی بہ دائر  
بعض معلوماقی حاویدر

مؤلفی :

یوسف سعاد

معارف نظارت جلیلہ سنک ۲۷ شوال ۱۳۲۱ و ۳ کانون ثانی  
۱۳۱۹ تاریخلی و ۲۳۸-۵۰۷ نومرولی رخصتنامہ سنی حائر در .

مهرسز نسخہ لکڑ ساختہ در

در سعادت

عصر مطبعہ سی : باب عالی جادہ سندہ نومرو ۴

۱۳۲۲

غرم



بِسْمِ اللَّهِ الرَّحْمَنِ الرَّحِيمِ

## فصل حادی عشر

سکزنجی سنه هجریه و قایمی

اسلام خالد و عمرو و عثمان . غزوة موته . سرية ذاة السلاسل .  
سرية ابی عبيده . خضره يه . بطن اضمه . فتح مکه . بعث خالد .  
غزوة حنين و هوازن . غزوة اوطاس . غزوة طائف . بعث  
عمرو بن العاص . اسلام عروه . اتخاذ منبر . اسلام جبلة ابن  
ايهم . اسلام فروه . ولادت ابراهيم نجل النبي . فوت زينب  
بنت النبي . نرخ .

۱

— اسلام خالد و عمرو و عثمان —

شهر صفرده ایدی « خالد بن الوليد ، عمرو بن  
العاص ، عثمان ابن ابی طاحه » مسلمان اولمشلردر .



خالدایله عثمان ابن ابی طلحه، بر لکده مدینه منوره  
 کیورلردی. عمرو ایسه وقعه احزابده قریشلرک منزهماً  
 مکهیه عودتلی، مخاطرات آتیهیه قبو اچش نظریله  
 باقهرق کندوسنک هر درلو امید مظفری محو اولدینی  
 حالده ارض حبشه صاوشمش ایدی.

ظن و تخمینی اوزره شایدکه قریش، مغلوب اولور  
 ایسه کندوسی حبشهده بولنوب مصاب اولمش اولمیه جق!  
 اما غالب کلورسه سلامتله مکهیه عودت ایدم بیلجک وهر  
 ایکی تقدیردهده متضرر اولمیه جق ایدی!...

عمرو، هنوز، نجاشی نزدنده ایکن سفارتله حبشه  
 کلان عمرو ابن امیه الضمری حضرتلرینی اولدیرمک  
 اوزره النبه ویرمسنی نجاشیدن رجا ایدوب نجاشی،  
 تکلیف واقعی صوک درجهده تقییح وحقایق متظاهریه  
 قارشى حالا مسلمان اولمیدیفندن ناشی عمروی توبیخ  
 ایتمش عمروده اوراده قبول اسلام ایدرک مدینه طاهرهیه  
 طوغری یوله چیقمشیدی. خالد بن الولیدک اسلامه  
 ابتداء میلی، رسول الله صلی الله علیه وسلم، حدیبیه  
 سفرنده وعسفان منزلنده صلات خوفه مشغول اولدینی  
 آنده عاینه بر قاج کره قصد ایدوب موفق اوله مامسی  
 ساعتده ظهور ایتمشیدی.

خالد، اسلامك احواله نظراً عاقبت غالييتنى اكلا -  
 يهرق، روماليله التجا ايتىنى قورمشدى. شوقورونتيده  
 ايكن افنديز، عمرة القضاء مقصديله مكيهه كلوب ووليد  
 بن الوليد، دن برادري خالد بن الوليدك حانى استفسار  
 بيوردى. و: [خالد، دين اسلامك حق اولدينى نظرند  
 مخفى قاله حق آدمليدن دكلدر] ديدى كه بوده خالدك  
 عرفاتنى تقدير ديمك ايدى. او ايسه كويا مسلمان يوزينى  
 كورمامك اوزره مكه خارجنه چيقمشدى.

وليد بن الوليد، كيفيتى وحقننده ابزال بيوريلان  
 التفات ستايش آميزى برادرينه يازدى. خالد دخى اندن  
 محظوظ ومنبسط اولهرق ارتق قبول دين اسلامه قطعياً  
 قرار ويرمش اولدينى. حالده عودت ايتدى و مدينة  
 طيبه يه عزيمت عزيميله مكه ده صفوان بن اميه يه ملاقى  
 اولهرق:

— «يا ابا وهب! ناصلسك محمد [عليه الصلوة  
 والسلام] عرب و عجمه غالب كلدى كندونه تبعيت  
 ايدى لم انك شرفى بزم شرفز ديمكدر»  
 ديدى. صفوان، مخالفته ابدآ دوام ايدى جكنى  
 سويلدى. خالد، صفوانك سوزينى ايشيدنجه باباسيله

برادرینک بدرده مقتول اولدقلرندن ناشی اغبرار وانفعالی  
باقی اولدیغنی دوشونهرک باشقه رفیق بولمق نیتله اندن  
واز کچوب عکر مه ابن ابی جهله راست کلدی واکا  
دیدیکنی بوکاده سویلدی. فقط عکر مه دخی صفوان کبی  
سوزلر سویلدی. بونکله رفاقت املی مقطوع اوله رق  
صوکره عثمان ابن ابی طلحه بی بولدی. چونکه او،  
خالدک دوستی ایدی. مع مافیہ احدده باباسی طلحه، عمی  
عثمان ودرت برادری بولنان مسافع، جلاس، حارث،  
کلابک قتللری عثمانی داغدار تاثیر ایتمشدی. خالد، بو  
جهتی نظر اعتباره الهرق بر کره تودد ایله برابر: [بزه]  
دایکده اوطورن بر دلکی یه بکزرز که اوستندن بر قوفه  
صو دوکولدیکی کبی طیشاری چیقمنه مجبور اولور] دیه  
بر مقدار مقدمه دن صوکره ماده بی آچدی. عثمان ایسه  
خلاف مأمول اوله رق اجابت و موافقه مسارعت  
ایتدیکندن او آنده مدینه سعاده کیده جکاری وقتی  
قرارلشدیردیله.

خالد، عثمان ایله برلکده مدینه سعاده کلیر ایکن  
یولک هده منزلده عمرو بن العاصه راست کلدی عمرو،  
بوللره: [مرحباً بالقوم] دیدی. بوللرده: [وبک] دیه  
حسن مقابله ده بولندیله.



عمرو، نرمیه کیتدکارینی صورتی. خالد:

— «والله لقد استقام الميسم وظهر الامروان

هذا الرجل لني فاذهب اسلم»

دیدى. عمرو کندوسنكده عين مقصد ايله مدينة نبوته متوجه ایدوکنی سویلمکله هپسی رفیق اولدیله. بولکده ایکندی وقتی مدینهیه واردیلر. راحله لرینی ظهر حرمده اناخه ایتدیله. خبر مقدملری مسموع عالی بیوریلوب افندیمز، ممنونیتندن: [رمتکم مکه بافلاذ کبدها] دیه سویلدی.

خالد، لباس پاکنی کیه رک نحو رسالته یونولوب کیدرکن تصادف ایلدیکی برادری ولید: [یوری زیرا سنک مقدمکز رسول اللهک موجب سرور و محظوظیتی اولمشدر] دیملکه خالد، سرعتلیدی. قارشیدن کوردیکی دقیقه دن خالدک حضورعالی رسالتپناهییه مشول ووقوفه دکن افندیمز، تبسم اوزره بولندی.

خالد، رفیقلرندن اول ذات اقدس رسالتپناهییه نبوتله سلام ویردی. رسول اللهده وجه طلق ايله رد سلامدن صوکره:

— « الحمد لله الذى هدانا لهذا . قد كنت ارى لك عقلاً  
رجوت ان لا يسلمك الا الى خير »  
بيوردى . خالد :

— « يا رسول الله ! ادع الله لى يغفر تلك المواطن  
التي كنت اشهدا عليك »  
ديه رجا يتمكله افنديمز :  
[ الاسلام يجب ما كان قبله ] ديه بيوردى . خالدده  
مستريح اولدى .

صوكره عثمانده عين وجهه اوزره بيعت ايتدى  
عمرو، كندى ترتيب و ارزوسيله و ذنب ماتقدم و ما  
تاخرى ايچون استغفار ايتديرمك . مقصديله رفيقلىرى  
اوكنه قاتوب حضوره سوق ايتمش و كنديسى انلردن  
كيرو قالمش ايدى . مع مافيه حضور عاليده حجاب و حياء  
سندن يوزينى قالد يروبده وجه نوار نبوى به باقمغه قادر  
اوله مامش و حتى حين بيعتنده مضمرى اولان ذنب  
ما تاخرندن استغفار جهتي اونوتهرق رفيقلىرى كبي  
يالكنز ما تقدمدن بحث ايدى بيلمشدر ! .

قدوم عمرودن مقدم بركون رسول الله صلى الله  
عليه و سلم ، اصحاب كرامنه : [ يقدم عليكم الليلة رجل

حکیم [بیورمشلردی [\*] فرداسی کیجه عمرو بن العاص،  
رفیققریلہ برابر مدینہ موصلت ایتشد.

خالد، بنی مخزوم اشراقندن [ولید بن المغیره] نک  
اوغلی اولوب قریشک سواری فرقه سی قوماندانی دیمک  
ایدی. فن حربده فوق العاده درایت و مهارت اکا داد  
حق ایدی.

عمرو بن العاص، بنی سهم اشراقندن و بین العرب  
عقل و فطانتیلہ معروف برداهی حصافتشعار ایدی.  
عثمان دخی بنی عبدالداردن اولوب کعبه معظمه نک پرده  
داری ایدی. مفتاح بیت، انلرده بولنور ایدی که شو  
صورتله حائز اهمیت اولان اوج بیوک ذاتک بردن قبول  
اسلام ایتلمی هیئت اسلامیہ ایچون بادی سرور عظیم  
اولمشدر.

۴

### غزوة موته

موته، شام دیارنده کرک بلده سنک قبله جابنده کائن

[\*] اخرج الخطیب البغدادی ان رسول الله صلی الله علیه  
وسلم قال یوما لاصحابه: یقدم علیکم اللیلة رجل حکیم فقدم  
عمرو بن العاص مهاجراً.



وبلقایه تابع بر پردرکه اکا اضافتله مشهور اولان محاربه،  
 روم قیصری امراسندن [شرحبیل بن عمرو الغسانی] نك  
 سفیر نبوی [حرث بن عمرو الازدی] رضی الله تعالی  
 عنه حضرت لرینی قتل ایتمش اولمسندن ایلری کلمشدی .  
 رسول الله صلی الله علیه وسلم جناب حرثی الله  
 نامه سعادت و یرمرك هرقل طرفندن بصری وحوالیسنه  
 والی اولان حرث ابن ابی شمر الغسانی به کوندرمشدی .  
 سفیر مشارالیه موده شرحبیل ، راست کلهرك سوال  
 ایتدی . شام طرفنه متوجه اولدیغی اکلامسی اوزربنه  
 «سنده غالباً محمد [علیه الصلوة و السلام] ك ایلچیلر -  
 ندنسك» ديه ابتدا بند و بوقاغی اورمش صوكره شهید  
 ایتمشدر .

جناب حارثندن باشقه سفراء کرام رسالتپناهی اره -  
 سندده هیچ بری قتل اولنماش شرحبیل ، حارثی سفیر  
 نبوی اولدیغی بیلیدیکی حالده قتل ایتمشدی !

شو مادهیه مطلع اولدینی زمان افندیمر ، بك زیاده  
 متأثر اوله رق همان براردو تجهیز بیوردیلر . آزادلیلرندن  
 [زید بن حارثه] رضی الله تعالی عنه حضرت لرینی ، الله  
 بیاض بر رایت و یرمرك اردویه قوماندان تعیین ایتدی .

و: [زید شهید اولور ایسه جعفر ابن ابی طالب اوده  
شهید اولور ایسه عبد الله بن رواحه امیردز او دخی  
شهید اولور ایسه مسلمانلر برینی اوزرلرینه امیر انتخاب  
ایتسونلر] دیه بیوردی .

نعمان اسمنده بریهودی ، او آنده حاضر ایدی :  
[ یا محمد ! پیغمبر ایسه ک اسمنی صایدیغک کیمسه لر جیمعا  
مصاب اوله جققلر . زیرا انبیاء بنی اسرائیل ، بویه بر  
ایشده هر قاج کیمسه نک آدینی صایارلر سه هپ مصاب  
اولورلردی ] دیمکله زید اکا رغما :

— « اشهد انه رسول صادق بار »

دیه سویامشدی .

ناس ، موته سفریچون جرفده طویلانمق اوزره  
خروجه مسارعت ایلدیلر . رسول اکرم صلی الله علیه  
وسلم دخی برلکده چیقوب عسکری « تبة الوداع » نام  
بایره قدر تشییع بیوردی . و تنیده توقفه : [ او صیکم  
بتقوی الله و بمن معکم من المسلمین خیراً . اغزروا  
باسم الله فی سبیل الله من کفر بالله . لاتغدروا ولاتغفلوا  
ولاتقتلوا وایدآ ولا امرأة ولا کبیراً فانیاً ولا منعزلاً

بصومعة ولا تقربوا نخلاً ولا تقطعوا شجراً ولا تهدموا  
بناءً [ديه وصايا اجرا بيورديلر .

عسكر حركت ايلديكي ائساده بعض اهل اسلام :  
[ دفع الله عنكم وردكم صالحين غايمين ] ديه ندا ايتمكله  
عبدالله بن رواحه رضى الله عنه ، ائله قارشى :

لكنتى اسأل الرحمن مغفرة

وضربة ذات فرغ تقذف الربذا

او طعنة بيدي حران مجهزة

بحربة تنفذ الاحشاء والكبد

حتى يقال اذا مروا على جسدى

يا ارشد الله من فاز وقدرشدا

شعرينى سويلا مشدر .

حين وداع واقتراقنده رسول الله صلى الله عليه وسلم  
اكا [ قل شعراً تقتضيه اقتضاباً ] ديه امر بيوروب مشار اليه  
دخى در حال :

انى تفرست فيك الخير نافلة

فراصة خالفت فيك الذى نظروا

انت الرسول فمن يحرم نوافله

والوجه منه فقد ازهى به القدر



فثبت الله ما آتاك من حسن

نثیت موسی و نصیر کالذی نصر و

شعربی سویلمش اندن ناشی رسالت پناه صلی علیه الاله  
افندی مزده : [ و انت فثبتك الله يا ابن رواحه ] ديه دعا  
بیور مشلردر.



شر حبیل ایسه اردوی اسلامك حرکتدن خبردار  
اوله رق سدوس بن عمروی بر مقدار - روایت کوره  
اللی بیک - عسکر له مقابله یه کوندرد کدن صو کره کندوسی  
منتظم بر اردو تجهیزاته تشبث و جانب قیصریدن استمداد  
ایلمشدر .

اهل اسلام اردویی، سدوس بن عمروه وادی القراده  
راست کلوب محاربه یه کیریشدی . فقط سدوس مقتول  
و عسکری مهزوم اولدی .

سدوس مصادمه سنی آز بر همتله بر طرف ایدرک  
اردوی اسلام معانه واردی . خالبوکه قیصر شر حبیل یوز  
بیک نفرلی بر قوه امدادیه تشدید رمش و اندن فضله لحم، جذام،  
بلقین و سائر بعض قبائل عربان دخی شر حبیله التحاق  
ایلدیکندن دشمن ، دهشت ویره جک درجه یه وازمش

وشو قوتك مقدمة الجيشى مالك بن رافله نك معيتنده  
اولدینى حالده مآبه قدر آچیلمشدى . اكا اوج بیسك  
نفر دن عبارت اولان بر قوتله مقابله تهلکلی کورونه رك  
عسکر اسلامه طور غونلق كلدى .

بناءً علیه اردو ارکان کرامی ، یا عودت لرینک ویا  
لزوم امدادك عرض عتبه علیای جناب رسالہ آب سید  
الانامی اولنمى خصوص لرینى تأمل ومذاکره ایچون او  
محلده ایکی کیجه قالدیلر .

عبدالله بن رواحه رضی الله عنه ، اردوی اسلامك  
رجعتی شان وشرف اسلامه یا قشیمیه جنی وبعد مسافه  
جهتیه استمداد دن ده استفاده حاصل اوله میه جنی مطالعه سنی  
بیان صد دیده : [ ای قوم ! والله سنك شمعی اکراه  
ایلدیک کزشی ، سبب خروج کز اولان شیدر . ارزوی  
شهادتله چیق دیکر . بز ، عدد وقوت و کثرتله قتال ایتیمورز .  
بلکه انجق دین ایلک اید . بورز . ایمدی یا غالبیت  
یا شهادت ] دیه رك مسلمینى قتاله تحریض ایلدی .

معانده ایکی کون اقامت دن صوکره متوکلاً علی الله  
روم اوزرینه ایلرویه طوغری عزیم و حرکت اولندی .

بلقا مضافاتندن مشارف نام محله دشمن اردوسنه تصادف  
ایدلمشدی .

موقع انتخابچون اسلام اردوسی اورادن کیری به  
طوغری براز چکارکدن صوکره صاغ قول [ قطبه بن  
قتاده العزری ] نك صول قولده [ عباده بن مالك  
الانصاری ] نك قومانداسی التسه اولمق اوزره صف  
حرب ترتیب ایدلدی . . زید حضر تلری ایسه رایت النده  
اولدینی حالد قلب عسکرده ایدی .

طرفینك مقاتله به باشلايه جفی بر صیره ده جناب زیدك  
قلبه جواریمی ، خدامی ، نخاستانلری ، بعض کونه  
عقدله لیرا اراث واحداث ایدرك وزید، شو عقدله لری  
خلوص درونه و صفوت قلب و صدره مانع کوره رك  
خواطر مذکوریه دفع ایچون عسکر مسلمینه : [ ای  
معشر مسلمین ! هیکز شاهد اولیکز که نقدر  
ایراد وعقارم و متملکاتم وار ایسه هپسنی . بیت انمال  
مسلمینه باغشلادم . زخارف دنیا شرف دین و عقبانك  
بر جزء قلیانه معادل اوله من . بوکون اوشرفك احرازی  
کونیدر ] دیه صوت بلند ایله ندا وبعده نفسنه ده [ ای  
نفس ! ایشته یالکیز قالدك ارتق خلوص نیت ایله غزا



ایتملیسک [ دیه خطاب ایدوب صوکره حربہ مباشرت  
ایتمشدی ! فقط حین مقاتلہ مذہ مزراق اینلہ اوریلہ رق  
شہید اولمغلہ رایتی جعفر المشدرد .

جعفر دخی یارہ لندی . یارہ سیلہ برابر ہیچ فتوریلہ  
کتیر میہ رک ثبات ایتدی . وبری بری اردنجه صاغ وصول قوللری  
کسیلدی فقط قولی کسیلنجه رایتی صول الیلہ طوتدی صول الی  
قطع ایدیلنجه اوزمان یرہ دوشور مامک اوزرہ رایتہ صارلدی .  
نهایت وجودندہ سکساندن زیاده یارہ اولدینی حالہ مرتبہ  
شہادتہ ایرہ رک رایت یرہ دوشدی . عبدالله بن رواحہ  
رضی اللہ عنہ حضرت تلی در حال سکر تدی قالدیردی . النده  
بولندینی حالہ قتالہ باشلادی . بر اراق دشمن قلنجی  
طوقانہ رق یارمقلرینک بری نیم مقطوع قالمشدی . حالبوکہ  
یاری کسیک پارماغی اعمال سیفدہ کندیسنه زحمت واذیت  
ویرمکہ باشلادیغندن آتندن ایندی . نیم مقطوع پارماغی  
ایاغنک التہ قویوب چکدی قویارتدی . اندن صوکرہ شہید  
اولنجه یہ دکین ایستدیکی قدر مانعسز حرب ایتدی .

\*\*\*

جناب عبدالله بن رواحہ نک وقوع شہادتیلہ اردوی  
اسلام ، قوماندانسنز قالمش بولمغلہ برابر رایت سـ عادت

یره دوشمشدی ! . فقط یرده قالماق ایچون [ ابوالیسر کعب بن عمرو الانصاری ] رضی عنه الباری حضرتلری آلدی . و اهل اسلام طرفندن امارت عسکریه یه انتخاب اولنه جق ذاته تسلیم ایتمک وزره [ ثابت بن اقرم العجلانی ] حضرتلرینه ویردی .

اردوی هایون ، مشکل بر موقعده ایدی . هزیمت ، تماماً ا-لامه توجه ایتمشدی . خالد بن الولید ، بوزغون عسکرک اوکنه کجدی اردوی فراردن ایقویمق ایستدیکی حالده موفق اوله مدی . انجق کندیس ی انتخاب ایتدیکی سپره صوقولدی .

ایشته او یله طار بر زمانده [ قطبه بن عامر ] رضی الله تعالی عنه حضرتلری ، بوزغون عسکری طور دیره - بیلمشدر ! . .

صوت بلند ایله دیمشدی که :

— « ای جماعت مسلمین ! فرار ایدرکن اولمکدن مردانه مقاومت ایدرکن اولمک دها خیرلیدر » شو سوزدن عسا کر اسلامیه ده ایی بر تاثیر حاصل اولدی . بناءً علیه بوزغون عسکر ، یورکنلرک دشمن علپهنده اولمق اوزره همان کیری یه طوغری دوندی ! خالد بن الولیدک معیتنه طویلاندی [ ثابت بن اقرم ]

حضرتلری دخی رایتی اکا ویردی . جناب خالد ،  
 بدايت امرده امتناع کوستره رک :

— « امر امارته سن بندن دهازياده احق واليقسک  
 زیرا سن بندن دها ياشلیسک »  
 دیمشسه ده ثابت :

— « سن فن حربی بندن دها اي بیلیرسک .  
 خصوصيله بن بونی انجق سکا ویرمک ایچون ادم »  
 دیمکه برابر افکار مسلمینه مراجعت ایدرک :  
 — « ای جماعت مسلمین ! خالک امارتنه  
 راضیمیسکر ؟ »

دیوب جواب موافقت ده الیغندن جناب خالد ،  
 رایت سعادت النده و موجود عسکر معیتنده اولدینی  
 حالده محاربه ایلمشدر .

خالک او کون ابناء حرب و قتالده ابراز ایلدیکی  
 بسالت پک فوق العاده ایدی . حتی النده طقوز عدد  
 قلنج قیرلمشدی !

مجاهدین کرامک قلتيله برابر کوستردیکی متانت  
 و فعالیت مردانه سنه دشمن عسکری نظر تحیرله باقیور  
 ایدی .

خالد بن الوليد، ترتيب و تصور ايديكي پلانتيك  
محسناتيله عسكريني شو بيوك دشمنك النذن قورتار -  
مشدي :

صباحلين عسكري تعيه ايدركن اولكي وضعي  
دكشيدردى . پيشداري دمدار ، مداري پيشدار تعين  
ايتدى ! صاغ قولى صول قوله صول قولى صاغ قوله  
چكيدردى كه شو ترتيب ، يكي امداد عسكري كلديكي ظنيله  
دشمنى فنا حالده توهيم ايده چكدى ! .

خالد ، شدتلى بر هجوم ايتمش و دشمنى يرندن  
اوينادوب كبرى به طوغرى پوسكورتمشدر .

ايشته او زمان خالد، دشمنك معسكرده براقديني  
بعض اشياي آلهرق كرى دوندى . و اردوسنى هيئتيله  
ياواش ياواش منزل سلامتته چيقاردى .



مؤتهده حرب وقوعه كلديكي كون رسول كبريا  
افنديمز ، اصحاب كراميله برابر مسجد شريفده او طور -  
يورلردى . ديدة پر نور بصيرتلى ايله عالم معنايه ناظر  
و متوجه ايدى . بر اراق [الصلوة جامعة] ديه ناسى  
چاغيره رق منبر سعادتلرينه چيقدى . مبارك چشم انور -  
لرندن ياش اقمقده ايدى : [ ايها الناس باب خير باب خير ،

باب خیر اخبرکم عن جيشکم هذا الغازی [ ديه باشلايه رق  
 [ زيد بن حارثه ] حضر تلرينك شهيد اولديغنى سويلدى .  
 لندن صوكره براز زمان سكوت اوزره بولنوب [ عبدالله  
 بن رواحه ] رضى الله عنه حضر تلرينك دخى شهيد  
 اولديغنى كوزلرندن ياش آقديغنى حالده بيلديردى . بر  
 از دها صوكره : [ اخذ الراية سيف من سيوف الله حتى  
 فتح الله عليهم ] رايى ، اللهم قلنجارندن برى آدى  
 و جناب حق ده فتحى انك يوزندن ويردى [ بيوردى كه  
 سيف تعبيرندن مقصود على ، خالد بن الوليد ايدى ! .

جناب خالدك [ سيف الله ] لقب و عنوان جلادتيه  
 ملقب و معروف اولمى افنديمك شو تعبير شريفلرندن  
 ايلرى كمشدى .

مرويدر كه اصحاب كرامدن [ يعلى بن اميه ] رضى  
 الله عنه حضر تلرى ، موته خبرينى حضور رسالته عرض  
 و اعلام ايده چكى زمان افنديمك ، اكا :

— « ايسترسهك سن بكا خبر وير ! ايسترسهك بن

سكا خبر ويريم »

ديمشدى . جناب يعلى :

— « بيوريكز يارسول الله ! »



دیدیکندن رسالتناما افندیمز، مؤته وقوعاتی اصحابنه  
برر برر خبر ویردی .

رسول اکرم افندیمز ، جعفر ابن ابی طالب رضی  
الله عنه حضرتلرینک فوتندن طولایی پک محزون  
و متأثر ایدی .

مجاهدین کرامک مدینه منورهیه یوم وصولندهده  
استقبال ایچون را کبأ خارج شهره قدر چیقمشدی .  
او زمان جعفرک دها صبی بولنان اوغلی [ عبدالله ] ی  
قارشوسنه المشدی . عودت ایدن مجاهدین ارسنده  
جعفرک بولننامسی سببیلله چوجغنک یوزینه باقدقجه آغلار  
و مبارک چشم شریف نبوتلرندن یاش آقار ایدی .

جناب جعفر رضی الله تعالی عنه حضرتلرینک  
حقنده طرف اشرف رسالتدن : [جعفرک کسیلان ایکی  
قولنه بدل جناب حق ، اکا ایکی قتاد ویردی کوردم که  
سماده ملکلرله اوچیور ایدی] بیورلدی . و اوغلی  
عبدالله دخی : [ هنیثاً لك ابوك يطير مع الملائكة في  
السماء ] تبشیر عظیمی اجرا اولندی که حضرت شهیدک  
[ ذو الجناحین ] و [ طیار ] دیه شهرت المسی بوندندر .

## سریه ذاة السلاسل

قضاءه طائفه لرندن بلی ، عذره قبیله لرینک مدینه  
منوره حیواناتی غارت ایتک اوزره وراه وادی القراده  
تحشد ایتکده اولدقلری مسموع عالی اولقله تنکیللری  
ضمینده علیهلرینه شهر جمادی الاخره سنده عسکر کوندرلدی .  
مهاجرین وانصاردن مرکب اولان اشبوفرقه ، اوتوزی  
سواری اولق اوزره اوچ یوز نفر ایدی و بیاض برلوا  
ایله سیاه برایتده للرنده ایدی بیوک والده سی [\*] بلی  
قبیله سندن اولق مناسبتیله «عمرو بن العاص» شوفرقه نك  
امارت عسکریه سنه طرف اشرف رسالتدن مأمور تعیین  
ایدلک اوزره : [ حاضر اول سنی برغزایه کوندره جکم که  
غنیمته نائل اوله جقسک ] دیه دعوت بیوریلورکن عمرو ،  
کندوسنک دنیا مالی ایچون مسلمان اولدیغنی سویلمش  
اوزمان حضرت سیدالانام افندیمزده : [ نعم المال الصالح  
للرجل الصالح ] بیورمشدی .  
همرو بن عاص رضی الله عنه حضرتلری ، دشمنک

قوتنه واقف اولدینی زمان مرکزدن استمداده احتیاج حس  
ایدرك بنی جهینه دن [ رافع بن مکث ] رضی الله عنہی  
حضور رسالته کوندردی استمداد ایتدی .

انک اوزرینه رسالتپناه افندیمزده [ ابو عییده عامر  
بن عبدالله الجراح ] رضی الله تعالی عنہی ایکی یوز نفر  
عسکر ایله امداده کوندردی . حین حرکتندہ عمرو ایله  
اختلاف ایتیموب اتفاق اوزره حرکت ایتلمری لزومی  
طرف عالی پیغمبریدن کندوسنه اهمیتله امر و توصیه  
بیورلمشدی .

ابو عییده حضرتلرینک معیتندہ کی قوه امدادیه  
ایچنده جناب شیخین مکرمین حضراتی دخی موجود  
ایدی ! .

ابو عییده اردوکاهه واصل اولدینی زمان عسکرک  
وظیفه امارتی اجرا ایتک ایسته مشدی . لیکن عمرو  
بن العاص :

— « سن بکا امداد ایچون کلدک اصل امیرالجیش نم »

دیه رد ایتدی . ابو عییده ایسه طبعاً ملایم برذات  
ملکی الصفات ایدی جوابده دیدی که :

— « رسول الله ، اختلاف ایتیمکز دیه امر ایتدی

سن بکا اویماز ایسه ک بن سکا او یارم »

عمرو ، امارتجه غيرك ايليشكنى كسمشىدى ! .  
 بناء عليه امام اولوب عسكركه نماز قيلديردى . اصحاب كرامك  
 افضللى [ ابو بكر الصديق ] ايله [ عمر الفاروق ] رضى الله  
 تعالى عنهما حضرتلرى ، عمروك اداره عسكريه سى الله  
 او صورتله كيرمش اولديلر !

جناب عمرو بن العاص ، عسكرك كندينه ويكديكرينه  
 درجه انقيادىنى كورنجه كندى معلوماتنه مراجعت  
 ايدورك يارينكى حركتى ايجون بر پلان ترتيب اتمش  
 انجق ترتيب و تدبيرنده زياده شدت كوسترمشىدى ! حتى  
 كيجه اردوده آتش ياقلمامسنى شديدأ منع ايتدكن فضله :  
 [ هر كيم آتش ياقار ايسه انى او آتسه آنارم ] ديه  
 اعلان دخى ايلمشىدى ! . هوا ايسه صوغوق اولغله  
 عسكرك ، تحمل ايدهميهرك شيخين حضرتلرينه شكايت  
 ايتديلر .

جناب فاروق ، حدث ايدوب :

— « نه ديمك ! بو آدم ، عسكرى صوغوقدن قيره -  
 جقمى » .

ديدى . بو سوز امير الجيشك پلاننك علمهنده  
 ايدى . ابو بكر الصديق رضى الله عنه ، امير الجيشك ترتيبىنى  
 تحسين و فاروقك حدثنى تسكين ايدهور ايدى :



— « طوقامه یا عمر ! حضرت رسول الله ، انی

انجق احوال حربہ وقوفی ایچون امیر تعین ایتدی  
مادامکہ امیردر ایشنه قاریشمق اولمز »

عمر، ارتق سکوت ایتدی. چونکہ امیر عمروک شو  
پلانی، موافق نفس الامر بر مصلحت ایدی. بناء علیه  
اکا مخالفته عسکرک آتش یاقسی بر چوق محاذیر و مخا-  
طراته بادی اوله بیلجک ایدی. مثلاً قوه اسلامیه به نسبت  
دشمن، کلیتلی ایدی. اسلام عسکری آتش یاقدینی حالدہ  
دشمن آنی قارشیدن تخمین ایدرک مقدارینی اکلادقدن  
صوکره تلاش ایتمکسزین طایانه طورہ جق ایدی .

عمرو بن عاص ایسه کیجه ترتیب ایتدیکی پلانک  
اکالی ایچون صباحلین بر هجوم ناکهانی اجرا ایتدی.  
دشمن اسلام اردوسنک مقدار صحیحی بیلمدیکی جهته  
بردتبره اورکوب بوزلدی . معسکرده بر خیلی حیوانانی  
ترک ایدرک طاغلدی.

عسکر اسلام، انلرک براقدقلری حیوانانی اخذ  
واغتنام ایله ساناً مدینه طاهره به عودت ایتدی .

انشاء عودتده غایت صوغوق بر کیجه عمرو بن  
عاص، احتلام اوله رق یالکز براستنجاء وتیم ایله عسکره  
صباح نمازینی قلدیرمشدره .

خبر سلامتی پایگاه سعادتہ عرض اچون عمرو .  
 عوف بن مالکی مدینہ طیبہ کوندرمشدی . عوف بن  
 مالک، عمرو ایلہ ابو عبیدہ ارہ سندی کی ماجرای و ابو  
 عبیدہ نك عمروہ صورت اطاعتی دخی عرض ایتدیکنندن  
 انك شو حالی بالخاصہ محظوظیت سنیہ بی موجب اولہرق  
 حقندہ : [ یرحم الله ابا عبیدة ] دعاء مخصوصی ارزان  
 بیورلمشدر .

عمرو ، مدینہ . نورہیہ کلدیکی زمان یولده جنب  
 ایکن امام اولوبده عسکرہ نماز قلدیردیغندن طولابی  
 طرف اشرف رسالتپناہیدن استجواب ایدلدی . هوانك  
 شدت برودتندن ناشی اغتسالی حالندہ هلاك قورقو .  
 سیلہ بعد التیمم نماز قلدیردیغنی سویلدی . حضرت سید  
 الانام افندیمزده تبسم بیوردی . انکارہ دلالت ایدہ جك  
 باشقہ بر حال و طورده بولنمیوب یالکز صوغوق هواده  
 عسکرہ آتش یاقدیرمدیغك علت و حکمتی ده سؤال  
 ایتدی . دشمنك اوزاقدن آتشی کوریکی حالده مقدار  
 عسکری کشف و تخمین ایدہ یلمسی احتمالہ منی ایدوکنی  
 عرض ایدوب کیفیت قرین استخسان عالی اولدی .

عمرو بن عاص ، هنوز یکی مسلمان اولمشکن کبار  
 اصحاب کرامدن مرکب بویله فرقه قوماندانلغنه مأمور

بیورلمسیله برابر مظفریت واقعه سندن فوق العاده ممنون  
ایدی. نزد رسالت پناهیده سائر لره فضل و رحیمانی اولسه  
او یله افخم اصحاب اوزرنده مسند قوماندانی به مأمور  
بیورلمیه. بخی فکرینه ذاهب اولمشدی ! . حال بوکه انک  
حکمت امارتی ، او خصوصده حائز اولدینی معلوماتی  
و برده بیوک والده سنک بنات قضاعه دن بولمنسی ایدی .  
جناب ابی عییده نك اکا اطاعت و تبعیتی ایسه منع وقوع  
اختلاف ایچون مجرد مماشات قیلندن برشی ایدی ! .  
جناب عمرو ، او فکرینی مقام تفاخرده اولمق اوزره  
اظهار ایتدی . معاودت و مواصلتدن سوکره ایدی بر  
کون حضور رسالت پناهیده دیدی که :

— یا رسول الله ! انک زیاده سودیکک کیمدر ؟ »

اقتدیمز :

— « عائشه ! »

دیه جواب ویردی . عمرو ، بردها صورددی :

— « نسواندن دکل . ارککلر ایچننده انک زیاده

سودیکک ؟ »

اقتدیمز ! جواب ویردی :

— « عائشه نك باباسی ابو بکر ! »

— « یا اندن سوکره ؟ »

— « عمرو » —

عمرو ، سؤالی تکرار ایتدجکه رسالتپناه افندیمر ،  
اصحاب کرامنی صره سیله سو یلردی . بو وجهله بر چوق  
اصحاب کرامک اسمی یاد بیورلدینی حالده کندیسنه نوبت  
کلدیکندن عمرو اوتانه رق سکوت ایتمشدر !

فی الحقیقه عمرو بن عاص حضرتلرینه نسبتله عندالهیده  
وعند رسالتپناهیده دهاسو کیلو پک چوق ذوات و بلکه  
طبقات اصحاب کرامدن عمروک بولندیفی طبقه نک اوست  
طرفنده بر خیلی طبقات وار ایدی . سؤالده دوام ایدوبده  
جواب المسی لازم کلسیدی سکزنجی سنه هجریه دین  
قبول اسلام ایتمش اولان اصحاب کرام تماماً صایله جقده  
عمروه بعده نوبت کله جکدی . عمرو بن عاص ، بونی  
اکلادی سکوت ایتدی .

•••

۴

— سریه ابی عییده —

جهینه علینه

شهر رجیده ایدی ابو عییده عامر بن الجراح رضی الله  
تعالی عنه حضرتلری ، اوچ یوز نفر عسکر ایله برابر



ساحل بحرده [ قبله ] موضعده جهينه طائفه سينك  
تنكيلنه مأمور آسوق اولمشدر فرقه نك ارزاقی آزا ولد یغندن  
توكنه رك بر خیلی صقندی چكمشلر حتی اغاچ یاپراغنی  
اكل دخی ایتشاردی !

شوصقندی بی جناب حق، مندفع ایلمشدی. حقك  
بر لطف مخصوصی اولمق اوزره دكز ، [ غنبر ] نامنده  
بیوك بر بالخی ساحله ، قرهیه آتمش او بالقی ایله اسلام  
عسکری تمام یارم آی مرزوق اولمشدر . لکن حرب  
و قتال وقوعه کلدن عودت ایدلدی .

\*\*\*

۵

سریه ابن الربعی

[ نجدده خضرهیه ]

اصحاب کرامدن « ابوقتاده نعمان بن الربعی » رضی  
الله تعالی عنه حضرتقلری اون بش نفر عسکر ایله برابر  
شهر شعبانده حرکت ایتدی . نجد دیارنده [ خضره ]  
نام محله ساکن بنی غطفان علیه اعزام اولنیور ایدی .  
جناب ابن الربعی ، غطفانیلرك بر ازینی قتل و درت نفر  
عورت ایله بر قاج نفرده صیلیرینی اسیر ایتدکدن صوکره

ایکی یوز اُس دوه و ایکی بیک قویون غنیمتله مظفرأ  
 عودت و مدینه منوره یه مواصلت ایتدی که شو وقعده  
 فرقه مذکوره، خارج مدینه ده اون بش کون قالمشدی.

•••

۶

### سریه ابن الربیع

[ بطن اضمه ]

ینه ابوقادة بن الربیع حضرتلری، سسکز یوز نفر  
 عسکر ایله سوق اولتمشدی « بطن اضم » مدینه طیبیه  
 اوج مرحله مسافده بر یردر. افسدیمز، مکه علیهنه  
 حرکت ایچون بعض تشبثاتده بولندیفی زمان کندی  
 نجد طرفیله مشغول کوستروب تشبثات و تدارکاتی اهل  
 مکه دن صاقلامق فکر یله شو فرقه تجهیز و اخراج اولتمشدی.  
 یولده « عامر بن الاضبط اشجعی » نام کیمسه یه  
 تصادف ایدلدی عامر، اسلامنی بللی ایدرک ایفاء تحیه  
 الاسلام صد دنده بونلره القاء کلمه السلام ایلدیکی حالده  
 عسکر افرادندن « محلم بن جثامه » انی اسکی بر ماجرایه  
 منی اوق ایله اولدیروب دوه سیله اشیاسنی مال غنیمت  
 دیه الدی .

محلّمك یدندن صدور ایدن شو جنایتك وقوع  
امثالیدن جناب حق، امتی : [ ولاتقولوا لمن اتقى الیکم  
السلام لست مؤمناً . . . ] آیت کریمه سبیلہ نہی و تحذیر  
بیور مشدر .

اشبو آیت کریمه نك سبب نزولی ، بر روایتہ كوره  
محلّمك وجه مبسوط اوزره ابن الاضبطی روایت دیگره  
كوره اسامه بن زید حضرت تلرینك و مرداس بن نہیك ہی  
قتل ایتمسیدر : غالب بن فضاله حضرت تلری ، بر طاقم  
عسکرله ارض فدكه كوندردلیكى زمان اهل فدك قورقو-  
لرندن اطرافه طاعیله رق مرداس قالمشدی . سریه نك  
بوكا تصادفنده مرداس ، تماماً اظهار اسلام ایلدیكى حالده  
اسامه ، انی قتل ایدوب قویونلرینی مدینه منوره یه سوق  
ایتدی . فقط کیفیت ، نظر رسول الله عین جنایت  
كوروله رك افندیمر ، زیاده متاثر اولمش واسامه یه مع التوبیخ  
اعتناق رقبه امر ایتمشدر .

ابوقتاده ، معیتله کیری دونوب مدینه سعادتہ کلیرکن  
رسول اکرم صلی الله تعالی علیه وسلم حضرت تلرینك  
مکه یه حرکتلرینی «ذی خشب» منزلنده اکلایه رق کندوسی ده  
اردوی هایونه التحاق ایتك اوزره یولی تعقیب ایتدی .  
و «سقیاء» منزلنده یتشدی .

\*\*\*

۷

## فتح مکه

حدیبیه مصالحه سنده خارج مکه اولان قبائل عرب،  
 مخیر براغلمش ایدی بناءً علیه ختام عقد مصالحه ده بنی  
 خزاعه، در حال عهد و امان رسالت پناهی به داخل اولمش  
 بنی بکر دخی قریشیلره التحاق ایتشدی .

ایکی طرفدن بری دیگر طرفه و دخیلارینه دخل  
 و تعرض ایتماک شرط مصالحه ایجاباتندن ایدی . لکن  
 شو ایکی قبیله ارم سنده عهد قدیمدن برو برودت و منا-  
 فرت اولدیغندن بنی بکردن [نوفل بن معاویه] نام شخص،  
 بر قاج هوادار لرله بر لکده بنی خزاعه دن بر طائفه نک  
 علیه قیام ایتشدر :

بنی بکردن بر آدم ، سید سکنه عالم صلی الله علیه  
 و سلمی هجو ایدوب انی بنی خزاعه دن بر ذات هجودن  
 منع ایچون دوکش یاره له مش ! . هاجی مرقوم دخی  
 بالمراجعه بنی بکری تحریک ایا مشدر . بنی بکرك دعوتیه



قریشیلرده فتنه ده حاضر بولمشلر. ولکن متنکر اوله رق بولمشلر ! .

بنی خزاعه، وتیر اسمنده برصویک کنارنده ساکن ایدی. نوفل، انلری غارت ایتک اوزره علیهلرینه کیجه یورودی. بنی خزاعه. شدتلی مدافعه لرله بنی بکری رجعت قهقرایه مجبورایدک روایت کوره حرم شریف کعبه یه دکن سورمش و او زمان کندیلرندن یکریمی مقتولده اولمشدی .

بنی بکری بنی خزاعه علیهنده کی شو معامله سی معا- هده واقعه نك خلاقی اولدینی کبی قریشک بنی بکری بنی خزاعه علیهنده التزام ایتسی ده عین خلاف ایدی . قریشدن عکرمه ابن ابی جهل، صفوان بن امیه، سهیل بن عمرو، خویطب بن عبدالعزی، مکرز بن حفص نام رؤسا، کندیلرینی کویا بللی ایتماک ایچون یوزلرنده نقاب اولدینی حالد شو ماجرا ده بولمشلر ! .

وقعه، مدینه طیبه یه هنوز عکس ایتزدن اول کیفیت، طرف اشرف حضرت رسالتپناهیدن اصحاب کرامه اخبار بیورلمشدی :

قتالک لیله وقوعنده سید الانام علیه الصلوة والسلام افندیمز، زوجات طاهرانیدن ام المؤمنین میمونه رضی

الله عنہا لك حجرہ سنده بیتوت بیورمش اولغله نصف  
اللیلہ تجدید و ضوء ایچون خلوتخانه سعادتلرندن چیقمش  
ایکن اوچ کره: [ایک] صو کره ینہ اوچ دفعه: [نصرت]  
تعبیر شریفی لسان رسالتلرندن صدور ابتدیکنی میمونہ  
ایشیدوب:

— «یا رسول الله! بویله وقتسنز کیملکه قونوشدیگر؟»  
دیدى. رسالتپناه صلى عليه الاله اقدیمز:

— «خزاعه دن بنی کعبک راجزیدرکه بندن طلب  
نصرت ایدر و قریشک یاردمیله اوزرلرینه کیجه هجوم  
ایتدکلرینی سویلر»  
دیه بیوردیلر.

بروجه اخبار نبوی [عمرو بن سالم الخزاعی] قرق  
نقر سواری رفقا سیله برابر اوچ کون صو کره و روایت  
اخرایه کوره ایرته سی کونی حضور پر نور پیغمبری به  
کلدی. رسول الله صلى الله عليه وسلم، اصحاب کرامیله  
برلکده مسجد شریفده او طور مشلردی. عمرو ایجری به  
کیروب پیشکاه رسالتپناهیده طور دی. و بت شکوایه  
باشلادی:

یارب انی ناشد محمداً

خاف ایننا وایه الاتلنا

قد كنت والدآ وكنا ولدآ  
 نمت اسلمنا فلم تنزع يدا  
 فانصر هداك الله نصرا ابدآ  
 وادع عباد الله يا نوا مددا  
 فيهم رسول الله قد تجردا  
 ان سيم خسفآ وجهه تربدا  
 في فيلق كالبحر يجرى مزبدا  
 ان قريشآ اخلفوك الموعدا  
 ونقضوا ميثاقك المؤكدا  
 وجعلوا الى في كداء رسدا  
 وزعموا ان لست ادعوا احدا  
 وهم اذل و اقل عددا  
 هم يبتونا بالوتير هجدا  
 و قتلونا ركعآ وسجدا

جناب رسالتآب افنديمز ، [حسبك يا عمرو] ديه  
 انى اسكات ايدوب وعد نصرته بمنونا اعاده و متعاقبا  
 تجديد مصالحه مقصديله ابوسفيانك مدينه يه كلمك اوزره  
 اولديغنى و كلديكى حالته ده مكيه خائبآ و خاسرآ عودت  
 ايده جكنى افاده بيورديلر .

ابو سفیان، قریشک شو معاملہ عہد شکنانہ سندہ  
 ذی مدخل دکل ایدی . وقعہ نک تماس ایتدیکی جہتلر  
 ملاحظہ ایدلکدن صوکرہ نقض عہد دیمک اولدیغنی  
 اکلایہرق یکدیگری تعیب و تقبیح ایتدیله . نہایت  
 تجدید صلحہ چارہ ارامق اوزره ابو سفیانی حضور  
 عالی رسالتہ اعزامہ قرار ویردیله !

نارۃ قتالک قبیلتن ارہ سندہ اشتعال ایتدیکی —  
 اخبار عن جانب الغیب اولہرق — مشکات صدر رسالتدن  
 بارقہ نمای ظهور اولور ایکن افندیمز : [اما ان هذا العارض  
 لیخبرنی ان النصیحی من عند الله ] بیوردقن صوکرہ  
 اکا : [ انظروا فان ابا سفیان یحییٰ ویلتمس ان یجدد  
 العهد ] تبشیرینی ده علاوہ بیورمشدی . اندن زمان قلیل  
 مرورندہ ابو سفیان خیقہ کادی . تجدید صلح و تمديد  
 معاهدہ فکرندہ ایدی .

اولا کریمہ سی و حلیلہ جلیلة المنزلہ جناب  
 رسالتپناهی [ام حبیبہ] رضی اللہ تعالیٰ عنہایہ کیتدی .  
 سعادتخانہ رسالتدہ مبسوط اولان بساط شریف نبویہ  
 اوطور مق اوزره ایکن ام حبیبہ منع ایدوب بساطی  
 طی اتمکله ابو سفیان :

— « بساطی بندمنی صاقینورسك يوقسه بنی بسا -

طدمنی ؟ »

دیه موردی. ام حییه :

— « بساط. سید الانام علیه الصلوة والسلامکدر

سن مشرک و نجسسك. سنی اوطورمغه قوم »

جوانی ویریرکن ابوسفیانك جانی صقیلهرق :

— « -ن بزدن ایریلهلی شر و آفته مصاب اولوب

اخلاقك دکشمش بوزولمش »

دیدي. ام حییه اکاده :

— « جناب حق، بکا اسلام شرفنی احسان بیوردی.

سنگ قریش ارمه سنده ریاست و دعوای فطانتکله برابر

وحدانیت خدا و نبوت حبیب کبریائی انکارله بر طاقم

معمولات و مصنوعات بشریه دن اولان اشیاء خسیسه بی

معبود انخاز ایدیشکدن دهها بیوک شر و قباحتمی

اولور . »

جواب حقارت آمیزینی وپردیکندن ابو سفیان ،

اورادن منفعلاً قالقوب حضور رسالتپناهی به واردی. و :

[ بن حدیبیه مصالحه سنده بولندم مدت معاهده مزی

تمدید ایدلم ] دیه تجدید صاحب و مسالت استدعاسنده

بولندی حضرت پیغمبر : [ سن بونك ایچون می کلدك

یا ابا سفیان [ دیه بیوردی . ابو سفیان ، اوت دیدی .  
 رسول الله : « هل كان فيكم من حدث = يوقسه منافئ  
 معاهده بر وقوعاتکرمی وار؟ » دیه تجاهل کوستردی .  
 ابو سفیان : « معاذ الله بزصلح وعهدیمز اوزرندمز تبدیل  
 وتغیر ایتیمز ، جوابی ویردیکندن رسول اکرم : [ فتحن  
 علی مدتنا و صاحننا = مادام که سزده اوینله بر حال  
 حادث دکل تمدید وتجدیده لزوم یوق بزده صلح ومدتمز  
 اوزرینه یز ] دیه بیوردی که بوندن صوکره ابو سفیان  
 ایچون دیه جک بر حرف بیلله قالماش دیمک ایدی . مع  
 مافیه ابوسفیان چاره بوله میهرق سوزینی بردها تکرارلدی  
 فقطط جواب قبول آله مدیغنه مبنی ابوبکر الصدیق ، عمر  
 الفاروق رضی الله عنهما یه صرهمسیله مراجعت ایتدی .  
 جناب ابی بکر ، رسول الله عاٹد بو مثللو اموره قطعياً  
 وضع ید مداخله ایدهمیه جکی بیانیله جواب ویردی !  
 عمر ایسه یك زیاده شدت اظهار ایدرك :

— « بندنمی شفاعت امید ایدرسک؟ ایش بکا قالیرسه

بر قارنجیه بیله کندیمه ارقداش بولورسهم علیهمکزمه مان  
 حرکت ایدرم »

دیدیکه بو ، بیوک بر تهدید ایدی ! انلردن صوکره



حضرت علی کرم الله وجهه نك خانه سمنه كيتدی نزد  
مرآتضاده فاطمة الزهراء و يانلرنده حضرت حسن بر  
صبي اوله رق وار ايدي. ابو سفيان :

— « يا على سن بكا قومك اك قريديسك كلديكم  
كي بني خائب كوندرميهرك بنم ايجون حضور محمدیده  
شفاعت ايت »

ديه رجا ايتدی. حضرت علی :

— « بز رسول اللهك عزم ايلديكي شيئه قارشى  
كندوسنه سوزسويليه ميز »

ديمكه ابو سفيان فاطمة الزهرايه التفات ايله :

— « يا فاطمه ! زينبك ابو العاصي حمايه ايله قور-

تاردينى كي سن ده بنى جوار و حمايتكه الده قورتار »  
ديدى. فقط اندن :

— « بن بر قادين كيمسه يم جوار و حمايه المدين

كلز »

جواني الدى. او زمان ابو سفيان، حضرت حسنى

كوستره رك تكرار :

— « اى محمدك قيزى شو اوغلكه امر ايتزميسك

تاكه ناس ييتنده جواريني اعلان ايدوب دنيا طور دجه  
سيد العرب اولسون »

دیدى. سوزى مفید اوله ميه رق :

— « او غلم چو جقدر جوار و حمايه نه اولديغى

بيلمز »

جواب رديله مقابله ايدلى .

صوكره :

— « اوليله ايسه بارى على به سويله »

دیدى. حضرت فاطمه :

— « سن کندك سويله »

دیدى .

ابو سفیان ، شاشیرمش یأس و حیرت هر طرفندن

احاطه ایتشدی ! جناب على کرم الله وجهه افندیمره

رجا ایتدی. دیدى که :

— « یا علی ! ایشم مشکلاته اوغرا دی شاشیردم سن

بکا بر عقل ویر ! »

على ، اکلا :

— « سن هپسنک میوکیسک طوغری مسجده

کیت ! طرفینی جوار و حمايته که الدیغی اعلان ایت ! .

چاره اودر »

دیدى. ابو سفیان ، استیضاح ایدرک :

— « بو تدبیر کافی اولورمی دیرسک »

دیدی. حضرت علی :

— « بیلهم. فقط باشقه تدبیرده بوله‌م »

جوانی ویردی . ابو سفیان ، شو تدبیری اجرا  
ایتمک اوزره بر سائق مجهول کندوسنی مسجد سه‌عاده  
سوق ایدوب کیتدی و :

— « ای ناس! آگاه اولیکیزکه بن، هرایکی طرفی ده  
کندی عهد و امانم البته الدم. والله بنم عهدیمی کیمسه  
قیرماز ظن ایدرم »

دیه اعلان امان ایتدی ! .

بو اعلاندن صوکره دوه‌سنه بینوب همان مکه یولنه  
کیتدی. حالبوکه کندوسنی بوبابده تصدیق ایدن یوغیدی ! .  
اصحاب کرام ایسه تعجب ایدرک انک ارقه‌سندن بری  
برینه باقوب کولشدیلر .

ابو سفیانک مدینه منوره‌ده مدت .کث واقامت بر  
از امتداد ایتدیکندن قریش قومی انی قبول اسلام  
تهمتله اتهام ایتمشلردی .

ابو سفیان ، مکه‌یه کیجه واصل اولمشدی زوجه‌سی  
هند، قریشک اتهامی اکا بیان ایتدکن صوکره :

— « بوقدر اکلندی که کوره ابو بر حوادثله کلد کسه  
ار ککسک ! »

دیدى. ابوسفیان ، جوابده ، ماهو الواقع نه ایسه انی  
سویلدی. لکن اوجوابدن هند، حدتله نرک :

— « یادیغک ایش اومیدر »

دیملکه برابر قوجه سنک کوکسنه بر دپمه اوردی !  
ابوسفیان ، قومنک کندیسنى اتهام ایتمسندن وقاریسنک  
شوبد معامله سندن طولانی دنیا یه کوسمش وتبرئه ذمت  
ایچون صباحلین اساف ، نائله نام بتلرک حضورینه کیدوب  
شرفلرینه قربان کسمش و [ فوت اولنجیه دکن سزه  
عبادتدن واز کچم ] دیه انلره تقدیسى بر عهد و پیمان  
ویرمشدی !



اشراف و رؤساء قریش ، ابو سفیاندن صور دیلر :

— « نه خبر وار تجدید مصالحه ایتدکی »

ابو سفیان :

— « والله محمد [ علیه الصلوة والسلام ] دن تجدید

معاهده ایستدم. جواب الله مدم ابوبکر. کیتدم خیر کوره مدم.  
عمره مراجعت ایتدم بزه اک بیوک دشمن انی بولدم. دیگر  
مسلمانلری برر برر کزددم. هر بری بر بهانه ایله بنی

باشدن صاودی. حکمدار لرینه بودرجه اطاعت ایدر بر  
قوم ایشتمدم. تجدید مصالحهیه موفق اوله مدم انجق  
علینک ارشادیله کندم بر مصالحه عمومیه اعلان ایدوب  
کدم! »

جوانی ویردی. رؤسا :

— « یا او زمان سنی محمد [علیه الصلوة و السلام] تصدیق ایتدیمی؟ »

دیدیلر. ابو سفیان :

— « ایتدی! فقط باشقه چارده بوله مدم »

دیه جواب ویردی انک اوزرینه :

— « اوله ایسه سن هیچ بر ایش کوره مامشسک.

سنک کندی کندیکه اعلان ایتدیکک صالحک نه حکمی  
وار. علی، بیاغی سنکله اکنمش! . سن بزه صلح  
خبرینی کتیرمدک که امین اوله لم. حرب خبرینی ده کتیرمدک که  
صاقنه لم تدارکده بولنه لم »

دیه انی لوم وتوبیخ ایلدیلر.

\* \*

مذاکره — ابو سفیانک مدینه دن انفکا کندن  
صوکره ایدی جناب رسالتاب افندیمز، برکون حجره  
سعادتدن طیشاری چیقوب اوطوردی و :

صوكره ابوبكر ك نردینه واروب اندن صورديلر. او  
ديدي كه :

— رسول الله ، قریش علیهنده حرکت ایتمك  
خصوصنده کی رأیی صوردی بنده یا رسول الله ! انلر  
سنة قومكدر نهائة الامر ایمان و اطاعت ایدہ جککرینی  
بیایرسك دیدم بندن صکره عمری چاغیردی او باده کی  
مطالعه سنی صوردی عمر ایسه قریش علیهنده شدت  
عظیمه اظهار ایتدی . واقعا قریش قومی تحت اداره به  
المدقجه قبائل سائر اله کلمز انکیچون رسول الله ، سزه  
شمدی مکه اوزرینه سفره حاضر اولمکزی امر ایتدی ،  
شو جواب ، اصحاب کرامی تماماً خبردار ایتمشدی .  
غزوات کرام همان کرمی \* تام ایله تدارکاته تشبث ایلمش  
و رسالتپناه افندیمز دخی غفار ، اسلم ، سلیم ، اشجع ،  
مزینه ، جهینه قبیله لرینی [ خدایه و روز جزایه ایمان  
ایدنلر رمضان اوائلنده مدینه به کلسونلر ] دیه دعوت  
ایتمشدی .

قبائل مرقومه . رمضان شریفك ابتدا سنده مدینه  
منوره به طوخری طاقم طاقم کلمکه باشلادیلر . شاعر  
بدیع الماتر نبوی جناب حسان بن ثابت رضی الله عنه



حضرت تیری اهل اسلامی حربہ تشجیع ایچون وار  
 قوتنی لسان طلاقته ویرمشدی . رسول اکرم افندیز  
 دخی بو خصوصده کی تشبثاتی اهل مکهدن ممکن مرتبه  
 صاقلامق ایستدی . حتی : [ اللهم خذ علی اسماعهم و  
 ابصارهم فلا یرونی الا بغتہً ولا یسمعون بنا الا فجأةً ]  
 دیه دعا دخی ایتمشدی . که مقصد همایونلری مقابله  
 ایچون حاضر لالغفه وقت برآمدن قریشی بغتہً  
 باصمق ایدی ! بطن اضم سیریه سی ده ایشته انجق بوفکره  
 بناءً نجد طرفه چیقارنمشدی .

سیریه نك طرف دیگره اخراجیله برابر مکه یوللرینی  
 طوتوب مواردینی قطعاً کسمک اوزره بنی خزاعه یی ده  
 نقطه لره مأمور ایتمشدی .

\* \*

مکتوب — هیئت اسلامیجه شو مرتبه ده اهمیتلی  
 تشبثلر اجرا اولندیغی نازک بر زمانده ایدی تشبثات  
 وتدارکات واقعینی اخبار ضمننده مدینه دن رؤساء مکه یه  
 بر مکتوب یازلمشدر !

مکتوبك حاملی ، [ام ساره] نامنده برقاری ایدی .  
 مرقومه ساره ، بنی هاشمک ازادیلرندن اولمقله برابر

رسول الله و اهل اسلامه عداوت ايدردی . وعداوتی  
 سبيله رؤساء مشرکينه متفق ديمک اولديغندن انلره و  
 بالخاصه عبدالعزى بن خطله خواننده لک ايدر و رسول  
 کبريا عليه السلام سويلنيان هجويه لری محضر مشرکينده تغى  
 ايله ايراد ايدوب حضارى اکلندي رير و اوسايه ده قريشک  
 نائل عطاياسی اولور کچينور ايدی . فقط بدر هزيمتندن  
 صوکره مکجه حادث اولان حزن و ماتم ، مرقومه نك  
 اعتبار خوانندکيسنى نظر رغبتدن دوشوردیکندن ساره  
 آرتق ديلنمک اوزره مدينه يه کلمشى . شدت مضايقه .  
 سندن بحثله حضور پر نور رسالته عرض حال ايتمش  
 اقدیمز دخی اکا بردوه يوکى ذخيره احسان بيورمى .  
 حالبوکه حين معاوتنده ولى نعمتک تشبثاتى عليه السلام  
 الله و بريان مکتوبى کمال اهتمام ايله ايصال ايجون مک  
 يولنه دوزلمش کيتمى .

رسول ذیشان، ايشه مطلع اولديلر . و در حال [على  
 زبير ، مقداد] رضوان الله عليهم اجمعين حضراتى  
 چاغيرتوب :

— کيدیکز روضه خاخ نام محله و صـ و لکزدہ

انده دوه ايله کيدر بر قاری به تصادف ایدم جکسکز او  
قاریده بر مکتوب وار آلوب کلیکزه.

دیدي اصحاب مشارالیه هم حضراتی ، همان سیر سریع  
ایله کیتدیلر . ساره ، روضه خاخده ایدی کیدیور ایدی  
طورد بروب مکتوبی ایستدیلر . قاری انکار ایتدی .  
اثواب و ائقالتی بالا عتنا تحری و تفحص ایلدکری  
حالده مکتوب بولنمديغندن عودته قرار ویردکری  
صرهده حضرت علی ، رفیق لرینه اعتراض ایدوب :

— « والله یغمبر ، یالان سویلمدی و اکا سمان  
یالان خبرده کلدی مکتوب محققدر که قاریده در ،  
دیدي قیلنجی چکدی و :

— « چیقارم جقسک و الا اوستکدن البسه کی  
صویوب سنی چپلاق ایدم جکم . رسول الله یالان سویلمز »  
دیدي . بو تهید شیدم قارشی ساره ، مکتوبی  
صاج اور کولرینک ارم سندن چیقاردی اللربنه و بروب  
بولنه دوام ایتدی .

مکتوب مذکور ، آچل دینی زمان ظاهر اولان  
مضمون و امضاء هر کسک نظر تحرینی جلب ایتدی :  
[ اما بعد یا معشر قریش ! فان رسول الله صلی الله تعالی

عليه وسلم جاءكم بجيش كالليل يسير كالسيل . فوالله لو  
جاءكم وحده لنصره الله و انجزله . فانظروا  
لانفسكم والسلام [ شو مكتوب ، كبار اصحاب كرامدن  
[ حاطب ابن ابى بلتمه اللخمى ] حضرتلرندن ايدى .  
بودرلو حر كته حمل و تحريض ايدن سبب و ماده نك تحقيقنه  
لزوم كوريله رك مشاراليه ، همان حضور رسالنه جلب  
اولندى :

— « يا حاطب ! نذر بو ؟ »

بيورديلر . حاطب :

— « يا رسول الله ! سويليه يم عجله ايمه ! قریش  
ايچنده اهل و عيالم وار فقط انلرى حمايه ايدم جك  
عشيرتم يوقدر . شو وسيله ايله مكده برال پيدا ايديم  
مطالعسنه مبنى جرءت ايتدم يوقسه بن مؤمنم ايمانده ذره  
قدر خلل و قصورم يوقدر »

ديه جواب ويرديكندن عمر الفاروق حضرتلرى ،  
اكا : [ الله سنك جانكى السون رسول اللهمك يوللرى  
او قدر اهميتله طوتد يرديغنى كورديكك حالده سن قريشه  
معلومات ويره يورسك ] ديه سويلد كدن صوكره :

— « يا رسول الله ! اذن ويرده شو منافقك بوينى

دیدیکی حالدہ رد بیورلمشدر :

— « یا عمر ! حاطب ، بدر غزاسنده بواندی .  
 نه بیلیرنسک بلکه جناب حق ، اصحاب بدره هر نه  
 یاپسه کز بن سزی عفو ایتشمدر دیمش اوله »  
 جناب عمر الفاروق ، کوزلرندن یاش آققده  
 اولدینی حالدہ سکوت ایتدی .

سفره دعوت اولسان قبائل متجاورده دن بر چوق  
 ذوات مدینه طیبه یه طویلاشمشدی . رسول مکرم افندیمز  
 [ ابارهم کلثوم بن حصین الغفاری ] رضی عنه الباری  
 حضر تارینی مدینه ده مأمور براغوب رمضان شریف  
 اونجی چهارشنبه کونی معیتنده اون بیسک نفر عسکر  
 بولندینی حالدہ صائماً مکیه طوغری حرکت وعزیمت  
 بیوردی .

شو مقدار عسکرک یدی یوزی مهاجریندن ، درت  
 بیکی انصاردن بیکی مزینه دن ، درت یوزی اسلمدن ،  
 سکر یوزی بنی جهینه دن ایدی مهاجرین عسکرنده  
 اوج یوز ، انصارده بش یوز ، مزینه ده یوز ، اسلمده  
 اوتوز ، جهینه ده الی رأس آت وار ایدی .

اردوی هایونک ابواء منزله دیگر قوله کوره سقیاء  
 ایله صرح مایننه و— ولی صروده عم زاده نبوی « ابو

سفيان بن الحارث بن عبدالمطلب، و انك اوغلى « جعفر  
ابن ابى سفيان » وعاتكه بنت عبدالمطلب اوغلى وام سلمه  
حضر تليزك برادري « عبدالله بن ابى اميه بن المغيرة » به  
راست كلديلر . بونلر ، مكادن مدينه منوره به هجرت  
ايتمكده ايديلر .

ابو سفيان ، رسالتپناه افنديمرك حليمه دن رضاعاً  
قرنداشى اولدينى و زمان بعثدن اوللرى محبت والفتى  
بولندينى حالده بعثدن صوكره ديكر قريش افرادى  
مثلاو عداوت مسلكنى طوتمشدى . رسول كبريا عليهنده  
شاعرانه لسان استعمال ايدردى !

بوكره طرفلرينه هيچ التفات بيورلمديغندن طولايى  
ابو سفيانك كوسترديكى تأثر و اضطراب ، مستلزم شفقت  
اوله رق امهات مؤمنيندن [ ام سلمه ] رضى الله عنها  
حضر تلى ، شفاعت صددنده افنديمزه :

— « يا رسول الله ! لا يكن ابن عمك و ابن عمك  
اشقى الناس بك »

ديدى . جناب على دخی انلری طریق نجاته ارشاد  
ایچون ابو سفيانه :

— « رسول اللهك وجه شريفه مقابل اوله رق



حضور عالیه کل و [نالله لقد آترك الله علينا و انا کنا  
لخاطئين] دی ،

دیدى. ابوسفیان، تنبيه جناب مرتضى اوزره حرکت  
ایتى. و اکا مقابل رسول کبریا دخی : « لا تریب  
علیکم الیوم یغفر الله لکم و هو ارحم الراحمین » جوابی  
و بردی . ملتجیلرک عذرلری ارتق قبول بیورلمشدی .  
لکن روایتہ کوره ابوسفیان ، اندن صوکره حجابندن  
باشی قالدیروبده وجه پاک احمدی به طوغری برنظر  
ایده مامشدر! ذو الحلیفه نک سقیاء منزلهدهده حضرت  
عباس رضی الله عنه ، تصادف ایتدی . اوده ارتق اظهار  
اسلام ایدرک اهل و عیالیه برلکده مدینه به هجرت  
ایده یور ایدی . رسول الله صلی الله علیه وسلم ، انک هجر-  
تندن پک زیاده محظوظ اوله رق :

— « یا عباس ! سن مهاجرینک خاتمه سی اولدک »

بیوردیلر . عباس ، یاننده کی اشیا سنی مدینه منوره به  
کوندره رک کندوسی او منزله اردوی سعاده قانیلدی .  
افندیمز ومعیتی هنوز صائم ایدیلر . یولده عشفان ایله  
قدید بیننده [ بدید ] نام صویه موصلت اولندیفی زمان  
افندیمز کندوسی صو ایله افطار ایدوب هرکسکده مخیر  
ایدوکنی اعلان ایلمشدر آندن صوکره شهر رمضانک

انسلاخنه دكين هپ مفطر بولنديلر. بني سليم عسكري  
 قديد منزلده اردوي هايونه التحاق ايتدي افنديمز ،  
 بو منزلده الويه و رايات عقد ايدوب بني سليم عسكرينه  
 برلوا ايله بر رايت ، بني غفاره بر رايت ، بني اسلمه  
 ايكي لوا ، بني كعبه بر رايت ، بني مزينه اوج لوا ، جهينه  
 درت لوا ، بني بكردن بر جماعت مسلميه برلوا ، بني  
 اشجمه ايكي لوا و يردى . بني كعبه و يريلان رايتي « ابو  
 شريح خويلد بن عمرو » النه آلدى .

اورادن كيجه ياتسوزماننده [مرالظهران] واردى .  
 مرالظهران ، مكيه درت فرسخ مسافده بر منزلدر .  
 حالو كه قریش ، هنوز ماده دن خبردار دكلدى .  
 بني خزاعه ، طريق مواردني اولجه قطع ايتمش بولنديغندن  
 وقتيله قریش ايشه اطلاع حاصل ايدمه مامشردى مع مافيه  
 اهل اسلام طرفندن امنيتلري يوغيدى انكچون خوف  
 و خشيت اوزره ايديلر . ايشته اوراده يعنى مرالظهران  
 نام محله اون بيك آتش ياقلمسنى افنديمز عساكر  
 مسلمينه امر و فرمان بيوردى . مقدم هايون ، بيوك  
 بر آتش دوتماسيله قریشه اعلان و اعلام اولدى ! .  
 رؤساء قریش ، عليهم رنده كي حر كتن امين اوله .

مدقارندن صوك درجه ده حيرت و تلاشه دوشديلا.  
 رئيسلري بوانان « ابوسفیان » كينه پايدگاهنه وارديلر  
 ابو سفیان دخی « حكيم بن حزام » و « بدیل بن ورقاء »  
 ايله برابر اولوب مرالظهرانك اوزرنده كي ديه چيقدی.  
 كوزينه دهشتلی بر آتش دونماسی كورندی ابو سفیان ،  
 بردنبره ديه جك برشی بوله مدی او آتش دهشتناكه بر  
 معنی ویره مدی آنجق :

— « عرفه آتشرينه بکزر »

ديه بيلدی . بدیل ايسه :

— « بنی عمروك آتشريدر »

ديرکن ابوسفیان :

— بنی عمرو، بوندن آذر »

سوزيله ، قباله ايتدی . شو محاوره دوام ايدرکن  
 مراوچی ده اردوی همایون قاره قولنك اله دوشديلا  
 اوكيجه عباسك ذهنتی بعض ملحوظات تخدیش  
 ایتمکه ایدی . فكرنجه شو اردو ، قریش اوزرينه  
 غفلتله مكیه كیره جك اولدینی تقدیرده بيوك برفالق  
 وقوعی محقق ایدی بناء عليه او محذور ملحوظ وقوعه  
 كلامك اوزره همان دخالته مسارعت ایتلمیچون عباس ،  
 واسطه بولوب ده قریشه خبر ویرمك جهتی تصور ایتدی .

رسول الله بك بغلة بيضاى سعادتينه بينوب اردوى  
مسلميندن طيشارى چيقمشدى . قاره قوللرك انه  
دوشمش اولان ابوسفيانك سنى اوزاقدن ايشتىدى .  
صوردى :

— « ابوحنظله مىدر [۱] »

جواب كلدى :

— « اوت »

اوراده بولوشدىلر. ابو سفیان دیدى كه :

— « بونه علامتدر يا ابا الفضل! »

او سؤاله عباس، دهشتلى برجواب ويردى : [هذا  
رسول الله فى عشرة آلاف فاسلم نكلك امتك] كلان،  
رسول الله و عسا كر مسلميندر اكر شو اردوى  
عظيم، عنوة مكهيه داخل اولور ايسه قريش نامى محو  
اولمش ديمك ايدوكنى بيلديرمك ايشتىدى !

ابو سفیان، ارتق رجايه باشلامشدى . روايته كوره  
ابو سفیان، قاره قوللرك انه دوشنجه محافظه فرقهسنه

[۱] ابوحنظله، ابوسفیانك برديكر كنيه سيدر خنظله بن

ابى سفیانك يوم بدرده جناب على طرفندن قتل ايدلديكى جلد  
اولك بحث مخصوصنده محرر در .

او کيجه مأمور بولن ان حضرت فاروقه تبشير و اعلام  
کیفیت ضمنتده :

— «جئناک بنقر اخذناهم من اهل مكة»

دیدیلر، عمر ممنونیتنی بیان ایدرک :

— «کتیردیککز آدم باری ابوسفیان اولسیدی،

دیمشدی .

حضرت عباس ، ابو سفیانی بغله سعادتك اردینه  
بیندیروب حضور رسالته کتوردی عباس ، چادرلرک  
اوکندن چکرکن [عسکر ایچنده بویله ناهنکام کزن  
کیمدر] دیه اصحاب کرام دقت ایدوب عباسی کورملریله  
برابر [عم رسول، عم رسول] دیر و چادرلرینه کیرر -  
لردی عمر ایسه چادیرینک اوکنده هر آتشدن بیوک  
بر آتش یاقشدی .

عباس، انک حذاسنه کلدی . عمر، ابو سفیانی او  
زمان کوردی. کفار حقنده کی غیظ و شدتی مزداد اوله رق  
حیدی :

— «یا عدو الله! سنده نه ایمان وار نه امان! باقکه

شمدی بن سنک بوینکی ناصل اورده جغم»

عمر، شو فکرینی اجرایه رخصت آلق ایچون خیمه  
سعاده طوغری یورودی عباس ده سرعتلیوب دربار

سعادته یتشددی هر ایکسی ده حضورده ایدیلر لکن  
یری ابو سفیانک شدتله علیهنده دیکری لهنده ایدی.  
عمر الفاروق، جناب رسالتابه:

— «یا رسول الله! شو آدم، اللهم دشمنیدر نه  
ایمانی وار نه امانی! اذن ویرده همان شمدی بوینی  
لوریم»

دیرکن عباس:

— «یا رسول الله! بن ابو سفیانہ امان ویرمشم»  
دیدیکندن فخر عالم افندیمر، ابو سفیانک امتحان  
قلبی ضمنتده:

— «یا اباسفیان! مسلمان اولکه سلامتی بوله سک»  
بیوردیلر. ابو سفیان ایسه:

— «یالات و عزایی نه یاپهیم؟»

جوانی ویرمش و عم مکرملریله حضرت فاروقک  
او مسئلهده کی فکر و اجتهادلری ده متخالف بولمش  
اولدیغنه باقرق اندن صوکره رسالتپناه افندیمر، عباسه.  
— «بو کیجه ابوسفیانی چادرکده حبس و توقیف

ایتده صباح یانمه کتیر ایجابنه باقارز»

امرینی ویرمشدر.



ابوسفیان، او کیجه عباسك چادرنده موقوف  
 قالمشدر. صباحین عسکر اسلام، صباح نمازینك آبدستی  
 ایچون مبادرت ایدرلرکن ابوسفیان بر کره قورقش  
 صوکره هپسی رسول الله مقتدیاً جماعتله نمازه طورونجه  
 هنوز امامت و جماعت رکوع و سجود بیلمیان ابوسفیان،  
 اسلام جماعتك ارکان صلاتده امام هماملرینه صورت  
 اطاعت و اتباعلرینه حیرتله [بن، بونك کبی بر ملک  
 دها کوردم] دیمکله برابر قریش ایچون عفو و امان  
 مقصدنده اولوب اولمادیغنی اکلامنی عباسدن رجا  
 ایلمشدر.

عباس، ابوسفیانی خیمه سعادته کتوردی. رسالتپناه  
 صلی علیه الاله افندیمز، اکا صوردی :

— «یا ابا سفیان ! هنوز لاله الاله دیه جکک وقت  
 ایریشمدیمی؟»

ابوسفیان، جواب ویردی :

— «یا محمد [علیه الصلوة والسلام] سن نقدر  
 کریم، نقدر حایم ایمشسک انام بابام سکا فدا اولسون !.  
 اللهمن باشقه بر الله دها اولسیدی قریشك حالی بویله  
 اولزدی»

نبی مکرم، تکرار صوردی :

— «یا محمد رسول الله دیه جکک کلمدی؟»

ابو سفیان، اکا قارشی بر از تلثم ایتک ایسته یه رک:

— «بونک ایچون بر از مهلت ویرا. زیرا هنوز

شبهه دن قورئیه مدم»

دیرکن عباس، انی غیابة الجب هلاکه دوشورمامک

اوزره درحال یدکله دی. وزمین نصیحتده:

— «یا ابا سفیان! ویحک اسلم واشهدان لاله الا الله

وان محمداً رسول الله قبل ان یضرب عنقک»

دیدى. عباسک بوسوزی ایسه هم جدی وخیرخواهانه بر

نصیحت، هم ده بر تهدید عظیم دیمک اولدیغندن ابو

سفیان ارتق اظهار اسلام ایتدی.

ابو سفیانک طرف اشرف رسالت پناهیدن مهلت

استدعاسنده بولندینی ساعته جناب فاروق، شمشیر

بدست اولدینی حالد خیمه سعادتک خارجنده کزینیر

و: [آه ابو سفیان سن شمعی طیشاریده اولسیدک

بویله لاقردی ایده مزدک] دیه حدتندن کندى کندینه

سویلنیر ایتدی.

ابو سفیانک قبول اسلام ایتدیکی کون عین زمانده

[حکیم بن حزام] ایله [بدیل بن ورقاء] دخی مسلمان

اولشلردر.

حکیم، دیمشدی که:

— «یا رسول الله! ناسک بر طاقم اوباشیله قوم  
و عشیرتکی قیرمغ، می کلدک؟»  
بوکا رسول الله صلی الله علیه وسلم:

— «قریش، بوباده اظلم و افجردد. ستر، حدیدییه  
ده کی مصالحه مزه قارشی غدر ایتدیکز. خزاعه دن بنی  
کعب علیهنه حرم بیت الله ده اتم وعدوان ایله تجاھر  
و نجاسر ایلدیکز»  
دیه بیوروب بدیل بن ورقاء خزاعی:

— «والله یا رسول الله! قریش، بزه غدر ایتمشلردرد.  
اگر قریش، طرفدارلق ایتمش اولمسیدیلر بنی بکر، بزه  
بودرلو معامله ده بولنه مزلردی»  
دیه تصدیق ایتدیکنندن حکیم:

— «قد کنت یا رسول الله! حقیقاً ان تجعل عدتک  
وکیدک لهوازن فانهم ابعد رحماً و اشد عداوة»

دیمکه مجبور اولمش بوکا حضرت نبی اکرم:  
— «انی لارجو ان یجمعها لی ربی فتح مکة و اعزاز  
الاسلام بها و هزيمة هوازن و اخذ اموالهم و ذر اربهم»  
دیه مقابله ایتمشدر. ایشته بو صبرده ایدی که  
ابوسفیان:

— « یا رسول الله! قریش، شو ایشدن کف ید ایلہ  
اعتزال ایتسہلر آمن میدرلر »  
دیہ سوردی، اقدیمز:

— « نعم من کف یدہ و اغلق دارہ فهو آمن =  
اوت کیم کہ الی بو ایشدن کری چکوب خانہ سی قپوسنی  
اوزرینہ قپایہ آمندر »

دیہ بیوردی . حضرت عباس رضی اللہ عنہ ده:  
— « یا رسول الله! ان اباسفیان رجل یحب الفخر  
فاجعل له شیئاً = ابوسفیان ، فخر و مباهاتی سور بر  
آدمدر . بو کون کندوسیچون مدار افتخار اولہ جق  
برشیلہ ائی ممتاز بیوریکز تا کہ قومی بیننده انکله افتخار  
ایتسون »

دیدى . حضرت پیغمبر :  
— « نعم من دخل دار ابی سفیان فهو آمن ومن  
دخل المسجد فهو آمن ومن القی سلاحہ فهو آمن ومن  
اغلق بابہ فهو آمن و من دخل دار حکیم بن حزام  
فهو آمن »

بیورمش و برلوا عقدایله ابورویحیہ بالاعطا: [ومن  
دخل تحت لواء ابی رويحة فهو آمن] دیہ ندا ایتسنی

اكا امر ايتدكن صوكره ابو سفيان ايله حكيم وبديلى  
 وادينك طار بر محلنده طورديروب عسكرى كوسترمينى  
 عباس رضى الله عنه امر صددنده افنديمز :

— « احبسه عند حطم الخيل حتى تمر به جنود الله  
 فيراها = ابوسفيانى اردونك كچه جكي طار بريره  
 كتوركه اللهك عسكرى كورسون »

بيورمشدر .

خانه سنده هر كسك امين و آمن اولملرى امتيازىنك  
 قيمتى تقدير ايتمكه برابر خانه سى قریش مستأمنلرندن  
 يك آز بر مقدارىنى آله بيلوب او حالده طيش اريده يك  
 چوق كيمسه لرك قاله جقلىرىنى ابوسفيانك عرض عتبه  
 عليا ايتمى ، ابورويحميه لواء الامان اعطاسنه سبب  
 اولمشدى .

عباس رضى الله عنه ، ابوسفيانى الوب بر كچيده  
 كتوردى . ابوسفيان كچيده عسكرك مرورىنى تماشا  
 ايتمكه عسكرك دخی فوج فوج كلكده ايدى . بر بلوك  
 عسكرك اشارتله :

— « شو كيملردر ؟ »

ديدى . صوردىنى بلوك ، سيف مسلول الهى حضرت  
 خالد رضى الله عنه قومانداسى التنده بنى سليمندن بيك

نفرلی بر فرقه ایدی. حذایه کلدکاری آنده هپسی بر  
اغزدن تمکیر کتیر دیلر .

عباس، ابو سفیان:

— « خالد بن الولید »

دیه جواب ویردی. ابو سفیان :

— « ها شو بزم ولیدک اوغلی خالدمی ؟ »

دیدی. عباس :

— « اوت »

دیدی .

خالدک او فرقه سندن سوکره [ زییر بن العوام ]

رضی عنه السلام حضر تلیرنک درت یوز نفری حاوی

زرهلی مهاجرین یکتلری دخی حذایه کلوب کذلک

تمکیر آلبرکن ابو سفیان :

— « بونلر کیملر در ؟ »

دیدی عباس :

— « زییر بن العوام »

جوابی ویرنجه ابو سفیان :

— « ها همشیره زاده کز می ؟ »

دیوب [ اوت ] جوابی الدی .

اندن صوکره [ ابو ذوالغفاری ] حضر تلرینک بنی  
غفار فرقه سی کچیور ایدی . ابو سفیان . وردی :  
— « بونلر کیمدر ؟ »

عباس :

— « بنی غفار ! »

جوانی ویرمکه ابو سفیان :

— « [ مالی و لغفار ] یعنی انلرله ییتمزده کچمشمز  
یوقدر »

یدی .

انلردن ده صوکره خزاعه قبیله سنک مهم بر شعبه سی  
بولنان بنی کعبدن بشیور نفر سوازی و آنی متعاقب سکر  
یوز نفر مزینه تیراندازلری و انلرک ارقه سندن ده بنی  
لیث ایله بنی ضمیره نک درت یوز نفر دلاورلری کچدی .  
انلردن صوکره بنی اشجع کچیور ایدی . ابو سفیان  
وردی :

— « بونلر کیمدر ؟ »

عباس :

— « بنی اشجع ! »

یدی . ابو سفیان اظهار استغراب ایدی :



— « سبحان الله محمد [عليه الصلوة والسلام] لك الك  
قوى دشمنی انلر ایدیلر شمدی مطیع اولدیلر »  
عباس، او زمان ایکا جواباً :  
— « نور اسلام، انلرک قبلرینی منور ایتمش که اوده  
اللهک بر فضل و عنایتیدر »

دیدى. ابوسفیان حیرتده قالمشدى! ملی ویاخود جبلی بعض  
اسبابدن طولای چوق زماندنبرو بینلرنده منافرت موجود  
اولان بونجه قبائل مختلفه یی از زمان ایچنده اداره واحده  
آلتمه الوب خبر سمرجه مکه یه دکن همان سوق ایده.  
بیانمک نه بیوک اقتداره توقف ایده چکی ملاحظه سیله  
ذهنی اشغال ایتمش طور یور ایدی! .

ابو سفیان شو ملاحظات ایله مشغول ایکن اصل  
موکب هایون قارشیدن ظهور ایتشدرد! که سواریلرک  
و زرهیلرک منتخبلرندن اولمق اوزره بشبیک نفرلی بر  
فرقه مخصوصه ایدی .

فخر کائنات اقدیمز حضرتلری ، قصواء نام ناقة  
هایونلرینه شرف انداز اولدقلری حالد امام جلیل  
الهمام والالرنده [سعد بن عباد] رضی الله عنه رایت  
سمادتی طوتیور و طرف اشرف یمینده صدیق اکبر ،

جانب سنی المناقب یسارنده [اسید بن حضیر] رضی اللہ  
تعالیٰ عنہما حضرت تری ، شرف مصاحبت ایلہ متشرف  
بولنیورلر ایدی . مهاجرین و انصار کرام حضراتی ده  
کیمی راجل، کیمی راکب اول حضرتک اطرافنی احاطه  
ایدوب جمله تکبیرلرله کلیورلردی .

صداء تکبیرک فضا ده حاصل ایتدیکی عکس و اهتزازک  
نمایان اولان قدسیتی ، [لولاک لولاک لما خلقت الافلاک]  
سیرینی تشریح ایتمکده و شو موکب مغبوط الکواکبی  
لسان نصرت [علیک عون الله] دیه القشلامقده ایدی .  
ابو سفیان موکب هایونی او یله بر هشتیده کورر  
ایکن عباسه :

— « یا ابا الفضل ! لقد أصبح ملک ابن اخیک  
ملکاً عظیماً — یا ابا الفضل ! برادر زاده کک ملک  
وسلطنتی بیومشدر ! »

دیمکله عباس، انی :

— « صوص ! او سلطنت دکل نبوتدر »

سوزیله رد ایتدیکنندن ابو سفیان دخی :

— « اوت نبوتدر »

دیه سوزینی دکشدرمشدر ! . موکب هایون ارتق

یا قلاشمبشدی ! ابوسفیانک مواکب سائرده کورمیدی  
برهیتله کلیور ایدی .

فرقة انصارک علمداری بولنان [ سعد بن عبادہ ]  
حضر تری رایتی حامل اولدینی حالده ابوسفیانک حذاسنه  
کلدیکی زمان :

— « یا ابا سفیان ! الیوم یوم الملاحمة ! الیوم  
تستحل الکعبة »

دیه سویلمش ایدی . ابوسفیان ، سعدک بوتهدیدیله  
دهشتلر ایچنده قالمغله عباسه توجه ایدرک :

— « حبذا یوم الدمار »

دیمشدر . موکب همایون تمام حذایه کلشدی . ابوسفیان ،  
او آنده حضور رسالته کیده رک معرض شکایتده :

— « الم تعلم ما قال سعد بن عبادہ ؟ »

دیرکن وارد اولان :

— « ما قال ؟ »

کلام استفهام نبویسنه مقابل سعدک بیاناتنی ایراد  
ایتمش واکا قارشی طرف اشرف رسالتدن :

— « کذب سعد . ولكن هذا یوم یعظم الله فیہ الکعبة »

ویوم تکسی فیہ الکعبة »

جواب تبشیرینی المستدر محمد بن اسحقک روایتنه کوره :

سعد حضر تلرینک ابوسفیانہ اولان تہدیدنی مهاجرین کرامدن  
بری [عمر الفاروق رضی اللہ تعالیٰ عنہ (\*)] ایشیدہ رک  
حضور رسالتپناھی یہ کیتدی. و :

— « یارسول اللہ! ما آمن ان یکون لسعد فی

قریش )

دیہ بیان رأی ومطالعہ ایتدی. اندن صوکرہ رسول  
مکرم افندیمزده جناب علی بی :

— «ادرکه! فخذ الراية منه ! فكن انت تدخلها»

فرمانیلہ بالا رسال سعدک البدن رایت سعادت  
الدير مشدر . فقط شو شرف علمداریدن محرومیت ،  
سعدک خاطرینی تغییر ایدہ جکی . لاحظہ سیلہ رایت ، اوغلی  
قیس بن سعدہ ویرلدی . سعد حضر تلری علمدارلقده  
رضاء شریف رسالتپناھی یہ موافق صورتده اوغلنک ایفای  
وظیفہ ایدہ بیلمسندن امین اولہ میہ رق اندن التمسینی رجا  
ایتدی انک اوزرینه قیسندن نزع ایلہ زبیر بن العوام  
حضر تلرینه تسلیم ایدلدی .

ذی طوی نام محله وصول زمانده رسول اکرم  
افندیمز ، اردوی هما یونلرینی آندہ توقیف ایتشدی . که

[۰] قال ابن هشام : الرجل المذكور هو عمر .

بوکا کلنجیه دکن حرکت اسلامیہ دن قریش خبردار  
 اولہ مامشدی انجق اردونک ذی طوادہ کی توقفی اٹاسندہ  
 قریش شہہ لہ رک تحقیق کیفیتہ قیام ایدرکن علیہلرینہ  
 واقع اولان حرکتدن معلومات الہ یلمشملر ابوسفیان دہ  
 عباسک یانندن ایریلہ رق مکہ یہ طوغری سرعتلہ کیتدی.  
 قریش ایسہ آنک باشنہ طوبالانوب دیدیلر :

— « یا ابا سفیان ! کلان کیمدر ؟ »

ابوسفیان :

— « وای حالکزمہ کہ قارشو طورہ میہ جغکز برقوت

ایلہ محمد اوزریکزمہ کلیور ! »

دیہ انلری مژدہ لہ دی ! اندن صوکرہ قریش :

— « محمد نہ دیدی ؟ »

دیہ صوروب :

— « ابوسفیانک خانہ سنہ ، مسجدہ کیرنلر و خانہ سندہ

اوطوروب قبوسنی قاپایانلر امیندر دیدی »

جوانی الیرلرکن حدت و حیرتلرندن :

— « اللہ ، سنی رذیل ایتسون ! بوناصل خبردرکہ

بزمہ سویلیورسک ! »

دیدیلر. ابوسفیان ، باشقہ چارہ بولہ میہ رق :

— « ای جماعت ! قبول اسلام ایدیکز ! سلامتی بولورسکنز »

دیمشدی . اوزمان زوجه سی معهوده هند، حدتندن هجوم ایدوب ابو سفیانك صقالنی طوتدی . و :

— « ای آل غالب شومقوتوه حریفی اولدیریکز . دیه باغیردی . ابوسفیان :

— « براق صقالی ! واللہ مسامان اولمزسهك قتل اولئورسك ! هایدی کیت یریکه اوطور ! »

تهدیدیه انی بالاسکات خانه سنه اعزام ایتک ارزوسنده بواندی . هندده خانه سنه قایندی

مکه خلقنی هیجان عظیم استیلا ایتشدی . کیمی ابو سفیانك خانه سنه ، کیمی حرم شریفه ، کیمی کندی خانه سنه قایانیر . کیمی ده حیران و سرکردان طولاشیر ایدی . مع مافیه ابوسفیانك اسلامی سبیله اکثر قریش ، مسلمانلقه مائل اولمشیدی [ سهیل بن عمرو ، عکرمه ابن ابی جهل ، صفوان امیه ] بنی بکر ایله بنی حارث و بنی هذیل ، احابیش قبیله لرندن برمقدار عسکر ایله اسفل مکه ده خدمه نام محله محاربه یه حاضرئیدیلر .

حضرت زبیر بن العوام رضی عنه السلام مهاجرین کرام ایله برابر [ ثنیة علیا ] دن کیروب خاصه سنجاغنی

حجونده دیکمه و رسول الله کندوسنه یتشنجهیه قدر  
 ایلرویه وارماغه واسلم ، غفار ، جهینه ، مزینه و قبائل  
 سائرہ عسا کر یله برابر خالد بن الولید حضرت تلرینک دمہ  
 اسفل مکہ ده واقع [ لیطه ، خندمه ] یوللریله کیروب  
 سنجاغی بیوتک طشره سندہ دیکمه که طرف اشرف رسالتدن  
 مأمور اولمشلردی ابو عبیده عامر بن عبد الله الجراح حضرت تلری  
 دخی بر جماعت ایلہ اهل مکہ نک سلاحسز طاقنک اوزرینه  
 بطن وادی یولندن حرکت ایدہ جکدی قریش طرفندن  
 تشہیر سلاح ایدلدکجه محاربه وقوعه کتیرلماسی امراء  
 مشارالہم حضراتنه شدیداً امر و تنبیہ اولندی . ۱۰ بناءً  
 علیہ کیمسہ یہ تعرض ایدلمیہ رک کمال آداب و تعظیم ایلہ  
 مکہ مکرمہ یہ کیرمک اوزرہ اردوی هایون قول قول  
 یورودی . سردار کتیبہ اصفیاء حضرت حبیب کبریاء  
 اقدیمز دخی [ اذخر ] طریقہ مکہ مکرمہ یہ توجه  
 بیوردی . ذی طواده مجتمع اولان عسکر مسلمینی و هر  
 برینک امر دینده ابراز ایتدیکی اطاعت جانشیارانه  
 و بسالت فدا کارانه سی و برده حین هجرتده مکہ ده  
 و مکہ یوللرندہ . مصادف اولدقلری احوالی و بوکون  
 حق هایونلرندہ تجلیساز اولان لطف عال العالی ذوالجلالی



موازنه و ملاحظه ایدرکن حس شکران ایله حاصل  
اولان تواضعلرندن ناشی سر معالی افسر رسالتپناهیلرینی  
اول قدر اشاغی به اکملردی. که مبارک لویه شریفه لری  
ناقه هایونلرینک پالاننه ایریشمشدی. اهل مکه تعرضه  
جرئت ایدمه دی. انجق خندمه ده خالده قارشى طورمش  
اولان مکه لی و متفقلری شهر ساح ایتدیله بالضروره  
مقابله ایدیلرک جمعیتلری طاغیدلمشدر.

جمعیت منهنمه فراریلرینک بر اوجی مسجد الحرام  
قبوسنه قریب حزوره محلنه منتهی اولمشدی.

ذی طوادن حرکت بیوزیله جنی انشاده و دیگر بر  
روایت کوره مکه یه دخوللرندن صوکره افندیمز، ابوهریره  
واسطه سیله انصار کرامی حضور عالیلرینه چاغردی و  
محضر انصارده قریشی مراد ایدمک :

— « قریش قومنک اوباشنی کورور میسکز ؟ »

دید کدنصوکره مبارک برالی — مقبوض مفروضی

بیچر کبی — دیگر الی اوزرنده حرکت ایتدیرمک :

— « احصد و هم حصداً حتی توافونی بالصفا = »

— انلری اکین بیچر کبی بیچیکز ! تا که صفاده

بکا ملاقی اولنجه یه دکن ! »

دیه اجرای قتال ایچون انصار کرامه اجازت ویردی اشیو  
اجازتک دخول مکدن صوکره خدمه ده خالده قارشى بعض  
اهل مکدنک حرکات اوباشانه سی اوزرینه شرف صدور ایتمش  
اولدیفی ده مرویدر .

ابو هریره دیر ایدی که :

— « اجازت اوزرینه بز در حال یورودک الیمزه

یکنی اولدیردک »

ابوسفیان، ایشته اوپله دهشتلی بر حالده حضور عالی یه  
کیره رک معرض شکایتده: « ایحت خضراء قریش لاقریش  
بعد الیوم = قریش کزیده لرینک قانی دو کولدی قالمدی ،  
دیدیکچون طرف اشرف رسالتدن: [من اغلق بابہ فهو آمن]  
عبارة شریفه سیله تأیید امان بیورلمشدر .

خدمه ده اوکون اهل مکه و متفقرندن یکر می اوچ  
« قتل و اهل اسلامدنده » کرزبن جابر الفهری « ایله  
« حبیش بن الاشعری » حضرتلری شهید اولمشدر .  
مشار الیهمما حضرت خالدک فرقه سندن . آز آیری دوشمش  
بولندقلری حالده دشمن النہ کچهرک قتل ایدلمشلردی .  
خدمه ده بولنق اوزره اهل مکدن جاس نامنده  
بری سلاحنوب خانه سندن چیقارکن زوجه سی اکا :

— « ترمیه کیده یورسک ؟ »

دیمش اوده :

— « اهل اسلامدن سکا بر خدمتکار کتیرمه ! »

جوابی ویرمشدی .

قریش بوزلدینی و قپوسنی قپایانک امین اولدیغنسک

اعلان ایدلدیکی ائاده تلاش ایله کلوب زوجه سنه :

— « قاری ! قپویی قاپا ! که قپوسنی قاپایان، امیندر »

دیرکن زوجه سی :

— « هانی خدمتکار کتیرمه چک ایدک قابوده می

براقدک ؟ »

دیه استهزا ایتدیکنندن جماس، بیان معذرت صد دنده :

وانت لو شهد تنا بالخدمه

اذفر صفوان وفر عکرمه

و ابو یزید قائم کا المؤتمه

واستقبلتنا بالسیوف المسلمه

یقطعن کل ساعد و جمجمه

ضرباً ولا تسمع الا غمغمه

لهم نهیب خلفنا و همهمه

لم تنطق فی اللوم ادنی کله

جواب شاعرانه سنی ویردی .

رسول اکرم افسدیمز، حضرت خالدک دست پر زور جلادتندہ قلنج پارلادیغنی کورمسلمہ امر و تنبیہ عالیترینہ قارشى ملحوظ اولان حرکتدن استفسارضمنندہ در حال آدم کوندردی . سبب قتال، جواباً کندیلرینه عرض و اعلام اولنه رق : [قضاء الله خیر] دیه سکوت بیوردیلر . خالدک مصادف اولدینی مزاحمه و مقاتله دن بشقه مقاومتہ تصادف اولنقمسزین اردوی همایون طاقم طاقم مکیه کیردی . حضرت فاتح ام القری، کداء یاخود اسفل مکده کدیدن دخول ایله حجونه مواصلت ایدوب راحله همایونلرندن ایندی .

ودریدن معمول اوله رق قوریلان خیمه خاصه سعادتلرینه کیردی . مبارک اللرندن ویوزلرندن توزی سیلیدی . صوکره خیمه سعادتده دیگر روایتہ کوره ام هانی بنت ابی طالبک خانه سنه عزیمتله انده غسل ایدوب سکنز رکعت نماز قیلدی و بعده سلاحرینی طاقندی قوشاندی . باشنه مغفرینی کیدی و راحله سنه بینهرک اوپله بر هیئت و هیبتله حرکت بیوردی که میاننده سیف شریفلری، سر سعادت افسرلرنده سیاه عمامه لی مغفرلری ، جانب یمینده ابو بکر الصدیق، جانب یسارنده امید بن حضیر،

رکاب هایونلرنده بلال ایله عثمان ابن ابی طلحه رضوان الله  
 علیهم اجمعین حضراتی بولنمقدده. ایدیلر . وجه پاك تابنا کلری،  
 او عمامه سیاه التندہ غمامه سیاه ایچندن شعشمه باش ظهور  
 اولان نیر السماء کبی انوار قدسیتله لمعان ایتمکده ایدی  
 حجوندن خدمه یه قدر آتلورلر صف باغلا یوب جمله سی  
 او حضرتک شرف مرورینه انتظار ایدر وضع اوزره  
 بولنیورلر ایدی . موکب هایون، صفلارده سندن خطوه  
 خطوه ایلرولمکده وحبیب خدا صوت لین وتر جیع کزین  
 ایله سورة انا فتحنا بی تلاوت ایتمکده ایدی. کعبه معظمه  
 کوروندیکی آندہ [الله اکبر] دیدیکنندن جمله اصحاب  
 کرامده تکبیر کتیردیلر اصحاب کزینک بر اغزدن تکبیر  
 کتیرملرندن تحصیل ایدن صداد دهشت اداء طاغلری  
 ایکلتمش و اودیة ام القری، صانکه موکب هایونی  
 «خوش کلدیکز» دیه القشلامش ایدی .

بی احرام اولدینی حالدہ حرم شریف بیت الله کلوب  
 حجر الاسود حذاسنه حین وصولده ید سعادتلرنده بولنان  
 کوچوک بردکنک ایلا حجری استلام و تکبیر بیوردیلر



او کون یوم جمعه ایدی و عید فطره اون کون

قالمشیدی . بیت الاهی یدی دفعه طواف ایتدی . طوافده  
 اصحاب کرام ، افندیمرک مبارک ایزینه باصوب اردنجه  
 کیدرلردی . اوزمان ابوسفیان ، بر محله طواف اهل اسلامی  
 تماشا ایتکده ایدی کندی کندینه : [ آه بر اردو دها  
 طویلاسمده شو آدمه حربه باشلاسم نصل اولور ]  
 دیدی . ابوسفیان ، اوملاحظهده ایکن افندیمرک ، آنک  
 یانندن کچور ایدی یوزینه باقهرق : [ او آدم ، سنی یینه  
 تذلیل ایدر ] بیوردی . بوسوزدن ابوسفیان ، توبه و  
 استغفار ایتدکن صوکره : [ حقا پیغمبرسک فی الواقع  
 قلبمده اوپله بر قورتی وار ایدی ] دیه اعتراف جرم  
 ایتمشدی !

فضاله بن عمرو بن الملوح الائی دخی اثناء طوافده  
 سوء نیتله یاواشجه یاقلاش-مقده اولدیفی کشف و تفرس  
 بیوریلوب انی اشغال واسکات ضمنتده :

[ فضاله میسک ] بیوردی . فضالهده [ اوت ] دیرکن  
 رسول اکرم : [ نه دوشونیورسک ] دیه صورتی اوده : [ دوشوندیکم  
 یوق انجق ذکر الله ايله مشغولم ] دیدیسهده افندیمرک  
 جوابنه مقابل تبسم ایتدی . و : [ ذهنکده قوردیغک  
 شیدن توبه ایت ] بیورمقله برابر مبارک الی فضاله نیک

کوکسی اوزرینه قوبدیغندن سینئه پر کینه سنده کی قورتی  
در حال زائل اوله رق ایمانک آندن صوکره رسوخ پیدا  
ایتدیکنی بعده کندیمی حکایه ایلمشدر.

افندیز ، طوافده دست شریفلرنده بولنان قضیب  
[ دکنک ] ایله رکن شریفی استلام بیوردی طوافدن  
صوکره باب الیتده راحله سعادتلرینی اناخه ایلدی .  
حول بیتده او زمان سنه نك کونلری عددنجه اوچیوز  
التمش عدد صنم مجسم موضوع ایدی . انلری محو ایتک  
اوزره دست هایونلرنده کی دکنک ایله برر برر اصنام  
مرقومیه اشارت و [ جاء الحق وزهق الباطل ان الباطل  
كان زهوقاً ] آیت کریمه سنی تلاوت بیورلردی . اشارت  
علیه اصنامک یوزی طرفنه طوغری واقع اولدینی حالد  
بتلر ارقه لری اوستنه وارقه جهتلرینه طوغری اولدینی  
حالد یوزلری اوستنه یقیلوب دوشرلردی ! . صنملر  
ایسه ایاقلرندن قورشون قلائی کی شیلرله قوتلی یاشدیرلمش  
ایدیلر ! اصنام تماماً قیرلدی حول الحرم هر درلو خسایس  
آناردن تطهیر ایدلدی .

اعظم الاصنام اولان ، هبله قیریلور ایکن زییر بن  
الغوام حضرتلری ، اوسفیانه تعریض صد دنده :



« سنك احده وجوديله افتخار ايتديك هبلي  
 كوريورميسك، ديمشدي . ابو سفيان اظهار محجوبيت  
 ايدرك : « اراق توبيخي براق يازير ! اكر محمدك  
 الهندن باشقه اله اولسيدي ايشلر باشقه درلواولورايدى »  
 جوابى وردى .

افنديز ، حاجيلردن معيت سنيه لرنده بولنان عثمان  
 ابن ابى طلحه دن بيت معظمك مفتاحى ايستدى . اوده  
 والده سى « سلافه بنت سعد » ك ياننه كيدوب مفتاحى  
 آندن ايستدى . سلافه بركره امتناع ايدر كى اولديسه ده  
 بالتهديد النذن الهرق رسول الله كيتردى و ويرمك  
 اوزره النى اوزاديركن عباس حضرت تلى حاجيلكك دخی  
 خدمت سقايت علاوه سيله بنى عبدالمطلبه تخصييص بيورلسنى  
 استدعا ايتديكنندن عثمان مفتاحى ويرمكدن جايرق النى  
 كبرى چكدى حضرت على او آنده : [ يارسول الله !  
 حاجيلك خدمتى اهل بيتكه تخصييص ايتليسكز ] ديمش  
 بولندى . بونك اوزرينه رسول اكرم صلى الله تعالى عليه  
 وسلم افنديز : [ يا عثمان ! الله ويوم قيامته ايمان ايتدك  
 ايسه مفتاحى وير ! ] ديدى . عثمان ، اندن صوكره :  
 — « آل امانتله ! »

ديهرك مفتاحی ویردی. انجق آباء واجدادینه مخصوص  
اولان خدمتک النذن کیده چکنه دائر سوزلری ایشدکجه  
محزون ومتالم اولیور ایدی. عثمانک شوامتاغی اوزرینه  
حضرت علی، انک قولنی بوکهرک النذن مفتاحی زورایله  
الديغنی سعید بن المسیب، روایت ایتمشدر رسول الله  
صلی الله علیه وسلم، بیت معظمه یه کیرمزدن اول ایچنده کی  
صنملرک اخراجنی امرایتدی و داخل کعبه نك دیوارنده  
منقوش اولان صورتلری سیلملری ایچون حضرت عمر  
ایله عثمان بن ابی طلحه بی کوندردی انلرده صورمذ کوره بی  
محو ایتدیلر. یالکیز اللرنده ازلام اولدینی خالده تصویر  
ایدلمش بولنان ابراهیم و اسماعیل عابهما السلامک  
صورتلرینی ابقا ایلدیلر ابو طلحه اوغللری، بی  
کندیلرندن باشقه سی آچه من ظن ایدرلرکن سیدالبطحاء  
اقدیمز کیردی. و ازدحام اولماق ایچون امر ایدوب  
باب البیتی اوزرلرندن قاپاندی.

معیت سنیه لرنده واسامه بن زید، بلال حبشی، عثمان  
بن طلحه، بولنیورلردی. جدران کعبه ده منقوش اولان-  
دیگر بر روایتیه کوره مجسم و مهیکل بولنان- اوایکی  
تصویری کوره رک نیچون محو و یا اخراج ایتدیکلرینی

عمر دن صورتی. عمر اکا جزمت ایدہ مدیکنی سویلدی.  
 ازلام ایله قطعاً - تقسام ایتدکلری حالده کفار قریشک  
 اوپله بر طرزده انلری تصویر ایتدکلرندن ویا خود انلره  
 الداندکلرندن طولایی حقلرندہ تقریب مخصوص اوله رق:  
 [ قاتلهم الله اما والله لقد علموا انهم لم يستقسموا بها قط ]  
 بیوردی. و همان محو ایتک اوزره اسامیه صو امر  
 ایتدی.

روایتہ کوره اسامہ، صوبی قوفہ ایله دوکر رسول  
 الله صلی الله علیه و سلم دخی دست شریفلریله هم سیلر  
 هم: [ قاتل الله قوماً یصـورون مالا یخافون ] بیورر  
 ایدی.

ایچریده برخیلی مدت مکث و آرام ایتدیلر. رسول  
 صاحب البیت افندیمز، داخل بیتده نماز دخی قیلدیلر.  
 نمازده قیویه مقابل اولان جداره توجه ایتشدی. فقط  
 قاج رکعت نماز قیلدیغی تعیین اولنه مدی. نماز و دعادن  
 صوکره چیقدی. ایشیکده طوردی و قیونک ایکی طرفی  
 اللریله طوتدی. خالد بن الولید، خلقک تهاجم وازدحامی  
 قیودن منع و دفع ایتکده ایدی. مفتاح کعبه، افندیمزک  
 النده و صاحبی عثمانه اعاده ایدلک اوزره ایدی اودقیقهده

حضرت علی، سدانٹک یعنی حجابت بیتک ده سقایه زمزم خدمتہ علاوہ بنی عبدالمطلبہ ویرنسنی استدعا ایلدی فقط بوکا قارشی افندیمز، او کونک کرم و وفاء زمانی اولدینی بیانیله عثمانی اراتوب مفتاحی اکا : « خذوها یا بنی طاحه ! خالدة ! خالدة ! لایز عہما منکم الا ظالم، دیہ اعاده ایلدکن باشقه خدمت مذکورہ یہ اخرک الی یوم القیام منع مداخلہ سنی جناب حق جل و علی [ان الله یأمرکم ان تؤدوا الامانات الی اهلها ..] آیت کریمہ سیلہ امر و فرمان بیورمشدر .

عثمان، مفتاحی آلوب ده کیری چکیلہ جکی انساده رسالتپناه افندیمز، اکا خطاباً :  
 — « الم یکن الذی قلت لک؟ »  
 بیوردیلر .

سبب — هجرتدن اول مکہ مکرمہ ده اوداعی نهج الصواب هدایت افندیمز، برکون عثمانہ راست کله رک انی دینہ دعوت ایتدی .  
 عثمان، بر طور استکبار ایلہ :

— « یا محمد [علیه الصلوٰۃ والسلام] شایان تعجبدرکہ بنم سکا متابعتی ارزو ایدہ یورسک جالبو کہ سن قومکک دینہ مخالف و دین آخری احداث ایتدک »

دیه جواب ویردی .

بومحاوره دن صوکره ایدیینه برکون امام المرسلین  
افندیمر، ناس ایلله برابر کعبه معظمه یه دخول ارزوسیلله  
باب کعبه یه کلنججه عثمان، حق نبویده بعض مرتبه عنف  
وغلظت کوستردیکندن افندیمر، اکا مقابل التزام حلم  
وسکوت ایدهرک :

— « لعلک ستری هذا المفتاح يوماً بیدی اضعه حیث

شئت »

بیوردی. عثمان، بونی استبعاد صددنده :

— « لقد هلکت قریش یومئذ و ذلت »

دیدی، قریشک او حالده و اوکونده کسب مسعودیت

ایده جگنی بیان ایچون افندیمر دخی :

— « بل عمرت یومئذ و عزت »

دیدکد انصکره کعبه یه کیرمشیدی. کلام نبوی، عثمانک

یوره کنده بر طوته رق امر موعودک عقیب محاوره ده

همان حادث و حاصل اوله جنی خوفیله مفتاحی الدن کیدر.

مامک اوزره او ذقیقه دن اعتباراً اسلامه میل ایتمش

بولندیقی حالده قومنک زجر و تحذیر یله سکزنجی سنه

هجریه یه قدر مسلمان اوله مامشدر .

عثمان دیر ایدی که: حضرت پیغمبر، بکا خطاباً «الم  
 یکن الذی قلت لک» دینجه مکّه مکرمه ده قبل الهجره  
 سویلمش اولدقلری: «یاعثمان! لعلک ستري هذا المفتاح  
 يوماً بیدی اضعه حیث شئت» کلامی درخاطر ایدرک:  
 «اوت یارسول الله! شهادت ایدرم که سن حق رسول  
 اللهسک» دیدم ایدی.

رسول اکرم افندیمز، بیت خدادن چیققدنصوکره  
 ایشیکده طور دقلری حالد: [لااله الا الله وحده لا شریک  
 له. صدق وعده ونصر عبده. وهزم الاحزاب وحده]  
 دیدی. خاق، حول بیت اللهده مجتمع واهل مکّه،  
 حقلرنده اولنه حق معامله دن اندیشناک ایدیلر. بیوردی که:  
 «کندی حقلریکزده نه درلو معامله می ملاحظه ایدرسکر؟»

بوکا:

— «نقول خیراً ونظن خیراً»

جوابی ویرملریله افندیمز دخی همان او آنده:

— «اذهبوا فاتم الطلقاء»

دیه اعلان ایلدیکی عفو و عمومی ایله برابر برده  
 خطبه او قویه رق خطبه ده جاهلیتک عادات ورسومی وبالخاصه  
 ربانی نهی ایتدی. و احکام قصاصی و دیات مغلظه و

و مخففه بی و شبه عمد و خطایی ا کلا تدی . جاهلیت زمانندن  
 قاله دعوالرک بطلاننه حکم ایتدی و برکافر ایچون بر  
 مسلمک قتل ایدیله میه جکنی ، اختلاف دین و مملتک مانع  
 ارث اوله جغنی ، دعا و بده دائماً مدعی به یننه و منکره یمین  
 تکلیفی لازم کله جکنی اوج کیجه لک مسافه یه قادینلرک بلا  
 محرم سفر ایتما ملرینی ، بعد العصر حین غروبده و بعد الصبح  
 حین طلوعده صلات و یوم الاضحیه ایله یوم الفطرده  
 صیام جائز اوله میه جغنی امر و اخطاردن صوکره بیوردی که :  
 ای قریش ! نسب سببیلک اولان مفاخرت جاهلیه بی  
 جناب حق ، سزدن اوزق ایتدی . او مقوله مفاخرنله  
 خلقه قارشى تکبر و تعظمی ترک ایدیکز زیرا جمله خلق ،  
 آدم علیه السلامک اوغلار یدر آدم ایسه طوپراقدن مخلوقدر  
 بنی آدمک بری برندن فضل و زیاده لیکلری انجق تقوی  
 ایله در [یا ایها الناس ! انا خلقناکم من ذکر و انشی و جعلناکم  
 شعوباً و قبائل لتعارفوا ان اکر مکم عندالله اتقاکم ان الله  
 علیم خبیر ] او قودی .

حضرت ابو بکر الصدیق افندی مزک پدری ابو  
 قحافه نك قبول اسلامی ، مخدوم مکرمنک دلالتیه  
 ایسته بو ائنده واقع اولمشدر . حضرت صدیق ، بابایی  
 ابو قحافه بی النسن طو توب حضور سعادت کتیردی



افنديمز : [ هلا تركت الشيخ في بيته حتى اكون انا  
آتيه ] ديه بيوردي صديق ، اني پيشكاه رسالته او طورتيدي .  
رسول الله . مبارك اللزيله صدرابي قحافه يي مسح ايدوب  
كندوسنه اسلام تكليف ايلدي ابو قحافه ده مسلمان اولدي ابو  
قحافه نك صاحبي صقالي اختيار لغندن بهم بياض اولمشدي  
افنديمز : [ غيروهما وجنبوهما بالسواد ] ديه خضاب امر  
بيوردي .

رسول اكرم صلى الله عليه وسلم ، صفايه چيقوب  
او طوردي حضرت فاروق دخی انك آلت طرفنده .  
او طوردي . اندن صوكره ناس برر برر رسول الله بيعت  
ايتمه باشلاديلر . ار ككلار يالكز اسلام وجهاد اوزرينه  
بيعت ايتديلر ، حضرت نبي مكرم انلرك الله و رسولنه  
اطاعت ايتلري اوزرينه بيعتلريني قبول ايتدي .

بيعة الرجال تمام اولدقن صوكره نوبت قادينلره  
كليله حضرت على كرم الله وجهه نك همشيرهي «ام  
هاني» بنت ابي طالب ، عاص بن اميه نك قيزي [ام حبيبه]  
وعتاب بن اسيدك خاله لري اروي ، عاتكة ، و جارت بن  
هشامك قيزي عكرمه ابن ابي جهلك زوجه سي «ام حكيم»  
وخالد بن الوليدك همشيرهي «فاخته» كي نسوان قريشدن

شان و اعتبار خصوصنده برکونه امتیازی اولانلر، نسوان سائرمنک اوکلرینه دوشوب حضور پر نور رسالته کلدیلر .

ابوسفیابک زوجه سی هند دخی تبدیل شکل و قیافته متنکره اولدیغی حالدیه قادینلرک ارسنه صوقلوب کلشدی ! قادینلرک بیعتلری اولب ابدیه شرفزول ایدن : [ یا ایها النبی ! اذا جاءك المؤمنات يبایعنك علی ان لا یشرکن بالله شیئاً ولا یسرقن ولا یزنین ولا یقتلن اولادهن ولا یأتین بهتان یفتیننه بین ایدیهن و ارجلهن ولا یعصینک فی معروف ] آیت کریمه سنده اولدیغی اوزره الی ماده اوزرینه منبی ایدی :

۱ — علی ان لا یشرکن بالله شیئاً

۲ — ولا یسرقن

۳ — ولا یزنین

۴ — ولا یقتلن اولادهن

۵ — ولا یأتین بهتان یفتیننه بین ایدیهن و ارجلهن

۶ — ولا یعصینک فی معروف

مواد مسروده منک وجهه ترتیبی، قبیح خصوصنده

اشیاء مذکور منک اکبر و اکثری یاخود بین النسوان

اظهری مادوننه تقدیم طریقہ علی سیاق التزیل اولمغلہ  
ینہ سیاق مبسوط اوزرہ صرہ سیلہ سوق وتبلیغ ضمنندہ  
طرف اشرف رسالتپناہیدن:

— «ابا یکن علی ان لایشرکن باللہ شیئاً = اللہ»

هیچ بر شیء اشراک ایتمامکن شرطیلہ بیعتکزی اخذ  
و قبول ایدرم»

تکلیفی درمیان اولندی. هند اوزمان باشی قالدیرہ رق  
معرض تقدیرده: «واللہ سن ارککلرہ تکلیف ایتمدیکن  
شرطی بزہ تکلیف ایدہ یورسک ارککلرک یالکز اسلام  
وجہاد اوزرینہ بیعتلری قبول ایتدک» دیہ مقابلہ ایتدی.  
رسول خدا افندیمنز، اندن صوکرہ:

— «ولایسرqn = سرقت دخی ایتماملری شرطیلہ»

بیوردیلر. هند، اوزمان ده: «ابوسفیان، ناکس بر آدمدر  
مالندن الدیغم مقدار قایل، بیلیم بکا حلال یا خود حرام  
اولورمی؟» دیدی. ابوسفیان، حاضر ایدی: [کچمشده  
الدیغک وار ایسه حلال اواسون] دیسیلہ رسول اکرم،  
تبسم ایتدی و طانیہ رق: [هندمیسک] بیوردی.  
هند دخی لسان تضرعہ: [اوت هندم! کچمشی عفو  
ایت یارسول اللہ! تا کہ اللہ ده سنی عفو ایتسون]  
دیدیکندن افندیمنز، صدد بحثہ رجوع ایدہ رک:

— «ولایزنین = زنا دخی ایتمایری شرطیلہ»  
 دیدی. هند، نسوان حاضرہ ایلہ حقلمرندہ لوٹ  
 زنای استبعاد صرہ سنده :

«او تزنی الحرة = حرہ قادیں هیچ زنا ایدرمی؟»  
 دیدی. بعدہ نجی مکرم :

— «ولایقتان اولادھن = چوجقلمری اولدیرما -  
 ملری شرطیلہ»

بیوردی. هند «بز، چوجقلمری کوچوک ایکن  
 بیوتدک و بیوک ایکن سن انلری بدرده اولدیردک ارتق  
 نہ اولدی ایسہ سز و انلر اوراسنی دھا ایو بیلورسکنز»  
 دیدی. عمر الفاروق زیادہ تمکین و وقاری وار ایکن ہندک  
 شوسوزینہ طایانہ میوب کولدی و کولمکدن ارقسہ سی اوستی  
 ییقیلدی. افندیمز دخی تبسم ایتدی و :

— «ولایاتین بہتان یفترینہ بین ایدہن وارجلہن»  
 دیدی کہ بوندن مقصد عالی، قادینلرک کندی اولادی  
 اولمیان لقیطلری زوجلمرینہ قذف و نسبتلہ بہتان ایتمش  
 اولمالمرینی امردن عبارت ایدی. هند: [واللہ بہتان،  
 چرکین شیدر. سن بزہ رشد و مکارم اخلاق ایلہ  
 امر ایدیورسک] دیدی.

اندن صوکره حیب خدا افندیمز :  
 — « ولا یعیذک فی معروف = منکر اولمیان خصوصاً  
 صابده رسول الله عصیان ایتمارلی شرطیلہ »  
 بیورنجه هند: [ بز بو دیوان عالی یه صوکره عصیان  
 نیتیلہ کلدک ] دیدی .

مواد مسرووده، نسوان طرفندن ارتق قبول ایدلمشدی .  
 بناءً علیه رسم بیعتک اجرا سیچون حضرت عمر الفاروقه  
 امر هایون شرفصادر اولدی او دخی بر روایت کوره  
 مصافحه صورتیلہ بالوکاله اخذ بیعت ایتمش روایت  
 اخرایه کوره افندیمز دست هایونلری بر ثوب ایله مستور  
 اولدینی حالده نسوانک بیعتلرینی مصافحه اخذ و اجرا  
 ایلمشلردر .

روایت دیگره نظراً بر قابده صویه افندیمز ، ال  
 صوقوب نسوان دخی غمس و غطس ید صورتیلہ بیعت  
 رسمی اجرا اولمشدر .

.\*.\*

هند، دمی هدر ایدیلان نسوان مکدن ایدی . بو  
 کره مظهر عفو و امان پیغمبری اولمش و خلوص قاب  
 ایله ایمان دخی کتیرمشدر . مسلمان اولدندن صوکره

درونده حب دین مبین و عشق سید الانبیاء و المرسلین  
افندیمز خروشان اوله رق :

— « یا رسول الله ! بو کونه دکین اهلنک . مقهور  
و مدمر اولمتنی ایستدیکم یالکمز سنک خیمه سعادنک  
ایدی . والله شمدی یز یوزنده اهلنک عزنی ارزو  
ایلدیکم انجق سنک خیمه سعادتکدر . نو چوق غفلتمده  
ایمشر . سن نقدر کریم و حلیم ایمش سک ! . سکا نظر  
محبته باقیان کوزلری الله تعالی کور ایتسون . »

دیمکه اکا مقابل رسول ذیشان افندیمز ، انک اسلام  
خصوصنده قوت قلبنک آتیا کسب ازدیاد ایده جکنی نور  
اقدس نبوتله کشف بیوردیغندن :

— « وایضاً و الذی نفس محمد بیده — والله بو  
حال ، سنده دها زیاده اولسه کرکدر ، »

دیدى . هند ایسه کرک ذات رسالتپناهى به کرک  
بتون اهل اسلامه صوک درجه ده بغض و عناد تله معروف  
برقادرین اولدینى حالده انک اوحالتی فیض ساری نبوت ،  
بر مجلسده محو ایدوب اهتداسندن صوکره دین مبین  
اسلامه و ذات پاک پیغمبری به محبتی اول درجه مزداد  
اولمشدی که اودقیقه دن اعتباراً یاننده نام نامی رسالتپناهى

ذکر اولند قبحه دروننده فرح عظیم حاصل اولور و اغلايه اغلايه خطیئات و سیئات سابقه سندن کمال حجاب و ندامتله استغفار ایلردی .

هند، امر بیعتک ختامیله خانه سینه کلدیکی زمان منزله کی اصنامی کاملاً طیشاری به آتمشدر .

صفاده رسم بیعتک اجراسیله افندیمز، دعایه مشغول بولندقلری ائتاده بعض انصار کرامک [رسول الله، وطنه کلدی. قاوشدی. عشیرتیه بولوشدی کورشدی. بوندن صوکره عجبا بزم بلده مزه کیدرمی] کبی بعض افکار و اندیشه لرله یکدیگرینه حسب حال ایتدکاری معلوم عالی اوله رق بعد الدعاء کیفیت، انصاردن استیضاح اولندی. انلرک دخی: [اوت یار رسول الله! ذهنمز بویه بر شی کلدی] دیماری اوزرینه: [ای جماعت انصار! بن، اللهک قولی و رسولی یم سنزک بلده کزه هجرت ایتدم. حیات و مماتم سنزکله در] بیورلدیفندن انصار، النفات واقعدن طولانی فوق العاده مسرور اولمشلر و سرورلرندن اغلاشلمشلردر.

او کون وقت ظهر اذاتی حضرت بلال حبشی رضی الله عنه، بیت معظمک اوستنده او قومشدر. اذان



اوقونور ايكن بهض اطفال ، انك سېنى تقليداً استهزا  
 ايتمشلر وابوجهلك قيزى چويريده : [الله ، بابامه لطف  
 واحسان ايتمش كه وقتيله فوت اولدى ده بلالك كعبه  
 اوزرنده باغيرديغنى كورمدى] ديمش ايدى !.

حارث بن هشام دخى ديمشدى كه : كاشكه اولجه فوت  
 اولوبده بو كونى كورميه ايدم .

اشراف ورؤساء قريش ، بو سياقده و بيان تأسف  
 صدندنه برر سوز سويلمشلر . انجق ابوسفیان ، محاورات  
 واقعه نك قوه قدسيه نبوتله كشف بيوريله جغنى بيلديكندن  
 ايلروده ينه سبب محجويقتى اولور ملاحظه سييله قورقديغنه  
 مبنى ياننده كي صناديده : « بن ، محمد [عليه الصلوٰة والسلام] ك  
 حقنده هيچ برشى سويليمم زيرا اكاسمان بيلديريلوره  
 ديه بيلمشدى . بو سوزلرى كندى يئلرنده سويلر كن  
 رسول مكرم افنديمز ، انلك اوزرلرينه سبحانه رحمت  
 كي سايه انداز عزو وقار اوله رق جريان ايدن محاوره -  
 لريني انلره برر برر خبر ويره سييله ابوسفیان اكا قارشى  
 كلامنى كتم وانكار ايتدى . افنديمز ، انك او خصوصده كي  
 عيب و قباحتنى يوزينه اورميوب حقنده يالكلز بر تبسم  
 ايله اكتفا بيوردى . حارث ايسه برهان وبداهته قارشى  
 هان :

— « بن شهادت ایدرم که بن، حق پیغمبر سک  
 زیرا بزم بو سوزلریمزه هنوز کیمسه مطلع اولمامشدی،  
 دیهرک قبول اسلامدن باشقه چاره بوله مدی .

یوم فتحک ایرتسی کونی بنی هذیلدن « جذب بن  
 الادلع، مکیه کلمشدی بنی کعبدن « خراش بن امیه، انی  
 قیلنج ایله قارنندن اوره رق باغیر صاقلرینی طشره یه  
 دوکدی. جذب، او حالدہ ارقه سنی بر دیواره طایادی.  
 یرہ طوغری آقوب یاییلمش اولان باغیر صاقلرینه نظر  
 نو مییدی ایله باقیور ایدی. صوکره کوزلری دوندی .  
 صوک کلامی اوله رق :

— « ای خزاعه قومی! بو غدیری بکا ایتکه موفق  
 اولدیکز »

سوزینی بروضع حزین ایله سویلرکن دوشوب فوت  
 اولدی .

کیفیت مسموع عالی اولدینی زمان رسول اکرم  
 همان قالقوب بر خطبه او قودی :

— « تحقیقا جناب الله، خلقت ارض و سما و آفرینش  
 شمس و قمر دن بری مکئی حرام ایتمشدره. وروز قیامته  
 قدرده حرام اولسه کرکذر الله و یوم آخرته ایمانی

اولان هر آدمه مکده قان دوکمک و مکده بولدینی شیء  
 قالدیرمق حلال دکلدر مکرکه تعریف ایده . و مکهنک  
 اغاجلرینی کسمک و اوتلرینی بولمق دخی جائز اولمز .  
 رسول الله مکده قان دوکدیکنی و قتال ایلدیکنی جواز  
 قتل و قتاله دلیل طوتان کیمسه یه سز، سویلیکیزکه بندن  
 بشقه کیمسه یه او حلال اولمز و بندن صوکره کیمسه یه  
 حلال اولمیه جقدر بکا دخی حلال دکل ایدی انجق کونک  
 بر ساعتده حلال اولوب اندن صوکره حرمت یرینه  
 کلدی اولجه حرام اولدینی کبی ینه حرام اولدی . ای  
 خزاء! الکزی قتلدن کیری چکیکز ! اول کشی بی که  
 قتل ایلدیکز دیتی اوزریکزه حکم ایتدم و یریکزه اگر  
 بوندن صوکره برینی دها اولدیریرسه کز و لیلرینی مخیر  
 ایدرم ایسترلرسه دیت الیرلر . ایسترلرسه قصاص ایدرلر،  
 حکم رسالتپناهی موجب عالیه نجه بی کعب، مقتولک  
 دیتی اوله رق ورنه سینه یوز دوه و یرمشلردر!

اهل مکه حقنده ارزان بیوریلان امن و اماندن ارکک  
 قادین بر قاج کیمسه لر مستثنا ایدیلر . جنایات و سیئات  
 عظیمه لرندن نانی بالاستما دملری اهدار ایدلمشدن .

عبدالله ابن ابی السرح — هندك نائل عفو و امان  
 اوله بيلمسی امثالنه جسارت ویره رك ديكړ فراريلار دخی  
 استمدعاء صفح و امانه و طلب عفو و غفرانه مبادرت  
 ایتشلردر. حتی عبدالله ابن ابی السرح، شو امید ایله  
 عثمان ذی النورین رضی الله عنه حضرتلرینه دخالت  
 ایتشدی .

صحابی\* مشارالیه ، دخیل مرقومك سود قرنداشی  
 اولدیغنه مبنی دخالتی قبول ایدهرك آنی کیزله مش و بر  
 مدت صوکره حضور پر نور نبوته عرض ایدوب عفو  
 ایتدیرمشدر .

ابن ابی السرح ، رسول الله مکده ، بولندیفی  
 ایام قبل الهجرته خدمت کتابت وحی الهیده بولنانلردن  
 بریدر. فقط اثناء ثبت و تحریر آیات حضرة القرآنده  
 [عزیز حکیم] یرینه [علیم حکیم] یازوق کبی بالالتزام بعض  
 تصدیسی اکلاشیله رق مرتد و مطرود اولمشدی. ایشته  
 انك بوکره عفوی بابنده حضرت ذی النورینك استر-  
 حامنه قارشى محل جوابده افندیمز، التزام صحت و سکوت  
 بیورمشلردی. شو جوابك دهشتی ایسه مسلم ایدی .  
 بناء علیه حضرت عثمان ده مقام نیازده اطناب کلام و بالدفعات  
 تکریر استرحام ایتمکله اعدل البشر افندیمز:

— «قد بايعناه فلينصرف = بيعتي قبول ايتدك  
هان دفع اولسون»  
ديه آني ذى النورين حضرتلرينه مع الاكرام  
باغشلا دى !

ابن ابى السرح، حضور عاليدين چيقدقدن صوكره  
رسول الله صلى الله عليه وسلم اصحاب كرامنه : [ اما كان  
فيكم من يقوم اليه فيضرب عنقه قبل ان ابايه = بيعتي  
قبول ايتزدن اول قلاغوب بوياني اوره جق ايجكزده  
بر آدم بوقى ايدى ] ديه سبب صحت وسكوتلرينى اظهار  
بيورملى اوزرينه حضار كرام ايجندن عباد بن بشر  
ديدى كه :

— «والله يا رسول الله! سنك بر كوز اوجيله امره  
واشارتكه منتظر ايدم اكر ادنى بر اشارتك اولسیدی  
بن انى هان قتل ايدردم»  
بو سوزه قارشى اقمديمز :

— «ماكان لني ان تكون له خائنة الاعين = لسانيله  
اظهار ايلديكنك خلافي كوزيله اشعار معناسنه خيانت  
اعين، هيچ بر نايدين صادر اولمدي»

بيورديلر. ابن ابى السرح، بوندن صوكره ديتند.

قوى مسلمان اوله رق بر خيلى غزواتده يارارلق  
كوسترمش وحتى حضرت عثمان رضى الله عنك زماننده  
مصره والى نصب وتعيين ده بيورلمشدر .

عكرمه وصفوايه — قریشك خندمه انهم زمانندن  
صوكره ابن ابى جهل ؛ يمن طرفنه صفوان بن اميه ؛  
جديه قاجمشدى . عكرمه نك زوجه سى «ام حكيم» اظهار  
ايمان و زوجى عكرمه ايجونده استحصال عفو و امان  
ايش اولديغندن بالتعقيب عكرمه يى يمنه كيتمك اوزره  
كمى يه يينمش اولديغى حالده بولدى و :

— «ناسك اك حليمى و اك كريمى اولان ذات  
طرفندن سكا امان ايله كلدم»

ديه انى كبرى مكه مكرمه يه كتيردى . هر ايكيسى  
برلكده خيمه سعادتك قپوسنه كلديلر . ام حكيم ،  
بالاستيدان مستور اوله رق حضورعالى يه كيردى . و :

— «يارسول الله! عكرمه يى كتيردم»

ديدى . بو خبردن رسول اكرم صوك درجه ده  
مخفوظ اوله رق فرح و مخطوطيته مبنى همان يرنندن سرعتله  
قالقار ايكن حتى رداء شريفه لرى اوموزندن دوشمشدى

امر ايدوب عكرمه يي ايجرى به كترى دى. و اكا التفات  
مخصوص اوله رق: [مرحباً بالراكب المهاجر] خطاب  
بركت نصابى ابدال بيوردي. عكرمه دخی در حال مسلمان  
اولدى. و حيا سندن يره طوغرى اوكنه باقرق :

— « يارسول الله ! تحقياً سن ، ناسك اك زياده

ايولك ايديجيسى و طوغرى سوزايسى و سوزينه وفا  
ايديجيسى سك »

ديدى. افنديز، محظوظيته :

— « اي عكرمه، سن بنم المدين كله جك نه يي ايستر-

سك ويره جكم »

بيوردي. عكرمه، او زمان :

— « بن، انى ايسترم كه شرکه تقويت ويرمك ايجون

سك عليهم كه كي جميع حركات و تفوها تمك عفوو مغفرت  
اولتمنى جناب حقدن طلب ايدمه سك »

ديمكه حضرت رسول الله، مبارك اللارنى قالديروب :

[اللهم اغفر لعكرمة كل عداوة عادانها او منطق تكلم به  
او مركب اوضع فيه يريدان يصد عن سبيلك] ديه دعا  
ايلدى .

عكرمه، بو مظهرت مخصوصه نك ويريكي سرور

ناحضور ايله و اخلاص و صميميته :



— « یا رسول الله ! کفر زمانده اسلام علیهنده  
 صرف ایتمدیکم دینارک ایکی مثلنی شمدی تقویت دین  
 مبین اوغورنده صرف ایده جکم واسلام علیهنده کی جنک  
 وجد المک ایکی اولقدیرنی شمدی کفار ایله ایده جکم »  
 دیمش و دیدیکی کبی اخیراً پک چوق یارارلق ابراز  
 ایدوب اجنادین غزاسنده شهید اولمشدر.

صفوانه — بن امیه نك برادری « عمیر بن وهب  
 الجمحی » بالاستدعا صفوانی عفوایتدیرد کدنصوکره جده یه  
 کیدوب صفوان ایله کوروشدی رسول اکرمک نصل  
 حلیم و کریم واقرباسنه نقدر مشفق و وفادار اولدیغنی  
 اکلاتدی :

— « او، سنک عم زاده کدر. امک عن و شرفی سنک  
 عن و شرفک دیمکدر »

دیدرک صفوانی مکة مکرمه یه کتیردی. صفوان،  
 حضور عالی رسالتپناهی یه کیردیکی زمان برادری عمیره  
 اشارتله رسول اکرمدن صورتی :

— « بو آدم دیورکه سن بکا امان ویرمشسک  
 اویله می ؟ »

رسول الله صلی الله علیه و سلم [ اوت ] جوابی  
 ویردی. صفوان :

— «اويله ايسه مسلمان اولق اچون بكا ايكي آي مهلت وير»

ديوب [دوت آي مخيرسك] جواب عاليسني آلدی .  
صفوان، اندن صوكره مشرك اولديغي خالده امن  
وامان اوزره قاله رق معيت سنیه رسالتهناهيده كيتديكي  
هوازن غزاسندم مسلمان اولمشدر.

\*\*\*

هبيره وابنه الزبيري — ام هاني بنت ابي طالبك  
زوجي هبيره ابن ابي وهب المخزومي «ايله» عبدالله بن  
الزبيري «نجران جانبیه فرار ايتمش ايديلر . هبيره ؛  
نجرانده كافرا فوت اولدی .

عبدالله بن الزبيري ، هيجو تهمتيله ،تهم ایدی بر  
مدت نجرانده قالدی . صوكره مقصد اسلام ايله مدينه  
طيبه يه كلهرك ملازمت رسالتهناهي به متوجه اولدی رسول  
الله . امك كلديكنی اوزاقدن كوردیكي ساعتده :

— «ايشته ابن الزبيري ، بر يوز ايله كليوركه انده  
نور اسلام وار»

بيوردی . ابن الزبيري :

— «السلام عليك يا رسول الله ! بن شهادت ايدرمكه

الله بر وسن انك رسولی سك . حمد و ثناء اول الله كه  
 بنی اسلامه هدايت ايلدى . يارسلو الله ! سكا قارشو  
 چوق مناسبتسزلكده بولندم فقط چوقده پشيمان اولدم ،  
 ديه كمال ندامتله اعتذار و اعتراف جرم و قصور  
 ايدمرك مسلمان اولدى . سيد الانام عليه الصلوة والسلام  
 افنديمز : [ الحمد لله الذى هداك الى الاسلام . يا عبدالله !  
 بيلمش اول كه اسلام ، كچمش كناهلرى محو ايدر ]  
 بيوردي .

ابن الزبيرى ، وادى اعتذارده بر خيلي اشعار  
 سويلمش ومدايح سنيه ي حاوى قصائد انشاد ايتشدرد .  
 ومشى — مشركين مكعدن بر قاچنك كندوسنه وعد  
 ايتدكلى مكافاته مقابل عم النبي حمزه رضى الله عنه  
 حضر تلرينى احد غزوه سنده شهيد ايتشيدى .

اشبو جنات عظيمه دن ناشى و حشيك دمى هدر  
 ايدى .

يوم الفتحده مكعدن قاچهرق بر مدت اطرافده  
 طولاشدينى حالده امين بر ملاجأ دائمى بوله مديفندن  
 بالمجبوريه حضور پر نور رسول الله دخالت ايتدى .  
 فقط رسول ذيشانك خاطر خاطر لرنده اكا قارشى تأثر

واغبرار اثرى باقى بولنديغندن كوزينه كورونماسى امر  
و تنبيه بيورلمش او بيچاره ده دائما نظرگاه سماجاه  
رسالتپناهيده بولمق كې برشرف عظيم جهانپهادر محروم  
اولدينى حالد طيشاريلىرده وقت كچيرمشدر .

سبب معلوم منقوريتته مقابل بر فداكارلق ايتمك  
تصورنده ايدى . شو تصور سوقيله ايدى كه حضرت  
صديق زماننده يمن حواليسنده بيوك برغانله چيقارمش  
اولان مسياحه كې بر شرير صبعى ده حمزه آندىنى  
حربه ايله اولديره بيلمشدر !.

\*\*\*

عبدالغزى به فطلى — قبل الفتح مدينه سعاده  
كلهرك مسلمان اولديغندن طرف اشرف رسالتدن بر  
قبيله نك جمع و تحصيل صدقاتنه مأمور بيورلمش ومعيته ده  
خزاعه قبيله لى برخادم و يرلمشدى . بر كون عبدالغزى ،  
خادم مرقومه قوشلق طعامنى حاضرلمسنى امر ايدوب  
كندوسى اويودى . خادم دخى احضار طعامده مسامحه  
ايدرك اويودى !.

عبدالغزى ، اوياندينى زمان خادمك طعامى حاضر  
ايتمكسزىن اويقويه ياندينى كوروب حدثلندى . خادم  
مرقومى اولديرى .

اوزمان حریف، عملنک وخامت نتیجه سنی ملاحظه  
ایده رک مدینه سعادت کلمه ارتق جرأت ایده مدی .  
طوبلادینی صدقه حیوانانی برابر سوروب مرتد اولدینی  
حمده مکیه قاچدی هدردی ، اشبو قل نفس وصو کره  
ردت تهملرینه مبنی ایدی .

رسول الله صلی الله علیه وسلم افسدیمز ، فتح مکه  
کونی طوافده ایکن اصحاب کرامدن بری عبدالعزاک  
استار کعبه به متعلق اوله رق کیزی طور دینی کوردی .  
وکیفیتی حضور رسالتپناهی به عرض ایتدی . شرف صدور  
ایدن : [ فاقتلوه ] فرمان پیغمبرسی موجب عالینجه  
او آنده و او مقامده انی «سعد بن حرث» ایله «ابو برزة لاسامی»  
مشترکاً اولدیردیله . دیگر روایتیه کوره « شریک بن  
عبده العجلانی ، قتل ایتشدیر .

صورت به نقیض — تهمت هجو ایله متهم ایدی .  
فتح مکه کونی قپوسنی اوزرینه قپایوب خانه سنده او طور انک  
امین اولدینی ایشتیکنه مبنی امید سلامتله همان خانه سنه  
واردی . وقپوسنی قپادی .

حضرت علی کرم الله وجهه ، انک خانه سنه واروب  
سؤال ایلدی بادی به کیتدیکی جوانی آلهرق کبری  
دوندی .

حویرث ، کندوسنک خانه سنده بولندیفی بللی اولمق  
 قورقوسندن ناشی باشقه بر محله کیزلنک اوزره طشره  
 چیقمشدی . حضرت علی ، سوقاقدہ راست کلهرک انی  
 اولدیردی .

\*\*\*

مقیس به ضیابه — قتل نفس وردت تهملریله متهم  
 ومهدر الدم ایدی برادری هشام بن ضیابه ، اولجه  
 مدینه طاهریه کلوب مسلمان اولغله برابر مرسیع  
 غزوه سنده حاضر بولنمشدی .

غزوه مذکوردهن عودت اتناسنده بنی عمرو بن  
 عوفدن برذات ، بونی مشرک ظنیه سهواً اولدیردیکندن  
 مقیس ، مکهدن کلدی و اظهار اسلام ایله برادرینک  
 قاتی دعوی ایلدی .

حضرت سیدالانام علیه الصلوٰۃ والسلام ، دیت حکم  
 ایدرک بنی فہردن برذاتی اکا ترفیقاً بنی نجاره کوندردی .  
 بنی نجار ، مقیسه برادرینک دیتی اولمق اوزره یوزدوه  
 ویردیلر .

مقیس ، دیتی الوب عودت ایدرکن ریفقنی یولده  
 طاش ایله قتل وبالا رتداد دوه لری مکیه سوق ایتمشدر!

مکه یولنده اوزمان شو بیتلرله اعلان شوق سرور  
ایتمکده ایدی :

قتلت به فهراً و حملت عقله  
سراقه بنی النجار ارباب قارع  
وادرکت ناری واضطجعت موسداً  
و کنت الى الاصنام اول راجع

خندمه ده مشرکینک انهمزامندن صوکره مقیس ، بعض  
هوادرانیله بر محله کیزانوب شرب شرابه مشغول  
بولیورلردی . ثمیلة بن عبدالله الکلبی ، انلرک اوحالنه  
واقف اوله رق یانلرینه واردی و اوراده مقیسی قیلنج  
ایله اوروب اولدیردی .

\*\*\*

هبار به الاسود — حق پیغبریده اذیتلره جرأت  
ایتملردن ایدی بدز وقعه سنده داما دنبوی « ابوالعاص  
بن الربیع » کریمه سعادتق حضور رسالته اعاده ایتک  
اوزره مدینه طاهره دن اطلاق اولنوب اوده زوجه سی  
« زینب بنت النبی » صلی الله علیه وسلم ی اعاده ضمنتده  
دومه ارکاباً مکه دن یوله چیقارمشدی .

اوزمان بو هبار ، بر باشقه سی ایله انک یولنی کسه رک  
ییندیکی دومی قارغی ایله اوردیغندن حضرت مشار الیها ،



هود جندن یره دوشوب حملی ساقط اولدینی حالده  
خسته لشمیدی .

شومعامله نك وقوعی اوزرینه رسول اکرم ، هبارك  
یولده اخذ و در دست یچون تعقیبنه حمزة بن عمرو والاسامی بی  
برقاج نفر اهل اسلام ایله مأمور ایتمش و متجاسر لرک حیا  
احراق لرینی ده انلره امر بیورمشدی .

فقط عمروك حین حر کتنده : [ انی کنت امر تکم  
ان تحر قوا فلاناً و فلاناً بالنار و ان النار لایعذب بها  
الا الله . فان اخذتموها فاقتلوها ] دیه احراق بالناره  
دائر اولان امر سابقنی تعدیل بیور دیلر .

حضرت زینب ، مرض مذکور تأثیر یله اخیراً ارتحال  
ایلدیکندن هبارك هدر دمنه سیئات مسروده سبب  
اولمش بولندیغی حالده اشبو فتح مکه کونی اله کچمه سی  
قابل اوله مدی .

حضرت رسول الله ، مدینه طیبه ده برکون  
اصحاب کرام یله برلکده اوطور ورکن هبار ، بغته حضور  
سعاده کلوب عرض دخالت و قبول دین مبینه مبادرت  
ایتمکله عفو بیورلمشدر .

زمان کفر نده کی سیئاتندن طولانی راست کلان

بعض اهل اسلام ، هبارہ سوکر اودہ باشنی یرہ  
طوغری اکوب تحمل ایدردی .

کیفیت مسـمـوع عالی اولہرق طرف ذیشرف  
پیغمبریدن : [ سب من سبک = سنی سوکنی سنده  
سوک ] دیہ مقابلہ بالمثلہ رخصت احسان بیوردی .

❖

هارث بہ طوطہ — سیئاتنہ مبنی مہدر الدم  
ایدی . فتح کونی حضرت علی ، بونی اخذ و قتل  
ایمشر .

قرتنا — عبدالعزی بن خطاک جاریہ و خادمہ  
و مغنیہ سی ایدی . افندیسنک قارشوسندہ تغنی ایلہ اوکو-  
دینی ہجویاندن طولایی دمی اهدار ایدلمشدی و لکن  
استیمان ایدمرک نائل صفح و امان اولمشدر .

قریبہ — دہ ابن خطاک کذلک جاریہ و مغنیہ سی  
و قرتناک رفیقہ سی اولمغلہ عین تہمتدن طولایی متہمہ  
ایدی . قتل ایدلدی .

ارنب — دہ خطاک آزادلدی و جاریہ سی  
ایدی . مہدرالدم اولہرق اولدیرلمشدر .

امسارہ — بنی ہاشمک آزادلیردن و ہاجیہ لردن

ایدی. حاطب بن بلتعنه مکتوبی مکّه ایصاله وساطت  
ایندیکی حالد روضه خاخده طویلهرق لندن مکتوب  
آتمشدی. بناء علیه مهدر الدم ایدی. بر روایتده  
یوم الفتحده حضرت علی الیه قتل ایدلمش دیکر روایتده  
کوره عفو بیوریلوب حضرت عمر زماننده «ابطح»  
نام محله اوستنه بر سواری آت سوردیکندن متأثراً  
فوت اولشدر.

ام سمر — دخی مهدر الدم اولهرق قتل ایدلمشدر.

\*\*\*

دمی اهدار ایدیلاان افراد معلوم و ماعداسی هر حالده  
امین ایدی. رؤساء قریشدن، خویطب بن عبدالعزی، نک  
بر محله مختلف بولندیغنی عتبه علیای رسالته عرض ایتمش  
اولان ابو ذر الغفاری حضرتلری، هدر دمی تصریح  
ایدلمش اولانلرک ماعداسنک امین اولدیغی حقنده الدیغی  
جواب عالی بی کیدوب خویطبه سویلمش خویطبه ده  
سرورندن حضور پر سرور رسالته کلهرک قبول اسلام  
ایتمشدی.

مکه مبارکه نک فتحی ارتق قطعاً تمام اولمشدی.  
فاتح البطحاء افندیمرک او اناده مکه معظمه ده مدت مکث  
واقامتی اون بش و دیکر روایتده اون طقوز کون قدر

زماندر بنی امیه دن « عتاب بن اسید » رضی الله عنه  
 حضر تلرینی ناسه نماز قیلدیرمق ایچون مکده والی  
 براقدی که مکیه برحبی اوله رق تعین اولنان والی اودر  
 بونک اجراء مأموریتی صد دنده کندوسنه خطاباً حضرت  
 پیغمبر اوج کره [ انالاق فقد استعماتک علی اهل الله ]  
 دیه بیورمشدر بونک اوزرینه عتاب، مسلمانلری جماعت  
 صلوته دوامه مجبورایتمک مقصدیله : [ والله لا اعلم متخلفاً  
 يتخلف عن الصلوة فی جماعة الا ضربت عنقه فانه  
 لا يتخلف عن الصلوة الا منافق ] دیه کوستردیکی شدت،  
 بعض ذواتی پیشگاه رسالتپناهی به بث شکوایه سوق ایتمکله  
 حقنده رسول الله صلی الله علیه وسلم : [ انی رأیت فیما یری  
 النائم کأن عتاب بن اسید اتی باب الجنة فاخذ بحلقة الباب  
 فقلقلها قلقلماً شديداً حتی فتح له فدخلها فاعز الله به الاسلام  
 فنصرته للمسلمین علی من یرید ظلماً ] دیه بیورمشدر .  
 روایتسه کوره اهل مکیه فقه وسنت سنییه پی  
 اوکرتمک اوزره معاذ بن جبلی عتاب ایله برلکده بو  
 دفعه براقمش دیکر قوللره کوره اقدیمز، حنین وهوازن  
 سفر لرندن مکیه مراجعتلرنده بر منوال مبسوط معلم  
 فقه وسنت اوله رق براقمشدر مشارالیه عتاب، فتح مکه کونی

قبول اسلام ایتش اولان اصحاب کرامدن هنوز یکرمی  
بر یاشنده برنوجوان ایدی شو وظیفهیه مقابل کندوسنه  
یومی بر درهم معاش تخصیص بیورلمشدی .

مناة — ساحل بحرده مشلل نام طاعده اوس و خزر ج  
قیله لرینک و دینداش لرینک مناة اسمنده بر صمنی وار  
ایدی . مشلل . ساحل بحرده بر طاعدرکه اندن قدید  
منزلنه اینیلور . سعد بن زید بن اشهل حضرتلری ، صنم  
مرقومک هدم و محاسنه مأمور بیورلدیغندن یکرمی  
سوارى عسکريله کیدوب هدم و محو ایلمشدر جناب  
سعدك هدم مناته مأموراً یوم حرکتی ، رمضان شریفك  
یکرمی دردنجی کونی ایدی .

\*\*\*

عزی — قریش ایله بنی کنانهك عزى اسمنده کی  
صمنی ده مکه مکرمهیه بر کیجه لك مسافده [نخله] نام  
محله ایدی . عزى ، قریش غمندنه اصنامك اعظمی  
ایدی خالد بن الولید رضی الله عنه حضرتلری ، اکا  
مأمور بیورماقله اوتوز نفر سوارى ایله کیتدی .  
عزی ، اوج باجاقلى برشی اوزرنده ایدی . باجاقلى  
قیروب یره دوشورد کدنصوکره اوستنده کی بنای ده

اوزرينه چو كديره رك عودت ايندى .  
 اوزمان حضرت رسول جليل عليه افضل التحية  
 والتبجيل افنديمز خالده :

[ برشى يابه مدك ] بيورديلر . خالده ، تكرار نخله يه  
 كيدوب كوردى كه عزانك خدمتجبارى عزايى طاغده  
 باشقه بر محله : [ يا عز خبليه ! يا عز عوريه ، ديه تعزیه  
 ايتكده ، بولنيورلر خالده ، عزايى تكرار قيراركن ايچنده  
 سياه و چيه لاق و صاچى طاغنيق برقارى چيقه رق هم  
 فرياد ايدر هم باشنه صاچنه طوپراق آتار اولدينى خالده  
 قاچغه باءلامغله :

يا عز كفرانك لاسبهانك  
 انى رأيت الله قداهانك

ديوب انى قيلنج ايله همان قتل ايتمشدى .  
 بوندن صوكره خالده ، واقع حالى مرض و اعلام  
 ايلديكى زمان رسول اكرم افنديمز ، قتل عزاده خالده  
 تمام موفقيتى تقدير و تصديق ضمننده : [ اوت او ،  
 عزى ايدى بلده كزده كنديسنه عبادت ايدملك املندن  
 ارتق مأيوس اولدى ] بيورمشلردر .

سواع — مکه مکرمه یه اوج میل مسافده هذیل  
 قبیلہ سنک برصمی ایدی انک هدمنه عمرو بن العاص  
 رضی اللہ عنہ مأمور بیورلغله واروب سواعی کسروا مح  
 ایتشد.

۸

### بعث خالد

فتحک تمامی اوزرینه حول الحرمده بولنان قبائلک  
 دعوتی صرہ سی کلش دیمک ایدی. بومناسبتله اطرافه بعض  
 مأمور لر کوندریلور ایکن خالد بن الولید رضی اللہ عنده  
 [یللم] ناحیه سنده بنی جذیمه یه مأموراً شهر شوالده ارسال  
 بیورلدی. خالدک اوزمان معیتندہ مهاجرین و انصار  
 کرام ایله بنی سلیمدن مرکب اوچوز الی نفر عسکرده  
 وار ایدی.

مکه معظمه یه بر منزل مسافده بولنان ناحیه مذکورده یه  
 واردی اهالی بنی جذیمه احتیاطاً سلاحلی اولدقلری  
 حالده استقبال ایتدیلر.

خالد، افلرک کیملر اولدقلرینی صورددی. قبیلہ خاقی

۸

جوابده :



— « بز، مسلمانلرز، نماز قیلرز. محمد [علیه الصلوٰۃ  
و السلام] ک نبوتی تصدیق ایدرز. مسجدلر یابدق اذان  
واقامت اوقورز »

دیدیلر . خالد ، نیچون سـلاحلی کلدکلرینی ده  
سؤال ایتدی : « عربدن بیضنک بزہ عداوتی واردر.  
اوزاقدن کورونجه قورقدق که سز انلردن  
اوله سکر بناءً علیه احتیاط اوله رق سلاحلنمشیدک ،  
دیدکلرینی خالد ، ایشـتدیکی حـالده سـوزلرینه اعتبار  
و التفات ایتیموب ترک سلاح ایتلرینی امر و تکلیف  
ایتدی اهالی مرقومه ده امر واقعہ قارشـی تماماً اطاعت  
کوسترمش ایدیلر . بونـکله برابر حضرت خالدک دیت  
ایجاب ایدہ جک درجہ ده کوستردیکی شدت ، مسموع  
عالی نبوی بیورلدیغی اندہ رسول خدا افندیمر تأسف  
ایدوب حضرت علی یی بز چـوق اموال ایلہ درحال  
اورایہ کوندرمش و قبیلہ خلعتنک اجراء مواساتنه بذل  
عنايت بیورمشدر »

## غزوة حنین و هوازن

اهل اسلامك مكة مكرمه بي فتح ايتمی ، قریشدن  
 بك چوق كيمسه لك سبب اسلاملى اولمشدر . مكه ده  
 اول مسلمان و اسلام طرفدارى آزاكن عقيب فتحده  
 ايمان ايتمامشلى آزالدى . دين اسلام بر مرتبه دها ميدان  
 الهرق قریش طرفدارى بولنان قبائل وعشاثر ، مسلمانلره  
 متوجه اولدى . فقط عربك اك بيوك قبائلندن  
 [هوازن] قبيله سى ، مسلمانلرك و مسلمانلغلك توسع  
 اشتهارينى منع ايتك اوزره [محمد فن حربيه آشنا اولميان  
 مكه ليللى بوزمش ايسه بزي ده انلره مى قياس ايدى بور]  
 ديه عتو و استكبار كوستره رك سببسالاركتيبه انبياء عليه  
 افضل الصلوة و اكمل التحايا افنديمزله حرب و قتاله  
 بالاتفاق وادى [حنين] ده جمع و تحشيد جيوشه مبادرت  
 ايتديلركه بوخصوصده مرضعه رسالتپناهى حليمه سعديه نك  
 قبيله سى بنى سعد بن بكر قبيله سيله بنى هلال ، بنى چشم ،  
 بنى نضر قبائلى ده ثقيف و هوازن ايله متفق و جميله سى  
 هوازن رئيسى [مالك بن عوف النضرى] نك قومانداسى

التندہ مجتمع ایدی . یالکز ھوازندن بنی کعب و بنی  
کلاب، بو مسئلہ دہ بیطرف بولندیلر .

حنین، ذی المجاز قربندہ بر وادینک یاخود بر  
صویک نامیدر مکہ ایله طائف ارمہ سندنہ و طائفہ دہا  
قربدر .

بنی ثقیفک رئیس [کنانہ بن عبد یلیل] یاخود  
[اسود بن قازب] ایدی شو صورتلہ اولان اجتماع  
عسا کردن ھوازن اردوسی، یکرمی بینک نفرلی براردو  
اولدی . ھوازنک تشبثات واقعہ سی مسموع عالی بیوریلوب  
درحال افندیمز دخی تدارکہ مشغول اولدی . حتی رؤساء  
مشرکین قریشدن صفوان بن امیہ دن عاریت سلاح  
الندی .

صفوان، کندیسندن سلاح استعارہ ایدلدیکی زمان  
صوردی:

— «غصبامی یا محمد!»

رسول اکرم صلی اللہ علیہ وسلم افندیمز:

— «خیر غصبا دکل بلکه سکا اعادہ ایدیلنجہ بدکین

تلف اولور ایسہ تضمین اولتمق شرطیلہ عاریتہ ایسترم»  
بیورملریلہ صفوان [اولیلہ ایسہ بأس یوق] دیہرک

اوج يوز عدد زره و یرمش و نوفل بن حارث بن  
عبدالمطلب دخی وجه مذکور اوزره اوج عدد مزراق  
اعاره ایتشدی .

سلطان قلمرو رسالت افندیمز تدارکاتی اتمام بیورنجه  
مکده عتاب بن اسید رضی الله تعالی عنه حضرت تلرینی  
والی تعیین ایتدی . و مکة اهل اسلامنه احکام دینی تعلیمه  
مأموراً معاذ بن جبل رضی الله عنه حضرت تلرینی ده عتاب ایله  
برلکده براغهرق شوالک التنجی و یایدنجی جمعه ایرتسی  
کونی دلیل اسملی استر هایونلرینه راکب و « سفیده ،  
ذاة الفضول » اسملرنده بری بری اوستنده ایکی درعی  
لابس اولدقلری حالد حنینه متوجهاً حرکت بنوردیلر .  
اشبو زرهلر ، حضرت داود علیه السلامک جالوتی قتل  
ایلدیکی صرمده لابس اولدقلری درع ایدوکی مرویدر .  
معیت جهانپناهیلرنده اون ایکی بیک نفر وار ایدی .  
عسکرك بیک نفری مهاجرین کرام ، درت بیک نفری  
انصار کرام ، بشیکی جهینه و مزینه . بنی سلیم ، بنی اسلم ،  
غفار ، اشجع قبیلهلرندن و ایکی بیکی ده اهل مکة و مؤلفة  
القلوب طاقی ایدی که ابو سفیان بن حرب و اوغللری  
یزید ایله معاویه ، خویطب بن عبد العزی و ابو جهلمک

برادری حارث بن هشام، سهیل بن عمرو، اشراف مؤلفه  
القلوبك سر آمدانندن ایدیلر. برلکده سکسان نفرده مشرک  
اولوب اچلرندن بری صفوان بن امیه ایدی .

\*

ابوواقدلیشی ، نقل ایدر دیرکه :

حنین سفرنده معیت سنیه رسالتپناهیده ایدم. یولده  
یشیل یاپراقلی کوزل و بیوک بر اغاچه تصادف ایتدک .  
اچاک طراوت ونضارتی نظر رغبت واستحسانمزی  
جلب ایتدی زمان کفر و جاهلیته قریب العهد اولدیغمزک  
سوقبله اولمی ایدی که کفار قریش وغیرلرینک سنده  
بر کون محل تفرج و تنزه اولق اوزره « ذاة الانواط »  
اسملى بویله جسیم براغاجلری بولندیغنی تخطر ایدرک:  
— « یارسول الله ! بو اغاجی « ذاة الانواط » اتخاذ  
ایتمکه بزه مساعده ایت نته کیم قریشک ذاة الانواطلری  
اولدیغنی کبی بزده کلوب بونده اکلنیرز ،

دیدک. قریش ، ذاة الانواطلرینه سنده بر کون  
کیدرلر اغاجک دالترینه سلاجلرینی آصارلر. دیننده  
قربان کسوب او کون ای بر ذوق وتفرج ایدرلردی  
مکر بو تکلیفمز ، مکروه کلدی . افسدیمز ، حیرت  
واستکراه ایله :

— «الله اکبر والله سزبکا برشی سویلدیگز که حضرت  
 موسی [علیه السلام] قومی بومثللو برسوز سویلمش لردی  
 [اجعل لنا الهاکمالهم آلهة] دیوب موسی دخی انلره:  
 «تحقیقاسز، احمق بر طائفه سکز، جوانی و پر مشدی،  
 بیور مقله سوزیمزدن ناشی رسول اکرم صلی الله علیه  
 و سلمه قارشی نادم و محجوب اوله رق توبه و استغفار  
 ایلدک.



بر کیجه سحر وقتی ایدی افندیمز، عسکرینی تعیه  
 و ترتیب بیوردی فرقه مهاجرین ایچون مرتب ایکی  
 لوانک برینی عمر الفاروق رضی الله عنه دیکرینی حضرت  
 علی المرتضایه، اوسیلرک لواسنی اسید بن حضیره خزر -  
 جیلرک لواسنی ده سعد بن عبادیه و یردی .

بنی سلیم قبیلله سیله مکه عسکری، مقدمة الجيش  
 [چرخه جی] تعیین اولمش و بونلره غازی نامدار حضرت  
 خالد بن الولید، قوماندان انتخاب بیورلمش ایدی .

اردوی همایون، مکمل و منتظم بر اردو ایدی. شو  
 انتظام و کثرته مبنی ایدی که جناب ابی بکر الصدیق رضی  
 الله تعالی عنه افندیمز، عسکر اسلامک انتظام و کثرته

نظر مسرتله باقهرق و اتحاد و انقياد اوزره حرکتلريني  
 ملاحظه ايدەرك: [بوعسکر، ارتق قلمتندن ناشی بوزولمز]  
 ديمش بولتمسيله سهواً صدور ايتمش اولان بوسوزك تضمن  
 ايتديكي خطاء غرور آمیزدن طولايي حقلرنده بر جزاء  
 سماوينك تحقق حلواني رسول اکرم، اکلايه رق طبع  
 عالی رسالته پناهیلرینه کراحت حاصل اولمش و فی الواقع  
 اردوی همایون بادی امرده بر هزیمت مهمه یه تصادف  
 ایتمشدی! . حتی انہزام اسلامه و انہزامک وقوعی حاکی  
 اولان: [و یوم حنین اذ اعجبتکم کثرتکم . . . . .]  
 آیت کریمه سنک معرض تویخده شرف نزولہ شو  
 سوزك تسبب ایتدیکی مرویدر .

کلام مذکورک یا کلشلفی بدیهی ایدی . زیرا کثرت  
 و قوت، کرچه اسباب مظفریت دندر لکن نصرت ده  
 حقک احسانیدر . اسباب لازمه حاضر ایدلد کد نصکره  
 نصرتی انجق طرف حق جل و علادن بکله ملیدر .

شو خصوصده ظهور ایدن خطایی تماماً تصحیح  
 ایتدیرمک و ناصر حقیقینک آنجق کنیدیسی اولدیغنی  
 بیلدیر مکده امته بر درس اعتبار و ابتصار اولق اوزره  
 جناب حق، اشبو غزاده مسلمینه ابتدا هزیمت صورتی

کوستروب عقینده عنایت الهیه سی اوله رق برده مظفریت  
عظیمه احسان بیوره شدرد ! .

دشمن اردوسنک قوماندانی مالک بن عوف ،  
محافظه مال و عیال غیرتیه حرب ایتدیرمک کبی بر  
ملاحظه بناء عسکرینی بالجمله نسوان و صبیان و حیواناتی  
ایله برلکده معرکه یه کتیره رک : [ جمله کز یکوجود  
اولدیغکز حالد هجوم ایده جکسکز ] دیه امر ایتشدی .  
اردوی هایون ، شوالک اونجی و دیگر روایتیه  
کوره اون برنجی کوفی اقشامی حنینه مواصلت ایتمکه  
دشمن طرفدن کلان جاسوسک مشهوداتی حقننده کی  
افاداتی هوازن عسکرنده خوف و خاجانی موجب  
اوله رق برخیلی مقداری طاغیلش و افندیمنک تجسمه  
مأمور آکوندردیکی « عبدالله ابن ابی حدرده » دشمنک نسوان  
و صبیان و حیوانات برابر اولدیغنی مرض و اعلام  
ایدرکن افندیمنز ، تبسم ایله : [ ان شاء الله انلر ،  
یارین هپ مسلمانلره غنیمت اوله جق ] دیه تبشیر  
بیوردی .

وادی حنینه کیدیله جک یول طار اولدیغندن  
عسکر مختلف یوللردن فرقه فرقه ایبریلوب یورودی .



طليعه به مأمور حضرت خالد بن الوليد ، بی محابا  
 سکر دواب کیدرکن بوصولردن دشمن ، بردنبره بایره رک  
 اوزرینه یغمورکبی اوق یاغديرهغه باشلامقله طليعه نك  
 بر قسم مهمی بولنان بنی سلیم ، بوزولیویردی . خالد  
 دخی او آنده اوق ایله یاره لئوب مکه عسکری هزیمتده  
 بنی سلیمه برابر وپیرو اولدی ، طليعه نك شو حالی  
 کتیبه نك بتون اقسام وشعبات سائره سنه بر لحظه ظرفنده  
 سرایت ایدرک قوجه اردو ، طاغیلدی مرکز میدان  
 محاربه ده یالکز فخر کائنات افندیمر ، نزد هامونلرنده  
 عم عالیری عباس ، فضل بن عباس عمزاده لری ابو  
 سفیان بن حارث بن عبدالمطلب . ابو بکر الصديق ،  
 عمر ، علی ، اسامه بن زید ، عبدالله بن مسعود  
 قالمشردی .

امر ایمانده ضعفی بولنان مکه لیلرک و علی الخصوص  
 مؤلفه القلوب طاقنک افکاری در حال بوزولمشدی ! .  
 حتی ابوسفیان بن حرب ، اسلامک او قورقونج بوز -  
 غولانی ائناده مکه لیلردن بری ایله سویلشور ایکن :  
 [بوهزیمتک دکره قدر ارقه سی الله ماز] دیمشدی ! .  
 صفوان بن امیه نك انابر قرنداشی کله دخی ،

اصحاب كرامك موفقيات متابعه سنده كي حالي باشقه  
 درلو اكلامقده اولديغني بللي ايدرك بر وضع  
 سخره آيز ايله : [ بوكون سحر بوزولدي ] ديمش و  
 صفوان ، اني رد و تقبيح صره سنده : [ صوص الله  
 آغزيني ييرتسون ! بكا هوازندن بري حاكم اولمقدن  
 قريشك حكومتى دها خيرايدر ] ديه كلدن يي تكدير  
 ايتمشدى .



سلطان هر دو جهان افنديمز ، شجاعتمده بهيمتا ايدى .  
 اك طار ، اك خطرناك زمانلرده اصلا تلاش و فتور  
 كوسترمزدى .

شجاعتملى حقنده جناب على المرتضى دير ايدى كه :  
 محاربه شدت بولوبده باشمز صيقيلديغني وقت هپمز  
 حول رسول الله صيغفور ايدك .

ايشته بود دفعه كي هزيمتمده بتون اردو بوزولديغني حالده  
 او حضرت عاليهت ، قطعاً فتور بيله كوسترميهرك دللى  
 كمالي هيت و صولاته سمت اعدايه طوغرى سوقه چا -  
 ايشير و كنديسنك بويله بر محله خوف و هراس سبيله  
 صاووشه جق همان بر شخص عادى اوليوب بر نجي حق

صادق الوعد الامین اولدیغنی و علی العموم بیانات و  
تبلیغاتنک برکون اولوب ده برر بررحیز حصوله کلدیکنک  
کوروله جکنی و دین مبینک تعمم و اعتلاسی موعود  
و محقق بولندیغنی تکرار صدندده : [ انا انبی لا کذب  
انا ابن عبد المطاب ] دیه طرف مخالفی تهدید ایدردی !  
انجق ابوسفیان بن حارث ، دلدلک یولارندن ، عباس  
و عبدالله بن مسعود حضراتی ده رکاب هایوندن طوتوب  
صولندن منع ایدرلردی .

مسلمانلر ، هزیمتی تمام کورد کدنصوکره بوزغون  
عسکری ینه میدان حرب وقتا له کتیر مک ایچون معیتندده کی  
اصحاب کزینی برابر صاغ طرفه چکیلرک :

— « ای ناس ! کلیکز . بن ، رسول الله . محمد

بن عبد الله »

دیه چاغیردی و ندا ایتدی عباسه امر ایتدی .  
عباس کور سسلی بر ذات ایدی . در حال صوت  
جهیر ایله :

— « یا معاشر الانصار ! یا اصحاب الشجرة و یا

اصحاب سورة البقرة ! »

دیه ندا ایتدی . انک اوزرینه عسکر اسلام ،

طرف طرف [یا لیلیک یا لیلیک] صدالریله جمله میدان  
 محاربهیه و پایگاه عالی نبوته عودت ایتمشلردر .  
 جناب حق ، عسکر اسلامه ارتق کمال صبر و سکینه  
 احسان بیورمش و شاهد فتح و ظفر اردوی هایونه  
 رهبر اولمشدی . هوازن عسکری هجوم ایدرکن حضرت  
 علی کرم الله وجهه بالمقابله انلرک علمدارینی قتل ایتدیکندن  
 او ائساده نبی اکرم صلی الله علیه و سلم : [الآن حمی  
 الوطیس = شمدی فرون قیزدی] بیورملریله برابر  
 را کب اولدقلری دلدله : [البدی البدی] دیدی . دلدله  
 درحال قارننی یره و یردی . افندیمز ، دلدلک اوستندمه  
 اوتوردینی حالدله الیله یردن بر آووج طوپراق و یاخود  
 اوفق طاشلر آلدی . و : [اللهم انجز لی ما وعدتني] دعاسنی  
 او قودی و صوکره : [شاهت الوجوه] دیه آووجنده کی طوپراغی  
 سمت اعدایه طوغری آتدی ! .

معجز آندندرکه آتیلان بر آووج قوم یاخود طوپراق  
 قتالدن منع و اشغال ایدمچک بر مقدارده اولدینی  
 حالدله کفاردن هر برینک کوزینه . بورون دلیکارینه  
 کیره رک انلری فوراً هزیمته اوغرا تمشدر .

دشمن ، هول جان ایله مال و عیالی براغوب ارتق فرار

ایده یورلردی. اهل ا-لام ده انلری بالتعقیب کیمنی قتل کیمنی  
اسیر ایدردی. حق ایشته شو آنده ایدی که اغنیاء انصار  
کرامدن و خزر جیلردن ابو طلحه رضی الله تعالی عنه  
حضرتلری دشمن عسکرندن یکرمی نفری قتل ایتشدرد.

•  
\* \*

سوء قصد — عباسک اصحاب کرامی نزد رسالتده  
نباته دعوت ایتزدن آز مقدم ایدی. «شیه بن عثمان  
ابن ابی طلحه» مضمهر فاسدینی حربک هنکام بحراننده  
اجرا ایتک اوزره افندیمزک نزد همایونلرینه صوقولمغه  
باشلادی. صاغ طرفندن کلدی، حضرت عباسی انده  
بوله رق جانب یسارینه رجوع ایتدی. صوانده ده ابو  
سفیان بن الحارث، قائم ایدی. جانب یسار و یمینندن  
انته از فرصت ممکن اوله مدیغنی اکلاینجه خلف ظهر  
همایونندن یاقلاشدی. قلنجی یتشدیره جک بره نزله کلدیکی  
و قلنجی قالدیردینی بر دقیقه ده کوزینک اوکنده ییلدیرم  
آتشی کی برشی پارلادی. شو آتش، خوف و خاجاتی  
موجب اوله رق شیه کیری به طوفری پوسه کوررکن  
افندیمز، التفات بیوروب ماجرایه اطلاع لرینی بللی  
ایتمکسزین: [تعال یا شیه] دیه چاغیردی. شیه نزد

هيا بونه كيتدى . افسدیمز رفق و ملايمتله شيبه نك  
 صدرينى : [ اللهم اعذه من الشيطان ] ديه مس و مسح  
 بيوردى . برکت مسح على ايله نبى اکرم صلى الله تعالى  
 عليه و سلم بالاخره محبوب قلبى اولمش ايدوكنى  
 حکايه صددنده شيبه : [ والله سيد الانبياء ، روحمدن  
 قولاغمدن ، کوزومدن دها زياده سوكيلم اولمشدر ] دير  
 ايدى .

روايته کوره شو غزوهده . اتى بيك نفر اسير ،  
 يکرمى درتتيك رأس دوه ، قرق بيکدن زياده قويون ،  
 قرق بيك قيه کמוש مال غنيمت اوله رق اهل اسلام  
 انه کچمشدر . دشمندن يتمش قدر مقتول بولنديقى حاله  
 اهل اسلامدن يالکيز درت نفر شهيد اولمشدر که برى  
 «ايمن بن ام ايمن» رضى الله عنهما حضر تليدر .

عقيب غزوهده خالد بن الوليدك بولتمسسه امر  
 نبوى شرفصادر اوله رق لدى التحرى هر طرفى ياره لى  
 اولديقى حاله بولتمش و حضور بر نور رسالته کتيرلمشدر .  
 حضرت نبى اکرم صلى الله عليه و سلم ، دهان  
 شريفلرينك آب حياتندن سورمکله جريحه لر درحال  
 کسب التيام ايتمشدر .

طرفینک ابتداء تلاقیسندہ حکمت اہل اسلامدہ  
یوز کویستن هزیمتک خبری مکہ یه واردینی زمان بعض  
اہل مکہ: « محمد [ علیہ الصلوٰۃ و السلام ] اولمش محمد-  
یلردہ منہزم و پریشان اولمش! بوندن صوکرہ قوم عرب،  
بابالرینک دینہ دونرلر، دیہ اظہار ممنونیت ایلمش بونلرہ  
قارشئ مکہ مکرمہ والی وقائمقامی عتاب بن اسید رضی  
اللہ عنہ: « محمد [ علیہ الصلوٰۃ و السلام ] اولمش ایسہ  
شریعتی باقی و مولاسی حی لایموتدر، دیمشدی .

۹۵

### — غزوۂ اوطاس —

حنین وادیسندن هوازن و ثقیف اردوسی واقبح  
هزیمتلہ منہزم اولہرق قبائلدن ہربری برطرفہ طاغلیمشدی  
شونلردن الی یوز قدر بر طائفہ [ درید بن الصمہ ] نک  
معیتندہ اوطاس نام محلہ چکلمشدی کہ اجتماعلری اہل  
اسلام حقندہ بر فکر خیرہ مبنی اولمدینی جہتلہ انلری  
تکیل و استیصال ایچون علیہلرینہ اصحاب کرامدن [ ابو  
عامر عبید بن سلیم الاشجری ] رضی اللہ تعالیٰ عنہ  
حضر تلری ، بر فرقہ عسکرلہ کوندولمشدر . فرقہ

مذکورده حضرت ابو عامرک برادر زاده سی ابو موسی  
الاشعری ایله زبیر بن العوام ، سلمه بن الاکوع رضوان  
الله علیهم اجمعین حضراتی ده وار ایدی .

ابو عامر ، حین مقاتله ده دریدک فرقه سنندن طقوز  
شخصی قتل ایتدی . اونجیسی میدان کبردیکی زمان  
ابو عامر ، انی علی الاصول دینه دعوت ایدرکن حریف ابو  
عامری رد ایتدی ابو عامر بونک قتلنه مانع مشروع  
قالمدیقنی بیان ضمنتده :

— « یارب شاهد اول ! »

دیدى او ده بالمقابله :

— « یارب شاهد اوله ! »

دیمش بولندیغندن ابو عامر ، انک شو سوزندن  
تعجب واستغراب ایدرکی اوله رق سببى تفکر زمیتند  
براز توقیف سیف ایتمکله فرصتدن بالاستفاده کافر مرقوم  
تخلیص جان ایدوب قلاچشدر .

بنی جشمندن حارنک « اوفی . علا ، نامنده ایکی  
اوغلنک آندقلری اوقلردن بری ابو عامری دیزندن  
اوره رق شهید ایتمشدر . رضی الله عنه

حضرت ابو عامرک وقوع شهادتندن سوکره انک



برادرزاده سی ابو موسی الاشعری حضر تلی قوماندان  
اولش وقاتلی دخی بالعتیب یتشوب قیلنج ایله اولدر مشدره  
قاتل ابو عامر ، درید بن الصمصمک اوغلی سلمه ،  
ایدوکی ده مرویدر .

فتح و ظفر ، جناب ابی موسی الاشعری حضر تلی بنک  
الده یوز کوستردی . بر چوق اسرا ایله بر خیلی اموال  
غنایم اله کچرک عسکر اسلام مسروراً عودت ایتدی .  
اسیرلرک اده سنده مرضعه رسالتیناهی و حلیمه بنت  
ابی ذؤیب ، ک قیزی و شیاء بنت الحارث ، دخی وار  
ایدی که رسول اکرم صلی الله علیه و سلمک رضاعاً  
همشیره لری دیمک ایدی .

شیاء ، حضور رسول الله کتورلدیکی زمان کندی  
عرض و تعریف ایتدیکندن افندیمز ، انی طانیوب مآثر  
اولش و مبارک کوزلرندن یاش گلشدی .

رداء شریفه لرینی یره سره رک شیمایی الک اوزرینه  
اوطور تندی . و حقیقده حرمت و رعایت کامله ابراز  
میوردی . حتی نزد نبویه معززاً قالمسینه بلده سننه  
اعاده سی بیننده تخیر ایدوب شیاء کندی بلده سنی اختیار  
ایتمکله افندیمز ، بر کوله و جاریه ایله ایکی دوه بر  
قویون دخی احسان ایدرک انی دیارینه کوندردی .

ابو عامر حضرت تلمی ، حالت موت و احتضارنده  
 ابو موسی الاشعری حضرت تلمینه وصیت ضمننده: [رسول  
 الله بشدن سلام ایت بنم ایچون استغفار ایتسون] ذیمشدی.  
 ابو موسی ، مدینه منورهیه کلدکدنصوکره عرض واعلام  
 کیفیت ایتدی. حضرت پیغمبرده درحال آبدست آلهرق  
 و مبارك اللزیمی هوایه زیاده قالدیرورق : [ اللهم اغفر  
 لعبید ابی عامر اللهم اجعله يوم القيامة فوق كثير من  
 خلقك من الناس ] دیه دعا ایتدی. شو دعائک عقیبنده  
 ابو موسی : « بنم ایچونده یارسول الله ! » دیه رجاده  
 بولدیغندن انک حقندهده تکرار اللری هواده اولدیغی  
 جالده : [ اللهم اغفر لعبد الله بن قیس ذنبه وادخله يوم  
 القيامة مدخلا كريماً ] بیورلدی .

حضرت شهنشاه اقلیم رسالت افندیز ،  
 فتح ام القرایه حرکت هایونلرندن از مقدم « ابوقناده »  
 رضی الله عنه حضرت تلمی سکن بوزنیفر عسکرله نجد طرفنه  
 کیتیمشدی . « اضم » نام محلهده [ عامر بن الاضبط ] .  
 تصادف اولندی . عامر بونلره سلام ویردی . سلام  
 تحیه مؤمن بناء علیه شعار اهل اسلام اولدیغی جهته

کند و سنک مسلمان بولندیقی کوزل اعلام و افهام  
ایتمشدی .

فقط معیت ابی قتاده ده کی عسکر کردن [ محلم یا خود  
محکم بن جثامه ] اسکی بر ماجرادن طولایی عامری  
اوراده اوقایله قتل ایدهرک دوه سیله اشیا سنی مال غنیمت  
دیه المشدرا که شو معامله ده کی چر کینلک بدیهی ایدی .  
بو مقوله معاملات و جنایاتک وقوع امثالندن اتی سی  
و تحذیر ایچون حق جل و علا حضرت تلی : [ ... و لا تقولوا  
لن القی الیکم السلام لست مؤمنأ ... ] آیت کریمه سنی  
انزال بیور مشدر .

ابو قتاده نك سفردن عودتسند اردوی هایون مکه  
اوزرینه یورومشدی اوده معیتله برابر مکه سمتنه  
یوللانهرق یتشمشلمر مکه نك فتحنده حاضر بولندقدنصوکره  
حنین غزاسنه دخی چیقمشلمر ایدی .

حضرت پیغمبر : وادی خنینه صلات ظهری ادا  
ایدوب بر اغاج کولکه سنه او طور مقله اصحاب کرام ده  
اطرافنده طور دیلر . ایشته اوساعتده غطفاندن فزاره  
قبیله سنک رئیس « عینه بن حصین » ، مقتول عامر بن  
الاضبطك قاتی طلب و دعوی ایتدی . اکا قارشی بنی  
تمیم شیخی « اقرع بن حابس » دخی قاتل محلمی مدافعه یه

باشلادی. کیفیت حضور رسالته دور و دراز بر محاکمہ بی  
تشکیل ایدہ رک اک صوکرہ ورنہ نک موافقتیلہ دیتہ قرار  
ویرلدی . و : [معلم کلسون دہ رسول اللہ انک ایچون  
استغفار ایتسون] دینلدی . معلم کلوب نبی اقدسک  
حضور ہایونلرنده اوطوردی . رسول اکرم، اکا :  
— « آدک ندر ؟ »

دیہ صـوردی . « معلم بن جثامہ » جوانی آلہرق  
صوکرہ ارہ لرندہ شو محاورہ جریان ایتدی :  
— « عامر بن الاضبط، اسلامنی سزمہ بللی ایتشکن  
انی قتل ایتدکمی ؟ »  
— « انک اسلامی اظهار ایتسی انجق اولومدن  
قورتلحق ایچون ایدی . »

— « یا سن قلبنی یاردکمی کہ طوغریمی یالانمی  
بیله سک »  
— « انک قابی بر قطمہ الحمد یارلسہ نہ اکلاشیلور؟ »  
— « یا قلبنی بیلمزسک لسانندہ اینانمزسک نہ  
یا بللی »

معلم ، صوکرہ درجہ دہ ملزم و بہوت قالمشدی .  
دیہ جک سوز بولہ مدی [یارسول اللہ! ہم ایچون استغفار  
ایت] دیدی . حضرت پیغمبر، انک او استدعاسنی رد

ایده رک : [ الله سنی عفو ایتسون ] بیورمغله محلم  
بوزوله رق و کوزلرندن یاش آقارق قالقبوب کیتدی  
ویدی کون صوکره کدرندن وفات ایتدی .

خربیدرکه محلمک جسدینی ارض قبول ایتیبوب  
طیشاری آتدی . تکرار دفن ایدلدیکی حالده ینه آتدی .  
کیفیت رسول الله صلی الله علیه وسلمه عرض اولندی .  
او زمان اقدیمز : [ ان الارض تقبل من هو شر من  
صاحبکم ولكن یرید الله ان یعظکم = ارض اندن یعنی  
محلمدن دها فنا کیمسه لری ده قبول ایدر اما جناب حق  
سزه وعظ ایتک ایستر ] بیوردیلر .

محلم ، بردها دفن ایدلدی وارض طشره آتمسون دیه  
امر تنبیه نبوی وجهله اوزرینه بیوک طاشلر وضع  
اولندی .

ذوالکفین — « عمر بن حمیمه ، نک او طوندن معمول  
و ذوالکفین اسمنده کی صنمک کسر و احسانه » طفیل  
بن عمرو الدوسی ، رضی الله عنه حضرتلری اعزام  
بیورلدی . شو خدمتک ایفا و اتمامندن صوکره کلوب  
طاشده اردوی هایونه التحاق ایتسی ده جمله وظائفندن  
ایدی . طفیل رضی الله عنه ، صنمی ییقبوب یوزینه آتش

دو کدیکندن ذوالکفین، یانمغه طو توشدینی ساعتده انی  
سیر ایدر و استخفاف و استحقار صد دنده :

یا ذا الکفین لست من عبادکا

میلادنا اقدم من میلادنا

انی حششت النصار فی فؤادکا

دیور ایدی. صوکره کندی قبیله سی بولنان بنی دوسدن  
معیتنه درت یوز نفر الهرق بر منطوق فرمان هایون  
رسالتهای اردوی هایونه طائفه یتشمشدر.

۱۱

### غزوة طائف

حنین بوزغونلرندن ثقیف قبیله سی طائفه عودتله  
بر سنه لك ذخیره لرینی یانلرینه آلهرق طائف قلعه سندم  
تحصن ایتدیلر !

حنین اردوسی قبائل متفقهدن مرکب بر اردو  
اولدینی حالده انک اقبیح هزیمتله وقوع انهمزامندن صوکره  
دها بیوک قوتی حائر بر دیگر اردونک اسلامه قارشی  
تحشید و تحشیدی امکائی قالمدیغنی و تنکیلرینه اهل  
اسلامک هر حالده حرکت ایده جکنی اکلامشیر و اکا  
مینی تدبیر تحفظی اولهرق قلعهیه قیامشیر ایدی !

هوازن رئيسی «مالك بن عوف» دخی متحصنلر  
مياننده ایدی .

رسول اکرم صلی الله تعالی علیه و سلم ،  
حنین اسراسیله اموال غنائمی جعرانده [\*] جمع  
ایتدیردی . محافظه سنه بر مقدار عسکرله عباد بن بشری  
مأمور تعیین بیوره رق کندیلری ، قوه موجوده ایله برلکده  
طائفه یورودی .

اوزمان امهات مؤمنیندن [زینب و ام سلمه] رضی  
الله عنهما حضرتلری ، معیت سنیده ایدیلر . مشار  
الیهمادن هر بری ایچون آیری چادر قورولش ایدی .  
ایکی چادرک ارسنده افسدیمز ، نماز قیلر ایدی که محل  
مذکورده «مسجد طائف» اسمنده بر مسجدک الآن  
موجودیتی مرویدر .

جناب خالد بن الولید رضی الله عنه ، مقدمه یه  
مأمور ایدی . یولده تصادف ایدیلان اسکی بر قبره اشارتله  
حضرت پیغمبر :

— «بو» ابورغالک قبریدر . اغاج بوداغی شکنده  
التوندن معمول بر شی ده مدفوندر .

[\*] جعرانه: مکه مکرمه یه اون قدر میل مسافده بر محلدر .

بیورمقله بعض اهل اسلام، محل مذ کوری قازوب  
غصن ذهبي چيقارمشدر.

اردوی هایون، سمرة الرطاحله مواصلت ایتدیکی  
ائتاده بنی لیث قبیله سندن برینی قتل ایتمش اولان قبیله  
بنی هذیلدن بر کیسه حقهده قصاص شرعی اجرا  
اولنمشدر.

سمرة الرعادن طائفه وارلدی . و قلعه درحال  
محاصره التمه الندی حضرت سلمان فارسی رضی الله  
عنک معرفتیه شو محاصرهده منجیق دخی استعمال  
اولنمشدی . اسلامده ابتدا منجیق قوللانیلان  
غزرا، شو غزرا و اول استعمال ایدیلان منجیقده بودر.  
ثقیف رئیس «عروه بن مسعود» ایله «غیلان بن  
مسلمه» اشبو وقعهده وثقیف میاننده دکل ایدیلر بونلر،  
مکه فتوحاتنک ختامنده اسلامه قارشى عربده مقاومته  
تاب وتوان قالمیه جغنی و اوحالده ابتدا طائف طرفلرینه  
حرکت ایدیله جگنی اولجه کشف ایتدکلرندن لدی الاقتضا  
محافظه بلده ایچون قوللانه جقلری منجیق صنعتی اوکرتمک  
اوزره [جرش] طرفنه کیتمشلردی .

مع مافیه ثقیف، صوک قوتی بازویه ویره رک قلعهدن  
مدافعه ایتمشلر چوق اوق آتمشلردر حتی دردی انصار



کرامدن اوله رق اون ایکی ذاتی شهید و بر خیلی کیمسه  
لری مجروح ایله مشلردی .

عبدالله بن امیه ، شو غزائک شهداسندن و عبدالله  
ابن ابی بکر الصدیق رضی الله عنهما حضرت تلری ده جریحه  
داراننددر . مشار الیهک یاره سی جوق زمان دوام ایتمش  
ونهایت پدر عالیلری حضرت صدیقک ایام خلافتنده جریحه  
مذکورمک تأثیری سبب فوتی اولمشدر .

ذوالکفین مصاحتک ختامیله طفیل الدوسی حضرت تلرینک  
طائفه عودتنده معیتنده غزایه کمش اولانلردن بر قاج کیمسه  
لرک وقوع شهادتی اوزرینه افندیز امر بیوروب ثقیفک  
باغلری قسماً قلع و احراق اولمش و اهالی محصوره  
طرفندن وقوعبولان رجا و استدعا یه بناء امر قلع  
و احراقدن بالاخره صرف نظر ایتدیرلمشدر .

منجینک ضرب مر میسیله قلعه دیوارنده حصوله کتوریلان  
رخنادن بعض اهل اسلام کیروب ایچریده سوری خرق  
ایتمک باشلامشلردی . محصورین ایسه قیزغین تیمور چو  
قلرینی رخنه دن طیشاری یه دورتمک صورتیله بالمداغه  
انلری اورادن منع و دفع ایتمشلردر .

بناء علیه بالکمز میدانده وقارشودن قلعه یه اوق ایله

محاربه دن باشقه چاره قلمدی. خالد بن الولید حاضر تلمی،  
 بر قاج دفعه میدانه کیدی. و مبارزه به تقیفدن آدم  
 ایستدی. رؤساء مشرکین و محصوریندن عبد یاللی:  
 — «سکا بورادن قارشو چقه حق آدم یوقدر .  
 بز ارزاقزی تو کدنجه به قدر مدافعه ده بولنه جغز صوکره  
 مجموعم بر دن هجوم ایدوب محو اولنجه به دکن حرب  
 ایده جگزر ،

جوانی و یردی .

محاصره نك شدتلی بر هنكامنده « عینه بن حصن  
 القزاری » اهل طائفله مکالمه ایچون طرف اشرف  
 رسالت پناهیدن بالاستیدان رخصت الهرق کیتدی.  
 انلره مأموریت و مأذونیتک بالطبع خلا فی اولدیفی  
 حالده :

— « تمسکوا بمکانکم ! واللہ لنجن اذل من العیید .  
 لو حدث به حادث لتجدن العرب عزاً و منة . فتمسکوا  
 بخصنکم ! و ایاکم و ان تعطوا ما بایدیکم . و لا یتکابر  
 علیکم قطع هذه الشجر ،

دیوب عودت ایستدی . مکالمه نك صورت جریانی استفسار  
 جددنده حضرت رسول الله . ا کا :

— « تقیفه نه سویلدک ؟ »

دیه موردی . عینه :

— « انلری دین اسلامه دعوت و نار جهنمدن  
تخذیر ایتدم کندولرینه جنت یولنه دلالتده بولندم .  
جوابی ویررکن افندیمز ، اولیابده قوه کاشفه  
نبوتلریله ادراک ایلدیکی ماجرای عینه نك یوزینه قارشى :  
— « یالان سویلدك . سن ، انلره شویله سویلدك ،  
بویله سویلدك »

دیه حرفیاً نقل ایتمکله عینه ، اعتراف و استغفاردن  
باشقه چاره قالمدیغی اکلایه رق مناسبتسزلکندن ناشی  
صوک درجده نادم و محجوب اولدیغی حالده :  
— « طوغری سویلدك یارسول الله ! توبه ایدرم »  
دیه بیلمشدی .

فتح مأمول دکلدی . محاصره ، اون سکیز و روایت  
کوره یکریمی کونلره کلشدی .  
ثقیف اهالیسنك کوله لرندن شو صروده اردوی  
اسلامه قاچانلرك آزاد ایدیله جکلری اعلان بیورلیدیغندن  
برروایت کوره اون ، دیگر روایت کوره یکریمی اوچ  
نفر ، قلعه دن پایگاه رسالتپناهی به فرار والتجا ایلمشدر

ایچلرندن اسملری معلوم و مضبوط اولانلر : [مضطجع  
، نفیع ، ازرق ، وردان ، یحنس النبال ، ابراهیم بن  
جابر ، بشار ، نافع ، نافع ] نامنده طقوز ذاتدر .

مضطجع — عامر بن معتبک کولهسی ایدی رسول  
الله صلی الله علیه وسلم انی « منبعث » اسمیه تسمیه  
و تلطیف بیورمشدر .

نفیع — طیب مشهور حارث بن کلدنک کولهسی  
ایدی . حین فرارنده قلعه دیوارندن بکره [مقره]  
استعمالیه اشاغی ایندیکندن « ابو بکره » کنیه سیله  
مکنی اولمشدر .

ازرق — بوده ابن کلدنک کولهسی و دهات  
هریدن حلیف بنی امیه مشهور «زیاد بن ابیه» ک والدهسی  
سمیه نک قوجهسی ایدی . اسلامی اوکرتنک اوزره  
رسول اکرم ، بونی خالد بن سعید بن العاصه ویرهشدر .

وردان — عبدالله بن ربیعنک کولهسی ایدی .

یحنس النبال — ابن مالک الثقفینک کولهسی ایدی .

ابراهیم — خرشة الثقفینک کولهسی ایدی .

بشار — عثمان بن عبداللهک کولهسی ایدی .

نافع — حارث بن کلدنک موالیسندن ایدی .

نافع — غیلان بن مسلمنک موالیسندن ایدی .

یونلر، مسلمان اولدقدن صوکره علملرلرده اصحابک  
طلب و دعوالری رد اولنه رق بالعکس آزاد ایدلکاری  
بیان یورلمشدر .

عثمان بن مظعونک زوجه سی «خوله بنت الحکم»  
طائف اغنیاسندن «بادیه بنت غیلان»ک یاخود «رفاعه  
بنت عقیل»ک خایاتی کندوسنه ویریله جکی وعد ایدیلر  
ایشه حصارک فتحنه چاره بوله جفتی سده نیه رسالتهاهی به  
عرض ایتدیردیکی خالدہ معروضات واقعہ مقرون قبول  
عالی اولہ مدیعتدن خوله، کیفیتی حضرت عمره سویلدی .  
جناب فاروق ، بالمراجعه طرف ذیشرف سیدالانام  
اگر میدن استیضاح ماده ایدوب بوسنه فتح طائفک میسر  
ومقدر اولدیغنی اکلا دی .

ایشته بو اراده ایدی که افسدیمز ، عودت عزم  
عالیسنده ایا وکنی عمر الفارونک وساطت و تصویله  
اعلان ایتدیردی . فتوحات یوز گوسترمکسزین عودت  
خصوصی ، بعض خزانہ آغیر کله رک موجب قیل و قال  
اولدی . افسدیمز فتحک شمدیلک میسر اولیه جفتی بیلدیکی  
حاده عسکری یهوده اتعاب ایتماک فکرنده ایدی .  
مع مافیه حس اولتان تأسفک دفعیله برابر حکمت

جماودتی عسکره علم الیقین اوله رق تلقین و اعلام ایچون  
ایرته سی صباح شدتله قتال قومانداسی و یردی . وقوع  
بولان محاربه ده ایسه بر قاج نفر اهل اسلامک یاره لی  
قالسندن باشقه فائده کورلمدیکندن ینسه عودت اعلان  
بیورلدی .

بو دفعه عسکر ، ممنون و محظوظ ایدی . اردو  
خلقنک بو درلو حرکات عامیانه سنه قارشی افندیمز ،  
دبسم بیوردیلر .

اشبو محاربه ده ابوسفیان بن الحارث بن عبدالمطلبک  
بر کوزی اوق ایله چیقارلمشدر . حضرت نبی اکرم  
اکا :

— « یا ابا سفیان ! هانکیستی دیلرسک ؟ دعا ایدیم ده  
گوزوکمی یرینه کلسون ؟ یا خود دیلر ایسه ک الله تعالی  
سکا جنتده بر کوز ویرسون .  
بیوردی . ابوسفیان ده :

— « یا رسول الله ! ایسترم که جنتده ویرسون .  
دیوب آوو جنده کی کوزینی یره آتمشدر . مشارالیه ابو  
سفیان ، مؤخرأ وقعه یرموکده شهید اولمشدر .  
اهل اسلام ، ثقیف علیه دعا ایتمستی رسول اکرمه

عرض استديار . نبي مختار افنديز بالفكس انلره اسلام  
وهدايتله دما ايتشدرد .

\*\*\*

تقسيم غنائم — اردوي همايون ، ذى القعدة نك  
بشنجى كيجه سى جمرانه يه كلدى . اموال غنيمت . انده  
تقسيم ايدلدى . حين تقسيمده افنديز غنيمتى يالكىز  
اهل اسلامه حصر وتخصيص ايتيوب قلوبك دين اسلامه  
جلب وتاليفي ايجون « ابوسفیان بن حرب » واوللرى  
« يزيد و معاوية » خويطب بن عبدالعزى ، عكرمه ابن  
ابى جهل ، و برادري حارث بن هشام ، سهيل بن  
عمرو ، حكيم بن حزام ، حارث بن حارث بن كلده ، علاه  
بن حارثة التقي ، عينه بن حصين الفزارى ، صفوان بن  
اميه ، اقرع بن حابس ، مالك بن عوف النضرى ، قيس  
بن عدى ، يه يوزر رأس دوه ايله برر مقدارده كموش  
احسان بيوردى بونلردن كيمى مكا اشرافدن كيمى قبائل سائر  
رؤسا ـ نندن مؤلفة القلوب كيمى ده هنوز مشرك ايدى ! .  
حقلرنده شوصورتله لطف على ابدال اولنه رق كوكلورى  
آلتشدرد .

مخرمه بن نوفل الزهرى همير بن وهب الجمحى ،  
هشام بن عمرو العامرى ده ايكنجى درجه ده اشرافدن

بولملرینه مبنی کندولرینه قرقر دوه ایله برر مقدار  
 کموش و سعد بن ربوع مخزومی به الی دوه ویرلدی.  
 حضرت پیغمبرک ابراز بیوردقلری جود و سخا  
 پیمبرانه سی، اشراف و رؤساء عربی حیرتده برافشدی.  
 حتی حین تقسیمده اک اعلا جنسندن یوز قدر دوه نك  
 بر وادیده طوپلانمش طوردیغنی صفوان بن امیه کوره رک  
 ایستکنی بللی ایدمک قدر صیق صیق باقدقدن صوکره.  
 — نه کوزل دوه لر در —

دیملکه رسول اکرم :

— « اویله ایسه انلر سنک اولسون »

دیه دوه لرلی اکا بخش و احسان بیورمشدر!  
 صفوان ، هنوز مسلمان دکل ایدی حین فتحده  
 قبول اسلام ایچون بالاستمدطا ، مکده درت ماه مهلت  
 المشکن بومرتبه جود و سخا انجق خصلت رسل و انبیاء  
 اولدیغنی : [ماطابت نفس احد بمثل هذا الا نفس نبی]  
 دیه اعتراف ایدمک ارتق تمام طیب نفس ایله مسلمان  
 اولمشدر .

اقرع بن حابس ایله عینسه بن حصن الفزاری ،  
 قریشدن دکل ایدیلر . ولکن رؤسادن بولملریله یوزر



دوه احسان بيوريله رق اشراف قريشك برنجي درجه سنده  
عد و اعتبار ايدلدیلر . بونلره يوزر دوه ويرلديكي حالده  
عباس بن مرداس اسلمی به قرق و ديكر روايته كوره  
انجق درت دوه ويرلديكندن عباس ، كوجنه رك :

اتجعل نهى و نهى العيب

بين عينة و الا قرع

و ما كان حصن ولا حابس

يفوقان مرداس في المجمع

وما كنت دون امرى منها

و من تضع اليوم لا يرفع

ديه صورت شاعرانده اعلان تأسفه باشلادی . افنديمز ،  
اكا قارشى . [اقتعوا غنى لسانه] بيورمه قله حضرت صديق ،  
عباسى دوه طوقا دینه كتوروب حصه سنى يوز رأس دوه به  
ابلاغ ايتدى عباس ، ارتق ممنون و مطيب اولمشدى .  
بناء عليه عرض شكران ضمننده پيشگاه رسالتپناهى به  
كلى رسول الله صلى الله عليه وسلم اكا :

— « يا عباس ! سن بنم حقمده شعرمى سويلدك ؟ »

ديه سؤال ايتدى . عباس ، اعتذاره ابتدار ايدهر ك جواب  
ويردى :

— « يا رسول الله ! تحقيقا بنم شعرم ديلمك او جنده »

قرنجه کبی قہر دار طورور و قرنجه کبی دیلمک او جنی  
ایصیریر سویلیمکدن باشقه چاره سنی بوله نم اختیار المده دکل ،  
افندیمز ، تبسم ایدم رک :

— « اویله در قوم عرب ، شعر سویلیمدکجه طورره من  
نته کم دوه باغیر مدقجه اولمز »

بیوردی . حالبوکه انصار کرامه دیگر لری قدر حصه  
ویرلمدیکندن بنی عمرو بن عوف منافق لرندن « معتب بن  
قشیر » بر طاقم قیل و قاله جسارت ایتشدی .

معتبک شو کفت و کوسی اصحاب کرامدن حضرت  
عبدالله بن مسعود واسطه سیله مسموع عالی اولدی .  
مشار الیه ابن مسعود حضرت لری دیر ایدی : انصار دن  
برینک شو تقسیمده عدالت اجرا اولمندی وجه الله ده  
قصد ایدلمدی دیمسی اوزرینه کلدیم انک او سوزینی  
افندیمزک قولاغنه کیزلیجه سویلیم . شدتله غضب ایتدیلر  
و غضب وانفعال لرندن وجه پاک تابنا کلری قیزارمق :  
[رحم الله موسی لقد اودی باکثر من هذا فصیر] بیوردی  
بن ده کاشکی سویلیمیه ایدم دیدم .

سعد بن عبادہ رضی الله عنه دخی قیل و قال انصاری  
عرض عتبه علیا ایتشدی افندیمز ، اکا :  
— « یاسعد ! سن بومسئله ده نه حالده سک ؟ »

دیه صورت و قلباً طرفدار انصار اولدینی جوابی  
 سعددن المسی اوزرینه انصار کرامی خیمه سعادتلرینه  
 جلب و جمع ایتدیردی. خیمه مذکورده سختیادن معموله  
 ایدی. صوکره خطبه به آغاز ایله خدایه حمد و ثنا ایلدی و :-  
 « سزدن صدور ایتدیکی بکا واصل اولان او

لاقر دیلر نه ایدی . سز او یله برشی سویلدیکزمی؟ »

دیه صورت و قلباً طرفدار انصارک ایتدین بیکاری :

« عقل و اذعان صاحب لریمیز یار رسول الله ! برشی  
 سویلمدیلر و لکن کنج لری : [ الله تعالی صوچنی عفو  
 ایتسون قریشه اعطا ایدرده بزی ترک ایدر حاله و که  
 قلند جلریمزد قائلر هنوز طاملا مقده ] دیدیلر «  
 جوابی ویردی . تقسیمات واقعه علیهنده بعض انصارک  
 شو تفوهاتی موجب انفعال عالی اوله رق کندولرینه تنبیه  
 و اخطار صد دنده رسالت پناه افندیمز ، کندی وجود پرسود  
 همایونلری سبیلله جناب حقک انصار کرامه احسان  
 بیوردینی نعم متنوعه بی تعداد و احوال انصارک ضالالتدن  
 هدایت ، اختلافدن ائتلافه فقر و عیالدن غناء و سعه حاله  
 تبدله محضا وجود مسعود همایونلری سبب ایدوکنی بسط  
 و ایراد ایله :

— « یامعشر الانصار ! قریش، جاهلیت و مصیبتدن  
 دها یکی قور تلمش ضعیف الاعتقاد مسلمانلردن بن ،  
 انلرک جبر خاطرلری و دینه تألیف قلوبی ایچون کندولرینه  
 زیاده جه حصه ویردم انلر، دوه، قویون آلوب مملکتلرینه  
 کیده جککر سزده رسول اللهی الوب کنسدی دیاریکزه  
 کیتمه راضی دکلیمکیز ؟ اکر هجرت اولمسیدی انصاردن  
 اولور ایدم . اکر ناس بر وادی یه انصارده وادی  
 آخره سلوک ایتسeler بن انصارک اولدینی وادی یه کیدر  
 ایدم .

بیوردیلر . انصار کرامده راضی و خوشنود و الوفات  
 عالیدن ممنون و متشکر اولدیلر . انک اوزرینه رسول  
 اکرم صلی الله علیه وسلم ، مبارک الارینی قالدیروب  
 خاصه انصار و انلرک اولاد و احفادی حقنده : [ اللهم  
 ارحم الانصار و ابناء الانصار ] دیه خیر و مرحمتله دعا  
 ایتشد .

.\*.\*

وفود هوازیه — تقسیم غنایمک اثناء ختامنده هوازن  
 اشراقدن طقوز و دیگر روایته کوره اون درت ذات ،  
 جعرا نهده حضور رسالتپناهی یه کلوب قبول دیه اسلام  
 و قبیلهلرینک مسلمان اولدقارینی عرض و اعلام ایتدیلر .

اسیر اولان اولاد و ازواج لرینک طرفلرینه رد و اعاده سنک  
طایب صد دنده :

— « یارسول الله ! لطف و کرم عمیمکزدن رجا  
و امید ایدرز که اولاد و ازواج و اموال لریمزی بزم  
احسان بیوره سکنز اسری ایچنده سنک رضا عاً عمته -  
لرک و خاله لرک بولندیفی کبی طفولیتک هنکاهنده سنی  
حضانه سنده حفظ و تربیه ایتمش، سکا خدمت لر و کفالت لر  
ایلمش قادین لر وارد ر بزم، ابی شمر الغسانی ، نعمان بن  
المنذر کبی . لویکه بو حضاتی ایفا ایتمش اولسیدک و سکا  
اولان انتساب و اختصاص مز انلرله اولمش اولسیدی  
حقم زده سندن شم دی مأمول ایتدی کمز شو عاطفتی  
انلردن امید ایدر ایدک سن ایسه جمله مکفول لرک اکر -  
میسک »

دیه نیاز مند عاطفت اولدیلر .

ذوات مذکور ه نک ایچنده « ابورقاء زهیر بن صرد  
سعدی ، دخی وار ایدی . معرض نیاز و استعطف افده :

امین علینا رسول الله فی کرم

فانک المرء نرجوه و نتنظر

امین علی بیضة قدما قها القدر

مشتت شملها فی دهرها خبر

امنن على نسوة قد كنت يرضعها  
اذفوك تملأوه من محضها الدرر

يبتلرني سويلدى. رسول اكرم :

— « بن، سزى كلير ظنيله تقسيم غنيمتى بو قدر  
زمان تاخير ايتدم سزى كچى كلديكز كوربورسكزكه بونجه  
خلق، غنايمك تقسيمنه منتظر درلر. بنم عـندمده سوزـ.  
لرك سوكيليسى طوغرىسىدر. ايمدى ماللريكزله اسيرلرـ.  
يكزك هانكيسنى ديلرسه كز اختيار ايديكز،

ديه بيوردى . انلر، اولاد وازواجلرينى اختيار  
ايلدكلرينى سويلدىلربونك اوزرينه افنديمز :

— « سزك اولاد وازواجلريكزدن بنم وبنى هاشمك  
و بر روايتده بنى عبدالمطلبك حصه سـنه دوشنلرى سزمـ  
ويردم وخلقندن ده ديليه يم كه حصه لرندن وازكچسونلر. بز  
اويله نمازىنى قىلدقدنصكره، مجمع ناسه كلوب اسيرلريكزك  
استردادنده رسول اللهى شفيع ايتمش اولديغكزى وخلقندن ده  
رجا ايتديككزى سويليكز بن، او زمان سزك ايچون  
سويلويوريرم »

ديه تنبيه ايتديكندن هوازن دخی موجببنجه حركت  
ايلدىلر . رسول الله صلى الله عليه وسلم قيام ايله خدايه  
حمد و ثنادن صوكره :

— د ای قوم! تحقیقا سزك قرنداشلیکز نائب  
و مسلم اولدقلری حالدہ کلدیلر انلره اسیرلرینی اعاده  
ایتمکے قرار ویردم. ایمدن صفاء خاطر و طیب نفس  
ایله ارزو ایدنلر، اسیرلرینی کیری ویرسونلر. بویلا یاپه  
میانلره جناب حقل ایلک اول ویرمچکی مال غنیمتدن  
عوضنی بن ویریم. کندی حصه می و بنی هاشمک  
حصه منی بونلره ویردم.

دیدى. ابتدا مهاجرین صوکره انصار کرام: [ بزم  
حصه لریمز، رسول الله کدر] دیدیلر اقرع بن حابس،  
بوکا قارشى ایاغه قالقوب:

— «بن و بنی تمیم راضی دگلز»

دیدى. عیننه بن حصن و عباس بن مرداس اسلمی  
دخی بویله سویلدیلر. بنی سلیم. حصه لرینی طیب نفسله  
رسول الله ترك ایتدیلر. بلاعوض ترك ایده میانلره هر  
بر اسیر ایچون ایلک غنیمتدن التیشردوه ویریله چکی  
طرف ذیشرف نبویدن وعد اولنه رق اسیرلرک بر قسمی  
مجاناً و دیگر قسمی عوض مؤجل ایله اولمق اوزره  
کیری الندى و هر برینه قبطیه نامیله معروف کتسان  
مصری دیزیلان قماشدن برر جامه بالا کسا صاحب لرینه  
اعاده و اعطا بیورلدى.



عینه بن حصنك حصه سنه دوشمش عجوزه بر  
اسیری عینه، صاحب شرف و حیثیت بناء علیه حائز  
قدر و قیمت ظن ایدرك :

— « یوز دوه فدیہ ویررلرسه اعاده ایدرم، »

دیمش بولنمسیله مزبورہ نك اوغلی ویاخود ابو رقاء  
زہیر، اكا جواباً لطیفه طریقہ :

— « یا عینه واللہ مانند یها بناهد ولا بطنها بوالد  
ولا فوها بیارد ولا صاحبها بواجد ولادرها بنا کد =  
بو عجوزه نك نه کلامنده طراوت و حلاوت نه ممه سنده  
استفاده اولنه جق بر حالت قالماشدر مفارقتیله قوجه سی  
مراق ایدم جك ده دکدر وار خیرینی کور، »

دیمشدی! جمرانده مدت مکث واقامت علی اختلاف  
الاقوال اون ویا اون اوچ کون قدر بر مدندر. اواسط  
ذی القعدة ده وروایتہ کوره ذی القعدة نك اون سکرنجی  
بر چهارشنبه کونی جمرانده دره کنارنده مبنی مسجد  
شریفدن احرامه کیروب معتمراً معیت موجوده سیله  
برابر مکة مکرمه به حرکت بیوردی .

اسوم مالک — هـ وازن اشراقندن کلش اولان



ذواتدن رئیساری مالک بن عوف النضرینک احوالی  
استفسار بیورلدی. انلر ، مالکک طائفده ثقیفه برابر  
بولندیغنی خبر ویردیلر. او صروده حضرت نبی محترم  
افندیمز : [ لوانانی مسلماً لرددت الیه اهله وماله ] دیه  
مسلم اوله رق کلدیکی تقدیرده مال و عیالک کندوسنه  
اعاده ایدیله جکنی بیان بیوردی .

مالک اشبو مؤده بی المسی اوزرینه ثقیف طویارده  
کندوسنی حبس ایدر خوفیله کیجه طائفدن قاچمش  
و جمرانهک مکه سمتنده خارج بر محله یتشوب حضور  
پر نور رسالتپناهیده قبول دین اسلام ایتمشدر اغتنام  
اولتمش بولنان بتون اموال و عیالی کندوسنه رد واعطا  
سیله برابر ایلرجه یوز دوه ده احسان بیورلمشدر ،  
کمال من و محظوظیتنی برقصیده سنده شویله بیان ایدر :

ما ان رأیت ولا سمعت بمنله  
فی الناس کلهم بمنل محمد  
اوفی واعطی للجزیل اذا احتدی  
و متی یسأ یخبرک عما فی غد  
واذا الکتیبة عرذت انیابها  
بالسمهری و ضرب کل مهند

فكانه ليت على ابيه

وسط المياه جاذر في مرصد

مالك، ورودندن اول اسلامه ميل ايتمش اولديني  
حاله ثقیفیدن خوفنه مبنی کتم حال و کیفیت ایدمه یور  
ایدی. ایشته یو دفعه قبول اسلام ایتمش سببیه بالتلطیف  
دیارنده کی اهل اسلام اوزرینه عامل تعیین بیورلمش و  
فرصت دوشوردکجه ثقیفی تضیق ایتک خصوصی ده  
کندوسنه امر و تنبیه اولمخشدی.

اندن صوکره حضرت رسول اکرم صلی الله علیه  
و سلم، اورادن مکة مکرمه یه کلدی. کیجه لین  
مكة مکرمه یه کوروب بیت اللهی زیارت ایتدی. « عتاب  
بن اسیده رضی الله عنه حضرت تلرینی یومی بدرهم معاش  
ایله امیر یعنی والی و ابو موسی الاشعری ایله  
معاذ بن جبل رضی الله عنهما حضرت تلرینی ناسه احکام  
شرع شریفی و آداب دینی بی بیلدیرمک ایچون قاضی  
تعیین ایلدی. ابن ابی محذوره رضی الله عنیه ده مؤذن  
براقدی مشار ایله ابو محذوره، غایت کوزل سسلی  
واون التی یاشنده برچوجق ایدی. بلال حضرت تلرینک  
فتح مکة کونی او قودینی اذانی تقلیداً استهزا ایتمش

اولان اطفال مكه دن برى ده اشبو محذوره ايدى . او  
 زمان بونك كوزل سسنى افنديمز . ايشيدهرك كندوسنى  
 بودفعه نزد هايونلرينه . جاب وحقننه دعا ايلدكندوكره  
 مؤذن تعيين بيسوردى . تاريخ هجرتك اللى طقوزنجى  
 سنه سنه دكين مكه ده مؤذلك ايدوب وفات ايتمشدر .

طواف بيت الله ضمننده . ذى طوى . دن اوغائى  
 مأذوناً مكه يه كوندرن نسوان جندن برى ، سفهاء  
 قريشدن حفظ و حمايه ايجون شو صورتله ايتديكى :

اعينه بالكعبة المستوره

ودعوات ابن ابى محذوره

و ماتلا محمد من سوره

و انى بعيشه مسروره

تعوينده مؤذن مشار اليك اذانسندن بحث

ايتمشدى .

قيس بن سعد بن معاذ رضى الله عنهما حضرتلرينك  
 كوندرلديكى صدام قيله سى اعيانندن زياد بن حارث ،  
 قيسك حركتنى ايشتمسيله مكه يه كلهرك حضرت بيغمبرله  
 ملاقات ايتمش و لى الاستيضاح سبب عزيمتنى اكلا -  
 دقدنصوكره صورت شفيعانه ده : « يا رسول الله ! قيسى  
 اعاده ايت بن قومك و افد و كفيليم انلر قبول اسلام

ایدر لر ، دیدیکندن قیس اعاده بیورلمشدر . اون بش  
کون مرورنده قبیله مذکوره خلقی کلدی . حضور نبویده  
مسلمان اولدی .

اقدیمز ، اصحاب کرامیله برلکده مکهدن ینه کیجه  
چیقوب بعض بقایای غنیمتی مرالظهرانده بالتقسیم و اخر  
ذی القعدة مدینه منوره کیردی . یوم انفکاکدن  
عودت و مواصلته قدر یتمش التی کون کچدی .

•  
\* \*

حضرت امیر ، بو سنه ناس ایله حجی عربک وقت  
جاهلیتده کی مناسکی اوزره ایفا ایتدی . عتاب خاندان  
بنی امیه دن عادل ، صالح ، اداره امورده قادر ، نافذ الکلم  
ویکرمی بریاشنده برنوجوان ایدی . ضعماء اهل کیندی سندن  
ممنون و امارتندن خوشنود ایدی . فقط کبار قریش ،  
بویله برنود میدنک ریایتی التته کیرمکدن ممنون اولما مشلردر .  
حتی ابو سفیان ایله دیگر یکی مسلمانلرک بر قسمی اندن  
صوکره مدینه منوره نقل ایتدیلر اشبو نقل اوزرینه  
ابو سفیان ، نجران والیسی تعیین بیورلدی اوغلی معاویه  
رضی الله عنه معیت سنیده کاتب وحی الهی اولدی .

۹۲

## بعث عمرو بن العاص

مدينة منورة به عوذت همايوندن صوكره عمرو بن  
العاص حضرتلريني عمان حاكملى « جيفره ايله برادرى  
« عيازه » [۱] سفير كوندردى . بونلر قرنداش ايدنلر  
عمرو ، ابى بن كعبك خط دستيله محرر نامه همايونى  
حامل ايدى [۲] عمانده ايكي اميردن ابتدا عيازه تصادف  
ايتدى . عيازه ، جيفردن اشرف ابدى عمرو ، سبب مجيئت  
وصورت مأمورييتنى عيازه اكلاتدى .

عيازه ، سفير مشاراليهك جيفره ايله ملاقاتنه و حامل  
لاولدينى نامه سعادتيك ده اكا تسليمينه لزوم كوره رك :

[۱] بواسم متن نامه سعادته اولدينى كى برخيلى آثار  
سيزده ده « عبد » در علامه عبنى عينك كسرى يانك تشديدى  
و آخرنده ذال معجمه ايله « عيازه » يازمشدر .

[۲] بسم الله الرحمن الرحيم . من محمد عبدا لله و رسوله الى  
جيفر و عبد ابني الجند . سلام على من اتبع الهدى اما بعد  
ادعوكما بدعاية الاسلام اسلمنا تسلمنا فاني رسول الله الى الناس  
كافة لانذر من كان حيا ويحق القول على الكافرين وانكما ان  
اقررتما بالاسلام وليتكما وان ايتما ان تقرا بالاسلام فان ملككما  
فرائل عنكما و خيلى تحمل بساحتكما وتظهر نبوتى على ملككما .

— « برادرم بندن بیوکدر . ملکده ده بندن  
مقدمدر کندوسيله سزى کورشديرهيم مکتوبى ده اكا  
ويررسکز »

ديمکله برابر استيضاح صددنده :

— « بنى نيه دعوت ايدم يورسک ؟ »

سوزينى علاوه ايتدى . عمرو بن العاص :

— « اللهم برلكنى و محمدك عبدالله و رسول الله

اولديغنى تصديقه »

ديمسيلاه آره لرنده باب محاوره آچيلدى :

عاياذ — « يا عمرو ! سن كندى قومكزك سىدى

اوغليسك سنك پدرك نه ياپدى بزده اكا اويالم »

عمرو — « بابام فوت اولدى . کندوسنه ايمان نصيب

اولدى ايستردم كه مؤمن اولس — ونده حضرت پيغمبرك

راى شريفى اوزره عمل ايتسون . لكن جناب حق ،

يكا هدايت احسان بيوردى بن مسلمان اولدم » .

— « نه زمان مسلمان اولدك ؟ »

— « ياقين زمانده »

— « اسلامك هانكى ديارده واقع اولدى »

— « ديار حبشه و نجاشى نزدنده »

عمرو، نجاشینک قبول اسلام ایتدیکنی بو صروده  
حکایه ایتشدی.

— «نجاشی مسلمان اولنجه قومی اکا نه معامله ده  
بولندیلر؟»

— «نجاشی، بعد الاسلام ینه سلطنتنده قائم اولدی.  
قومی کندوسنه اتباع ایتدیلر.»

— «پاپاسلری، کشیشلری ده تابع اولدیلر می؟»  
— «اوت انلرده.»

— «یا عمرو! صاقین یالان سویلمه که انسانده یالاندن  
چرکین برشی دهاییوق.»

— «قطعیا یالان سویلمم. دینمزدده یالان حلال  
دکلدر.»

— «پیغمبریکز نه امر ایدر و نه کبی شیلردن نهی  
ایدر.»

— الله تعالی یه طاعتی امر ایدر. معصیتدن نهی  
ایدر. صدق و صلهٔ رحم امر ایلر. ظلم و تعدیدن،  
شرب خمر و زنادان اصنام و اوثانه عبادتدن منع ایدر.

— نه کوزل شیلره دعوت ایدر. برادریم اکر بنی  
دیكلرسه واروب اکا ایمان و اطاعت ایدردک. و لیکن  
برادریم ترك سلطنتله اختیار ذل و مسکنت ایتمز»

— « برادرک اگر قبول اسلام ایدرسه حضرت رسول اکرم ، انی ینه قومنه ملک ایدر . انحق اغنیادن زکات الوب فقرايه ويرر »  
 — « بونه کوزل عادتدر ! »

سوز بو نقطه یه کلیرکن عیاذ ، زکاتک ده صورت و کیفیتندن سؤال ایتدی . عمرو ، زکاته متعلق بعض معلومات ویردی . هر نوع اموال و هر صنف حیوانانندن زکاتک کمیتنی اکلاتدی . عیاذ ، استغراب ایدر کی اوله رق !  
 — « یا عمرو ! شمدي بزم وادیلر ده اغاج یاراغنی ییوب کزن طوارلردن ده النورمی ؟ »  
 دیدی . عمرو :

— « النور »

جوانی ویردی . عیاذ ، بونک اوزرینه عمان اهاالیسنک مسلمان اوله بیله جکارینی عقلی کسمدیکنی بللی ایتدی :  
 — « ظن ایتیم که عمان خلقی بعددار و کثرت یشمار ایله مطیع و مسلمان اولسون »

مدینه یه بعد مسافه سیله برابر خلقنک کثرت وقوتنه بناء اهل اسلامک تجاوزندن قورقدقلرینی بیان ایتیمک ایستیور ایدی .



عمرو، بوندن سوکره اوچ کون دها مکث ایتدی.  
 عیاذ، جیفر ایله کوروشوب عمروک مأموریتنی و منا.  
 قشاتی خبر ویردی. جیفر، عمروی یاننه چاغیرتدی.  
 ایجرییه کیررکن قویماق ایچون خدمه، عمروی برکره  
 قولندن طوتدیلر! جیفر، انلری منع ایتمکله عمرو،  
 ایلرییه واروب اوط-وره جق اولدی اوطورتمدیلر.  
 او زمان عمرو، جیفرک یوزینه باقری. اوده: «نه  
 ایسترسک» دیدی. سبب محیثت و مراجعتک ندر  
 دیمک ایدی. عمرو نامه هایونی تسلیم ایتدی. جیفر،  
 انی نهایتنه قدر او قویوب یاننده اوطورن عیاذه اوزاتدی.  
 اوده تماماً او قودقن سوکره جیفر، سؤال ایتدک باشلادی  
 دیدی که:

— «قریش نه یایدی؟»

عمرو جواب ویردی:

— «قریشک بعضی طوعاً بعضی کرهاً تابع اولدی  
 جمله خلق اسلامه رغبت ایتدی. جناب حقلک هدایتی  
 یتشوب ادراک ایتدیلرکه اولجه ضالته ایمشیر! شمدی  
 ایمانه کلدیلر. سندن باشقه کیمسه نك قالدینی معلوم دکلدر.  
 اگر اسلامه کلزسه ک بیلدلیسک که علیهمکزه عسکر کله.

جکدر. قبول اسلام ایتده سلامت بول. و سنی قومک  
اوزرینه یننه حاکم نصب ایتسون،

بو جوابه قارشی جیفر، و هله بر سوز بوله مدی :  
— « بونک ایچون یارین قونوشلم »

دیدی. عمرو، اورادن چیقدی. عیاذ ایله یننه  
ملاقات ایتدی عیاذ:

« یا عمرو! اکر ملک و سلطنت خوفی مانع اولسه  
امید ایدرم که برادرم مسلمان اوله جق »

دیدی. عمرو، ایرته سی کون جیفره ایتدی. ولکن  
خدمه، کندوسنی ایچری یه قویـ دقلرندن عیاذک تنیه  
و توصیه سیله کیردی. بو دفعه جیفر، رد دعوتی ایما  
ایدر بر صورتده تلغم ایتدی.

عمرو ایسه قبول اسلامه مقابل ملکک بقاسی و عکس  
حالده زوالنی تبشیر صورتیه انی قبول و یارد دعوت  
شقرینک برینی اختیار و ترجیحده مخیر بر اقمشدی ۱ .  
باشقه مناقشه یه حاجت کورمیه رک همان عودت ایده جکی  
بیانیله چیقدی .

جیفر، دوشوندی. او کیجه عیاذ ایله مصاحبت  
ایتدی. ایرته سی صباح عمروی یننه چاغیرتوب هر ایکی  
امیر برادر، برلکده مسلمان اولدیلر. و جمع صدقات

ایچون رخصت ویردکن فضله مخالفلر اوزرینه ده معاونت  
ایتدیلر عمرو دخی عمانده اغنیاء عربک زکاتلرینی طو -  
پلادی . فقراسنه ویردی . و درون بلده ده کی محوسیلری  
جزیه یه باغلایه رق مدینه منوره یه عودت ایتدی .

..

۱۳

### اسلام عروه

عروه بن مسعود، طائفک محاصره سی زماننده  
جرشده ایدی . رسول الله صلی الله علیه و سلمک  
مدینه طیه یه عودتلرندن سوکره عروه ، جرشدن  
طائفه کلدی .

بر اراق اعیان طائفدن « غیلان بن مسلمه » ایله  
مشاوره ده اکا دیدی که :

— « دقت ایده یورمیسک محمد [علیه الصلوٰة والسلام] .  
و خلقک اکا اتباعنه ؟ »

غیلان :

— « اوت کور یورم سن نه ملاحظه ده سک ؟ »

دیدی . عروه :

— « عرب ، بزی صاحب رأی رزین ظن ایده یور .

لرسده او ذاته ايمان و اتباع ايتدجكه بز. اويله دكلمشز،  
جوابی ويريركن غيلان :

— « سندن شو سوزك ثقيف ارم سنده صدورندن  
منمون اولم . سن انلرك رئيسی ده اولسهك عليهكده  
جراتلرندن قورقورم »

ديمش .. بونك اوزرينه عروه، قبول اسلامه و اتباع  
سيد الانامه عزم قويسنی قطعياً بيان ايتدكدن صوكره  
غيلانه دیدی که :

سكا بن، شمدی به قدر هیچ بر کیمسه به سويلمديکم  
برشيئي سويله به يم محمد [عليه الصلوة و السلام] ك مكه ده  
ظهورندن مقدم بر وقت تجارت مقصديله نجرانه كیده .  
يور ايدم . يولده قافله نك نزول ايتديكي بر محله ارقداش لر  
مدن از ايريله رق بر كولكه ده ياتمشدم . قارشيمده  
ايكي جاريه بليره رك يامه طوغري كلديلر . كولكه نك بر  
طرفه اوطورديلر بن . ياتمقده ايدم . اويوركي مخصوص  
كوزلریمی قابادم . ايكي جاريه ، بكا اشـ ارتله يكدیكرينه  
شويله قونوشديلر :

« من هذا فيما نقولين يا ابنة الاكرمين »

« هذا عروة بن مسعود . سيد غير مسود . مفيض

جود و عسره منجود »

— « صدقت يا ابنة الاكرمين! فمن اين هوى ا الى  
اين نوى؟ »

— « اتى من المعقل المنيف . طائف ثقيف . وهو  
ينوى نجران ذاة المخاليف »

— « صدقت يا ابنة الاكرمين ا . فما هو مصيب فى  
سفره هذا ؟ »

— « تسهل طريقه . وينفق سوقه . ويعلو فوقه »

— « صدقت يا ابنة الاكرمين! . فما عاقبة امره ؟ »

— « يعيش زعيماً ويتبع نبياً كريماً ويتعاطى امراً  
جسيماً فيرتد عنه كليماً »

— « صدقت يا ابنة الاكرمين! . وما النبي ؟ »

— « داع محاب له امر عجاب . يأتیه من السماء

كتاب يهر الالباب ويقهر الارباب »

محاوره لرى بورايه كلنجه سكوت ايتديلربن ده اويويه  
قالشم . اويانديغم ائناده جاريه لريوق ايدي . وقتا كه نجرانه

واردم پاپاس دوستم وار ايدي يانسه كيتدم بكا نصيحت

و وصيت اوله رق : « يا ابا يعفور ! شمدي خلقى ارشاد

ايدم جك نبى ذیشانك مكده زمان ظهوريدر » ديدى . بن :

[اوديديكك شى ندر؟] ديه صوردم . پاپاس ، يمين ايدم رك :

— « والله او ذات ، انديانك آخرى و خير ليسيدر .

قونی قتل عاد کبی قتل ایدہ جکدر . نحین ظہورندہ  
ابتدا کندوسنہ ایمان ایدہ جک سن اول ،  
دیدي . بن ، بو سوزلرک بر حرفی بیلہ کیمسہ یہ  
سویلما مشدم ارتق ایمان و اتباع ایتدم .

\*\*

عروہ ، ایدن صوکرہ طائفدن مدینہ طاهرہ کلوب  
مسلمان اولمشدر بلده سنہ عودتندہ قومنی دین اسلامہ  
دعوت ایچون استیزان ایدرکن رسول اللہ صلی اللہ علیہ  
وسلم اکا : [ انہم قاتلوک = انلر ، سنی قتل ایدہ جکدر ]  
بیوردیلر .

عروہ ، ثقیفک کویا کندي حقنہ کی حسن ظنہ  
الدانہرق : [ لو وجدونی بائماً ما یقظونی ] دیدي کہ ثقیفدن  
بر قیلنہ خطا کلیہ جک قدر ہر خصوصہ امین اولدیغی  
سویلماک ایستیور ایدی .

طائفہ عودتندہ اہالی بی دینہ دعوتہ مبادرت ایتش  
ایدی . ثقیف ایسہ بالخالفہ کندوسنہ لسان ایلہ خیلی  
اذا وجفا ایتشلر ! . نہایت بر صباح وقتی خانہ سنک طامی  
اوزرندہ صباح اذاننی او قورکن اسافل ثقیفدن بری انی  
اوق ایلہ اوردی ! .

عروہ او دقیقہ دہ :

— واللهك برلكنه ومحمدك رسالتنه شهادت ايدرم  
 رسول الله بو حالى بكا اولجه بيلديرمشدى «  
 ديه دين وايماننى اظهار ايتدى .  
 مشار اليهك خبر قتلى مسموع على اولدينى زمان  
 حقننده: [مثل عروءه مثل صاحب يس . دعى قومه الى  
 الله فقتلوه] بيورلمشدر .

\*\*\*

۱۴

### — اتخاذ منبر —

خطيب منبر لاهوت صلى الله تعالى عليه وسلم .  
 اوائل احوالده موايعظ ونصايحي اياقده اولدقلىرى حالده  
 ايفا بيورورلردى . مسجد شريفده مقام وقيام سامى  
 رسالتپناهينك تسهيلي ايجون اصحاب كرامك ارزولرى وطرف  
 اشرف پيغمبريدن ارزان بيوريلان مساعده سنيه اوزرينه  
 سهيل بن سعد الساعدى دولكر ميمون ايله برلكده بر  
 خرما اغاجى كوكنى كتير مشلر . دولكر ميمون ، محراب  
 سعادتك صاغ حانينه ركز ايدوب افنديمىز . مذكور  
 ستونه اتكا ايتمكده بواندينى حالده پنه اياق اوزره خطبه  
 اوقور ايدى . برمدتده بويله كچدكدن صوكره روايته

کوره مدینه طاهره به گلش اولان بر رومی ، او حالی  
 کوره رک بر منبر اعمال ایدم جگنی سویلدی .  
 ولدی العرض کیفیت ، مقرون مساعده سنیه اولدی .  
 رومینک یابدینی منبر ، اوچ قدمه لی ایدی . موقع مخصوصه  
 وضع ایدلدی جمعه کونی رسول الله ، خطبه ایچون اوزرینه  
 چیقدینی وانصایحه بده و مباشرت ایدم جکی آنده اولکی  
 خرما ستونی ، وجود مسعود رسالت پنا هیدن کندوسنی خالی  
 بولوب تأثرندن ایکله مکه باشلادی . مختلف روایتلره  
 کوره ستونک صداء حنینی : یاوروسنی ارایان ناهنک ،  
 یاخود انانی ایستیان طفلك ، یاخود برعاشق واله آواره  
 دلك آوازی کی یاخود خوار ثور کی ایدی ! . بتون  
 جماعت حاضره ایشتدیلر . افندیمر ، منبردن نزول ایله  
 واروب مبارک اللرینی ستونک اوزرینه وضع ایتدیکجه حنینی  
 منقطع اولدی . روایت کوره ستونی قوجاقلیه رق اکا  
 دیدی : [اگر ایسترسهک سنی اولکی موقعه دیکیم  
 یکیدن یشیلنوب یا پراقنوب میوه ویره سک . ایسترسهک  
 جنت باغنه دیکیم جنت چشمه لرندن سقی اولنورسک  
 صاحبا و اولیاء الله ، میوه کدن یرلر] آذرب توقدن سوکره :  
 [نعم قد فعلت نعم قد فعلت] سوزینی علاوه ایتدی و تکرار منبر



سعادتہ چیقدی وستون مذ کوری دنیاہ غرس اولمق  
ایله آخرتہ غرس ایدلمک بینندہ مخیر ایتدیکی حالہ  
انک آخرتی اختیار ایلدیکنی وانی مس ومسحله تسکین  
ایتمسیدی قیامتہ قدر بالان طورہ جغنی بیلدیردی .

۱۵

### -- اسلام جبلة --

جبلة بن ایهم، بنی غساندن ایدی و بلقاده والی ایدی.  
طرفه نامه هماون تسطیر یله دین مبین اسلامه دعوت  
بیورلدی . جبلة دخی بالاجابه مسلمان اولمق ایله برابر  
جانب عالی رسالتپناهی به جوابنامه و هدایا کوندردی .

۱۶

### -- اسلام فروه --

فروه بن عمرو الجذامی، جذام قبیله سندن  
ایدی. قیصر روم طرفدن معان حوالیسی عربلرینه  
امیر و متصرف ایدلمش ایدی .

طرف ذیشرف حضرت رسالتپناهیدن یازدیریلان  
نامه نامی هماون ایله عمرو بن امیه الضمری رضی الله

تعالی عنه ارسال بیوریلہرق شو اثناده دینہ دعوت  
ایلدی . فروہ قبول اسلام ایدوب سفیر پیغمبری  
معزراً اعاده ایتش وسید الانام علیہ الصلوۃ والسلام  
افندیمرہ برآت ، وفضہ نامندہ بیاض برقار ، برحمار ،  
برقاج طوپ قماش ، بر سرمرہ لی قفتان ہدیہ رسمیلہ و  
مسعود بن سعد نامندہ بری یدیلہ کوندرمشدی .

رسول اکرم صلی اللہ علیہ وسلم ، ہدایای واردہ پی  
قبول بیوردی . ومسعودی حضرت بلال رضی اللہ عنہ  
مسافر و یروب اکرام و ضیافتی دہ امر و نبیہ ایتدی  
قماش طوپلرینی ازواج طہراتہ تقسیم وقاطری ابو بکر  
الصدیقہ اعطا وقبای زرینی مخرمہ بن نوفلہ بخش ایلدی .  
جمارک حسن محافظہ سنی ابواسید ساعدی یہ اصمارلدی .  
وفروہ نک مکتوبہ یازدینی جوابنامہ سعادتہ برابرالہ  
جائزہ اولہرق اون ایکی بچق قیہ ( = ۵۰۰ درہم )  
کوش و یروب مسعودی ممنوناً اعاده ایلدی .

فقط قیصر ، فروہ نک اسلامنی ایشیدہ رک انی قبول  
اسلام تہمیلہ بالالہام نصرانیتہ رجوع و ردت تکلیف  
ایتشدی . فروہ ، یوم مسئلہ دہ موافقت کوسترماسنہ مبنی  
فلسطین قصبہ سی جوارندن مرور ایدن نہر کنارندہ  
مصلوباً اعدام ایدلمشدر .

...

۱۷

## ولادت ابراهیم نجل النبی

علیه السلام

خلال ذی الحجه ده رسول اکرم افندیمزک نجل  
کریمی ابراهیم ، جوارئ سعادتلرندن ماریه رضی الله  
عنهان تولد ایتمشدر .

قابله سی آزادلی جاریه سی سلمی ایدی . سلمی ،  
زوجی ابورایمه ولادت ابراهیمی سویلمشدی . اوده  
حضور رسالتپناهی به تبشیر کیفیت اتمکله ، ژده اوله رق  
افندیمز ، ابو رافعه بر کوله احسان بیوردی و اوکیجه  
ادینی ابراهیم دیه قودی .

جبریل علیه السلام کله رک : [السلام عليك یا ابا ابراهیم]  
دیه سلام ویردی . بوندن رسول الله صلی الله علیه وسلم  
زیاده محظوظ و ممنون اولدی . یدنجی کون عقیقه اولوق  
اوزره بر قویون کسیدی . و ابراهیمک باشی تراش  
ایدوب صاجی آغزلغنججه کموش برمنلی نقره ایله مساکینه  
تصدق ایلدی . صوکره امر عالی ایله او صاجی دفن  
ایتدیله .

مرضه سی حقنه کی روایت اختلافی در . بر روایت  
 کوره دایه سی ، خارج مدینه عوالی قریه لرنده ساکن  
 « براء بن اوس » ك زوجہ سی « ام بردہ خولہ بنت  
 المنذر بن زید الانصاری » ، دیگر روایت کوره قرای  
 مذ کورده ابو سیف حدادك زوجہ سی ام سیف ایدی .  
 انس بن مالک رضی اللہ عنہن منقہ ولد رکہ :  
 ابوسیف دمیرجی ایدی . کوروکنک اوجاغندن خانہ سنہ  
 دومان کلیر ایدی . رسول اکرم ، نجل نجیننی کورمک  
 ایچون ابوسیفك خانہ سنہ کیده جکی زمان انس ، ابتدا  
 کیدر حداده خبر ویریر ایدی . حداده آنشنی سوندیریر  
 دوماتی کسیریر ایدی . صوکرہ افندیمز ، کیدوب ابرہیمی  
 کورور آغوش سعادتنه آلیر اوپردی .

\*\*\*  
 ۱۸

## فوت زینب بنت النبی

صلی اللہ علیہ وسلم

کراشم مکرمہ نبویه نك بیوکلی زینب رضی اللہ عنہا  
 حضرت تلی . بوسنه دار بقایه رحلت ایتشد .  
 رسول اکرم صلی اللہ علیہ وسلم ، زوجات طامراتندن

سوده بنت زمعه وام سلمه ايله ام ايمان وام عطية الانصار به  
رضوان الله عليهم اجمعين حضراته امر بيوروب انى غسل  
ايتيردى .

زينب رضى الله عنهانك على نامنده بر اوغلى ايله  
« امامه » اسمنده بر كريمه سى وار ايدى . على ، بلوغ  
صره سنده وفات ايتدى . حضرت فاطمه رضى الله عنهانك  
وفاتنده وصيتى موجبجه امامه يى حضرت على كرم الله  
وجهه تزوج ايتمشدر .

...

۱۹

نرخ

شو ارالق مدينه منورده ارزاق و ما كولات زياده  
به ايه جيقه رق خاق ، ارزاقه نرخ قونلا سنى استمدعا  
ايتمشدر . رسول الله صلى الله عليه وسلم : [ان الله هو  
المسعر القابض الباسط = تحقيقا نرخ ويرىحى ، قبض  
ويبسط ايدىحى جناب اللهدر] ذيه استمدعا واقى ترويج  
بيور نامشدر .



## فصل ثانی عشر

طغوزنجی سنه لھجریہ وقایعی

[ سنه الوفود ]

بنی تمیمہ سینہ نك مبعوثیتی . وفود بنی عذرہ . ولیدك بنی  
مصطفیہ بیتی . بعث عبداللہ بن عوسجہ . قطبہ بن عامر ك خشمہ  
بعث و ارسالی . ضحاک بن سفیانك بنی كلابہ بعث و ارسالی .  
بعث علقمہ . بعث علی . اسلام ضمام . اسلام كعب  
بن زھیر . غزوہ تبوك . وفود و اسلام ثقیف . وفود بنی  
فزارہ . مكاتب حمیر وفات نجاشی . وفات ام كلثوم بنت النبی .  
وفات منافق عبداللہ ابن ابی . حج ابی بكر الصديق . وفود طی  
وفود بنی كندہ . وفود ہمدان . وفود بلی . وفود مزینہ ، وفود  
بجیلہ . وفود تجیب . وفود بنی اسد . وفود بنی بہراء . وفود بنی  
مرہ . وفود بنی محارب . وفود بنی عبس . وفود بنی ازد . وفود  
بنی البكاء . وفود بنی ہلال . وفود بنی دارم .

۱

بعث عینہ

حضرت نبی اکرم صلی اللہ علیہ و سلم ،  
شہر محرمہ صحابہ کرامدن « بشر بن سفیان »  
حضرت لرینی اخذ زكات ایچون بنی خزاعہ دن بنی تاعب  
قبیلہ سنہ اعزام بیورمشدی .

بشر ، بنی كعبك زكاتی طویلار ایكن بنی تمیم ،

زكاتك مقداريني استكثار ايدەرك انلرى اعطاء زكاندن  
 منع ايجون : [نيجون مالكزى ويره يورسكز] ديديلر ! .  
 بنى كعب ، دين اسلامى قبول ايتدكلرندن زكات ايسه  
 اركان اصلينه دن بولديغندن بحث اتملريله بريكيلر ، سلاح  
 وعسكرله منع والغاء زكانه مبادرت ايتديلر ! .

ايكى قبيله نك شومعامله سى اخذ وجمع زكاتى اشكال  
 اتمشدى . بناءً عليه بشر ، ايفاء وظيفه يه موفق اوله ميه رق  
 مدينه يه عودت و حضور برنور پيغمبرى يه عرض حال  
 و كيفيت ايلدى .

بونك اوزرينه « عينه بن حصن الفزارى » بنى  
 تميم عليه اعزام بيورلمشدر . عينه نك معيتمه عرباندن  
 اللى نفر سواري موجود ايدى . شو سواريلرك ايجند .  
 انصار و مهاجرين كرامدن بر فرد يوغىدى .

عينه ، مدينه دن چيقوب « صفراء » طريقيله بنى  
 تميمه كيتدى « سقياء » نام محله قبيله مرقومه يي بفتة  
 اوردى . قبيله نك بر خيلى حيواناتى سوردى . اون  
 براركك اون بر قادين و اوچده صبى اسير ايدەرك كبرى  
 دوندى . اسيرلر ، مدينه ده رمله بذت الحارثك خانه سنده  
 حبس و توقيف ايدلديلر .

اسیرلرینی المی ایچون بنی تیممک بعض وجوه  
 و اشرفانی بر هیئت مخصوصه اوله رق مدینه به کلدی .  
 و عطار د بن حاجب الدارمی ، اقرع بن حابس الدارمی  
 [۱] زبرقان بن یدر السعدی ، عمرو بن الاهتم المنقری ،  
 الحنات بن یزید المجاشعی ، نعم بن یزید ، قیس بن عاصم  
 المنقری ، وجوه مذکور ه دن ایدیلر . موقوف اسیرلر  
 انلری کورونجه اغلامغه باشلا دیلر .

رؤساء مرقومه ، مسجد شریف رسول الله کلدیلر .  
 بنی اکرمک هانکی حجره ده ایدوکنی بیلمدکلر ندین هر  
 حجره نك قبـوسی اوکنه کلوب : [ یا محمد طیشاری  
 چیق ] دبه باغیر دیلر . اقدیمز ایسه او کون او ساعتده  
 عائشه رضی الله عنهانک حجره سنده حال رقودده [ قیلوله  
 ایله مشغول ] ایدیلر . طیشاری چیقدی . بنی تیممک شو  
 نداء بلیدانهلری هر حالده قبیح ایدی . جناب حق  
 دخی تقییح و توبیخ معرضنده [ ان الذین ینادونک  
 من وراء الحجرات اکثرهم لایعقلون و لو انهم صبروا

[۱] اقرع ، مقدما حنین ، طائف کبی بعض مشاهدده  
 معیت سنیه ده بولنه رق غنایم دن کندوسنه فوق العاده اوله رق  
 حصه افراز و احسان بیورلمش ایدی . بو وقعه ده ده بنی تیمم  
 طرفدار ی اولدینی حالده بولتمشدر .



حق، مخرج الهم لكان خيرا لهم و لله غفور رحيم [ آیت  
کریمه سنی انزال بیور مشدر .

رسول اکرمک حجره سه عادتدن خرو جيله برابر  
حضرت بلال ، اويله اذانى او قومغه باشلادی . انلر ،  
افنديمزی سه وزه طوتهرق براز طور دیر دیلر . بعده  
برلکده مسجد شریفه کیدوب نماز قلقدن صوکره  
افنديمز ، حجره شریفه لرینه طوغری عودت بیوردی .  
او ارالق ینه بنی تمیمی کوردیکی حالده آلدیرمیه رق  
کیدى . سنتی ادایه مشغول اولدی . صوکره بیقیدی .  
صحن شریف مسجده او طور دى . رؤسا ، حضور عالی به  
صوقوله رق :

— « بز ، بر جاعنزه که مدحز ، زین کتیروب ذمزشین

ویریر . »

دیدیلر . رسول اکرم آنلرک بوسوزینی رد ایدم رک :

— « مدحی زین و ذمی شین کتیرن انحق جناب

حقدر بوسوزدن مقصديکنز ندر . »

دیدى . رؤسا :

— « سنکله مشاعره و مفاخره ایدم جکز ،

دیدیلر . افنديمز ، جوابده :

— ما بالشعر بعثت ولا بالفخار امرت و لكن  
هانی کوردم نه کز وارد ر.

دیمسیله زبر قان، عطار د بن حاجبه اشارت ایتدی.  
عطار د، ایچلرنده اک کنج ایدی قالقوب بنی تیممک مدح  
و ستایشنی حاوی بر خطبه او قودی . بوکا مقابل امر  
عالی رسالتله ثابت بن شماس ، قالقدی . الله تعالی به حمد  
و ثنای و ذکر کلمه شهادتینی و مهاجرینک حسن خلق  
و خاق ایله اولان فضیلتنی و انصار کرامکده فضل متابعتله  
نصرت و معاونتارینی ذکر و بیاندن صوکره و حدانیت  
خدا و صدق رسالت رسول کبریایه ایمان ایتدیرنجیه  
قدر کفار ایله حرب و قتاله مأمور من الله اولدقلرینک  
یسط و اتیاننی حاوی بر نطق بلیغ ایراد ایتدی ،  
انک اوزرینه زبر قان :

نحن الکرام فلاحی یعادلنا  
نحن الرؤوس و فینا یقسم الربع  
و نطعم الناس عند القحط کلهم  
من السدیف اذالم یونس الفزع  
اذا اینا فلا یأبى لنا احد  
انا کذلک عند الفخر نرتفع

پیتلرینی حاوی بر شعر او قودی . بوکا حسان بن ثابت  
حضر تلری :

ان الذائب من فھر و اخوتہ  
قد بینوا سنۃ للناس تتبع  
یرضی بہا کل من کانت سریرتہ  
تقوی الالہ و کل الخیر یصطنع  
اکرم بقوم رسول اللہ و شیعتہ  
اذا تفاوتت الہواء و الشیع  
اھدی ہم مدحاً فلا یوازرہ  
فیما احب لسان حاکک صنع  
جواب رنکیننی و یرنجہ اقرع بن حابس :  
اتیناک کما یعرف الناس فضلنا  
اذا خالفونا عند ذکر المکارم  
وانا رؤوس الناس فی کل معشر  
وان لیس فی ارض الحجاز کدارم  
و ان لنا المربع من کل غارۃ  
تکون بنجد او بارض التھام  
شعرینی او قودی . بوکا دخی حسان بن ثابت :  
بنی دارم لاتفخروا ان فخرکم  
یعود و بالا عند ذکر المکارم

هبائتم علينا تفخرون و انتم

لناخول من بين ظئر و خادم

و افضل ما نلتهم من المجد و العلى

و قادتنا من بعد ذكر المكارم

فان كنتم جئتم لحقن دمائكم

و اموالكم ان تقسموا فى المقاسم

فلا تجملوا لله نداء و اسلموا

ولا تفخروا عند النبی بدارم

والا ورب البيت مالت اكفنا

على رؤسكم بالمرهفات الصوارم

جوابی و پردی .

مجاوردہ ہو مرکزہ کا دیکی ساعتہ اقرع کندیلر بنک

مرجو حیت و محرو حیلر نی اعتراف ایتدی . و :

— و والله بو ذات [ محمد علیه الصلوٰۃ و السلام ] .

عالم غیبدن نصرت و تأیید احسان اولنوب اندن هیج بر

شیشی دریغ ایتمیشلر ! . خطیبی خطیبیمزك شاعری

شاعریمزك فوقسده و انلرك سسلری بزم سسلریمزك

اوستنده در .

دیملکه برابر هدی او آنده قبول اسلام ایتمیشلردر .

ایچلرندن « قیس بن عاصم » . بالخاصه بذل التفات  
 وحقننه : [ شو ، خیمه نشین عربلرک سیدیدر ]  
 تبجیل کزینی شرفصدور بیوراش و اسیرلری  
 کندولرینه اطاده اولاندقدن فضله عمرو بن الاهتمک  
 غیرى هر برینه اون ایکیشر اوقیه ویریلوب عمروه بش  
 اوقیه جائزه احسان وانعام ایدلمشدر .

..

۲

### وفود عذره

یمنده عذره قبیله سندن اون ایکی کیمسه . مدینه  
 منوره یه کلشدی . قبیله لری اغنیاسنک زکاتلرینی کتیر مشلردی .  
 ایچلرنده « جرره بن نعمان » دخی موجود ایدی [ عم  
 صباحاً ] دیه سلام جاهلیتی ویردیلر حقلمنده رعایت کامله  
 اجرا اولندی . انلرده قبول دین اسلام ایندیلر و :  
 — « یارسول الله ! بزم تجارت مزشام ایله درشام طرفنده  
 ایسه روم قیسری هرقل وار . حقننه سکا برشی وحی  
 اولندی ؟ »

دیه صوردیلر حضرت پیغمبر ، جوابده :

— « مرده سزء كه قريباً شام فتح اوله جق و  
 مرقل او حواليدن چكيله جك كيدم جكدرد »  
 ديه تبشير بيوردي . بدمه عذريلر . ممنوناً و مطيباً  
 عودت استديلر .

..

۳

### بعث وليد بن عقبه

بنی مصطلق قبیله سنك زكاتلرینی اخذ ایچون رسول  
 اکرم، وليد بن عقبه ابن ابی معیطی مأموراً بعث و اعزام  
 بیوردي . قبیله مذکورہ ، مقدما قبول دین ایدمرك  
 مسجد دخی یاپدیر مشلر ایدی . انجق ولیدایله ارالرنده  
 زمان جاهلیتدن قاله منافرت بولندیفی حالده بو کرم  
 انك طرف نبویدن مأموراً ناحیه لرینه متوجه و متقرب  
 اولدیغی ایشتملری اوزرینه استقبال ایچون یکر می بش  
 کشی بوله چیقار مشلر . و قدومنی تهته ضمننده دوه وقویون  
 کسدر مشلر !

ولید ایسه منافرت واقعه سببیه خوف و تحاشی  
 ایدمرك هنوز قبیله انك ایچلرینه کیرمزدن اول عودت

ایندی . و انلرک کندوسنی مساحاً قارشولوب  
قتله مبادرت ایتملرله کیری دوندیکنی رسول الله صرض  
ایلدی . که بونک افاده سنه کوره قبیله نك تأدیبتشکیللری  
لازم کلرک سوق قوته اقتدیمر دخی همت ایتک اوزره  
ایکن قبیله رؤسائی ولیدک خلاف مأمول کیری  
دونبور دیکنی کورملرله شبهه نلرک کلدیلمر ماهو الواقی  
حضور پر نور رسالتناهی به عرض ایتدیلمر .

بونک اوزرینه تحقیق کیفیت صدندله خالد بن الولید  
رضی الله تعالی عنه حضرتلری اعزام بیورلمشدر .

حضرت خالد ، کندوسنه ویریلان تعلیمات سینه  
اقتضاسیجه قبیله نك ایمان اوزره اولدیلرینه دلالت ایدله جک  
احوالی کوردیکی صورتده صدقه زکاتی اخذ ایدوب کیری  
کله جک و خلافتی مشاهده ایتدیکی تقدیرده کفار حقندکی  
معامله وجهله حرکت ایدله حکدی . مغرب و عشاء  
اذا نلرینک او قوندیغنی کوردیکنه مبنی زکاتلرینی الهرق  
عوت ایلدی .

ولیدک اشبو حرکتدن طولانی حقنده : [یا ایها الذین  
امنوا ان جاءکم فاسق نبأ فبینهوا ان تصیبا قوماً بحواله  
فتصبخوا علی ما فعلتم نادمین ] آیت کریمسی نازل  
اولمشدر .



بعث عبدالله بن عوسجه

بنی حارثه بن عمرو بن قمره قبیله سنی دین اسلامه  
دعوت ایتک اوزره حضرت پیغمبر، عبدالله حضرت تهرینی  
النه طرف اشرفلرندن نامه هایون ویره رک بعث  
و ارسال ایتشدی .  
قبیله خاقی قبول اسلام صورتیله اجابت ایتدکلرندن  
قبیله نامه عالینک یاؤوسنی غمل ایدرک صحیفه سنی صو  
قوفه سنه یامه یابدقاری اخیر آسموع عالی بیورملغله انلرک  
اشبو معامله عامیانه و حماقتشعارانه لری موجب تأسف  
اوله رق حقلرند : [ مالهم ذهب الله بمقـولهم ] دیه  
بیورلمش و سهم الاصابه دیمک بولنان دعاء نبوی مستجاب  
اولمشدر .

قبیله مرقومه ، وجود و صوته، رعدت و کلامده  
چیرکین بر عجله و قاریشقلق ، عقل و ادرا کده سغه  
صاحبی اوله رق خفیف احوال صبی اطوار قالمشدر !  
حتی بولردن بعضنی تمیز کلامدن عی و عاجز کوردیکنی  
واقدی حکایه ایتمشدر .



..

۵

## بعث قطبه

پدشه ناحیه سنده خشم قبیله سنک تنکیلی ایچون اصحاب  
 کرامدن قطبه بن عامر خضر تلمری ، معیننه یکر می نفر  
 ویریلدک کوندرلمشدی . قبیله نك شدتلی مدافعه سنه مبنی  
 وقوعه کلان مقاتله ده طرفیندن برخیلی آدم لر یاره لندی  
 فقط قطبه و معیتی ، انلرک بر قاج اشخاصنی قل ایستدیلر  
 و مطلوب وجهله تنکیل اشقیایه موفق اوله رق خشمک بر چوق  
 دوه و قویونلرینی و نسوانندن بر طاقم اسیرلری آملر غامماً  
 عودت ایتمشلردر .

غیمت واقعه غیر از خمس تقسیم ایدلدیکی زمان  
 هر برینک حصه سنه دردر دوه و اونر قویون دوشمشدی .

\*

..

۶

## بعث ضحاک

شهر ربیع الاولده ایدی ضحاک بن سفیان الکلابی  
 خضر تلمری ، قرطاً نام محله کیده رک بنی کلاب قبیله سنی

دين اسلامه دعوت ايتدی . قبیله خلقی باایخلافه قتاله  
مجاشرت ایتلمیرله ضحاک انلری حرباً بوزوب بر خیلی  
اموالی اخذ و اغتنام ایلمشدر .

...

۷

### بعث علقمه

جده خلقندن بر طاقم کیمسه لرك حبشه لیلره دیگر  
روایتیه کوره حبشه لیلرك جدهده بعض اهالی یه تجاوز  
ایتدیکی مسوع عالی اولسی اوزرینه منع تعرض ایچون  
حضرت نبی اکرم افندیز ، «علقمه بن مجززه رضی الله عنہ  
اوج یوز نفر عسکرله بعث واعزام بیورمشدی .

علقمه ، معیتله جده طرفلرندن بحرآ حبشه توجه  
ایدرك بر جزیره یه وصولنده - تنکیلرینه مأمور  
بولندیفی - اشقیانك حرکت واقعه دن خبردار اوله رق  
طاغلاقلری ا کلاشلایفندن رجعت ایتمشدر .

...

۸

## سریه علی

حضرت علی کرم الله وجهه اfdیمز، طیی قبیله سنک  
 «قلیس» اسمنده کی بت و بتخانه سنی هدم و تخریبه و قبیله  
 مذکورہ فی نہب و غارتہ یالکز انصار کرامدن یوز الی  
 نفر عسکر له شهر ربیع الاخرده بعث و ارسال بیورلمشدی.  
 عسکرک یوز نفری دوهیہ الی نفری آتله را کب  
 ایدی.

بر صبح وقتی بفتہ هجوم ایلہ بتخانه تخریب و ایچنده کی  
 قلیس دخی قلع و افا ایدلدی . بتخانه نک خزینہ سنده  
 اوچ درع و «رسوب» مخدم ، یمانی اسمارنده اوچده  
 قلنج بولمشدی . قبیله نک دوه و قوون کبی بر خلی  
 اموال و مواشیسیمله بعض ذراریسی اله کجدی . حضرت  
 علی ، رسوب مخدم اسمنده کی قلنجلری رسول اکرم  
 ایچون صفی مغنم اوله رق آیردی اوست طرف نک ده  
 خمینی تقریق ایدوب باقیمستی تقسیم ایدلدی .  
 صاحب الجود نامدار حاتم طائیک قیزی سقانه  
 دخی سبابای واقعه میاننده ایدی . فقط اوغلی عدی ،  
 شام طرفه فرار ایتدیکندن اله کجمدی .

رسول اکرم صلی الله علیه وسلم ، سفینه‌ی  
برقاج کون صوکره مدینه طاهره ده آزاد ایدوب معززا  
برادری نژدینه کوندردی . بومرزه حقنده طرف ذیشرف  
نبویدن ابراز بیوریلان مروت ، انصافه سبب اوله رق  
عدی ، ایرته سی سنه مدینه منوره یه کلوب حضور پر سرور  
رسول الله ده قبول دین اسلام ایله شرفیاب اولمشدر .

\*\*

۹

### اسلام ضمام

ضمام ، بنی سعد بن بکرک ایلیجیمی اوله رق مدینه  
طیه یه کلشدی انس بن مالک رضی الله عنه حضرتلری  
روایت ایدرمشکه :

برکون مسجد شریفده حضرت رسول الله ایله  
برلکده اوطورور ایدک . مسجد قیوسندن دوه ایله بری  
ایجری کیردی . دوه سنی چو کروب ایاغنی باغلدقدن مکره  
قومه خطاباً : « محمد [علیه الصلوٰة والسلام] هانکیک زدره  
دیدى . نبی اکرم ده اصحاب کرام میاننده بریاننه طیائمش  
اوطورور ایدی . بز جواب ویردک که : « ایشته شو

بر ياننه طيئاش ارطورن آق بکزلی ذاتدر ، بونک  
اوزرينه او آدم نى محترمه « ابن عبدالمطلب » ديه خطاب  
ايتى . حبيب مکرم . جواب ويردى . يعنى روى  
رد واستثقال کوسترمدى . کلان آدم ، ديدى که :

— « سکا سؤال ايدہ حکم وسؤال الريمى شدت اوزره  
ايدہ حکم بکا کوجنميه جکسک »

حضرت نبى ، بونى قبول ايدہ رک :

— « خاطريکه نه کلور ايسه سؤال ايت »

بيورمسيله شخص مرقوم :

— « سنک ربک وسندن اولکيلرک ربلرى حقيچون

طوغرى سويلکه حق تعالى سنى جميع بنى آدمه بعث و  
واسال ايتديمى ؟ »

ديدى . حضرت پيغمبر ، اگا :

— « اللهم نعم »

جوانى ويردى . اوشخص ، ينه عين غلظتله :

— « شهر رمضانده اوروج طوتلمسنى ده امر

ايتديمى ؟ »

ديدى . جواباً :

— « اللهم نعم »

بيورلدى . ضمام :

— « اغیا مزدن صدقه زکات آلوبده فترامزه  
ویرمکی ده سکا امر ایتدی ؟  
دیدى . ینه :

— « اللهم نعم »

بیورلدى . ایشه بودرلوجو ابلى ایشیده رک مر قوم ،  
قبول دین اسلام ایتدی . و قونى دینه دعوت  
ایده جکنى وعد ایلدی و کندوسنک ضمام بن ثعابه ایدوکنى  
بیلدیردى .

ضمام ، کندی حوالیسنه عودت ایلدیکی دقیقه ده  
خلق ، ملک نزدینه طویلا ندیلر . انلره قارشى لات و عزادن  
اعراض و اظهار اکراه ایتدی ضمامک اشبو استکراهندن  
قبيله خلقى توحش ایده رک اکا :

— « یا ضمام ! بویله سوزسویله مه . زیرا قورقرزکه  
سکا جذام یاخود جنون عارض اولور ،  
دیدیلر . ضمام ایسه انلری تقریباً :

— « وای باشکزه !. انلر ، نهیه قادرکه بکا برشى  
عارض ایتسونلر . جناب حق ، بزه رسول کوندردى .  
اکا کتاب ایندیردى ملک ، سیبيله سزى ضلاتدن خلاص  
ایلدى »

دیدکدن صوکره محضر قومده کله شهادتی کتیروب  
انلری دینه علناً دعوت ایتشدرد . مرویدرکه ضمامک  
اشبودعوتی اوزرینه اوکون اقشامه دکین قومنک بتون  
ارککی وقادینی دینه کیرمشدر .

...

۱۰

### اسلام کعب بن زهیر

زهیر ابن ابی سلمی ، بلغاء شعراء عربدن ایدی .  
کعب ایله بحیر ، بونک ایکی اوغلی ایدیلر مابها الاشتهاری  
اولان طلاق و بلاغتی کندوسنک فوتندن صوکره اشبو  
ایکی اوغلنه میراث قالمشدی .

کعب ، لسان طلاق و بلاغتی سیف و سنان شهامت  
مقامنده دین و اسلام عایهنده استعمال ایدردی . بوندن  
دولایی ده مضروب پیغمبری اوله رق فتح مکه کونی دمی هدر  
قلعش بولمننه مبنی یمنه قاجمشدی .

حضرت رسول اکرمک طائف سفرندن عودتی  
اتناده بحیر ، مسلمان اوغلله انک اسلامنی کعب ایشیده رک  
کندوسنه : « نیچون بابا کاک دینی ترک ایتدک ، دینه

ستم و تکدیری حاوی بر قصیده کوندردی . اشبو  
قصیده بی بحیر ، حضور پر نور نبویده او قودی . حضرت  
پیغمبرك بوندن ناشی کعب حقهده کی غضب هایونلری مشتمد  
اولدی . و کعبك بودرلو حرکتنه . مقابل بحیر دخی رسول  
خدانك حلم و مروت و مکارم اخلاقه دأر . کتوب  
یازوب کبی دین اسلامه وسده سنیة حضرت رسالتپناهی یه  
عرض معاوخته دعوت ابتدی .

مکتوبك وصولنده او آنه دکن کعبك قابنده بولنان  
قسوت در حال زائل و دین مبین اسلامه نورهدایتی و رسول  
اکرم خدانك وده و محبتی حاصل اوله رق مدایح جلیله سنه  
دأر انشاد ایلدی کی قصیده غرا ایله مدینه منوره یه کلدی .  
ابوبکر الصدیق حضر تلرینك یاننه واردی . اوده انی الوب  
صبح وقتی مسجد شریفه کیتوردی . و :  
— « یارسول الله ! بیعت ایدم جك »

دیه حضور اقدس نبوی یه عرض و تقدیم ابتدی .  
کعب ، ابتدا ید مؤیده نبوتپناهی بی طوته رق اخذ بیعت  
ایلدکن صوکره حضور عالیده دیزچو کوب او طور دی و :  
— « کعب بن زهیر ، نائب و مستغفر اولدینی حالده  
استیمان ایچون حضور سعادتکزه کلك ایستیور قبول  
بیوریلور می یارسول الله »



دیوب [نعم] جواب قبول وامانی المغله :

— « یا رسول الله ! کعب بن زهیر ، بنم »

دیرکن بونی ایشیدن انصاردن بری قالدی :

— « رخصت ویرده شونک بوینی اوریم

یا رسول الله ! »

دیدى. رسول اکرم :

— « وازکیچ که او ، دین اسلامه میل ایله تابا

کمشدر »

دیه انی منع ایتدی. اول وقت کعب دخی قصیده سنی

تلاوته باشلادی . تلاوتی عاشقانه برادا ایله ایدی .

کیفیت ، محظوظیت هایونی موجب اولمقده ایدی . حق :

ان الرسول لنور يستضاء به

مهند من سیوف الله مسلول

بیته کلدیکی زمان اشبو بیتک استماعندن کسب و تحصیل

بیوردقلری خط او فرلرندن ناشی افندیمز ، مبارک ظهر

شریفارنده کی برده سعادتارینی چیقاروب جائزه اوله رق

کعبه احسان واکسا بیورمه شلردر . کعب دخی برده مبارکینی

شکران فراوان ایله اخذ و قبول ایدوب عمری اولدقچه

او برکذر سعادته افتخار ایده کمشدر .

۱۱

## غزوة تبوك

تبوك ، دمشق شام ايله مدينة منوره ارمسندہ بر  
موضع معروفدر شامدن مدينة طاهره زيتون ياغي  
ايله بياض اون كتين بر قوم ، قيصر رومك شامده  
اسلام عليهنده تجهيز جيوشه متدارك اولديغني و جذام  
وغسان قبيله لرينك ده روم ايله متفق بولندقلرني خبر  
و يرمسيه مقابله ليزوم كوريله رك اردو ترتيبه افنديمز ؛  
امر و فرمان بيورديلر .

مكندن و قبائل سائرمدن عسكر جلب ايتك اوزره  
اطرافه مأمورلر كوندرلدي . اوكونلرده مدينه حواليسنده  
براز قحط و غلا وار ايدى . او مناسبتله قدرتي اولانلرك  
عسكره اغانه ايتلري ده امر بيوردلدي .

حين تدارك و سفرده حر كتن مقدم محل مقصودي  
تبيين و تصریح بيورماق عادت سنیه لری ایکن بو دفعه  
روم علیه ایدوکی خلاف عاده اوله رق اصحاب کرامه  
اعلام بیورلمشدی که تدارکده غفلت و مسامحه اولنیه رق  
روم کی بردولنك اهمیت وقوتنه و حال حاضرده کی مضایقه

معلومه کوره هر کس متبصر و متدارك بولمق نفيه  
 رمز و اشارت ديمکدی .

اشبو غزاده اراده سنيه جناب رسالتپناهی به امثالاً  
 ابوبکر الصديق رضی الله عنه افنديمز، تبرعا و جهاز عسکره  
 اعانة جميع اموالي اعطا ايلدی .

حضرت عثمان ذی النورین رضی الله عنه دخی شامه  
 کوندرمک اوزره حاضر لدينی ايکی یوز و فی روايه اوج  
 یوز رأس دوه سنی حمله لری بولنان ذخيره ايله برابر  
 ايکی یوزقيه کموش اعانة اعطا ايلمشدر . قتاده نک روايته  
 کوره مشار اليه حضرتلری، اشبو غزايه بيک رأس دوه  
 ايله یتمش آت کوندرمشدر .

عبدالرحمن بن سمره دن منقولدر که حضرت عثمان  
 ذی النورین ، بکنه بيک التون قويه رق حضور اقدسه  
 کتيروب دوکدی . رسول اکرم ، او آلتونلری مبارک  
 اللریله قارشديروب : [ ما یضر عثمان ما عمل بعدالیوم ]  
 ديه عثمانک سلامت وعافیت دارینتی یعنی ماضی و آئیده کی  
 خطیئاتنک مغفوریتنی او ساعتده کنديسنه تبشیر  
 بیورمشدر .

حضرت عمر الفاروق دن مرویدر که :  
 تبوک سفری اناسنده زنکین ایدم ، کندی کنديمه

دیدم که « ابو بکری کچه بیلورسم ایشته شمدی کچه  
بیلورم ، بو امید ایله جمیع مالک نصفی کتیروب تجهیز  
جیوشه صرف اولمق اوزره حضور اقدس نبوی به  
براقدم . نبی اکرم بکا :

— « یا عمر ! اهل و عیالک ایچون نه الیقویدک »

دیدى . بن :

— « بر بوتدرینی براقدم یا رسول الله ! »

دیدم بو ائنده ابوبکر الصدیق کلدی . اعانه و یردیکی  
صدقه یی کتیردی . اکاده سؤال بیورلدى . جوابده :

— « ادخرت الله و رسوله »

دیدى . صوکره بن :

— « یا ابا بکر ! هیچ برشیده سفی کچه مدم » دیدم .

\*\*\*

عبدالرحمن بن عوف رضی الله عنه دخی قرق قیه  
زر خالص العیار و دیگر روایتیه کوره درت درهم اعانه  
و یروب :

— « یا رسول الله ! سکنز بیک درهم وار ایدی

نصفی ربمه اقراض نصف دیگرینی اهل و عیالم ایچون  
ادخار ایتدم »

دیدي. حضرت پیغمبر: [برکت اولسون ویردی که  
و الیقویدینگکه] دیه دعا بیوردی .

نبی اکرمک درود اجابت نمودی برکت لریله جناب حق  
عبدالرحمانک مالنه اول قدر برکت احسان بیورمشدی که  
دورت زوجه سندن مرض موتنده تطلق ایلدیکی تماضر بنت  
اصبع، ربع ثمن حصه ارثیه سیچون ورثه ایله سکسان بیک  
درهم و بر روایتده سکسان بیک مثقال التونه صاع  
ایتمشدی .

عباس بن عبدالمطلب ، طلحه بن عبدالله ، سعد بن  
عباده ، محمد بن مسلمه رضوان الله علیهم اجمعین حضراتی ده  
بررمقدار مال اعطا ایتشلردر . فاصم بن عدی حضرت لری  
یوز وسق خرما اعطا و اتفاق ایتدی . انصار کرامدن  
ابو عقیل دخی بر صاع ، دیگر روایتده کوره یازم صاع  
خرما و یروب: [بوکیجه صباحه قدر خلقه قیودن اجرتله  
صو چکدم اجرتم اوله رق ایکی صاع خرما ویردیله .  
برینی بورایه کتیردم . برینی عیاله براقدم] دیمشدر .  
رسول اکرم صلی الله علیه وسلم ، امر بیوردیلر  
ابو عقیلک خرما سنی دیگر بعض اصحاب کرام طرفدن  
کتیریلاان خرمانک اونسته صاچدیله .

منافق را ، طعن و تشنیع صد دهنده دیدیلرکه :  
عبدالرحمن ایله عاصم ، او قدر کلیتی مالی مجرد ریاء  
ایچون ویرمشلر ! . هله ابو عقیلک برصاع خرما سنه  
اللهک و رسولک احتیاجی یوغیدی لیکن ابو عقیلک  
قصدی ، کندی اکیروب صدقاتدن برشی المقدرا ! .  
منافقینک بوکونه سوزلرینی حق تعالی : [ الذین  
یلمزون المطوعین من المؤمنین فی السدقات والذین لا یجدون  
الاجهد هم فیسخرون منهم سخر الله منهم ولهم عذاب الیم ]  
آیت کریمه سی انزال بیورده رق رد و تزییف ایتشدرد .  
نسوان اصحاب دخی حلیاتلری اهدا ایله اعانه  
اشترک ایامشلردرد . سفر ، غایت صیجاق بر موسمه  
مصادف ایدی . حرارت هوایی منافقین سر رشته  
طوته رق مسلمانلری تهویل صد دهنده : [ لاتنفروا فی الحر  
= . بیجا قنده غزا یولنه چیقمیکز ] دیه سمی بالفساد  
ایتدیلر . منافقلری رد و تکذیب ایچون : [ فرح الخلفون  
بمقدمهم خلاف رسول الله و کر هوا ان یجاهدوا  
باموالهم و انفسهم فی سبیل الله و قالوا لاتنفروا فی الحر  
قل نار جهنم اشد حرأ لوکانوا یفقهون ] آیت کریمه سی  
انزال بیورلدی .

منافقتك پیشوای مشهوری « عبدالله ابن ابی بن  
سلول » ده: « روم دولتی محمد [ علیه الصلوة و السلام ]  
نه ظن ایده یور اصحابیه برابر انک اسیر اوله جقلرینی  
بیلورم، دیه مسلمانلری تخویفه چالیشیر ایدی. مسلمانلر  
ایسه اراذل مرقومنه نک اودرلو تفوهاننه رغما خواهش  
میح ایه جهاده حاضر لقمده ایدیلر .

\*\*\*

ابتداء امرده بعض اهل ایمانک ده تخلف ارزوی  
حسن اولنمشدی. که مؤمنلرک اشبو ارزوی تخلفلرینی  
معرض توبیخ و تقریعه جناب حق جل و علا: [ یا ایها  
الذین امنوا مالکم اذا قیل لکم انفروا فی سبیل الله انا قاتم  
الی الارض ارضیتیم بالحیوة الدنیا من الاخرة فما متاع  
الحیوة الدنیا فی الاخرة الا قایل ] آیت کریمه سبیله بیلدیر-  
مشدر .

ناسک غزادن تشاقللری، غزاتک شدت حرارت  
ایام صیفه و تحطه مسادف اولسی ، مساننک بعدیه  
برابر لوازم حرب و غزاجه نقصانلری مدینه ده اثمار  
وفوا کهک زمان ادراکی بولنمسی و عسکر رومک قوت  
و مهابتی کی بر قاج وجوه و اسبابه مبنی ابدی .

\*\*\*

وفور بنی کنانه — تبوك سفری انساننده بنی کنانه نك  
وافدارى بر جماعت اولدينى جالده مدينه طاهره يه  
كلديلر. رئيسلرى «وائله بن الاسقع» ايدى .

رسول اكرم صلى الله عليه وسلم، اكا: [سن كيمسك  
ونه ايجون كلذك؟] ديه سؤال بيورديلر. وائله :

— «اللهه و رسولنه ايمان ايتمه كلدم بكا قبول  
امر و نهك اوزرينه بيعت اعطا ايت»

ديدى. اولوجهله اخذ بيعت ايدرك كندى ديارينه  
كيتدى. قومننى كيفيتدن خبردار ايدر كن پدرى اعراض  
ايدوب بردها يوزينه باقىه جغنى سويلمش برادرى وفى  
روايه همشيره سى بالعكس انصاف ايله قبول اسلام ايتدكن  
فضله تبوك ايجون سفر لوازه نى تدارك ايدويروب وائله يي  
مجهزاً مدينه طيبه يه اعزام ايلمشدر .

وائله نك مدينه منوره يه شوايكننجى كليشندن آزاو  
حضرت نبى عزز، تبوكه متوجهاً حركت بيورمشلردى.  
زاد و ذخيره كى لوازمك نقصانندن طولاي كبرى  
قالعه مجور ارله جق اصحاب كرامده متأسف ايديلر. حتى  
بو كى فقراء اصحابدن «سالم بن عمير، علبه بن زيد، ابوليلي،



عبدالرحمن بن كعب مازنی ، عمرو بن غنمه ، سلمه بن  
صخر ، عرباض بن ساریه ، عبدالله بن مغفل ، حضراتی  
برلكده حضور اقدس پیغمبری به كلوب :

— «یا رسول الله! بز، پیاده قالدق. ینه جك ویرده

سنكله برلكده غزایه كیدهلم»

دیه عرض حال ایندیله . رسول اکرم صلی الله

علیه وسلم :

— «سزك ایستدیککز بنده یوقدر»

جوانخی ویرمكله انلر ، معیت سنیه شرفندن محرو-

میتلرندن ناشی اغلدقلى حالد پيشگاه عالیدن طیشاری به  
چیقدیله .

اصحاب مشارالیه هم حضراتنك شو كونه اغلايشله

حضوردن چیقملری ، كندولرینك بین الاصحاب «بكائین»

عنوانیه معروفیتلرینه سبب اولمشدركه حقیقت حال

و صمیمیت باللرینی : [ وعلى الذين اذا ما نوك لتحملهم

قات لا اجدما احملكم عليه تولوا واعينهم تفيض من الدمع

حزناً ان لا يجدوا ما ينفقون ] آیت کریمه سی اشعار ایدر .

مع مافیه بونلر ، شرف معیتدن ینه محروم اولماشلردر . ابن

یامین بن عمیر بن كعب نضری ، ابولیلی ایله عبدالله بن مغفله

اوساعتمده واولله حالد تصادف ایتدیكندن ینمك ایچون بر

دوه و زاد و ذخيره اوله رقه برصاغ خرما ويردى .  
 ديكر ايكيسى، عباس بن عبدالمطلب رضى الله تعالى  
 عنه حضرت تلى جابندن، اوچى ده عثمان بن عفان رضى  
 الله عنه حضرت تلى طرفندن تجهيز ايديله رك دوه لره .  
 اركاب و غزايه اعزام اولمشلردر .

ابو موسى الاشعري رضى الله عنه حضرت تلىندن  
 منقولدركه :

اشعري جماعتى ، ينه جك حيوان طاب واستدعا  
 ايمك اوزره بنى حضور على رسول الله كوندديلر .  
 بن ده :

— « يا رسول الله ! ارقداشلم، مركب احسان

بيورمكر استدعاسيله بنى سكا كوندديلر »

ديه عرض حال ايتدم . بوكا قارشى افنديمز :

— « والله بنى هييج برشيئه بينديرم »

جوابى ويرديلر مكر بن، خبرم اولميه رقاو حضرتك

حال غضب هايونلرينه تصادف ايتشم . تأسف و تأثر

رسول الله يى مستلزم بر حر كنده بولنديغم خوفندن

طولاي محزون اوله رقاو ايتدمك نرينه كلدم .

انلره بيان حال و كيفيت ايتدم اره دن بك آز مدت

بیله کچما مشدی ایشتم که منادی بیدانی رسول الله اولان  
حضرت بلال : [ ای عبدالله بن قیس ] دیه ندا ایدر  
جواب ویردم . بلال . بکا :

— « کل رسول الله سنی چاغیرور »

دیدی بو کره حضور عالیلرینه کیر دیکم آنده  
رسول الله صلی الله علیه و سلم بکا : [ خذ هذین  
القرینین و هذین القرینین ] دیه سعددن صاتون  
آلهزق حاضرلدیغی الی رأس دوه لری اشارتله  
کوستردی . و :

— « بونلری ارقداشلریکه کتورده سوبله که  
جناب الله [ و یاخود رسول الله ] سزی بونلره  
بیدیرور بیکیز »

دیدی . بن ، اودوه لری الدم کلام . و امر عالی یی  
حرفیاً تبلیغ ایتدکن صوکره دیدم :

— « والله سزی براقم ناکه بریکیز بنمله کلوب  
رسول الله مقاله لرینی ایشیدم جکدر یوقسه رسول الله  
سویلمدیکی برسوزی بن ، سزه تصنیعاً بقل ایتشم ظن  
ایدرسکیز »

ارقداشلر . بکا :

— « سن، بزم عند مزده طوغری بر آدمسك و لكن  
 مادام كه اويله ارزو ايتدك كيدرز »  
 ديوب قالدیلر. برابر كيتدك . بن دیدم :  
 — « يا رسول الله بزه مركب ويرمامكه اول یمین  
 ایتشدك شمدی ویزدك »  
 بونك اوزرینه افندیمز :

— « سزه مركبی جناب حق ، ویردی . بكا امر  
 ایتدی كه برایشی یا پمانه یمین ایتسه مده صوكره بیلسه مكه  
 خیر ، اویشی ایشلمكده در یمینی بوزوب كفارت  
 ایدیم »  
 دیه جواب ویردی .

\*\*\*

اصراب بنی اسدونی غطفاندن سکسان و برروایتده  
 یتیمش ایکی و یا اوتوز طقوز کشی سرد اعدار  
 طریقله تخلف ایچون استیدان ایتدیلر. استدعالری مقرون  
 مساعده سذیه اوله رق کندولرینه : « کیدیگز مامولدرکه  
 جناب حق ، زمان قریبده بزی سزدن مستغنی  
 ایدر » بیورلمشدر . [ و جاء المعذرون من الاعراب  
 لیؤذن لهم و قعدالذین کذبوا الله ورسوله سیصیب

الذين كفروا منهم عذاب اليم ] آیت کریمه صی . اعراب  
مرقومك صورت تخلفلری حقدند نازل اولمشدر .

\*\*\*

مرویدرکه تبوك اثناء تدارکنده رسول مکرم ، بنی  
سلمه دن « جد بن قیس » :

— « بنی اصفر غزاسنه بزمله کیتکه هیچ رغبتک  
وارمیدر ؟ »

دیه سؤال بیوردی . جد بن قیس ، جوابده :

— « یارسول الله ! اذن ویرکه مدینه ده قالهیم .

زیرا بنی بیلورلرکه عورتلره زیاده میلم وارددر . قورقرمکه  
روم قیزلرینی کورور ایسم صبرسنزقلله فتنه یه دوچار  
اولورم »

کبی سوزلری درمیان ایتمکه نبی افیخم صلی الله  
علیه وسلم :

— « سکا اذن ویردم »

دیوب اندن اعراض بیوردیلر . مرقومك اعتذارنده کی  
بطلان ، بدیهی اولمغله جناب حق الک شاننده : [ومنهم  
من يقول ائذن لی ولا تفتنی الا فی الفتنة سقطوا وان  
جهنم لمحیطة بالكافرین ] آیت کریمه بنی انزال بیوردی .

\*••

مكة مباركدن مدينة طاهريه حين هجرت سنيده  
 بني سلمه دن سيدورئيسلرينك كيم اولديني سؤال بيوريله رق  
 بني سلمه :

— « رئيسمز، جد بن قيسدر . ولكن بخل ايله  
 موصوف و معروفدر ،

جواني ويريركن رسول خدا افنديمز ، بر وضع  
 انكارايله : « اي داء ادوؤ من البخل . سرك رئيسكمز،  
 عمرو بن جوحدرد، ديمش وجد مرقومي بخلي سبيله موقع  
 سيادت و رياستدن تنزيل ايلمشدي ا .

•••

ذات اشرف حضرت رسالتپناهينك خلق جهاده  
 حث ونحريضنه قارشى منافقذر ، افكارعموميه نك طرف  
 طرف تشويشنه سعي واقدامدن كيري طورمامقده ايديلر .  
 بومقوله دن بر كروه ، سويليم نامنده بر يهودينك خانه سنده  
 قشبت اهل اسلام عليه نده لاقردى ايتمكه ايديلر .  
 حضرت پيغمبر ، طلحه بن عبدالله حضرت تلي بنى اصحابدن  
 بر جماعتله اعزام ايدرك انري او خانه دن طاغندي .

\*••

جلاس بن سويد بن صامت نامنده برى ، اوغلى ياخود

اووهی اوغلی مصعب ایله برر اشکه را کباً جانب  
قبادن مدینه طیهیه طوغری کلیورلردی اهل اسلامه  
عداوتی اظهار وانلرک تبوک سفرندن تخافلرینی ارزو  
ایده رک دیدی که :

اگر محمد [علیه الصلوٰۃ و السلام] ک کتیردیکی حق  
ایسه بز ، بو بیندیکمز اشکلردن بد تر اوله لم :

بوسوز ، مصعبه تأثیر ایتدیکندن مصعب . حدتله :  
— «ای عد والله ! خدا حقیچون سنک بوسوزیکی  
حضرت پیغمبره ایصال ایدرم . سن ، بنم لظرمده خلقک  
اعزى ایدک . شمدی برسوز سویلدک که اوسوزی اکا  
سویلرسم سنی خلق ایچنده رذیل ایدر سویلمزسم بن  
هلاک اولورم ولکن هلاکدن سلامت اولیدر ،  
دیدى ودر حال کلوب ماجرانی :

— « یارسول الله ! اگر بنده بو کناهده شریک  
اولوب حقمده آیت نازل اولمق خوفی اولمیدی ویاخود  
بر بلایه گرفتار اولمق اندیشه سی بولنسمیدی انک بوسوزینی  
سیکا سویلمزدم »

دیه عرض ایتدی . حضرت پیغمبر ، جلاسی جلب  
ایده رک صورتی جلاس ، یمین ایله برابر انکار ایتدی  
مصعب ، اوراده حاضر ایدی : [ یارب رسولکه بر آیت

کوند رکه صدق کلام اندن بللی اولسون [ دیه مناجات  
ایتدیکنندن ] بحلفون بالله ما قالوا ولا قد قالوا کلمة الکفر  
وکفروا بعد اسلامهم وهموا بما لم ينالوا وما نقموا الا ان  
اغناهم الله ورسوله من فضله فان يتوبوا یک خیراً  
لهم ... ] آیت کریمه سی ، نازل اولمشدر .

جلاس ، آیت کریمه بی ایشیدنجه : [ جناب حق ،  
بکاتوبه بی عرض ایلدی ] دیه مرضی عالی به مخالف تفوهاتندن  
صدق و انا بته توبه ایتدی . حتی اوتنه دنبروا کا قارشی  
ابراز ایدم کلدیکی طور و معامله سنی تغیر و تبدیل ایتدیکی  
کبی برو احساننی ده کسمامشدر . جلاسک بو کونه حال و  
حرکتی ، قبول توبه سنه و صدق قولنه علامت عدا اولمشدر .

...

تدارکاتک ختایله حضرت نبی اکرم صلی الله علیه  
و سلم اهل بیت رسالتلرینه نظارت ایچون حضرت  
علی کرم الله وجهه افندی میز و امور مملکتک اداره سی  
ایچون ده محمد بن مسلمه بی مدینه طیبه ده استخلاف ایتدی  
اداره امور مملکت ایچون « سباع بن عرفطه » بی  
برافدینی ده مرویدر . دیگر بر روایتده دخی « ابورهم  
الغفاری » بی برامشدر .



حضرت علی . کندوسنک معیت سنیهدده تبوکه  
کیدهمیه جکنه تأسف ایدرک :

— « یا رسول الله! بو آنه قدر هیچ برغزاده تخلف  
ایتمدم سبب بدرکه بنی کری به براغوب کیدرسپک ؟ »  
دیدى . بوکا جوابده افندیمز :

— « اما ترضی ان تكون عندي بمنزلة هارون من  
موسى الا انه لاني بعدى = راضى دكليسك كه  
عندمده هارونك موسى نزدنده حائر اولدینی رتبه  
ومنزله اولهسك و لكن شو قدر بر فرقك واركه  
هارون ، موسادن صوكره بنی ایدی بندن صوكره بنی  
و نبوت یوقدر »

دیوب انی بالخاصه اعزاز بیوردقندن صوكره  
زوجات طاهرات رسالتیناهیلرینه ده انك مأموریتی  
بیان و امر نهینه اعتبار اولنمی لزومنی اخطار ایتدی .  
اردوی هایونك خارج مدینه طاهرده « نذیه الوداع »  
نام محله طویلانمنسه اراده سنیه رسالتیناهی شرفصادر  
اولهرق حضرت ابو بكر الصديق رضى الله عنهده محل  
مذكوره مرکز قوماندانی بالتعیین عسکره نمازده امامت  
ایتمسی طرف اشرف نبویدن کندوسنه امر وتنبیه  
بیورلدى .

منافق عبدالله ابن ابی بن سلول ، اورادہ بر بلوک  
 ارقد اشاریلہ اردو کاہ اسلام سمتہ یورویہ رک «زباب» نام  
 محل مقابلندہ توقف ابتد .



رسول اکرم صلی اللہ تعالیٰ علیہ وسلم ، رجب شریفک  
 طقوزنجی پنجشنبه کونی مدینہ طیبہ دن حرکت بیوردی .  
 منافقر ، قنہ قصیدیلہ : «علیہ اولان غیظ و برودتنہ  
 مبنی انی کری براقدی» دیدکارندن بو سوز ، علینک  
 کوجنہ کیدہ رک همان سلاخلاندی . سیر سریع ایلہ نبی  
 معظم افندیمر [جرف] مخلندہ یتشدی و :

— «یا رسول اللہ ! خالقده شویله بر سوز واردر  
 مظنه نك ازاله سیچون بنی معیتکزه السه کز»  
 دیدی . و لکن مرتبہ هارونیتہ راضی اولسی  
 وصایاسنک تکراریلہ اعاده بیورلدی .



ثنية الوداعده رايات والويه عقد اولنه رق علم اعظم ،  
 صديق اکبر یدینہ وبرروایتده زیر بن العوام حضر تلیرنک  
 الہ ویرلدی . اوسک لواسی ، اسید بن حضیرہ خزر جک  
 لواسی ده ابو دجانہ حضر تلیرنہ اعطا ایدلدی .

انصار کرامدن هر بطن کندينه بر لوا عقد ايته دي .  
 بني مالك بن النجار بطنك بايراغني عماره بن حزم  
 حضرتلرينه ويرميشدي . بعده كيري الوب زيد بن ثابته  
 ويردي . او زمان عماره :

— « يا رسول الله ! بكا غضبي ايتدك كه بايراغني  
 المدين كيري الدك »

ديه صوردي . رسول الله افنديمزا كا :

— « غضب ايتدم ولكن حق تقدم اهل قرآنكدر  
 زيد . قرآني سندن زياده اخذ ايتمشدر . قرآن ، كندي  
 صاحبنی تقديم ايديجيدر هر نقدر صاحبي قولانغي كسيك  
 بر عبد سياه دنجي اولسه »  
 جواڭني ويردي .

افراد اهل اسلام ، اردوكاهده تعداد اولندي .  
 بر روايته اوتوز بيك ديكر روايته قرق بيك ايدي .  
 مقدمة الجيشه خالد بن الوليد ، ميمنه عسكركه طلحه بن  
 عبد الله ، ميسريه عبد الرحمن بن عوف رضوان الله  
 عليهم اجمعين حضراتي تعين بيورلدي .

اردوي هايونك اورادن حركتي ائنهاده عبدالله بن  
 ابي بن سلول ، نفاقدن باشقه سبب وعاته مستند اولميهرق :  
 [ بنم بني اصفرله حرب وقتاله ايشم يوقدر . خلق ظن

ایدرلرکه انلرله قتال قولایدرد. اویله کور یورم که شو خلق  
 زنجیر اسارتہ طاقلسہ لر و اطراف عالمہ طاغلسہ لر کر کدر]  
 دیوب کری دوندی . کندی کبی اولان ارقداش لری ده  
 برابر ایدی. انلرک خبر تخلف لری مسموع عالی اولنجہ:  
 — «اگر اندہ خیر بوانسییدی بزملہ رفیق اولور  
 ایدی ممنون اولیکز که اشرا رک شرلرندن خلاص اولدیکز»  
 بیورلشدر .

صحیح الاعتقاد اولان اهل اسلامدن ابو ذر الغفاری  
 و ابو خیشمة السالمی ، کعب بن مالک ، مرارة بن الریبع ،  
 هلال بن امیہ حضراتی کری قالمش لردی . ابو ذر  
 حضرت لری ، اردو ایلہ برابر چیق دینی حالہ دوه سی  
 بولدہ قالمقلہ زاد و ذخیرہ سنی بالضرورہ کندوسی  
 یوکلنوب راجلاً اردو بی تعقیب ایتشدر ! .

ابو خیشمة ده مدینہ ده برقاج کون طور دقدن صوکرہ  
 کری قالدیغنه پشمان اوله رق یورودی اردوی هایونه  
 التحاق ایلدی . دیگر اوچ ذاتک تخلف لری ده مجرد مشقت  
 سفردن قاجدقلری ایچون ایدی .

...

وافد بنی کنانه اولان «وانله بن الاسقع» دخی تام

شو صروده بلده سندن مدینه طیه به عودت ایتشدی .  
 لعذر تاخر ایتمش بولنان بعض اعصاب کرام ، برر برر  
 چیقوب اردوی سعادتہ التحاقہ مسارعت ایدہ یورلردی .  
 وائله ، او زمان :

— « بوغزاده الیمه کیره جک حمه غنیمتی کندوسنه  
 ترک ایتمک شرطی ایله بکا کیم بر مرکب ویریر ؟ »  
 دیه اعلان ایتدی . کعب بن عجره ، اکا بردوه ویردی .  
 وائله ، ینوب یوله دوشدی . اردوی هایونه یتشدی .

\*\*\*

اشبو سفردہ یک چوق غرائب مشاهده اولمشدر :  
 ودیمه بن ثابت ، بر بلوک منافق ارقداشلریله برابر موکب  
 هایونک اوکی صره کیدرلردی . استهزاء صددنده  
 یکدیگریته :

— « دقت و تمجب ایدیکزکه بو آدم [ رسول الله  
 صلی الله علیه وسلم ] شامک قصور و حصوتی فتح ایتمک  
 ایستر . »

دیدیلر . ایچلرندن وقبیلہ بنی اشجعدن بنی سلمه حلبی  
 اوله رق مخشی بن حمیر دخی :  
 — « کاشکی بو سوز مقابلنده هر بریمزه یوزر

قرباج اور سیدیلردہ تک حق مزیدہ بوندن طولای آیت نازل اولمیدی .

دیدى . رسول اکرم صلى الله عليه وسلم بوما جرایه مطامع اوله رق عمار بن یاسر :

— « کیت شو قومہ کہ آتشہ یاندیلر ، و سؤال

ایت کہ یکدیگریله شمدی نہ سویلشدیلر . انکار ایدر لر سہ دی کہ سز شوبله شوبله دیمدیکزمی ؟ »

دیه امر بیوردی . عمار ، ودیعه بلوکفی استنطاق ایت مکله انلر ، کلوب حضورر سول اللہہ علی طریق الاعتذار : — « یا رسول الله ! ن ، او سوزی لہو ولعب وملاطفہ طریقہ سویامشدک »

دیدیلر . کہ [ واثن سالتہم لیقوان انا کننا نخوص و نلعب قل ابالله و آیاتہ ورسولہ کنتم تستہزؤن . لاتعتذروا وقد کفرتم بعد ایمانکم ان نغف عن طائفة منکم نغذب طائفة بانہم کانوا مجرمین ] آیت کریمہ سی انلر کہ او بایدہ کی مقالرینک حقیقتی ناطقدہ .

مرقوم مخشى بن حمير ، آیت کریمہ نک منطوقہ عفو الہی بہ نائل اولان طائفہ دن ایدی . حتی کندوسنہ فی سبیل اللہ مرتبہ شہادت نصیب اوله رق قبرینک معلوم بولما سی حقندہ کی مناجاتی قرین قبول بیورلدیغندندر کہ

يوم بمأمده شهيد اولمش و وجودندن اثر و نشان  
بولنما مشدر ۱.

ديار مجمرده مرور — ديار حجر ، جـوار وادی  
القراده در ۰ اردوی همایون اکا واصل اولدینی اثـنـاده  
قوماندان کتیبه انبیاء افندیمر :

— «بو محلك صويندن ایچمیگز. وصویله آبدست ده  
المیگز . انکله یوغورلمش خورکز واریسه انی دوه لره  
وبریکز دوه لره دیزلرینی محکم باغلا یگز . و بو کیجه  
شدتلی بریل اسه جکدر . منزله هیج برکیسه چادرندن  
ارقداشسر طیشاری چیه مسون »  
دیه تنبیه بیوردیلر .

اشبوا و امر و تنبیه اتدن صوکرده ديار حجر دن صورت  
مرور و حرکتک تعین فی قصدايدر اولدینی حالده [نفسارینه  
ظلم ایدن شو معذب خلقتک مسکن و ديارلرینه اغلیه رق  
کیریگز . تا که انلره اصابت ایدن مصیبت ، سزده اصابت  
ایتمیه ] وصایایندی ده علاوه ایدرکن مبارک باشنی اوزته رک  
دوه سنی اسراع ایلدی و وادی بی سرعتله یجدی . اردوی  
همایونک اوجوارده اقشاملین اینه جکی و اینه یکی منزله  
کیسه نك ارقداشسر چادر دن خارجه چیه مامسی امرعالی

اقضاندن ایدی هر کس، اشبو اراده سنییه اتباع ایتمشکن  
یتون اردونک ایچندن یالکیز بنی ساعده قبیله لی ایکی  
کیمسه عذر و غفلتله حدود امری تجاوزله ارقداشمنز  
طیشاری چیقدی لر !

بری، قضاء حاجت ایچون چیقمشدی. انی خناق  
علی طوتدی، مصروعاً یر. دوشدی. دیکری دوه سنی  
غیب ایتمکله ارامغه چیقدی انی ده یل قابول بنی طیّ دیارینه  
آدی !

مصروع مرقوم، اصحاب کرام طرفدن قالدیرلدی  
رسول الله صلی الله علیه وسلم اقدیمزک، دعاء بالخیر شفاء  
وعافیتله شفا یاب اولدی. دیکری نیر اردوی سعادتک تبو کدن  
عودتله مدینه طاهره یه مواصلتندن صوکره بنی طیدن  
یوقاچ کیمسه لر کتیردی لر.

...

حیار حجر حدودنده بولندی کیجه نك ایرته سی  
صباحی عسکر، صوسزلقدن صوکره درجه ده، مضطر  
قاله ورق دربار درر بار رسالته شکایت ایتدی لر. غوث الرسالین  
اقدیمز، یوز بنی قبله یه ذونه رک دعا ایتدی هواده  
هیچ بلوط یوق ایکن همان یلوتلر پیدا اولدی. ویکدی کیرینه



قاریشهرق بیوک یاغمور یاغدی . خلق . قزیه لرینی صو  
ایله طولدر دیلر . حضرت پیغمبر افندیمنز کمال سرورندن  
تکییر ایلدی . و او آند بولوتلر یازیلوب هوا چلمغله :

— « بن . شهادت ایدرم که خدانک رسولی م »

بیوردیلر . مسلمانلر . او سماعتده کی رحمتک کیفیت  
نزوانی کورمش اولان بر منافقه :

— « معجزه نبویه بی کوردک . ارتق عذرو بهانه یه

محل یوق کل مسلمان اول »

دیدیلر . منافق خبیث :

— « اوت تصادفی بر بولوت کچردی

یاغدی !... »

جوانی ویردی .

...

برمنزلده ناقة سعادت ، ضایع اوله رق اصحاب کرام ،  
ارامغه حقیقه شاردی اهل عقبه و بدردن اولان « عماره  
بن حزم » حضرت تلخیص ده حضورعالیده ایدی . عماره نک  
حضورده بواندینی صروده منزلتیده قینقاع یهودیلرندن  
زید بن الصلت بولنه رق کندی یاران وهوا دارانه دیر  
ایمش :

— « محمد [ علیه الصلوة والسلام ] پیغمبرم دیر و  
کوکلردن خبر ویریز . حالبوکه شمدی دود سَنک زرده  
اولدیفنی بیلمز ،

امک اشبو تفوهاتی رسول اکرم نور اقدس نبوتله  
کشف بیوره رق عماره یه :

— « یا عماره ! سَنک منزاکده بر آدم ، شویله بر  
سوز سویلدی . خدا حقیچون بن ، غایی بیلیم . مکرکه  
حق تعالی انی بکا بیلدیره . اشته شمدی دودمک زرده  
اولدیفنی حق جل وعلا ، بکا بیلدردی . فلان محله  
یولاری برداله طولاشمش طوربور کیدیگز کتیریگز ،  
دیدي بعض اصحاب ، همان کتیدیلر . یولاری دالدن  
قورتاروب دود بی کزی کتیردیلر .

عماره ، منزله کلدی حاضر اولانلره ماهوالواتی  
اکلاتدی . ایچلرندن بری :

— « سن کلزدن اول بوراده زید بن الصلت ، سَنک  
دیدیکک شیدی سویلمشدی ،

دیمکه عماره حدتندن منافقک ا کسه سَنه بر توقات  
اوروب :

— « یا عباد الله ! بنم منزله بیوک بر مصیبت وار

ایمش ،

دیه حریفی اورادن سورمش چیقارمشدر.

سهبیل بن بیضاده منقولدرکه :

تبوك سفرنده رسول اكرم صلى الله عليه وسلم  
بر کون بنی ردیف ایلمشدی یوکسک سسله بکا  
خطاباً اوج کره : [ یاسهبیل ! ] دیدی . بنده هر  
دفعه ده : [ لبيك ] دیدم . بوندن اصحاب کرام تفرس  
ایندیلرکه مقصود عالی ، کندیلریدر درحال اطراف  
وجوانیدن برربرر حضور سامیده طویلانه رق شرفظه ور  
خطابه منتظر اولدیلر . افندیمز ، انلره :

— ومن شهد ان لا اله الا الله وحده لا شريك له وان  
محمداً عبده ورسوله حرمه الله على النار ،

بیوردیلر .

...

یولمه مه — یول اوزرنده بیوک بر بیلانه تصادف  
ایدیلرک خلق قورقودن یانسه یناشه مدیلر . بیلان کلوب  
حضورنبویده بر مدت مکث ابتدی کورنلر ، تعجب  
ایتمکده ایدی . صوکره ، کری کیده رک یولک بر کنارینه  
چککدی ناس . حضرت رسول اکرمک نزدینه طویلاندیلر .  
افندیمز :

— بیلور میسکز که بوییلان نه سسویلر؟ مکده یانمه  
 کلوب بر کیجه قرآن اجتماع ایدن جنلردندر. منزلی بو  
 نواحیده اولدیغندن رسول خدایی استقبال حققی ایفا  
 ایتک اوزره قارشومزه کلدی. و بعض مشکللرینی صورتدی.  
 جواب آلدی شمعدی اوراده طور یور و سزه سلام ایده یوره  
 دیدی. بونک اوزرینه اصحاب کرام، انک سلامنی :  
 [ علیه السلام و رحمة الله وبرکاته ] دیه احسن صورته  
 و دایتدیله. ایشته بونک اوزرینه ایدی که افندیمز: [ حیوا  
 عباد الله من کانوا = کیم اولور ایسه اولسون عباد الله  
 قاعده تحیتی ایفا ایدیکر ] بیور مشلردر.

برکون جناب پیغمبر صلی الله علیه و سلم ، اصحابنه  
 بیوردی که :

— یارین قوشلق وقتی تبوک پیکارینه واره جغز  
 هر کیم که بندن اول یتشیرسه اکال صوقسون ،  
 تبوک نام مرحله ، مدینه طیبه دن شامه کیدرکن  
 یاری یولدر . اردوی همایون واروب پیکارک  
 باشنه ایندی مکر ایکی آدم اول وار مشلرمش ! پیکارک  
 صوبی ایسه اردونک احتیاجنه کافی مقدار دن آرزو ضعیف  
 اقرار ایدی . رسول اکرم صلی الله علیه و سلم ، او ایکی  
 شخصدن صورتدی .

حرف ياء ك صويه طو قاذقلى اكلاشيله ر ق كنديلرى تكدير  
ايدلدى. صو كره اسر يغمبرى موجبنجه بيكارك صويندن  
بر قاب طولديريله ر ق حضوره كتيرلدى حبيب اكرم  
افنديز ، مبارك اللاريني ، اغزيني و وجهه شريفنى قابك  
ايچنه ييقايوب صوينى بيكاره دو كديكنى . متعاقب منبعدن  
فوران شديد ايله صو ، هوايه طوغرى فيشقىرمش آقش  
و او صو ، بتون اردو خلقنه كفايت ايلمشدر .

اردوى هايونك تبوك منزلنده هيت اقاتى اطراف واكنافه  
عكس اتمكده اولديني حالده روملرده ورومه تابع عربانده  
بر كونه حركت كورولمى بناءً عليه محاربه ده وقوع  
بولمى . فقط شام حدودينه قدر كلوب ده قوجه روم  
دولته ميدان او قومسى بالخاصه دهشتى موجب اولدى .  
حتى عقبه ، صريه جوارنده ساحلده [ايله] ديارينك حكمدارى  
بولنان « يوحنا بن رؤبا = وين » تبوكده حضور اقدس  
رسالتناهي به كلوب اوچ يوزالتون جزيه ويرمك شرطيله  
عهد و امان طاب اتمكده كندوسنه :

[بسم الله الرحمن الرحيم . هذه امنة من الله ومحمد النبي  
رسول الله . ليوحنة بن رؤبة واهل ايلة اساقفتهم وسائرهم

فی البر و البحر . اہم ذمة الله و ذمة النبی و من کان  
معه من اهل الشام و من اهل الیمین و من اهل البحر .  
فمن احدث . منهم حادثاً فانه لا یحول ماله دون نفسه و انه  
طیب لمن اخذه من الناس و انه لا یحل ان ینعوه ما یریدونه  
ولا طریق یریدونه من برا و بحر [ دیہ اماننامہ عالی اعطا  
بیور و لمشدز .

اشبوا اماننامہ عالی بی افندیمز ، « جہیم بن صلت » ایلہ  
« شر جیل بن حسنا » حضراتہ یازدیر . شدی .

بلاد شامدن یکدیگرینہ اوج میل مسافہدہ بولنان  
« جرباء » و « اذرح » نام بلدہ لر اہالیسی دہ سنوی یوز  
التون جزیه و یرمک اوزرہ استدعاء عہد و امان ایتملریلہ  
انلرہ دخی : [ بسم الله الرحمن الرحیم هذا کتاب من محمد  
النبی رسول الله لاهل اذرح . اہم آمنون بامار الله و امان  
محمد . و ان علیہم مائۃ دینار فی کل رجب و افیۃ طبیۃ .  
والله کنیل علیہم بالنصح و الاحسان الی المسلمین و من لجأ الیہم  
من المسلمین من المخافۃ ] اماننامہ عالیسی احسان بیور و لمشدز .

\*\*\*

حضرت فخر المرسلین افندیمز ، تبوکدہ بر کون  
محضر اصحاب کرامدہ او طور و در لکن :

— « مافعل کعب [ بن مالک ] »

بیوردی . بنی سلمه دن بر ذات و یا خود « عبدالله بن انیس » حضرت تری ، جوابه تصدی ایدم رک :  
— « یا رسول الله حبسه برداء ونظره فی عطقیه »  
دیدی که بو جواب ، کعبک بلا عذر تخلفتی سده  
سنیه به عرض واعلام صورتی ده متضمن ایدی !

غضب وانفعال جناب نبویدن وقایه مقصدیله معاذ بن جبل  
رضی الله عنه . قائل مذکوره قارشی مدافعه مقامنده [ بدماقلت ]  
دیدکدن صوکره ذات اقدس پیغمبری به اقبال وتوجهله :  
— « یا رسول الله ! ما علمنا علیه الا خیراً »

دیدی . انلرک بو درلو محاوره لری اوزرینه نبی  
افخم افندیمزده سکوت بیوردیلر .

\*\*\*

که ابانر — ابو ذر الغفاری حضرت تری ، اردوایله  
برلکده حرکت ایتیش اولدینی حالد دوه سی یولده قائلله  
زادو ذخیره سنی کندوسی یوکانوب تبوکه طوغری اردونک  
عقبینجه کلیور ایدی .

بر کون رسول الله صلی الله علیه و سلم ومبعی  
تبوکرده ایکن بری جانب مدینه طیبه دن یولده نمایان  
اولدی . اصحاب :

— « یا رسول الله ! یولده بر پیاده کلیور »

دیدیلر . اقدیمز ، اوسمه باقهرق :

— « کن اباذر = ابوذر اول »

بیوردیلر . صوکره اصحاب کرام ، دقت ایدوب

کور دیلر که کلان ، ابوذردر :

— « یا رسول الله ! هو والله ابوذر »

دیدیلر . بولک اوزرینه اوسیار وحیدك حسن اخلاص

ایله آزادکی احوالنك تقدیری ص دنده : [ رحم الله

اباذریمشی وحده ویموت وحده ویمیت وحده ] بیورلمشدرکه

یونده ابوذرك عاقبتنه اشارت وار ایدی .

• شارالیه ، حضرت عثمان ذی النورین اقدیمزك

اواخر ایام خلافتنده ایجاب مصلحت اوله رق « ربذه » ده اقامته

• أمور بیورلمشدی . ویاخود کندی ارزوسیه بالاستیدان

کیدوب انده اختیار اقامت ایلمشدی . بقیه ایام حیاتی

ربذه ده سکون و آسایشله امرار ایتمش و حین وفاتنده

برکوله سیله زوجه سندن باشقه یاننده کیمسه سی بولنماش

ایدی . وصیتی موجبجه انلر ، کیندوسنی غسل و تکفین

ایدوب یول اوستنه براقیدیلر . دوهیه را کب اولدینی

حاله ابتدا تصادق ایدمك جماعته منتظر طور دیلر که



بوده و سستی انجاماتنیدن ایدی . قارشودن بر جماعت  
 کوروندی . دومیه راکب ایدیلر . جماعت ، حذایه  
 کلنجه غلام ، ابوذرک دفنی ایچون انلردن یاردم ایستدی  
 مکرانلر ، اجله اصحاب کرامدن عبدالله بن مسعود  
 رضی الله عنہک جانب عراقن حج ایچون مککیه کلان  
 بر جماعتی ایدی .

ابن مسعود حضرتلری ، او آنده تأثرندن صوت  
 جهیر ایله اغلامغه باشلایوب ابوذرک عاقبت بویله و فانی  
 وقوع بوله جغغه دائر مشکوة صدر شریف رساله-ن  
 لمعان ایدن نور حقیقتی قصد ایدهرک : [ صدق رسول الله  
 تمشی وحدک وتموت وحدک وتبیت وحدک ] دیدی .  
 هپسی دوولرندن ایندیلر . . نمازینی ادا و کندوسنی  
 قبره دفن ایتدیلر .

\*\*\*

که ابا ضیمه — ینه بر اراق یوله بری کوروندی .  
 اصحاب کرام :

— « یارسول الله ! یوله بر سواری کوروندی  
 کلیور »

دیدیلر . رسول اکرم صلی الله تعالی علیه وسلم ،  
 کلان سواری حقنده :

[کن ابا خیشمة] دیدی . صـ و کره دقت ایدوب  
کوردیلرکه ابو خیشمه در ! .

سبب ورود والتحاقی کند و سندن سؤال بیورلدی .  
اردوی هایونک حرکتـدن صو کره ایدی ابو خیشمه ،  
کندی خانه سـنه کیرمک اوزره ایکن کوردی که ایکی  
زوجـه سی محل تنزهی اولان چارداغنی کوزل سوپوروب  
صولامشلا صوغوق صو بارداقـلرینی قویـمشلا . بعض  
طعامـلری ترتیب واحضار ایتـمشلا . قبوده طور دینی حـالده  
کیرمیه رک بونلره براقـدی . و کندی کنـدینه رسول اکرم  
صلی الله تعالی علیه و سلم و بتون اصحاب کرام ،  
مجرد اعلاء کلمه الله و محافظه کلمه اسلام ایچون حضور  
ورا حـتـلرینی ترک ایدوب بوضیـعـه جاقـده کونش ایچـنده صحرالرده  
اولسونلرده بن ، بوراده کولـکه ده زوجـه لرمله مشغول  
اولهیم بوشـرط انصافدن جدأ بعیددر دیه بالملاحظه نفسنی  
لوم و مؤاخذه دن صو کره : [والله بوایکی چارداقـدن هیج  
برینه داخل اولمام . تا که رسول الله مـلـحق اولورم] دیوب  
زادو ذخیره سنی دوه سـنه تحمیلأ نبوکـه طوغری یوللانـدیغنی  
مرض ایدنبجه کیفیت ، محظوظیت سـنیه رسالتـپناهی بی  
مستلزم اوله رق حـقـنده دعاء خیر بیورلدی .

عبدالله زوالجاریه [۰] — اردوی هایونک تبوک متوجهاً  
حرکتی انشاده یولده رکاب عالی به کلوب :

[۰] عبد الله، مزینه قبیله سندنذر باباسنک فوتیله عنمک نزدنده  
یتیم و صوک درجه ده فقیر قالمشدی. بیودکدن صوکره بر قاچ  
دوه و قویون و بر ایکی ده کوله صاحبی اولدی. اسمی «عبد  
العزی» ایدی. قبول دین اسلامه میل عظیمی اولدینی حالده  
عنمک خوفندن جسارت ایدمه مامکده ایدی. رسول الله صلی  
الله علیه و سلم افندیمنک فتح مکه دن کمال عافیت و موفقیتله  
عودت سنیه لرینی استبشار ایتدیکی زمان بتون قوت و جسارتی  
قلبنه طویلایه رق عنمه دیدی :

— « یا عم ! سنک مسلمان اولمکه باقیور ایدم مع التأسف  
شمدی به قدر الله و رسولنه ایمان و اطاعت اماره سنی سنده  
مشاهده ایتدم. بوندن صوکره بقاء عمر و حیاته اعتمادم قالمیه رق  
بن، مسلمان اولغه مجبور بولنیورم. اذن و یرکه مسلمان اولیم »  
عم مرقوم انی رد صره سنده :

— « اکر سنده مسلمان اولور ایسه ک سکا و یردیکم  
اهوالی صرتکدن کوملککه وارنجه به قدر هپ آلیم »

دیه قسم ایتدی. عبدالله، سوق محبت پیغمبری ایله :

— « بن مسلمان اولدم اموالی ایسترسه ک آل »

دیدی. جمیع ملکنی ترک ایدهرک حتی اوزرنده کی رداء  
وازارینی دخی اکا و یره رک چیلاق اولدینی حالده عمی نزدندن  
والده سنه کلدی. خاک پای رسالتپناهیه یوز سورمک ایچون  
مدینه منوره به کیده جکنی افاده ایتدکدن صوکره یولده کیه جک  
برشی ایستدی. والده سی، کندوسنه آلاجه برکلم و یردی .

— یارسول الله! دعا ایت که فی سبیل الله شهید اوله یم»

دیدیدی . افتدیمز ، جوابده :

عبدالله، کلیمی ایکی پارچه کسیدی . برپارچه سنی ظهرینه ردا ، دیگر پارچه سنی ده بلنه ازار باغلا یوب او هیئتله مدینه طیبه یه کلدی که آلاجه ایکی پارچه کلیمی ردا و ازار ایتمش اولدیغی مناسبتیله «ذو البجادی» نامیله تعرف ایتشدور .

عبداللهک مدینه طاهره یه موصلتی صباح وقتی ایدی . ابتدا مسجد رسول الله صبح نمازینی قیلدی . صباح نمازینک مسجده اداسندن صوکره خاق شویله برتفحص بیورملری ، افتدیمزک عادت سنیه لری ایدی . بودفعه نظر هایونلری ، صحابیء مشارالیه مصادف اولدی .

و انی یبانیجی بر آدم کوره رک نره لی اولدیغی سؤال ایتدی . عبدالله ، نره لی اولدیغی و نسبنی و اسمک « عبد العزی » ایدوکنی عرض ایتدی . او زمان حضرت پیغمبر : (اسمک عبدالله ذوالبجادی اولسون بزم یاقینم زده منزل طوت) بیوردیلر . ذوالبجادی ، جوار حضرت سیدالانامده منزل کزین اقامت اولدی . وقرآن کریمی اوکرندی .

نبوک سفرینک تدارکاتی ائنده برکون ذوالبجادی ، مسجده آواز بلند ایله تلاوت قرآن کریمه مشغول ایدی . حضرت عمر ، انک حرکتتی انکار صددنده :

— ( یارسول الله ! کورمنیمسک شو اعرابی بی که آواز بلند ایله قرآن او قویوب خلقک صلوة و قراثرلینه مانع و مزاحم اولبور )

دیرکن افتدیمز ؛ [ دعه یا عمر ! فانه خرج مهاجرأ الی الله ورسوله ] دیه حالنه براغلمسنی فرمان بیورمشلردی !

— « بکا براغاج قابوغنی کتیر! »

بیوردی . اوده سمره اغاجی قابوغندن بر مقدار  
کتیروب تقدیم ایتدی . رسول اکرم افندیمز ، انی عبداللہک  
بازوسنه باغلا یوب :

— « الہی ! بن بونک قانی کفارہ حرام ایتدم .  
دیرکن عبداللہ :

— « یارسول اللہ ! بنم مقصودم ، بو دکلدی بلدک  
شہید اولق ایدی »  
دیدیکندن افندیمز :

— « سن ، عزرا نیتیلہ چیقڈک . سنی ستمہ طوتوب  
قتل ایدہ جکدر اما ینہ شہیدسک »  
بیورمشدر .

عبداللہ ، بو کرہ تبوک مزلندہ حمایہ طوتیلوب فوت اولدی .  
وقت وفاتی کیجہ ایدی . غسل و تکفین ایله نمازی  
قیلندقدن سو کرہ قبری حاضرلورکن بلال ، النده بر  
آتش شعلہ سنی طوتمشدی .

ابن مسعود حضر تلمری نقل ایدرکہ : کیجہ عسکر  
طرفندہ کوزیمہ بر شعلہ ایلشدی . شعلہ یه طوغری کیتدم .  
حضرت رسول اللہ ایله ابو بکر و عمری اورادہ بولدم .  
عبداللہ ذوالبجادیسک قبرینی تہیشہ ایدیورلردی . قبر

حاضر اوله جه رسول اکرم افنديمز ، اني مبارك اللريله  
قبره اينديردی . ابو بکر ايله عمر دخي قبری اورتوب  
اوزرينه قوفه ايله سو دوکرکن رسول الله صلى الله تعالى  
عليه وسلم : [ قرنداشکنزک اوزرينه قوفه یی دوکیکنز ]  
بیوردیلر .

امر تقیر ختام بولدقده حضرت رسول اکرم صلى  
الله عليه وسلم : [ الهی ! بن عبدالمهدن راضی یم . سن ده  
کندوسنی ارضا بیور ] ديه دعا ایتدی .

ابن مسعود حضرتلری ، علاوه دیر ایدی :  
— « آه کاشکی او قبرک صاحبی بن اولیدم »

تبوکده بر کیجه رسول خدا افنديمز ، قالقوب  
مبارک اللريله یم طوبره سنی آلدی « طرب » اسمنده کی  
آتنه آرپه ویردی . و آتک ارقه سنی ، صاغری سنی ردا  
شریفه سیله سیلیدی . اصحاب کرام :

— « یارسول الله ! مبارك ردا کنز ، بوکالا یقه میدر؟ »

دیدیلر افنديمز :

— « سز نه بیلورسکنز بایکه جبرائیل ، بکا بویله

امر ایتشدیر دون کیجه دخي تیمار ایتک خصوصه صنده .

ملائكته بكا عتاب ايتديلر . جهاد وفي سبيل الله غزا  
 نيتيله برآت باغلایان هر مسلمان آته ويرديكي مردانهك  
 مقابله سنده جناب حق، اكا بر حسته يازار . وبر كناه ده  
 عفو ايدر .

بيور مسيله اصحاب سؤال ايتديلر:

— « يار رسول الله! اصناف فرسك خير ليسی، ايوسی

هانكيسيدر ؟ »

افنديمز دخی جوابده :

— « خير الحیل الادهم الاقرح الارثم . ثم الاقرح

المحجل طلق اليمين فان لم يكن ادهم فكملت على  
 هذه الشبه = آتلك خير ليسی ، اوست دوداغی بياض  
 و آلتی سقر و كندی سياه رنكلی اولاندر . صوكره  
 سقر و مطلق اليمين اولاندر اكر سياه اولمزرسه  
 مذکور شكل و نشان ايله كمت يینی قوله اولاندر .  
 بيورديلر .

\*\*\*

روملرك او ائنه اهل اسلام عاينده مدينه طيبه  
 طرفه حركته تشبثلری اولمدينی و اولبايده کی مسمو-  
 عاتك بی اساس ايدویکي تبين ايدهرک كيفيت موقع مذاكرديه

قونولدی . اقلدیغز، اصحاب کرامنی نزد هایونلرینه جمع ایدوب :

— « روم علیهنه دها ایلرو کیده لم می یوقسه بورادن مدینه یه عودت ایده لم می؟ »

دیه استفسار رای بیوردیلر .

حضرت عمر الفاروق :

— « یارسول الله ! اکر دها ایلرویه کیتمهک ما مور ایسه ک کیده لم »

دیمکه نبی اکرم، اکا جوابده :

— « اکر ما مور اولسیدم سزکله مشاوره ایتزدم »

بیوردیلر . حضرت عمر ، در حال نهج الصوابه

انتقال ایده رک :

— « یارسول الله ! روم عسکری چوق و هیبتی

بیو کدر بودفمهکی هیبت مقدم هایونکز، انلرک کوکلرینه

خسوف و دهشت براقدی . اکر شمذیلک عودت ایله

بر باشقه زمان رومه هجوم بیورسه کز اولی وانسیدر »

دیدمی که حق و صوابده بومرگزده ایدی . انکه چون

رسول اکرم دخی بو مطالعه یی تصویب بیوره رق عودته

میل ایلدی . او انشاده شامده طاعون ظهور ایتدیکی ده

ایشیدلمکه عودت حقنده کی فکر هایون، تاید ایده رک :



[طاعون اولان یرہ کیرمیکز] تحذیری ایستہ شواہدہ  
شرفصادر اولدی .



خالد بن الولید حضرت قاری ، درتہ-وز یکرمی نفر  
عسکر ایله «دومة الجندل» ده اکیدر بن عبدالملکہ اعزام  
بیورلدی ،

حضرت خالاک بمیتدهکی عساکر مسلمین ار سنده  
«والله بن الاسقع» دخی وار ایدی خالد. بر جمع قلیل  
ایله موفقیتنی بر کره استبعاد ایتدی. افدیغز او زمان :  
[ انک ستجدہ یصید البقر = سن ، انی بقر صیدیلہ  
مشغول اولدینغی خالدہ بولور کنیررسک ] دیه خالاک  
موفقیتنی وقوعندن اول کیندوسنه تبشیر ایتدی اکیدرہ  
حوالی دومة الجندل قبائلنک حکمداری ایدی کیندوسی  
و قبیله سی نصرانی المذهب ایدی .

خالاک اکیدر لہندہ کی اشبوحرکتی اننادہ اردوی  
ہایوبک ده تبوکدن مدینہ طیبہ یه عودتی وقوع بولدی .  
کہ تبوکده مدت مکث واقامت یکرمی کون قدر اولمشدی .  
بر کیجه یولده بر عقبہ دن کچیلہ جاک ایدی . رسول  
اکرم صلی اللہ تعالیٰ علیہ وسلم ، امر بیوردی کہ کندی  
ذات اقدس لری ابتدا کچمدکجه کیمسه کچمیہ . منادی ،

کیفیتی اردو یہ اعلان ایلدی. محرم راز نجی حذیفہ رضی  
 اللہ عنہ حضرت قمری، ناقہ سعادتك یولارینی طوتمقدہ  
 عمار بن یاسر دخی رکاب عالیده اوله رق دوہ پی سور -  
 مکده اولدینی حالده ایکیسی معیت خاصه رسالت پناہیده  
 ایدیلر.

حذیفہ. نقل ایدرکه:

ناکاه اون درت سوار ی قارشومزده کوروندی که  
 طرفزه توجه ایتمشلر! کیفیتی عرض ایتدم. افندیمز،  
 انلر طوغری بر کره حایقرمقله هپسی کوزدن غائب  
 اولدیلر.

حضرت پیغمبر. معیت سنیہ لرنده کی ایکی صحابی  
 اکرمه سؤال ایتدی:

— «بونلر، کیملر ایدی بیلدیکزمی؟»

— «بیلمدک یا رسول الله! یوزلرینی باغلامشلردی»  
 دیدیلر. افندیمز:

— «بونلر منافقلردر قیامتہ دکین منافق اولسه لر  
 کرکدر»

دیدی. ودوام ایتدی:

— «مقصدلری نه ایدی بیلدیکزمی؟»

— «خیر بیلمدک یا رسول الله!»

— «قصداً يتديلكه عقبه ده بكا مزاحمه ايله ناقه مى  
اوركىدوب بنى دوهدن دوشوره چكار واولديره .  
چكلردى»

— «يا رسول الله! قبله رينه، نچون خبر وىروبده  
انلرى قتل ايتديرمدك»

— «او حالده عرب، ديرلر كه مرافقتلر بيله دشمنلرينه  
ظفر بولدينى قومي قتل ايتديردي. بوسوزى سوياتمك  
ايسته م»

اشبو جواب اخيرك عقبنده افنديمز ، او كوريتان  
منافقلر حقنده : [ يارب ! سن . انلرى ديله علتنه مبتلا  
قىل ] ديه دعا دخى بيوردى .  
ايكى صحابي ، صورديلر :

— «يا رسول الله ! ديله عاتى ندر ؟»

بوکا :

— «بر آتشدر كه قبللرينه دوشوب انلرى هلاك ايدر»  
جوابى ويردكدنصوكره . مذكور اون ايكى منافقك  
اسملرينى ، كنيه لريني حضرت صديقيه سويلدى .

ايرقه سى صباح عقبه ماجراسنى «اسيد بن حضير»  
حضرتلرى ايشيدهرك اردوى هايونده بولان منافقلرك

جميعاً اعدام ايدلمسنى طلب و استدعا ايتدى فقط مشار-  
اليهك اشبو استدعاسى ده قبول و تصويب بيورلما مشدر.  
يولده بر موصلقدن غايت جزئى صو اققده ايدى.  
افنديمز :

— كيم بزدن اول يتشير ايسه صويه طوقانمسون ،  
ديه امر و تنبيه ايتمش اولدينى حالده منافقيندن بر  
طائفه اول وارهرق خلاف امرعالي موصلغه طوقانديلر.  
حين و صولده منافقينك حركت واقعه لرى معلوم على  
يوريله رق انلرى لعنتله ياد ايتدكدن صو كره مبارك دست  
هميونلرني موصلغك الله طوتوب طاملايان صولرى صب  
و مسح ايله برابر دعا ايتمش عقيب دعاده منبعك دروننده ييلديرم  
آوازه سى كې بيهوك بر كورلتى حاصل اوله رق تضيق  
شديد ايله صو ، فوران ايتمشدر .  
تبوك موقعنده كورولديكى ذكر ايديلان پيكار دخی  
ونك غیری بر پيكاردر .

رسول اکرم صلی الله علیه وسلم افنديمز ، خلال  
مضان شریفده سالماً مدینه منوره یه کلدی . ابتدا مسجد  
شریفلرینه نزول ايله عادت سینه لری اوزره انده ايكي  
کعت نماز قیلوب اوطوردی .

تبوك - فرنده تخلص ايدن مؤمنلر ايسه كندی حقلر نده  
آيات كريمه نك خبر نزواني ايشيده رك صوك درجه ده  
حيران و پشمان اولمشلر و عظيم برده شت ايچنده قالمشلردى  
حتى ايجلر نندن يدى نفرى و بر روايته كورده ده دابولبايه  
مروان عبد المنذر ، اوس بن ثعلبه ، و ديعه بن حزام ، نام  
اوج صحابي ، مسجد شريفك ديرمه كنه نفسلرينى باغلايويپ  
كنديلرينى نجي اكرم ، حل و اطلاق ايتدكجه چوز  
ميه جكلرينه قديم ايتمشلردى !

رسول اكرم صلى الله عليه وسلم ، كوردى كه  
بعض ذوات ديركلره باغلى طور يورلر سببى سؤال  
بيوردى . اصحاب كرام ، حقيقت خالى عرض ايتديلر .  
افنديمز : [ بن ، يمين ايدر كه طرف الهيدن امر صادر  
اولدكجه بونلرى چوزمم ] ديمككه حل و اطلاق مأموريتو  
متضمن اولمق اوزره : [ و آخرون اعترفوا بذنوبهم ..  
آيت كريمه سى نازل اولمشدر .

اشبو آيت كريمه نك نزولى اوزرينه عفو و اطلاق  
اولديلر . ديديلر كه :

— « يا رسول الله معيت سنیه كزده غزايه كيشمكدر  
يزى يالكنز اموالمر ، منع ايتدى . بز ، ماللر يمزى سكه

ویردك . آل تصدق ایت ده بزى شو و سبيله ايله لوٹ  
معصیتدن تطهیر ایتمش اول ،  
استدعاء واقع :

— « مالکزدن اودیدیککیز وجهه اوزره برشى  
المغه مأمور اولدم »

ديه رد اولنوركن : [ خذ من اموالهم  
صدقة ... ] آیت کریمه سی نزول ایتمکله انلرك ثلث  
اموالنى اخذ و تصدق ایدوب ثلثانى صاحبلىنده ابقا  
بیورمشدر .

خالد ، برکیجه مهتابده درمة الجندلده اکیدرك سیرایی  
جوارینه مواصلت ایتدی . اکیدر اوکیجه سیراینک  
طامی اوستنده مهتابه قارشى موقع مخصوصنده زوجیه سی  
« رباب بنت انیف » ايله شرب شرابه مشغول ایدی .  
بونلرك او طور دقلرى محل مرتفعدن باقلدینى حالده  
قارشوده کی صحرای واسع الانحانك سوت دریاسی کی  
منظره مخصوصه سی رباب و اکیدر کی ارباب ذوق و صفانک  
شوق تنزهلرینى تحریک ایده جک مرتبه ده لطیف ورنکین  
کورونمکده ایدی .

اوزم نوشانوشده مهتابک و منظره نك لطافتنه دائر  
سوزلر دخی جریان ایتمکده ایدی . ایشته او یله بر ساعتده

یبانی بر صیغیر کلوب اکیدرک باب قصرینی بوینوزیله اورمغه باشلادی. رباب، انی کوره رک اکیدره اکلادی. اکیدر، بر جرأت سرمستی ایله آتی در حال حاضر التوب برادری حسان وایکی نفر غلامی و بر قاچده خدامی معیتده اولدینی حالده صیغیری تعقیبه چیقدی. خالد ایسه انلرک احوالی کورمکده ایدی.

اکیدر، کمال غفلتله حییه انی تعقیب ایدرکن خالد راست کله رک طوتولدی. خالدک معیتده بولنمش اولان افراد سیه دن و بنی طیدن «بحیر بن بحره»:

تبارک سائق البقرات انی  
رأیت الله یهدی کل هادی  
فمن ینک حاندا عن ذی تبوک  
فانا قد اصرنا بالجهاد

دیه ماجرای کوزل تضمین ایتسنه منی اکا طرف اشرف و سالتدن: [لا یفضض الله فاک] دعاء بالخیری ابدال بیورلمش اوده طقسان یاشنه کلدیکی زمان بیله مجرد برکت دعاء نبوی ایله اغرنندن بر دیشی دوشمامش سقطلا نمامشیدی. اکیدرک برادری حسان، قصره قاچوب مقاتلهیه ابتدار ایتدی بر روایت اکیدرک دام اسارته دوشدیکی عربده ده حسان، مقتول اولمشدر.

انجق اکیدرك «مصاد» نامنده بر برادری دها  
بولمقله او، قصرده بالتحصن مقاتله به مباردت ایلدی.  
اکیدرك اطاعتی حائده حیا مدینه طیبه به کتیرلمسی  
والا قتل ایدلمسی فرمان نبوی اقتضاء جلیلندن ایدی.  
خالد، انی شو ایکی شقدن برینی قبول و اختیارده مخیر  
براقدی. اکیدر، سلامتیچون شق اولی اختیار  
ایتدیکنندن خالد:

— «شو شرطله که حصاره کیره جکم»

دیدى. اکیدر انی رد ایدهمدى. قیویه کلدیله  
اکیدر، قیوی آچسنى مصاده سویلدی. مصاد، بر کره  
ممانعت کوستردیسهده اصرار ایده. میهرك آچدی. اوراده  
مصلحه منقعد اولدی که اکیدر طرفندن ایکی بیك دوه،  
سکز یوز قیصر اراق، درت یوز درع، درت یوز قارغی  
بدل صالح ویربله جک ایدی. مصالحه مک شو وجه ایله  
عقدی اوزرینه خالد، اشیاء مذکوریهی آلب اکیدر  
و برادری ایله اولدینی خالد مدینه منوره به طوغری  
حرکت ایتدی.

مسجد ضرار — اردوی هایونک تبوکن مدینه



منوره یا عودتی صروده یولده « ذی اوان » نام . منزله  
 بر جماعت ، حضور پر نور رسول الله کلوب انشا  
 ایتدکری مسجد لرینک شرف مقدم همایونیه تشریف  
 بیورلمسی استعدا ایتملر . که اشبو جماعت ، کروه مکروه ،  
 منافقیندن بر طاقم شرار نابکار ودعوت ایتدکری مسجد  
 دخی لسان قرآن عظیم الشان ایله لغتی یاد ایدلمش اولان  
 مسجد ضرار ایدی . مکر راهب ابو عامر فاسقک سوق  
 و تشویقیله « خدام بن خالد ، ثعلب بن حاطب ، معتب  
 بن قشیر ، ابو حبیبة بن الازعر . جاریة بن عامر ، و بونک  
 ایکی اوغلی « مجمع » ایله « زید » و « نبتل بن الحارث ،  
 یخرج . مجاد بن عثمان ، عباد بن حنیف . و دیعه بن  
 ثابت » نامنده اون ایکی منافق ، قبا مقابله سنده بر محله  
 مسجد یامشملر ! . ایچلرندن « خدام بن خالد » مسجدک  
 هر صه سی کندی ملکی اولدینی حالده اوزرینه مسجد  
 یایلمق شرطیله انلره ترک ایتشدی . مسجدک ختام  
 انشاسی اهل اسلامک تبوکه حرکتلرینه مصادف  
 اولمش ایدی .

او زمان افندیملرک مسجد مذکوره کیدوب  
 ایچنده نماز قیامسی نیاز صد دنده :

— « یا رسول الله ! ضعفا و مرضا ایچون صوعوق  
و یا غمورلی کونلره مخصوص اوله رق محله مزده بر مسجده  
یابدق . بر کره تشریف بیوروب ایچنده نماز قیلسه کز  
وخیر و بر کتنه دعا ایتسه کز ،

دیدیلر . مقصدلری ، رسول اکرم صلی الله علیه  
وسلمه سوء قصد ایدی . فقط امر غزادن بشقه  
ایشه وقت اولمادیغندن مسجده عزیمت هایونلرینی  
غزوه دن عودته تعلیق صورتیله جواب ویرمشدی .  
یولده انلرک مراجعتلری بوندن ناشی ایدی .

حالبوکه حقایق احوالندن جناب حق : [ والذین  
اتخذوا مسجداً ضراراً و کفراً و تفریقاً بین المؤمنین .... ]  
آیت کریمه سنی انزال ایله حبیب اکرمی خبردار ایتدیکنندن  
درحال مالک بن الدخشمی ، معن بن عدی العجلانی ،  
عامر بن السکن ، وحشی قاتل حمزه حضراتی هدم  
مسجده ضراره مأموراً بعث و اسرا بیوردی بونلر ،  
یولده مالک بن دخشمک محله سی بولنان بنی سالم بن عوف  
دیارینه مواصلت ایتدیلر .

او زمان مالک ، رفیق معنه : [ آز صبر ایت بن ،  
واره یم منزله دن آتش آله یم ] دیهرک منزله کیتدی و بر خرما

دالنی آتشلیوب کتیردی . اقشام ایله یاتسو اره سنده  
ایدی تعجیل تام ایله اورادن واردیلر . مسجد ضرارک  
بانی و صاحببری هپ یانده حاضر ایدیلر .  
مسجدی او آتشله یاقدیلر . ییقدیلر . هدم و  
احراقندن صوکره محلی ، طرف ذیشرف رسالتک  
امریله مزبله ایدلمشدر .

\* \*

ضالمرک عودنی — خالد ، دومة الجندلدن کنديسی  
قالقمزدن اول « عمرو بن امية الضمری » حضرتلرینی  
فتح واقعی و ماجرای سده سنیة رسالته عرض ایتک  
اوزره حسانتک سلبدن برجامه سندسی ایله مدینه طاهره یه  
کوندردی .

سلبدن عمرو یديله دومه دن ارسال و تقدیم ایدیلان  
جامه زر بفت سندسی ، اصحاب کرامک نظر تعجب  
واستحسانلرینی جلب ایتدی . اللریله طوتوب یومشاقلغنه  
و حسن و ظرافتنه باقار تعجب ایدرلردی ! .  
افدیمر : [لما ديل سعد في الجنة احسن و الين من هذا]  
بیوردیلر .

مذکور جامه نزمین ، حضرت علی کرم الله وجهه

افندیمره احسان اولنوب : [ شققه بین الفواطم ] دیه امر  
بیورلدی . حضرت علی دخی آنی بیرتدی . کندی والده سی  
« فاطمه بنت اسد » و زوجة محترمه سی « فاطمه بنت النبی  
صلی الله علیه وسلم » ایله « فاطمه بنت حمزه » ، « فاطمه  
بن ربیعہ » یه تقسیم ایتمشدر .

خالد ، اکیدردن الدینی بدل صاحبك ذات اقدس  
رسالتیناهی ایچون صفی مغنم نامیله بر مقدارینی افراز  
واتخاب و باقیسنی سریه افرادینه تقسیم ایلدی .

اشبو غنیمتدن وائله بن الاسقعه الی دوه ایله دها  
بعض اموال اصابت ایلدیکندن وائله ، حصه سنی الوب  
عهدی موجبجه کعب بن عجره یه کتوردی کعب :

— « بن سکا دوه بی رضاء باری ایچون ویرمشدم .  
عمل خالصی بویله برشیله بوزم »

دیہ آنلری ینه وائله یه اعاده ایتدی .

ایکی برادرلر ، حضور پر نور رسالتیناهی به کیردیکی  
زمان هر سنه بیت الماله جزیه ویرملری شرطیله مصالحه  
تأیید و امضا و دومه حکومتک ینه عهدلرنده ابقاسیله  
الترینه اماننامه اعطا بیورلمشدر . روایت اخرایه کوره  
اکیدر ، حضور عالیده قبول اسلام ایلمشدر .

بلا عذر تخلف ایتمش اولان مؤمنلرک تخلفلری  
تاسف عالی بی موجب بولمقده ایدی . بناءً علیه بعض  
ذوات ، مسجد شریفده نزدهما یونه وارده رق بیان معذرت  
طریقيله استدعاء عفو ایلدیلر . کنجینه حلم و کرم اقدیمزده  
انلرک واهی معذرتلرینه قارشى التزام حلم بیوررلردی .



ثمة مخلفه — امر اعتذارده ارتکاب ایتدکلری  
کذب و خلافلرینی یوزلرینه اورمق کبی بر معامله ایله  
کیمسه بی تخجیل ایتدی . یالکز کعب بن مالک ، مرارة  
بن الربیع ، هلال بن امیه « تخلف ایتمش اولانلرده  
قالمش بولندقلرندن ناشی انلرله الفت و مصاحبتدن اصحاب  
کرامی منع ایتدی بونلرک هراوچی کمال فزع واضطراب  
ایله برر گوشه یه چکیلرک تضرعه مشغول اولدیلر .  
حتی کعب بن مالک ، نقل ایدرکه :

[ بدر و تبوک غزوہ لرندن بشقه هیچ بر غزاده  
حضرت پیغمبر صلی الله علیه وسلمک معیتده بولمقدن  
تخلف ایتماشدم . بدرده تخلف ایدنلرک هیچ بری  
معاتب اولمدی . زیرا نبی اکرم ، غیر قریشی قصد  
ایدنلرک خروج بیوردقدن صوکره محاربه تقرر ایتشدی .

بن، کرچه بدرده حاضر دکلم. ولکن لیلة العقبه ده  
 یعنی رسول اکرم افدیمزله عقبه مکده اسلام و جهاد  
 اوزرینه معاهده و مبیعه اولندیغی کیجده حاضر ایدم  
 بدرك کرچه خلق بیننده شهرتی وار ایسه ده بنم عندمه  
 لیلة العقبه حضورینک فضیلتی بدرك فضیلتندن ناقص  
 دکلدرد. او زمان که تبوکه کیتدیلر. بن، ایام سائرهدن  
 زیاده قوتلی و ثروتلی ایدم. والله هیچ بر غزه ووده بنم  
 ایکی دوهم بولمندی انجق تبوک سفری ایچون ایکی دوه  
 آلمشدم. تبوکه یوله چیقانلرک کثرت افراندن ناشی  
 کیری قاله جقلر، کندیلر ایچون وحی الهی نازل اولمدقجه  
 غلبه لکدن کیمسه فرقنه وارمه میه جفنی امید ایتمشلردی.  
 معیت سنیده ده تبوکه کیتمک عزمنده ایدم. حتی  
 رسول اکرمک حین حرکت هایونلرنده ینه او نیتله کندی  
 کنده نه وقت واصل اولسه یتشه بیلورم دیمشدم ایشه  
 شمعی کیدرم ایشه صبح حرکت ایدرم دیرکن اردو، منزل  
 مقصوده یتشدی. بنم ایچون یتشمک امید و امکانی قالمدی.  
 هر وقت منزلدن طیشاری ملول و مغمووم چیقار  
 ایدم. چونکه غزادن تخلف ایدنلرده ینفاق ایله متهم  
 یاضعف و ناتوانلغنه مبنی اذن الهی ایله معذور اولان

کیمسه لردن بشقه بر فردہ تصادف ایدہ مزدوم . نبی اکرم  
صلی اللہ علیہ وسلم ، بنی هیچ یاد ایتدی انجق  
تبوك محلنه واردی اوطورور ایکن سهؤال بیوردی .  
عبدالله بن انیس : [ یارسول الله ! حبسه بر داه ونظره  
فی عطفیه ] دیدی . معاذ بن جبل اکا قارشى : [ بئها قلت ]  
دیدکدن صوکره افندیمزه خطاباً : [ والله یارسول الله !  
بز . او آدمک ایولکندن بشقه بر فناغنى بیلمیز ] جوابی  
ویردی . افندیمز ، سکوت بیوردیلر .

وقتا که اردوی سعادتك خبر و معاودتی الندی بنی غموم  
و اندیشه لر ، استیلا ایدہ رک کندی کندی : « یارب !  
حضور عالیده نه کی یالان سویلسیم اولور نه حیلہ ایلہ  
کندی غصبدن تخلیص ایدہ بیلورم ، ديه دوشونمکه باشلادم  
بعض طرفلره دانشدم حق خادمه بیلہ مذاکره ایتدم  
فقط مقدم هایوندن صوکره اودرلو افکا باطله درونمدن  
تمام آرائل و مضمحل اوله رق بیلدم که یالار ایلہ و اعمال حیل  
ایلہ چاره خلاص یوقدر بناء علیه عزم و جزم ایتدم که  
ایشی اولدینی کی طوغری - ویلیهیم . عادت سنیه لری  
اوزره افندیمز ، مسجد شریفده ایکی رکعت نماز قیلوب  
اوطورونجه ، مخلف ایدن لردن بر جماعت کله رک بیان معذرت

ایتدیلر . حضرت رسول اکرم افندیز ، انلرک ظامر  
 اعتذارلرینی بالقبول حقلرنده استغفار ایدوب باطن  
 احوالرینی جناب حقه حواله ایلدی . بنده واردم سلام  
 ویردم صورت غضوبانه تیسیم ایدرک بنی حضـورینه  
 دعوت ایتمکله واردم قارشوسنده اوطورددم : [مسلمانلرله  
 جهاده کیتمکدن سکا نه مانع اولدی . ینه جک دوه کی  
 یوق ایدی ] بیوردیلر . بن : [اوت والله شمدی سندن  
 بشقه برکیمسه نک حضورنده اوطورمش اولسیدم غضب  
 وسخطندن سرد معذرتله کنیدی قورتاریر ایدم ظن  
 ایدرم ولکن والله یقیناً بیلدم که سکا بریالان سویلیوب  
 انکله سنی بندن راضی و خوشنود ایدرسیم کرکدرکه  
 حق تعالی قریباً بکا قهر و غضب ایدر . . اگرچه  
 شیمدی شو طوغری اعتراف ایتدیکم جرم وکناهمدن  
 ناشی غضب ایدرسک ولکن مأمولدر که صدق مقام  
 سبیلله حضرت مولی بنی عفو ایدر و الله سفردن کری  
 قالمده هیچ بر عذریم یوغیدی . حین تخلفده کی  
 قوت و ثروتمدن زیاده حاللی و ماللی اولدیغمده  
 یوقدر [ دیدم . بونک اوزرینه رسول اکرم صلی الله  
 تعالی علیه و سلم ، بنم حقمده : [بوطوغری سوبلدی]  
 دیه سوزیمی تصدیق ایلدکن صوکره :



— « قاق باقم شانکده طرف حقندن نه درلو  
حکم صدور ایدم جکدر؟ »

دیدي . بن قالقدم . مسجندن طیشاری جیقدم ،  
بنی سلمه دن برجماعت ، بکا :

— « واللہ بز، سنک بوندن اول برکنام ابتدیکنی  
بیلیمورز دیکر متخلفینک حضور رسول اللہمہ ابتدکری  
اعتذار ایله بیان معذرت ایدم مدک . رسول اللہ صلی اللہ  
علیه وسلمک ایدم جکی استغفار . غفران ذنوبک ایچون  
کافی ایدی »

دیهرک بوباید صوک درجه یه قدر اصرار ایتدیلر .  
حتی اشبوا اصراردن طولایی عقلمه کلدی که دونه یمده  
براعتذارده بن ایدم ! . او آنده راست کلان معاذ بن  
جبل ، فکر اعتذاریمی تصحیح و کنیدی اندن تحذیر  
ایتدی . بن ، اوجاعتدن سؤال ایتدم :

— « بنم کی دها وارمیدر ؟ »

جواب ویردیلر که :

— « ایکی کشتی واردر سنک کی سویلدیلر . سنک  
کی ده جواب آلدیلر . بری مرارة بن الربیع العمری ،  
دیگری هلال بن امیه الواقفیدر »

بن ، ارتق طورمدم . منزله کلدیم . حضرت

رسالتنامه صلى الله عليه و آله افنديمى ، مسامالمى بز ثلثة  
متخلفه ايله تكلم و مكالمه دن نهى بيوردى . ناس  
بزدن چكىلدیلر و بزدن متغير اولوب تماميله يوز  
چويرديلر . ارض و مدينه طيبه باشمزه بر ديار غربت  
كبي كلى . بو حال اللى كيجه دوام ايدى درديمزه  
ياندق . ايكي ارقداشم خانلرينه قانديلر . آغلامغه دوام  
ايتديلر . بن كننج و دينج . اولديغ سبيله منزلدن چيقار  
و جماعت مسلمين ايله نمازه حاضر اولور ايدم سوقاقلرده  
كزردم كيمسه بكا حرف واحد لاقردى سويلمزدى .  
رسول الله صلى الله عليه و سلم . مجلس شريفنده ايكن  
حضور عاليلرينه كاي ايدم سلام و يرير ايدم كندى  
كنديه : « عجباً سلامه جواباً رد سلام ايجون مبارك  
دوداقلرى تحرك ايتدى يوقسه ايتدى ؟ » دير ايدم  
يعنى سلامنى اخذ و قبول ايله رد ايتديكنى مبارك  
دوداقلرينك حر كشتن اكلامق ايتردم ده اكلايه مزدم .  
كيزليجه باقار ايدم . هر نه زمان كه قرب عاليلرنده نمازه  
مشغول اولور ايسم كوزاوجيله بكا نظر بيورورلردى .  
جانب هايونلرينه بافديغ كبي اعراض ايدوب طرف آخره  
باقارلردى . ناسك بودرلو تكلم و اختلاطدن امتناعلرى

صوك درجده جفاء عظيم اوله رق ناچار عم زاده م و دوستم  
ابوقتاده نك باغچه سنه كيتدم اكا :

— « يا ابا قتاده ! اللهی و رسول اللهی سوديكمی  
بيلورسك دكلى ؟ »

ديدم سكوت ايتدی . بردها سويلدم ينه سكوت  
ايتدی تکرار ايتدم [ الله و رسوله اعلم ] ديه بيلدی .  
ارتاق سوق مأیوسيتيله اغلايه رق دوندم . مدينه  
سوقاغنه كلدم مكر بيع ارزاق ايجون شامدن مدينه  
طبيه يه گلش برنبطی ، سوقاقده بنی سؤال ايدردی ! .  
خلق ، بنی اكا كوسترديلر . كلدی ملك غساندن بكا پر  
مکتوب ويردی . ملك غسان مکتوب بنده بكا يازيور  
ايدی که : [ ايشتم صاحبك سكا جفا ايتمش . سنی جناب  
حق ذليل وضايع ايتدی . بزه کل ! . حقكده مواساته  
رعايت ايدرز ] بونی بويله بولنجيه ديدم : بوده بلادن  
بر درلو بلادر مکتوبی یأس و خدمدن همان آتسه  
ياقدم .

تکلمك يوم ممنوعيتندن قرقنجی کيجه کجدي .  
حضرت پيغمبر ، آدم کوندره رك قربان مرته دن بزی  
منع ايتدی . سؤال ايتدم :

— « تطليقی ایدیم یوقسه ؟ »

— « یوق یالکزاغزال ایدوب قریب اولمیه جقسک »

جوابی ویردی . دیگر ایکی ارقداشم دخی منع

ایدلی . بونک اوزرینه زوجه مه :

— « کیت اهلك جانبنه ! . بو باده حکم وفرمان

الهی صدورینه دکین قال »

دیه انی کوندردم . هلال بن امیه نک زوجه سی

حضور پر نور رسالته واروب :

— « یا رسول الله ! هلال ، براختیار کیمسه پر بندن

بشقه خدمت ایده جک کیمسه سی یوقدر کندوسنه خدمت

ایچون یاننده قالدیغمدن اکرام اولنورمی ؟ »

دیه صوردی . [ خیر ولکن سکا تقرب ایتسون ]

نی وتنبیهی الهرق :

— « والله هلال ، بر پیر فانیدر بر شیئه رغبت

وحرکتی یوقدر . والله او کوندنبرو اغلامغله مشغولدر »

دیدی . نیم خانهم خلقتک بعضی بکا :

— « هلالک زوجه سی کیدوب عتبه علیای رسالتدن

استیدان ایتدیکی کبی سنده زوجه کک نزدنده قالمسینه

استیدان ایتسک »

دیدى . بن :

— و الله اويله يابه مم اذن ويريرمى ويرمزى انى ده  
ييلم خصوصيله بن ، كنجم »

ديه جواب ويردم . بو حال اوزره اون كيجه دها  
كچدى .. تمام اللى كيجه يه بالغ اولدى اللنجى كيجه صباح  
نمازنى مسجدده جماعتله قيله ميوب خانه مك طامى اوزرنده  
قيلمش او طور يور ايدم .

صوك درجده متحير ومكدر ايدم . جهان باشمه  
طار گلش ايدى . اودقيقه ده ناكاه برصدا كه جبل سلمك  
تپه سندن كلدى : [مژده يا آعب بن مالك] ديور ايدى . اشبو  
نداي بشري اداي ايشيدنجه ضيق ومصيبتمك طرف حقدن  
فرح وفرجه مبدل اولديغنى اكلايه رق سرورمدن بي  
اختيار سجده شكره قباندم مكر نبى اكرم صلى الله  
تعالى عليه وسلمه ام سلمه نك حجره سنده و كيجه نك  
ثلث اخيرنده وحى الهى نازل اوله رق صباح نمازندن  
صوكره توبه لر يمزك قبول بيورلديغنى اصحاب كرامنه  
بيلديرمش اولديغندن ناشى بزي تبشيره مسارعت ايتمشلر  
ايمش ديكر ايكي ارقداشلر يمه ده قوشديلر بكاده برسواري  
قوشدى بنى اسلمدن برديكرى جبل سلمه چيقدى باغيردى  
انك سسى اتدن اول يتشدى .

روایتہ کورہ ندا ایدن « عمرو بن حمزة الاسامی »  
 و آتہ سواری اولہرق تبشیرہ مسارعت ایدن دہ « زبیر  
 بن العوام » ایدی . مرارہ بی تبشیرہ کیدن « سہلکان  
 یاسلمہ بن سلامہ » و ہلالک مبشری دہ « سعید بن  
 زید » ایدی . رضوان اللہ علیہم اجمعین ! . کعب ، دیرکہ :  
 جیلدن صوت جہیر ایلہ کیفیتی بکا ایصال و تبشیر  
 ایدن حمزہ یہ اوزرمدن ایکی البسہ می چیقاروب و یردم .  
 صوکرہ کندم آخردن البسہ استعارہ ایدہ رک کیدم و  
 حضور اقدسہ کیتدم . مسجد شریفہ اصحاب کرامیلہ  
 اوطور مقدمہ ایدی طلحہ بن عبد اللہ ، بی کورور کورمن  
 سکر دہ رک یانمہ کادی و بالمصافحہ تہنئہ ایلدی واللہ مہا  
 جرلردن ہیچ بری ، انک بکا ایتدیکی اکرامی ایتدی  
 شو اکرامی ہیچ اونوتمم . واردم ذات رسالتناہی یہ  
 سلام و یردم مبارک وجہ صبیح سعادت لری ، شوق و  
 شادندن بدر درخشان کبی اولدینی حالہ بکا :

— « ابشر بخیر یوم مرعلیک منذ ولدتک ایاک »

بیوردی بن دیدم :

— « سندنمی یا رسول اللہ ! یوقسہ اللہد می ؟

— « خیر بندن دیکل اللہدندر »

دیه جواب ویردیلر . دیدم :

— « یا رسول الله ! قبول توبه مک شکرانه ماچیزی

اولق اوژره تجرد ایدوب جمیع ماللی اللهک سیل  
رضاسنه صدقه ایتمه بی ایسترم »

افندیمر :

— « بعضی الیقوی که حقه خیردر »

بیورملریله جوابدم :

— « خیردن اصابت ایدن حصه می الیقویم »

دیدکن صوکره دوام ایدم رک :

— « یا رسول الله ! جناب حق ، انجق بنی صدقه

مبنی خلاص ایلدی . عمرم اولدقجه یالان سویلمامکه

عزمم ، توبه مک اسباب قبولندندر . والله هیچ برمسلمانی

بیسلم که طوغربانی یوزندن اللهک اکا انعام ایتدیکی

شی ، بنم رسول الله حضورنده ابراز ایلدیکم طوغربانمندن

ناشی مولانک بکا احسان و انعام ایلدیکی شیدن احسن

اولسونی . بردها یالانه میل ایتدم . بوندن بویله ده جناب

حق ، محافظه بیورسون . الله تعالی نبی کریمه [ لقد

تاب الله علی النبی و المهاجرین و الانصار الذین اتبعوه هم

فی ساعة العسرة من بعد ما کاد یرزق قلوب فریق منهم

ثم تاب عليهم انه بهم رؤف رحيم] آيت كريمه سنی انزال  
 بیورمشدر . والله نعمت اسلامدن صوکره رسول الله  
 قارشنی صدقه موفقیتم کبی بر نعمت دها احسان بیورملدی .  
 دیدم ]

..

۹۲

### و فود واسلام ثقیف

رسول اکرم صلی الله علیه و سلمک تبوکدن  
 شهر معاودتلی بولان رمضان شریفده ثقیفک وافدی .  
 مدینه طیبیه کلشدر .

عروءک قتلندن صوکره کندیلرینک بیوک بر محلا  
 طرده اولدقلرینی اکلامشیلردی . چونکه اطراف و  
 اکنافده بولان قبائلک دائرة اسلامه کیرمکده اولدقلرینی  
 کورمکده و بتون قبائلک هیئت مجوعه سی دیمک اولان  
 مسلمانلرک ارمسنده یالکز یاشایه میه جقلرینی اکلاملریله  
 برابر هوازن رئیس مالک بن عوف نضرینک دخی امر  
 عالی موجبجه اجرا ایتدیکی تضییقاتنه قارشنی صوک  
 درجه ده اضطرار و اضطرابه دوشمکده ایدیلر .



نهایت چاره تحریرسنه لزوم ~~سورده~~ رك مذا كرمیه  
 کیریشدیلر . دهات عربدن و بنی علاجك اخوانندن  
 « عمرو بن امیه » عبد یاليله ایشك بوجهترین اکلاندی  
 حاضر بولغان و جوو مملکت دخی او فکرده عمرو ایله  
 مشترک و مشارک اولدقلرینی سویلدیلر .

حضور برنور رسالتیناهییه ارسال رسلدن بشقه  
 چاره اولدیغنه مبنی بنی مالکدن اوچ کیسمه نك عبدیالیل  
 ایله برلکده مدینه طاهرهیه کوندولمسنه قرار ویرلدی .  
 بنی احلافدن « حکم بن عمرو ، شرحبیل بن غیلان ،  
 بنی مالکدن « عثمان ابن ابی العاص ، اوس بن عوف ،  
 نمیر بن خرشه » مبعوث انتخاب اولندی ، بونلر ، عبد  
 یالیل ایله برابر کلدیلر . مدینه منورهیه تقریرلنده اصحاب  
 کرامدن « مغیره بن شعبه » به تصادف ایتدیلرکه حضرت  
 رسول اکرم و اصحاب کرامنك ینك دوه لرینی مغیره  
 اوکون او محله رعی ایتدیره یور ایدی .

مغیره ، ثقیف مبعوثلرینی توقیف ایدرک کیفیتی  
 عرض ایتک اوزره کندوسی مدینهیه کلدی . ابتدا ابوبکر  
 الصدیق رضی الله عنه حضرتلرینه مصادف اولدیغندن  
 اکلاندی . صدیق اکبر افندیمز دخی مقدم ثقیفی عتبه  
 علیای رسالته عرض ایلدی .

مغیره ، اندن صوکره تقیفلرک نزدینه کلدی .  
 انلری حضور عالی نبوی به دعوت ابتدی . ونه صورتله  
 عرض تحیت ایده جکلرینی کندولرینه اوکرتدی .  
 لکن تقیفلر ، حضور عالی به واردقلرنده ینه کندی  
 بیلدکاری کبی عرض تحیت ایتشلردر !.

مع مافیه حقلرنده اکرام ایدلمش وبالخاصه  
 کندیلر یچون مسجد شریف قربنده چادر قوردیریلوب  
 هپسی آنده اقامه اولمشدر .

خالد بن سعید حضرتلری ، معروضات ثقیفی پیشگاه  
 رسالته عرض واعلامه و اوامر سنییه بی انلره تبلیغه مأمور  
 بیورلمشدی .

تقیفلر ، قبول اسلام ایده جکلرینی عرض ایتدیردیلر .  
 آنکه برابر دهها اوج ماده بی ده استدعا ایلدیلر که اوده :  
 صنم اعظم لری بولنان لانتک اوج سنه به قدر ابقاسی ،  
 نماز قیام قدن عفورلری ، اصنام سائر نک افناسنده بشقه لری  
 مداخله ایتمه رک انلری کندی اللریله کسر و احما ایتمه  
 مساعده اولمسی ماده لرندن عبارت ایدی . .

رسالتهناه اقدیمز ، مواد ثلثه نک یالکز شق اخیرینی  
 قبول بیورهرق لانتک بر آن بیله بتاسی جائز اولیه جفی

و نمازی بولمیان دینده خیر اولمدینی جوابیله انلری رد ایتدی .

تقیفیلر ، هدم لانک بر آی اولسون تأخیرینی استدعاده اصرار ایتلریله بر ساعت بیله تأخیر ایدیله میه چکی جوابیله قطعاً رد اولندیلر .

بناءً علیه هر تکلیفی قبول طریقیه مسلمان اولدیلر .  
۱ یچلرنده عثمان ابن ابی العاص ، جمله سندن حدیث السن اولق مناسبتیه هیئت و افده ، نزللرندن ایرلدقجه اشیارینی بکلمکه عثمانی براغیرلردی . نزله عودتلرنده عثمان صاویشوب حضور عالییه کلیر و دینه متعلق مسائل صورتدی . و قرآن کریمی دیکلمکه رغبت کوستیر ایدی . حضرت پیغمبری ، او یقوده بولور ایسه ابوبکره مراجعت ایدردی .

انک بو معامله سندن ثقیف و افدلری خبردار دکل ایدیلر . اسلامه اولوجهله کوستردیکی میل و محبتی ایله برابر قرآن کریمی تعامه باشلامسی محظوظیت سنیه رسالتپناهی بی موجب اوله رق کندوسی ، تقیفیلره امر تعیین بیورلمشدر .

بونلرک حین عودتلرنده لات تخانه سندن کی اموالی

اخذ و ارساله مأموراً ابو سفیان ايله مغیره بن شعبه  
یانلرینه بالتفریق اعزام اولمشدر .

تخانهك جلب اموالى ايجون مأمورلرك تعیین  
واعزامی ائنده ابو ملیح بن عروه :

— « یارسول الله ! بابام عروه ، مدیوناً وفات  
ایتمشدر . تخانهدن کتیر یله جك اموالدن بورجك تسویه سنه  
مساعده بیوریکز »

دیهر فع رقعة نیاز ایتمکله استدعاسی مقرون مساعده  
سنیه بیورلدى . قارب بن الاسود دخی بوندن جسارته  
کلهك :

— « یارسول الله ! بنم بابامده عروهك لابوین  
قرنداشیدر مدیوناً فوت اولدى . انك ايجونده عروهك  
بورجی حقنده ارزان بیوریلان مساعده سنیه یی ابدال  
بیوریکز »

دیدى . عروه مسلم اولدیفی حالده وفات ایتمش او  
بری ایسه قبول اسلام ایتمکسزین فوت اولمش بولمسنه  
مبنى بونك ايجون اويله مساعده اولنه میه جنى جوابی  
ویرلدى .

قارب ، هر نقدر اسود ، کفر حالده وفات

ایتمش اولسه ده مسلمانلرله قراغنی بولمسنه مرحمة مساعدده  
بیورلمسی استرحامنده اوسرار ایتدیکندن انکچون دخی  
عین معامله نك اجرا یی امر و فرمان بیورلمشدر .

بناءً علیه مغیره ، اموال مذکوره دن امر و فرمان  
رسالتنهای و جمله عروه و اسودک بورجلرخی تسویه  
ایتدکدن صوکره متباقیمی غنائم عدیله بر نهج شرعی  
لازم کلانلره تقسیم ایدلمشدر .

لاتک کسر و هدمیچون خالد بن الولید ایله مغیره  
اعزام اولندیلر . مغیره ، لاتی بالطه ایله اوروب طاغندی  
بتخاننی دخی تمام تخریب ایلدکاری حالیه مفتاحدارینک  
اساسه طوقانلماسنی رجا ایتسی اوزرینه اساس مقصده  
او زمان انتقال اوله رق همان اساسنده کی طاشلر دخی  
سوکیلوب چیقارلمش و هریری کاملاً محو و نابود  
ایدلمشدر .

•••

۱۳

وفود بنی فزاره

بنی فزاره نك مبعوثلری اوندن زیاده اشخاصی حاوی

اولدینگی حالدہ کلدیلمر . ایچلرنده « خارجه بن حصن »  
 جد یاخود حر بن قیس ، وار ایدی که اشبو جد « عینه  
 بن حصن » ک برادر زاده سی و جماعتک اک کوچوکی  
 ایدی . انصار کرامدن « رملہ بنت الحارث » رضی اللہ  
 عنہا نک خانہ سنہ مسافر ایدیلمر .

غایت ضعیف دودلرہ را کب ایدیلمر . حضرت  
 رسول اللہ صلی اللہ علیہ وسلم ، بلده لرینک احوالی  
 سؤال بیوردی . انلر ، قحط و غلادن ناشی بلده لرندہ کی  
 شدت ضیق و ضرورتدن شکایت ایدہ رک رحمت احسان  
 بیورلمسیچون دعا یتمنی رجا ایدیلمر . و« لیشفع لنا ربک  
 الیک » جملہ نئی عامیانہ درمیان ایتدیلمر . افندیمر :

— « سبحان اللہ ویلک انا شفعت الی ربی . فمن  
 ذا الذی یشفع ربنا الیه . لا اله الا هو العظیم وسم  
 کرسیہ السموات والارض وهو یسط من عظمتہ وجلالہ  
 کما یسط الرجل الجدید »

دیدکدن صوکرہ دوام ایدہ رک :  
 — « ان اللہ لیضحک من شفقکم وازالکم و قربہ  
 غیائکم »

بیورملریلہ فزاریلردن بری ، اکا اظهار حیرت ایلہ :

— « او یضحک ربنا یا رسول الله »

دیدى . افندیمر : [نعم] جوانی ویردیلمر . فزاری ،  
منبسط اولهرق :

— « لن نعدم یا رسول الله ! من رب یضحک

خیراً »

دیدى . بونک اوزرینه رسالتپناه افندیمر ، انک او  
سوزندن کولهرك قالقدی جمعه کونی ایایی . منبر سعاده  
چیققدی مبارک اللرینی قالدیردی دعایه مشغول اولدی :  
[اللهم اسق بلدك وبهيمتك وانشر رحمتك واحي بلدك  
الميت . اللهم اسقنا غيثاً مغيثاً مریئاً مریئاً مربیاً مربیاً  
طبیقاً واسعاً عاجلاً غیر آجل نافعاً غیر ضار . اللهم سقیا  
رحمة لاسقیا عذاب ولا هدم ولا غرق ولا محق . اللهم  
اسقنا الغيث وانصرنا على الاعداء] دعاده ظمر کف  
سعادتلرینی قالدیمرزدی . الا دعاء استسقاءده قالدیمر  
ایدی . او ساعتده اللرینی اولقدر قلدیرمشدی که . مبارک  
ایکی قولتوقلرینک بیاضی . مشاهده اولمشدی .

افندیمرک دعایه او مشغولیتی ائناسخنده اصحاب

کرامدن « ابولابه بن عبدالمنذر » حضر تلری ، ایاغه  
قالقهرق :

— « یا رسول الله ! خرما ، قورولقده در ،

دیدى . او کونده و او حقته لرده مدینه ده نزول  
غیثه اماره اوله جق بر پارچه بلوط کورولمديكى حالده  
غوث اعظم کائنات اولان جناب رسالت پناهك تضرع لری  
اوزرینه رحمتك بهمه حال احسان بیوريله جغنه ایمان کاملی  
اولسنه و یا غمخور یا غدینی حالده خرما سنك ده ایصال نه جغنی  
بیلدی کنه مبنی خرما یی آله جق قدر مساعده ایتسنی طلب  
صددنده بولنیور ایدی . بوکا مقابل رسول اکرم ینه :  
[ اللهم اسقنا ] دیدیلر ابولبابه ، تکرار :

— « یا رسول الله ! ان التمر فی المرابد »

دیوب بونی اوج نوبت تکرار ایلدی . رسول معظم  
افندیمر : [ اللهم اسقنا حتی یقوم ابولبابه عریانا یسد  
ثعلب مریده بازاره ] دیه دعا یه دوام بیوردیلر .

روای حدیث ، « یزید بن عیینة السملی » دیرکه :

والله جو سماده بر پارچه بلوط کورلمزکن جبل  
ساعتك ارقه طرفندن بلوط لر پیدا اوله زق رحمت دولمکه  
باشلادی اول قدرکه ابولبابه ، خرما لرینی سیله قایدیر مامق  
ایچون قوشوب مریدینك آقندی محلی ازاريله سسد  
ایتمکه چپلاق مشغول اولدی . نزول رحمت ، بر هفته



دوام ایتدی . کسلمیه رک متصل یاغدی صکره فزاری  
مرقوم سکز محی جمعه ایدی :

— یا رسول الله ! هلك الاموال وانقطعت السبل  
ديه نیاز مند اولدی . اقدیمز ، منبر سعادتلرینه  
چیقوب مرفوع الید اولدینی حالده [ اللهم حوالینا  
ولا علینا علی الا کام والظراب و بطون الاویة و منابت  
الشجر ] بیوردیلر . یلو طلر ، در حال یوکسلدی . کونش  
یوزی کورلدی . هوالر آجلدی . اوزمان مدینه طاهره  
دره سنده بر آی متدایا یاغمور سوی آقشدی .

..

۱۴

### مکتوب حمیر

یمنده سلاله ملوک بنی حمیر رؤسائندن « حارث بن  
عبد کلال ، نعیم بن عبد کلال ، نعمان ذی رعین ،  
همدان ، معافر » نام ذوات ، اسلاملرینی عرض و اعلام  
ایچون « مالک بن مره الرهاوی » بی نامه ایله حض-ور  
سامی رسالته کونردیلر .

جناب فخر الرسل اقدیمز ، رؤساء مرقومه به خطاباً

برجوابنامه یازدیروب جوابنامه ده جناب حق عزوجل  
 حضرت تهرینه حمد و ثنا ایله بالابتدا بلاد و مدن عودتنده  
 رسوللرینک و رودلرینی و مدینه ده الملکه کوریشوب خبر  
 و مکتوبلرینک و وصولی احسن و جوهله بیاندن صوکره  
 نماز و زکات و غنائم و صدقات حقنده بعض و صایا درج  
 و نحریر و اصحاب کرامدن « معاذ بن جبل ، عبدالله بن  
 زید ، مالک بن عباد ، عقبه بن نمر ، مالک بن مره »  
 حضراتی طرفلرینه ابعاث و معاذک کندولرینه امیرتعیین  
 بیورلدیفنی تذکار ایلمشدر .

بونلرک کللری ، عیاش بن ابی ربیعہ المخزومی رضی الله  
 عنہک مأموراً طرفلرینه کیده رک کندولرینی دین اسلامه  
 دعوت ایتیمی اوزرینه واقع اولمشدی .

رسول اکرم صلی الله علیه و سلم ، یازدیردقلری  
 نامه هایونی عیاشک الله و یروب : [ بلده لرینه کیجه  
 واریرسهک صباح اولمدقجه کیرمه ، و صباحلین احسن  
 طهارتله تطهردن صوکره ایکی رکعت نماز قیل . و  
 خدادن نجاح و قبول نیاز ایت و اکامه سیغین . بعده  
 کتابی صاغ الکله انلرک صاغ اللرینه ویر . و سورة  
 البینه یی اوقو . و دی که : « آمن محمد وانا اول المؤمنین »

ایمدی سکا بر حجت ابراز اولنمز الابطالانی ظاهر و بر  
 کتاب مزخرف ده اتیان اولنمز الانوری ذاهب اولمش !  
 بیلمدیکک لسان ایله میرلدانیرلرسه ترجمه ایتلرینی سویله.  
 « حسی الله آمنت بما انزل الله من کتاب وامرت لاعدل  
 بینکم ..... والیه المصیر » دی ! . مسلمان اولولررسه  
 سجده ایلدکلی قضب ثلثلرینی آلوب سواقیلرنده  
 علماً احراق ایت [ دیه امر بیوزمش عیاش حضرتلری ده  
 امر وفرمان رسالتنهایینی حرفیاً اجرا ایلمشدی .

۱۵

### وفات نجاشی اصحمه

اقایم حبش حکمداری اصحمه رضی الله عنه حضرتلری،  
 رجب خلالتیده وفات ایتشد حکمدار مشارالیه اوائل  
 ظهور نور اسلامده برقلب پاک متین ایله اظهار ایمان  
 وایقان ایتمش و اصحاب کرامک ارض حبشه هجرتلرنده  
 حقلرنده ابراز ایلدیکی حرمت ورعایت کامله ایله برابر  
 ذات اقدس نبوییه اولان اخلاص و محبتک آثار  
 عدیده سی بالدفعات شاهده اولنمشدی .

یوم وفاتنده کیفیتی رسول الله صلی الله تعالی علیه  
 وسلم ، اصحاب کرامنه : [ قدتوفی الیوم رجل صالح من

الحبش فہلموا فصلوا علیہ - فقوموا فصلوا علی اخیکم  
اصحمة [ دیہ خبر ویرہ رک اصحاب ایلہ برلکدہ مصلاہ  
چیقدی . الک نمازینی قبلہ یہ متوجہا درت تکبیر ایلہ  
قلدیردی .

۱۶

### وفات ام کلثوم بنت النبی

اسم شریفی آمنہ ایدی . قبل الہجرہ عتبہ ابن ابی  
لہبہ عقد ایدلمش ایکن سورۃ ثبت یدا ابی لہبک نزولی  
اوزرینہ مرقوم ابولہب ، وزوجہ سی حمالة الخطبک امر  
ونحریضی ایلہ عتبہ ، اونور عین نبی بی تطلیق ایتمکلہ  
بالاخرہ عثمان بن عفان رضی اللہ عنہ حاضر تلی نکاح  
ایتشدی .

«اسماء بنت عمیس ، صفیہ بنت عبدالمطلب ، ام  
عطیہ ، رضوان اللہ علیہن حضراتی غسل و تکفین ایتدیلر ،  
پدر مکرملری قبری اوزرینہ حاضر بولنوب اغلا دیلر .  
مرحومۃ مشار الیہانک جنازہ سی قبر کنارینہ قونلدیغی  
زمان رسول اکرم صلی اللہ تعالیٰ علیہ وسلم حاضر  
بولنان اصحاب کرامنہ سؤال ایتدی :

— «هل منکم رجل لم یقارف الیاءة»

انصار کرامدن ، ابو طلحه ، رضی الله تعالی عنه ،  
جوابده :

— « یارسول الله ! بن ، بویکجه مقارفه یینی مجامعه  
ایتمدم ،

دیملکه کندوسنه امر بیورلدی . اوده حضرت  
امکلاوم رضی عنها الحی القیومی قبره ایندیردی .

\*\*\*

۱۷

## وفات منافق ابن سلول

عبدالله ابن ابی بن سلول ، شهر شوال اواخرنده  
خسته لنه رق یکر می کون خسته یاندقدن صوکره فوت  
اولمشدر .

مرقوم ابن سلول ، جاهلیتک ایام اخیره سنده خزر جیلرک  
سیدی . طلوع مهر منیر اسلامدن صوکرده جمهور  
پرشرور منافقینک ریتی ایدی .

وفات ایده چکی کون رسول اکرم صلی الله علیه  
و سلم انک یانسه واردی باشی اوجنه اوطوردی .  
منافق حالت نزعده ایدی . افندیمر ، بیوردیلرکه :  
— « سنی محبت یهود ، هلاک ایتدی »

منافق ، بوكا قارشى صوك بر جرات اوله رق :  
 — • سعد بن زراره بن يهوده اولان خصوصتى تخلص

ايدى مدى ،

ديدكدن صوكره سوزنده دوام ايتدى :

— • يا رسول الله ! عتاب زمانى دكل ايشته بن  
 كيده يورم جنازنده حاضر بولمك كزى و كوملك كزى بكا  
 كفن ايدوب انكله بنى دفن ايتدزمك كزى رجا ايدرم ،  
 نبى اكرم افنديمز ، اوكون برى برى اوستنده ايكي  
 كوملك كيمش بولنيور ايدى اوستنده بولنان كوملكى  
 چيقاروب ويردى . ابن سلول ، وجود مسعود رسالته  
 تماس ايله شرفياب اولان ايچ كوملكى ايستدى . افنديمز ،  
 انى دريغ ايتمه رك احسان بيوردى .

بر روايه كوره منافقك فوتندن صوكره صحابه دن  
 بولنان اوغلى عبد الله رضى الله عنه ، جلد شريف  
 رسالته نهايه . ملاصق اولان ايچ كوملكى ايسته مشدر .  
 على كلا التقديرين دريغ بيورلمدى اوقيص سعادت ايله  
 مرقوم تكفين ايدلدى .

تكفين وتجهيزينك ختامى صروده اوغلى عبد الله  
 حضرت تليخنى افنديمز ، تمزيه بيوروب نمازنى قيليق  
 اوزره قبره قيام ايلدكلرى زمان حضرت عمر الفاروق ،  
 اهل نفاقه عداوت فاروقانه سنى بللى ايدمه رك :

یا رسول الله ! نمازینی می قیله جقسک؟ حالبوکه بو آدم،  
فلان کون شو یله سویا لمشدی فلان کون بو یله سویا لمشدی  
دیهرک انواع سیداتی تعداد ایتدی .

حضرت پیغمبر ذیشان افندیمر ، تبسم ایدوب  
ابن سلولک نمازینی قیلمش وحقنده استغفارده ایلمش  
ایسهده بوندن بو یله اهل نفاقک جنازه لرینه حاضر  
اولما لمری واوزر لرینه نماز قیلمام لمری طرف اشرف رب  
العالیندن [ ولا تصل علی احد منهم مات ابدآ ولا تقم  
علی قبره ] آیت کریمه سیله کندوسنه امر بیورلمشدر .  
نمازدن اول اشبو آیت کریمه نک شرف نزول ایتمش  
اولدینی وبناء علیه ابن سلول اوزرینه اقتدیمرک ارتق  
نماز قیله مدینی ده روایتندردر .

\*\*\*

ابن سلول اهل اسلام ایچون بیوک بر بلا ایدی .  
فوتیله مسلمانلر . غائله هائله شروفساندن قورتلمشدر .  
وبیک قدر منافقده خلوص ایله مسلمان اولمشدر .  
عمم النبی عباس رضی الله تعالی عنه حضرت تلرینک  
بدرده کی اسارتنده اشیا واثوابی سلب واخذ اولنه رق  
چپلاق قالدینی زمان امک وجودینه کله جک انجق بو ابن

سلوك كوكملكى بولمىش ايدى . ابن سلوك اوزمان  
حضرت عباسه ويردىكى كوكملك مكافانى اولىق اوزره  
افدىمىز ، قيص هايونازىنى احسان بيورمشلردى .  
حديثيه كوننده كفار قريش ، اهل اسلامى دخول  
مكودن منع ادوب ابن سلواه اجازت ويردكلى حالد .  
ابن سلول :

— « محمد [ عليه الصلوة والسلام ] رئيسمزدور .  
او ، ابتدا كيرمدكجه بز كيرمىز »  
ديه شرط حرمت وتعظيمى ايفا ايتىش اولديغىك  
مكافانى اوله روقده حقننده استغفار بيورلدى ! .  
ابراز اولنان رسم عيادتده منافقين - اثره قارشى  
جلب واستمالت قلوبدن عبارت ايدى ! .

\* \* \*

۱۸

### حجج ابوبكر الصديق

تبوكدن عودت همايون ، شهر رمضان شريفده .  
ايدى . افدىمىز ، ماه شوالى مدينه طاهرده كچيردى .  
سلخ ذى القمده كلدى . حجج شريفك اداسيجون مكه



مکرمه نی تشریف ارزو سنده بواندیلر . فقط مشرکینک  
 عادت جاهلیه لری اوزره کعبه نی چپلاق طواف ایندکاری  
 مسموع عالیلری اولمغله او یله بر حالدہ انلرله بر لکده  
 حضور بیت اللہده طواف ایتملرینی مکروه کوروب یرینه  
 ابوبکر الصدیق رضی اللہ عنہ حضرتلرینی صحابہ کرامدن  
 اوج یوز کشی ایله برابر مکہ کوندردی .

ابوبکر الصدیق حضرتلر، طرف اشرف رسالتدن  
 امارتی حائز اولمغله مکده مناسک حجی ایفا و خلقه تعلیم  
 ایده جک و براءة سورہ سنک اولندن اوتوز و یاخود قرق  
 آیت کریمه یی ناسه او قویه جق ایدی . سعد ابن ابی وقاص ،  
 عبدالرحمن بن عوف ، جابر بن عبد اللہ رضوان اللہ علیہم  
 اجمعین حضراتی کبی اجله اصحاب کرامدن بعض ذواتده  
 معیتده ایدیلر . سیدالرسول افندیمز، هدی ایچون یکر می  
 رأس دوه تعیین وانلری مبارک اللریله تقلید و اشعار  
 بیوروب امیر حضرتلرینه کوندردی . حضرت امیردخی  
 کندیس یچون بش رأس بدنه کتوردی . هدی رسالته  
 مخصوص اولان دوه لک محافظه سنه ناجیه بن جندب اسلمی  
 رضی اللہ عنہ مأمور بیورلمشدی . مسجد ذی الحلیفه دن  
 احرامه کیردیلر . انلر هنوز مکہ و ارمزدن اول جبریل

عليه السلام ، نازل اوله رق تبليغات مطلوبه بي ياطوغرى بدن  
 طوغرى به ذات سالتپناهينك يا خود اقر با سندن برينك  
 ايفا ايتمى لزومنى بيلديرديكندن افديمز ، حضرت على  
 المرتضاي چاغيردى . سورة مذكوره نك اوائلى ابو  
 بكر الصديق رضى الله عنه سندن الوب موقفلرده ناسه  
 اوقومسنى و :

- ۱ — مؤمن اوليان شخص ، جنته كيرميه جكدرد
- ۲ — چپلاق اولان شخص ، كعبه بي طواف ايتمه جكدرد
- ۳ — بوسنه دن صوكره مشرك اولان شخص ، كعبه بي  
 طواف ايده ميه جكدرد

۴ — الله ورسول الله دن موقت عهدى بولنان كفار ،  
 انقضاء مدتلىرینه دكين اميندرلر . درت ماهدن صوكره  
 مسلمان اولينلرك دملى هدردر .

كلماتنى دخى اعلان ايتمى امر وتنبیه بيوردقدن صوكره  
 « عضباء » اسملى ناقة خاصة سه عادتلىرینه بالاركاب ابو  
 بكر عقيبنده ارسال بيوردى . حضرت على . ابوبكره  
 يولده صباح نمازى وقتى يتشدى .

جابدن مرويدرکه :

جماعتله نمازه شروع ايدملك اوزره ايدى «عضباء» ك  
 صوقتى ايشيدلدى . رسول الله صلى الله تعالى عليه وسلمك

تشریف لاری امید یله امیر . صلاتدن تأخر ایدم رک انتظار  
اوزره طورور ایکن حضرت علی ، کوروندی . ابوبکر  
الصديق ، اگا :

— «میرام رسول = امیرمی یوقسه رسول اوله رق می  
کلدک ؟»

دیه صوردی . حضرت علی :

— «لابل رسول بقراءة براءة علی الناس يوم  
الحج الاکبر»

جوانی ویرمکله صديق اکبر افندیمز ، اوائل سورهمی  
علی به تسلیم ایتدی .

کعبه معظمه به مواصلتلری ، ذی القعدة نك سکنزحی  
کونی ایدی .

• وقفلرده خطبه بی حضرت صديق ، او قودی . وناسه  
مناسک حجی او کرتدی اهل اسلام او یله حج ایتدیلر .  
کفار دخی عادتلی و بیلدکلری اوزره حج ایتدیلر .  
حضرت علی کرم الله وجهه افندیمز ، يوم النحرده جمرة  
العقبه یاننده ایاغه قالمقوب اوائل سورهمی ناسه تلاوت  
وکلمات اربعه بی اعلان و تبلیغ ایامشدر .

ابوبکر الصديق افندیمزک امر و اخطاریله ابومهر

حضرتلری بر جماعتله بر اشوب چادرلرک ارمه لرنده مجامع  
 ناسده کیفیتی اعلان و تبلیغه حضرت علی به معاونت  
 ایلدیلر تبلیغ آیات و کلمات مأوریتک اوزرندن رفع  
 ایدلمسندن صدیق اعظم حضرتلری ، مکدر اولمشدی .  
 عودتندن صوکره بر اراق سوئال ایتدی :

— « یارسول الله ! نه قصورم اولدی که سوره بی بندن

الدک ،

امر تبلیغک یا کندوسی یا خود عترت طاهره لرندن  
 بری طرفندن ایفا ایدلمسی لزومنی جبریل علیه السلام  
 بیلدرمش اولدیغه منی حضرت علی بی ارسال ایلدیکنی  
 اؤدیمز ، جواباً بیان بیوردیلر .

\*\*\*

۱۹

### وفود بنی طیء

بنی طیه دن اون برکشی حضور اقدسسه کلدی .  
 رئیسلری زید الخیل الملهل ، ایدی . رسول اکرم صلی  
 الله علیه وسلم ، اسلامی عرض و تکلیف ایتدی .  
 انلرده مسلمان اولدیلر . زید الخیل ، بیان شکران صد دنده :  
 — « یارسول الله ! سنک وجود مسعودکله بزى تأیید  
 و تقویت ایدن و دینمزی معصوم ایلیان خدای عزوجل

حضرت قرینه حمد و ثنا اولسون ! بن، سنك دعوت  
ایلدیکك اخلاقدن خیرلی بر اخلاق، دها بیلیموزم  
حیرت و تعجب ایدرم کندی عقلریمزله اتباعمزدن که طاشلره  
عبادت ایدر ایدك،

دیدي. حضرت نبي افخم صلی الله علیه و سلم  
[بو حال، سنده دها زیاده اولسه کرکدر] ديه  
زیدك دین مینه و رسول رب العالمینه ایلروده بوندن ده  
دها زیاده محبتك مزداد اوله جغنی کندیسینه بالتبشیر  
رفیقلرندن هر برینه بشر قیه و زیده اون ایکی قیه نقره  
احسان و بنی طیء حوالیسندده بمض اراضی بی اكا اقطاع  
بیوردی،

او آله دکن اسمی «زید الخیل» ایکن فضل و عرفانه  
مبنی تغیر و تصحیح ایله «زید الخیر» تسمیه بیورلمشدر.  
که بوده ملاقات و صحبتندن افسدیمزك ممنون اولمسندن  
ناشی ایدی. حتی حقنده ده بیوردیلرکه:

عربدن برینی بکافضل و هنرایله وصف ایتسه لرکلدیکی  
زمان دیدکلرندن اکسك بولور ایدم ولکن زید الخیری  
دیدکلرندن دها اعلا بولدم»

زید الخیرك حین عودتسده یوله وفاتك

وقوع بوله جفنه اشارت اوله رق افنديمز : [انه لايخو زيد  
من حمى المدينة] بيورديلر! زيد، ارقداش ليله برابر  
بلده لرينه كيدر كن مجد صولرندن برينه وصولنده حمايه  
طوتولهرق اندن وفات ايتشدرد.

۲۰

### وفود بني كنده

سكسان ياخود التمش نفر سواري ايديلر. ايجلرنده  
والاشعث بن قيس «ده وار ایدی. مدینه سعادتہ، واصلتہ  
باركاه رسالتہ كیره جكلری زمان صاچلرینی طارایوب  
دوزلتدیلر. كوزلرینه سورمه چكدیلر. ايبكلی جبہ لر  
كیدیلر. صوكره حضوره كبردیلر. و: [ابیت اللعن] دیدیلر.  
رسول الله صلى الله عليه وسلم ، بوسوزه قارشى :  
[بن . پادشاه دكلم عبداللهك اوغلى محمد] ديمكله كنده  
مبعوثلرى ، اسميله چاغيرميه جقلرینی سويلدكلرندن  
حضرت پیغمبر ؛ [ابوالقاسم] ديه بیوردی.  
اوزمان بنی كنده مبعوثلری :

— يا ابا القاسم سنك ايجون خبء واخفا ایلديكمز

شى ندر؟

دیدیلرہ رسول اکرم بیان تعجبلہ :

— « سبحان اللہ خبء واخفاء، کاهنہ قارشى پاپيلوز

کاهن و کھانت و متکهن محقو کہ جهنمدمدر »

دیه رد و انکار ایلدی. بولک اوزرینه :

— « یاسنک رسول اللہ اولدیغکی ناصل بیله لم؟ »

دیه صور دیلر. سید البطحاء افدیمز، یردن بر آوج

قوم آلدی. وانی انلرہ کوسترہ رک :

— « بو، بنم رسول اللہ اولدیغمہ شهادت ایدر »

دیرکن کف سعادت لرنده بولنان قوم تسبیح ایتدی

و کیفیتى مبعوثلرده . مشاهده ایتش اولدقلرینه . بنی او

آنده قبول دین اسلام ایله برابر قرآنی دیکلمکه ارزو.

المرینی عرض ایتدیلر . رسول اللہ صلی اللہ علیہ وسلم

سورة والصفاتی تلاوته باشلایوب ورب المشارق عبارة

شریفه سنه کلدیکی کبی کسیدی . وهیچ بر یری حرکت

اتمامک اوزره اولدیفنی کبی طوردی. یالکز مبارک کوز.

توبندن یاش آقمده ایدی .

کنده مبعوثلری :

— « بنی آغلار کوریورز. یوقسه رسول کوندردن

مخافله می اغلایورسکز؟ »

دیه صور دیلر. افدیمز :

— وان خشيتي منه ابكتني .. بعثني على صراط مستقيم

فی مثل حد السیف ان زغت عنه هلکت »

دیه بی-وروب [واثن شدًا لند هبن بالذی اوحینا

البک] آیت کریمه سنی ده او قود قدن صوکره :

— « سز مسلمان اولم دیکزمی ؟ »

دیه صوردی . مبعوثلر؛ مسلمان اولدقلرینی سویلر -

لرکن : [یا او بو یونلر یکرده کی ایه کلر نه اوله حق] بیورلمقله  
کندیله ، انلری قویاروب آندیله ! .

عم النبي عباس بن عبدالمطلبك بعض بلادہ سیاحتلر

نده کندوسنی سؤال ایدنلره ملوکه منسوبیتنی بیلدیلمک

ایچون : [آکل الماراک اوغلی یم] دیه سویلمش بولندیغنه

استناداً الاشعث بن قیس ، بعض مصاحبتی اثناسنده

تأیید مناسبت مقصدیله رسول الله : [نحن بنو آکل

المرار وانت ابن آکل المرار] دیمکله افندیمز ، بنی عبد

المطلبه برابر بعض قریشی مراد ایدمک : [لأنحن بنو

النضر بن کنانة . لانفقوا امننا ولا نشفی من آبائنا]

بیورمشدی .

الاشعث ، ارتحال نبویدن صوکره ارتداد ایدمک

خلافت ابی بکر الصدیق زماننده اسیر اولدینی حالده



حضور خلافتناهی به کتیرلمشیدی . حضرت صدیق ،  
 بونی قتل ایتدیرمک اوزره ایکن اشعث ، جناب خلیفه یه :  
 [ استبقنی لحروبک و زوجنی اختک ] دیمش اوده بونک  
 دیدیکی وجه اوزره یایوب همشیره سی ام فروه رضی الله  
 عنهای اشعثه تزویج ایلمشدر .

الاشعث ، او زمان مدینه منوره ده دوولرک اولدیغی  
 محله کیره رک بولدیغی قلنجی ایله یاره له مغه باشلادی کورنلر :  
 [ کفرالاشعث ] دیه باغیرمقده ایدیلر . اشعث ایشنی بتیردکن  
 صوکره قلنجی غلافه قویوب : [ والله بن کافر اولمدم  
 انجق رجل بزه همشیره سنی تزویج ایتدی . بزا کر  
 بلده مزده بولنسیدک بونلردن بشقه درلو ولیمه اوله حق  
 ایدی . ای اهل مدینه ! . کسیکز بیکر ] دیدی صوکره  
 دوولرک امانی صاحبزینه ویردی .

\*\*\*

۲۹

### وفود همدان

کوزل دوولره را کب اولدقلری حلاله یتمدن کلدیله .  
 آرقه لرنده آلاجه برده لری باشلرنده کوزل عمامه لری  
 وار ایدی . رئیس لری « مالک بن النقطه » ایدی .

فخر الرسل صلى الله تعالى عليه وسلم افنديمك  
تبوكدن اوان معاودتارينه تصادفي سببيده يولده ملاقات  
ايتديار. التفات جهاندرجات رسالتپناهى به نائل اولديار  
هر درلو معروضات و استرحاماتلرى اسعاف و اللرينه  
عهدنامه اعطا بيورلدى. كندولرينه مالك بن المظى، امير  
تعيين ايتدى [ نعم الحى - همدان . ما اسرعها الى النصر  
واصرها على الجهد . وفيهم ابدال وفيهم اوتاد ] بونلر  
حققه لسان شريف رسالتدن صادر اولمشدر .

••

۴۴

### وفود بلى

رويفع بن ثابت بلويدن منقولدركه :

قومك حضور پرسرور رسالتپناهى به وفودلرى، سنه  
تاسمه هجر بهنك ربيع الاولنده ايدى كله جكارندن خبردار  
اولنجه استقباله چيقددم . يولده انلرى بولوب خانه مه  
دغودت ايتدم خانه مده بوكلرني اينديرديلر . سفر ائوابلرني  
چيقاروب تميز البسه كيديلر . صوكره حضور پرسرور  
رسالتپناهى به برابر كيتك . افنديمز سؤال ايتدى :

— « یا رویفیع بونلر کیمدر ؟ »

دیدم :

— « یا رسول الله ! قوم و قبیله مدر »

افندیمر ، قبول و محظوظیتنی بللی ایدرک :

— « مرحباً بك وبقومك »

بیوردیلر . بن دیدم :

— « یا رسول الله ! بونلر ، اسلامه مقرو بلده لرند »

قوملرینک اسلاملرینه کفیل اولوب کلمشلر »

افندیمر :

— « من یرد الله له خیراً یرده للاسلام »

بیوردیلر . دیدم :

— « بونلری کندی خانومه ایندیردم »

بوسوزیمی ده تحسین ایتدی .

بلویلرک اره سند « ابوالضییب » اسمنده بز پیروار

ایدی . دیدی که :

— « یا رسول الله ! بز خدانک وحدانیتنی و سنک

رسالتکی و کتیردیکک دین مبینی تصدیق ایدوب و آباء

واجدادلریمزک اصنامندن بیزار اولوب حضور پر نور

رسالتپناهیلریمز کلدک »

افديمىز ، جواب مقامنده :

— « سزى اسلامه هدايت ايدن خدايه شكر و ثنا اولسون بيليكنزكه دنيادن دين اسلامك غيرى بردين ايله كيدنلر وكيده جكلر ، بالمله جهنمه كيدرلر »

بيورديلر ابوالضبيب « استيضاح صددنده بعض سؤالرده بولندي . هر برينده ده جواب على الدى . ديدى كه :

— « يارسول الله ! بن قونوق آلمغه وضيافت ويرمكه رغبتلى بر آدمم بونده بنم ايجون اجر و ثواب وارمى ؟ »  
— « اوت كرك فقير ، كرك غنى بر مسلمانانه ايتديكك ابولك صدقه برينه كچر »

— « يارسول الله ! قونوقلغك مدتى نه قدر در ؟ »  
— « اوج كوندر . يانكده بر قونوغك اوج كوندن زياده قالبوده سنى مصرفه قوييمى اكا حلال دكلدر »

— « يارسول الله قويون ضاله سنده حكم شرعى نه در ؟ »  
— « اكر صاحبي چيقوبده نشانلري بيان ايدر سه صاحبنه ويريلور والا انكله انتفاع اولنور »  
— « يا دوه ضاله سنده ؟ »

— « دوه ضاله سنده سنك نه ايشك وار انى حالنه براقكه صاحبي بولوب السون »

— « یا رسول الله ! بز، زمان جاهلیت مزده یکدیگر -  
 مزی غارت ایدردك غارتله حاصل اولمش نزد مدده بعض  
 اموال واردر . شمدی مسلمان اولدم حکم نه در »  
 — « هر کیم که مسلمان اولور تصرفنده بولنان مال،  
 ملکیدر »

بو محاوره نك ختامنده هیئت وافده قالقوب  
 منزله کلدیلر . انلرایچون نبی اکرم افندیمز، بکا بر مقدار  
 خرما کوندردی . بن، او خرما ایله ضیافتلرینه استعانت  
 ایلدم . بر قاچ کون صوکره رسول اکرم صلی الله علیه  
 وسلم ، جائزه لرینی ویردی . کندولرینی دیار و قبیله لرینه  
 عودته مأذون بیوردی .

\*

۶۳

### وفود مزینه

وفود مزینه ، دوت یوز نفر گیمسه ایدی . مدینه  
 طیبه دن اذن عالی ایله بلده لرینه عودتلی ائساده  
 واقع اولان استدعالرینه بناء حضرت رسالتناه افندیمز،  
 عمر الفاروقه :  
 — « یا عمر ! ژودالقوم »

بیوردیلر . فاروق حضرتتری :

— « یا رسول الله ! بنده بر مقدار خرماذن بشقه

برشی یوقدر . اونکده بونلره کفایت ایدم جگنی عتلم  
کسمز »

دیمکله نبی معظم صلی الله تعالی علیه وسلم :

— « وار یا عمر ! ویر ! »

دیه فرمان بیوردیلر . نعمان بن مقرن بلوی ، حکایه  
ایتمشدرکه عمر ، هیئت مذکوره بی اوینه کتوروب خرماینی  
کوستردی و : « ایستدیککز قدر الیکز » دیدی . خرما ،  
برشی قایل ایدی . هرکس حاجتی مقدار ایدی .  
اک صوکره الان بن ایدم . کوردمکه هیچ بر دانه سی  
النماش ، هیچ برشی اکسلمانمش کی طور یور ! .

•••

۲۴

### وفود بجیله

بجیله وفودی ، یوز الی نفر ایدی « جریر بن  
عبدالله البجلی » حضرتتری رئیس لری ایدی جریر ، حکایه  
ایتمشدرکه مدینه طاهره کلدیکده حله می کیدم حضور  
یاک رسالته کیتدم .

رسول خدا خطبه ده ایدی . اصحاب کرام ، کوز  
 اوجيله بکا چوق دقت ایتدیلر .. بنده — هرکسک بکا  
 دقتلرندن اشتباه حاصل ایدرک — یانه او طور دیغم زانه :  
 [ یوقسه رسول الله ، بنم حقمده شمدی برشیمی سویلدی ]  
 دیه صوردم .

جوابده : «اوت خطبه ده ایکن : [انه سید خل  
 علیکم من هذا الباب — او من هذا الفج — رجل من عین ذی  
 رعین وان علی وجهه مسحة ملک ] دیه سویلمشدی »  
 دیدی .

\*\*\*

جریر ، قومنک سید مطاعی ایدی . ملیح الوجه  
 طواں بدیع الجمال ، صحیح الاسلام ، کبیر القدر ،  
 عظیم القدر بر ذات ایدی . وجهنده کی مسحة . لمکدن  
 مقصد عالی ، ملاحت و صباحت مخصوصه سی ایدی .  
 حضرت رسول الله افندیمر ، دست شریفه یی  
 آجوب :

— « خدایک وحدایتنه و کندی رسالتنه اینسانمق  
 و بن وقت نمازی ادا و ذکاتی اعطا ایتک و رمضانی  
 طوتمق و جمیع اهل اسلامه خیر خواه اولمق و والی اولان

آدم ولوکه بر عبد حبشی اولسه ینہ امرینه اطاعت ایلمک  
اوزره بکا بیعت ایدرمیسک ،

دیه جریره ورودی .

جریر حضرتلری بو مذکوراتک جمله سنی بالقبول  
حبیب خدایک دست همایون بیعتلرینی آلمشدر .

رسول مکرم ، جریرک دیاری احوالندن سؤال  
بیوردی . جریر :

— « یا رسول الله ! جناب حق ، دیاریمزک خلقی  
یئننده دین اسلامی ظاهر و روشن ایتدی . مساجدده  
وصحراالرده اقامت صلاته قیام ایدرلر . بتخانهلری منهدم  
اولدی »

جوابی ویردی . افندیمز صورديلر :

— « یا ذی الخلصه بتخانهسی نه حالده در »

— « اولکی حالی اوزره قائمدر »

— « ای جریر ! بنم درونمی بوذی الخلصه غایله  
سندن مستتریح ایتزمیسک »

— « یا رسول الله ! بنمده ارزو ایتدیکم بودو انی بن  
تخریب ایدیم »

ذی الخلصه ، بجیلہ ، خشم قبیلہ لرینک « کعبه



الیمانیه ، نامیلہ معروف بر بتخانہ سی ایدی انی زیارت  
ایچون اطرافدن بر خیلی کیمسه لر کلیر کیدر لردی .  
خزیرة العربده او مثلوا آثار شرك وضلالت قالدیر لمقدمه  
اولدینی حالدہ انک حالی اوزره قالمسی جائز کورولمیه رک  
هدم و تخریبینه جریر حضر تلرینی مأمور ایتدی .  
اوده :

— « بر عذر م واریا رسول الله ! آتہ بینہ میورم .

دوشیورم »

دیدی . بونک اوزرینه رسول اکرم صلی الله علیه  
وسلم افندیمز ، مبارک اللرینی جریرک صدرینه قویدی .  
و: [ اللهم ثبته واجعله هادياً مهدياً ] دیه دعا بیوردی .  
جریر ، ذی الخلصه تخریبینه کیدر کن بیندیکی سرکش بر آت  
ایدی . برکت دعاء پیغمبری ایله آت سرکشک ایتدیکی  
کبی جریر حضر تلری دخی آندن بردها دوشمیه رک یوز  
الی نفر معیتله کیتمش و ذی الخلصه بی هدم و احراق طریقله  
خراب ایتمشدر .

جریر حضر تلری طرفدن خبر موفقی عرض و اعلام  
ایچون بنی احمددن مدینه طیبه یه اعزام اولنان و ابوار طات  
حصین بن ربیعہ ، کیفیتی :

— یا رسول الله ! والذي بعثك بالحق ما جئت حتى

تركتها كأنها جمل اجرب ،

دیه عثه علیای رسالتہ تبشیر ایدنبجہ سید العالمین افندیمز ،

احسک خیل و رجالنه بش کره برکتله دعا ایتمشدر .

\* \*  
۲۵

### وفودنی تجیب

خطه یمنده بنی کنده تجیب قبیله سنک ایلچیسی اون

اوج نفر کیسه ایدی .

بونلر ، بلده لرنده کی مواشی و اموالارینک زکاتلرینی ده

حامل ایدی .

مقدملری ، مسروریت و محظوظیت رسالتیناهی بی

مستلزم اوله رق حقلارنده بذل التفات بیورلدی . و اجراء

ضیافتلرینه حضرت بلال رضی الله عنه مأمور اولدی

زکاتلرینی دربار نبوته عرض ایتدیلر . او زمان کندی

بلده لرنده کی فقراء مسلمینه تقسیم ایتلمری امر اولندی .

فقراء محلیه یه توزیعدن صو کره فضله کلان قسمک کتیرلمش

اولدیغنی سویلدیلر .

مکت و اقامت لری مدتی حقارنده مراسم مهمانوازی  
اجرا سینه فوق الامثال اعتنا اولندی . عودت ایچون  
وداعه کلدکارنده دیگر و افدینه اولان مقدار دن زیاده  
عطایا و جوائز احسان بیوریلوب افندیمز :

— « ایچکزده جائزه سی ویرلماش قالدیمی ؟ »  
دیه صوردی .

— « اوت یار سول الله ! بر کوچوک رفیقمز وار  
ایدی . منزله اشیا و مواشیعزی بکله مکه بر اقمشدک او  
قالدی . »

دیملریله انک دخی کوندربلی امر بیورلدی .  
بنی تحیب وداع ایدرک . منزله رینه کلدیلر غلام مزبور .  
حضور عالییه دخولنده :

— « یار سول الله ! شمدی حضور شریفکدن کیدن  
جماعتدئم . بنم ارزوم انلرک ارزولری کبی دکلدر . کرچه  
رفیقلریمکده دین اسلامه رغبتلری واردر اما بنم همت  
زیاده در . انلرک حاجت لری روا بیوردک بنم دخی حاجتمی  
روا قیل . »

دیدی . حضرت پیغمبر :

— « سنک حاجتک ندر ؟ »

دیه صورتی. اوده :

— «والله بن دیکر لرہ احسان ایتدیکک کبی مال انعام  
ایتسون دیه بلده مزدن جیقوب کلام . بلکه یا رسول الله  
دعا وشفاعتک برکتیله جناب حق، بنی عفو و مغفرت ایلده.  
و بنم قلبی مال دنیادن فارغ و آزاده ایدوب غناء قلب  
احسان بیوره دیه کلام .»

جوانی ویردی. انک اشبو طاب و رغبتی و علو  
همتتی اقدیمز. تقدیر و تحسین ایدرک حقنده توجه تام ایلده:  
[اللهم اغفر له وارحمه واجعله غناء - غناء فی قلبه] دیه دعا  
بیورمش و کندوسنه جائزه و عطیه ویرمشدر .

•••

حجة الوداعده قوم تحجیدن برینه مناده ملاقی اوله رق  
شو غلامک حالندن سئوال ایدمجه :

— «یا رسول الله بز اندن دها قناعتی بر آدم  
ایشتمدک . یاسنده بتون اموال دنیایی تقسیم ایتسه لر نظر  
و التفات بیلہ ایتمز .»

جوانی آله رق: [الحمد لله انی لارجوان یموت جمیعاً]  
بیورمش ایدی. ایچلرندن بری بونی اکلایه مامسنه . بنی:  
[اولیس یموت الرجل جمیعاً یا رسول الله] دیه

صوردیغدن رسول الله صلی الله علیه و سلم اولکی  
 سوزینک تشرح و ایضاحی ضمنتده : [ تشعب اهوآؤه  
 و همومه فی اودیة الدنیا فلعل الاجل یدرکه فی بعض  
 تلك الاودیة فلا یبالی الله عز و جل فی ایها هلك ] دیه  
 بیوردیلر . یتمده اخیراً وقوع بولان ردت اختلالنده صحابی  
 مشارالیه ، کندی قوم و قبیله سنی و عظم و نصیحتله ردتدن منع  
 ایتسنه مکافاة صدیق اکبرک زیاد بن ولید واسطه سیله  
 مظهر تکریمی اولمشدر .

۲۶

### وفود بنی اسد

بنی اسد بن خزیمه و افدری ، اون نفر ایدی .  
 میانه لرنده اعیان قبیله دن « وابسه بن معبد ، طلیحه بن  
 خویلد . معاذة بن عبدالله بن خلف ، حضرمی بن عامر »  
 دخی وار ایدیلر اقدیمز اصحاب کرامیله صحبت ایدرلرکن  
 بونلر ، کلدیلر .

ایچلرندن حضرمی ، برارالق :

— « یارسول الله ! سن ، بزی دیگر قبیله لرکی

اجبار و خبردار ایتدن بز ، بونجه مشاق سفر اختیاریله  
و کندی ارزومزله کلدک . قبول - لام ایدوب سکا تابع  
اولدق ،

دیه وضع منت ایتک ایستدی که کراحت درکار  
ایدی . جناب حق ، انک ردی صد دنده : [ یمنون  
علیک ان اسلموا قل لاتمنوا علی اسلامکم بل الله یمن  
علیکم ان هدیکم للایمان ان کنتم صادقین ] آیت کریمه سنی  
انزال بیورمشدر .

...

وابصه ، « بر واثم » دن سؤال نیتیله حضور پر نور  
رسالته کیردی فقط سؤالدن اول افندیمز :

— « یا وابصه ! سؤال مضمیریکی سکا سویلیه یم می ؟ »  
دیدی ، وابصه :

— « سویله یا رسول الله »

دیدی . بونک اوزرینه رسول اکرم صلی الله علیه  
وسلم :

— « بر واثمدن سؤاله کلدک »

دیرکن وابصه :

— « ای والذی بعثک بالحق »

دیه تصدیق کیفیت ایتمه که سؤال مضمرینه جواب  
اوله رق :

— « البرما انشرح له صدرک . و الاسم ما حاک فی  
نفسک وان افتاک عنه الناس »

بیورلدی . بونلر ، زمان جاهلیتیلر نده کی عیافت  
و کهانتلرینک بعدالاسلام جواز وعدم جوازیغی استفسار  
ایدوب ممنوعیتنه دائر جواب الدقدن صوکره خط یمنی  
ومل ایچون دخی صور دیلر . و : [علمه نبی فن صادق  
مثل علمه علم] جواغی آدیلر .

## ۲۷

## وفود نبی بهراء

یمنده اوچ نفر کیمسه لر ایدی . بونلره ابتدا اصحاب  
کرامدن مقدار رضی الله عنه . ملاقی اوله رق حقلرنده  
عزت و اکرام ایتدی . یمک چیقاردی . یدی لر . یمکن  
بر مقدار آرتدی . بقیة طعامک بر قسمنی . مقدار ، کاسه  
ایله افندی مزه کتیردی افندی مز دخی تناول بیور دیلر .  
کاسه ده قالمش اولان طعامه جناب حق ، برکت  
ولدت احسان ایدرک مقدار ، انی اندن صوکره

هر کون وفود بهر انک سفره سنه قویر ایدی . وافدین  
 دخی اکل ایدر ولذتی هر کون مدح ایلرلر ایدی .  
 لذت و برکتک کیفیت حصه وانی مقاداد ، اکلانجه  
 انلر ، حیرتله : [ نشهد انه رسول الله ] دیدیلر .  
 اعتقادلری بو سببله کسب قوت ایتدی . برقاج کون  
 طور دیلر . اصحاب کرامدن فرائض و آداب دینییه اوکر .  
 نوب جائزملرینی الدقدن صوکره بلده لرینه عودت ایتدیلر .

..

۲۸

### وفود بنی مره

ذی مره دینیلان محلدن حارث بن عوف ، اون  
 اوج نفر ایله مدینه طیبهیه کلهزک :  
 — « یارسول الله ! لوی بن غالب نسلندتر . سنک  
 قوم و عشیرتکیز »

دیدى . نظر عاطفت جناب پیغمبری بی جلب ایتک ایستدی .  
 بو سوزدن نبی اکرم افندیمنز ، تبسم بیوروب انلردن بلده لرینک  
 احوالی سوردی . کلنلر : [ والله انا لمستون وما فی المال  
مخفادع الله لنا ] دیدیلر قحط و غلادن شکایتله التماس دعا



ديك اوليور ايدى. [ اللهم اسقمهم الغيث ] ديه حقلرنده  
غيث ورحمه دعا بيورلدى. و هر برينه حضرت بلال  
يديله اونزو حارث بن عوفه اون ايكي قيه نقره احسان  
اولندى.

عودتلرنده كورديلركه افنديمرك دعا بيوردقلى  
كون بلد لرينه رحمت دوشوب هر يرده فيض بركت  
رونما اولمش.

رسول الله صلى الله عليه وسلم افنديمرك حجة الوداعه  
حاضر لمقدمه اولدينى ائمه بوهيئت و افده دن مدينه  
طيبه يه كمش اولان برى نزول رحمت خصوصنده كي  
حيرتى رسول ذیشان خدايه :

— « يا رسول الله ! رجعنا الى بلادنا فوجدناها  
مصبوبة مطراً بذلك اليوم الذى دعوت لنا فيه. ثم قلدنا  
اقلادا الزرع فى كل خمس عشرة مطرة جوداً. ولقد رأيت  
الابل تأكل وهى برك. وان غنمنا ماتوا رى من ابياتنا  
فترجع فتقبل فى اهلنا »

ديه عرض و حكايه ايتدى. افنديمرك اكا قارشى :

— « الحمد لله الذى هو صنع ذلك »

ديه شكر و سپاسنى بارگاه صمدانيته رفع بيورمشدر.

۲۹

## وفود بنی محارب

اون نفر ایدی ایچلرنده خزیمه بن سوادده وار  
ایدی. جناب رسالتپناهك بدایت دعوت جلیله لری هنگا-  
منده وبالخاصه ایام مواسمه کندی لرینی قبائله عرض  
ایلدیکی صره لرده عریده بونردن غلیظ و سرکش  
طائفه یوق ایدی. نهایت هدایت سبحانیه ، انلری  
حضور پر نور نبوته سوق ایدرک قبول اسلام ایتدی.  
مسلمان اولدقلری حالده مملکتلرینه عودت ایتدیلر .

۳۰

## وفود بنی عبس

بر قاج کیمسه لر، کلوب مسلمان اولدیلر. و :  
— « یارسول الله ! هجرت ایتیانلرک اسلاملرینه ک  
صحیح اولمیه جغتی عالملریمز ، بزه سویدیلر . اکر بویله  
ایسه مواشی و اموالری صانه لم هجرت ایدلم »  
دیه صوره رق رسول الله صلی الله علیه و سلمدن :

— « هر زرده اولور ایسه کز حق تعالی یه تقوی  
اوزره اولیکز اعمالکزدن هیچ برینه نقصان جزا  
ویرمن ،  
جوابی آدیلر .

۳۱

### وفود بنی ازد

یدی نفر ایدی . سوید بن الحرث ده برابر ایدی .  
حضور عالی رسالته کلدیلر . قونوشدیلر . « نه اصل کیمسه  
لرسکزه دیه سؤال بیورلدی » بزه ، مؤمن کیمسه لرزه ،  
دیدیلر بو جواب ، تبسم سعادتی موجب اوله رق کندیلر  
ندن بمض شیلری سؤال ایتمک وسیله سیله بینلرنده شو  
محاوره جریان ایتدی :

— « محققا هر سوزک حقیقتی وار . سزک سوزیکرک  
و ایمانکیزک حقیقتی نه در ؟ »

— « یا رسول الله ! بزم سوزیمزک و ایمانمزک حقیقتی  
اون بش خصلتدر . بشی اعتقادده ، بشی عملده اساس  
اولق اوزره طرف شریفکدن کلان آدم ، بزه تعلیم

وتلقين ابتدی. دیگر بش خصلت دخی زمان جاهلیتدن  
قلمه عادتزدركه هنوز ترك ایتدك مكروه كوریلور ایسه  
ترك ایدرز.

— « بنم رسولك اعتقاده متعلق سزه بیلدیردیکی  
بش خصلت نهدر؟ »

— « الله، ملككربنه، كتابلربنه، رسوللربنه، قیامت  
كوننه ایمان. »

— « عمله متعلق اوكرتدیکی بش خصلت ندر؟ »

— « كلمه شهادت، صلوة، صیام، زكات، حج »

— « جاهلیتدن قلمه بش خصلتكنز نهدر؟ »

— « وقت وسعتده شكر. بلایه صبر، قضایه رضا،

دشمن علیهنده حین قیامده ثبات، شهادت اعدایی ترك »

جوابلر، نزد عالی رسالتده جدیر تقدیر

كورولهرك افندیغز: [ بونلر، علما و حکما کیسه لردركه

علم و فقهلرندن انیا اوله یازدیلر ] بیوردقدن صوکره:

— « بنده سزه بش شی اوکرده یم که تمام یکر می

اولسون. سز شول شیئی طویلایمیکز که انی یمیه جکسکز.

شول شیئی یایمیکز که انده ساکن اولایه جقسکز. شول

هیه رغبت ایتیمیکز که عاقبت انی ترك ایده جکسکز. الله

تقوی اوزره اولیکزکه نهایت اکا رجوع ایدم جکسکر .  
شول شینه رغبت ایدیکزکه انده مخلد قاله جقسکر»  
دیه بیوردیلر .

\*\*\*

۳۳

### وفود بنی البکاء

بر طائفه اولارق کلدیلر . « معاویه بن ثور بن عبادة  
بن البکاء» ایله اوغلی بشرو «مجمع بن عبدالله بن جندح  
بن البکاء» ، «عبد عمرو بن اصم» دخی برابر ایدیلر .  
معاویه بن ثور ، یوز یاشنده پیر فانی ایدی . دربار  
نبوته رجا طریقله دیدی که :

— «یا رسول الله ! او غلم بشردن خوشنودم .  
بکا برو احسان اوزره درانی مبارک دست شریف رسا .  
لکیزله مسح بیوریکز»

حضرت رسول الله صلی الله علیه وسلم ، معاویه بنک  
رجاسنی قبول بیوروب مبارک الاریله بشرک یوزینی  
صیغادی . واکا برقاج کچی دخی احسان بیوره رق  
برکته دعا ایتدی .

بنی البكاء دیارنده قحط اولدینی زما ندرده او قرمه  
 قحط کلدیکنک بیانیه شکر و افتخار صد دنده بشرک  
 اوغلی محمد :

و ابی الذی مسح الرسول برآیه

و دعا له بالخير و البرکات

اعطاه احمد اذ اتاه اعزاً

عفرا نواجیل لسن باللحبات

یملآن وفد الحی کل عشیه

و یعود ذاک المله بالندوات

بورکن من منح و بورك مانحا

و علیه منی ماحیت صلاتی

شعر بلیغی سویلشمدر .

\*\*\*

فجیعہ برده اماننامه ویردی . عید عمروک آدینی  
 ه عبدالرحمن ، ديه تصحيح و بلادی اراضیه مندن بر  
 مقداری اکا اقطاع بیوردی .

\*\*\*

۳۳

وفود بنی هلال بن عامر

پر جماعت ایدی . زیاد بن عبدالله بن ببارک ، عید

عوف بن اصرم، قبيصه بن مخارق، دخی ایچلرده ایدیلر.  
 زیاد امهات مؤمنیندن خاله سی میمونه رضی الله  
 عنہانک خانه سنه کلدی. رسول الله صلی علیه و سلم  
 زیادی حضرت میمونه نك نزدنده کوروب غضبله کیری  
 دوندی. میمونه حضرتلری، کیفیتی اکلا یه رق: [یارسول  
 الله! بنم همشیره زاده مدر] دیدیکندن افندیمز، ایچری  
 کیردی اوطوردی.

بر مدت صوکره مسجد شریفه کلدی. زیاد دخی  
 برلکده ایدی. او یله نمازینی جماعتله قیلوب زیادی نزد  
 هایونارینه اوطورتدی. و اکا دعا ایتدی. مبارک دست  
 شریفلریله زیادک باشنی صیغادی. حتی دست شریفلری،  
 باشندن بوروننه بوروننک اوجنه دکین ایندی.

اشبو مسح سعادتک اثر نور و برکتک یوزنده دائماً  
 مشاهده ایدلدیکنی بنی هلال، حکایه ایدرلر ایدی. حتی  
 زیادک اوغلی حقنده شاعرک :

یا ابن الذی مسح النبی برأسه  
 و دعا به بالخیر عند المسجد  
 ما زال ذاك النور فی عمر نینه  
 حتی توارى یتنه فی الملحد

شعر رنگینی. او معنایی کوزل تصریح ایتمشدر.

حضرت نبی افندیمر ، عبد عوفی تغیراً عبد الله

ایله تسمیه بیوردی .

..

قیضه :

— « یارسول الله ! بزدن بر آدم ، برینی  
اولدیردیکندن ایکی قبیله بیننده خصومت حادث اولمقله  
تسکین فتنه ایچون بن ، استقراض ایدوب مقتولک دیتی  
اولیاسنه ویرمشدم . اندن حالا مدیونم . اعانه بیوره  
دیه استعطاف ایتدی . حضرت نبی الله دخی :  
[ ابتدا ظهور ایدمک مال زکندن دینی کندی تسویه  
ایدمک ] وعد ایتدکدن صوکره :

— « یا قبیضه ! دینمک اوج آدمک غیرنه حلال  
دکدر . بری ، اصلاح ذات البین ایچون مدیون  
اولاندر که خاتمدن دینلر بوب دینی ادا ایدم بیلور .  
بری ، مالی قضاء ، آفتله تلم اولاندر که اصلاح  
وسعه حاله دکن دینلر بیلور . اوچنجیدی ده ،  
اول نقیر در که فقر و فاقه سنه قومندن اوج  
عاقل کیمسه شهادت ایدم از فقیر ، فقردن خلاصنه  
دکن خلقندن سؤال ایدم بیلور . یا قبیضه !



تساؤل ، بو اوج کشینک غیری ایچون حلال دکلدره  
بیوردیلر .

..

۳۴

### وفود بنی دارم

قیله لخدمن دارم جماعتی ، اون نفر ایدی .  
رئیسلی ، هانی بن حبیب ایدی اقدیمزه بر قاج رأس  
آت، صیرمه لی و قماشدن بر قفتان؛ بر مقدارده خمر هدیه  
کتیردیلر .

قفتان ایله آتلی ، قبول بیوریلوب خمر خقنده :  
[ شرب خمری جناب حق ، حرام ایتدی ] دینلدی . هانی  
هدیه سی مرتبه حسن قبولدن ساقط ایتمامک عزم  
و قصدیله :

— « او یله ایسه صاته لمده »

دیمش ایسه ده طرف اشرف نبوتدن :

— « شر بنی حرام ایدن ، بیعی ده حرام ایتمشدر .

طوبراغه دو کیگز »

دیه قطعیا رد ایدلدی .

قفتان ، حضرت عباس رضی الله عنه احسان  
بیورلشدی . عباس :

— «یا رسول الله ! بن بونی نه یابهیم که ارککلره  
حریر ، حرامدر»

دیدی . فخر عالم صلی الله علیه وسلم :

— «التونلرینی سوکوب بعضنی قادینلره زینت  
بعضنی کندک صرف ایت قماشنک ده بهاسیله انتفاع ایت»  
بیوردیلر . بونک اوزرینه حضرت عباس ، قفتانی  
سکز بیک درهم بدل ایله بر یهودی به صاتمشد .  
وفود بنی دارم . ارتحال نبوی به دکین مدینه  
طیبه دن آیرلماشلردو .

## — فصل ثالث عشر —

## اورنجی سنہ ہجریہ وقایعی

فوت باذان . بعث معاذ و ابو موسی . وفود عبدالقیس .  
 وفات ابراہیم بن النبی . کسوف شمس . بعث خالد . بعث علی .  
 وفود بنی حنیف . وفود از دشنوئہ . وفود نصاری نجران .  
 بعث ابی عبیدہ . وفود بنی خولان . وفود بنی مدلج . وفود  
 بنی غسان . وفود بنی غامد . قدوم عدی . وفود سلمان .  
 وفود بنی منتفق . ورود اسود عنسی . حجة الوداع . قدوم  
 فیروز دیلمی . طلوع جبریل .

## فوت باذان

باذان ، ملوک عجمک سابق فی الاسلامی ایدی .  
 قبول اسلامہ منی سید الانام علیہ الصلوۃ والسلام  
 افندیمر ، انی یمن ولایتی والیہ کنندہ ابقا بیورمشدی . بو  
 کرہ خبروفاتی مسموع عالی بیورلمسیلہ زیر ادارہ سندہ بولنان  
 یمن حکومتی اقسامہ بالتقسیم برقسمنہ والی سابق باذانک  
 اوغلی شہری . اقسام سائرہ سندہ عامر بن شہر الہمدانی

ابو موسى الاشعري ، خالد بن الوليد ، يعلى بن منبه ،  
معاذ بن جبل رضوان الله عليهم اجمعين خضر اتى والى  
و عامل تعيين بيور مشدر .

معاذ ، يملك جهت علمياسنه ، ابو موسى الاشعري جهت  
سفلاسنه مأمور ايدى . زياد بن ليلى ، حضر موته عكاشه  
بن ثورى ، سكاك قبائلى حكومتنه مأمور بيور لمشدر ايدى .

\*\*\*

۲

## بعث ابو موسى و معاذ

رسول الله صلى الله عليه وسلم ، معاذ ايله ابو موسى  
الاشعري حضر تلرينه بعض و صاياده بولنه رق : [يسرا  
ولا تعسرا بشرا و لاتنفرا و تطاوعا] بيور ديلر . بلاد  
سائر خلقنه نسبتله يمن اهالىشى . لين القلوب كسه لر  
اولمى حكمتنه مبنى غايت رفق و ملايمتله استيناس و  
استمالتلرينه همت اولمى اهميتله توصيه ايدلدى . معاذك  
يمنه متوجهاً مدينه طيبه دن حركت ايتديكى كون حضرت  
نبى محترم افنديمز : [يا بلال عمامه مى كتير] ديه عمامه  
سعادتلرينى جلب ايدوب كيدكد نصكره معاذ ، راحله سنه

ارکاب اولندی.. رسول اکرم معیت سنیہ لرنده مهاجرین  
وانصار کرام ایله برلکده انی تشییع بیوردیلر ..  
ائناء تشییعده معاذ، را کباً حضرت پیغمبر، معاذک  
یانی صره ماشیاً کیدیور و معاذه امر مأموریتنه عائد  
وصایا اجرا بیوریورلر ایدی .  
معاذ، تأدب صدنده :

— « یارسول الله ! بن را کیم . سن پیاده سک  
رخصت ویرده راحله دن اینهیم . آریلنجیه قدر  
سنکله برابر پیاده یورویهیم »  
دیدى . بوکا افندیمز :

— « یا معاذ ! سنک مأمور اولدیغک ایش ، فی  
سبیل الله در فی سبیل الله کورولهجک ایشلرده اوله  
معامله جائز اولهمن »

بیوردیلر . وانی راحله دن ایندیرمیدیلر .  
اندن صوکره ذات اقدس رسالتیناهى، وصایایه دوام  
ایدرک :

— « یا معاذ ! بوکوندن صوکره ملاقات ایدهجک  
اولسیدک سکاوصیتیمى قیصه کسردم . ولکن بوسنه دن صوکره  
سن بنی کوره میوب مسجدیمى و قبریمى کوره جکسک »

بیورملریله حضرت معاذ، فراق رسول الله دائر اولان  
اشبو تلقیناته تحمل ایدمه یه رک اغلامغه باشلادی .

نبی ذیشان ، ایفاء وصایایه دوام ایتدی :

— یا معاذ ! سن ، اهل کتاب اولان بر قومک  
ایچنه کیدیورسک . اورایه واریدیگده انلری اللهک  
وحدانیتنه و بنم نبوت و رسالتی تصدیقه دعوت ایت .  
انده سکا تابع اولورلرسه تبلیغ ایت که اوزرلرینه جناب  
حق ، یکر می درت ساعتده بش وقت نماز فرض ایتمشدر .  
انده ده سکا اطاعت ایدرلرسه اکلات که زنکیسلرندن  
ماللرینک زکاتی آلتوب فقراسنه ویرلمسنی جناب حق  
امرا یتمشدرانده ده موافقت ایدرلرسه صاقین که امواللرینک  
ایولرینی سچوب آله . مظلومک دعاسندن قورق .  
زیرا مظلومک دعاسیله اللهک یئننده حائل یوقدر . یا  
معاذ ! انلر سکا جنتک مفتاحی نه در دیه سؤال ایدم جکلر  
لااله الا الله اولدیغنی سویله . یا معاذ ! الله ایچون تواضع  
اوزره اولملیسک که جناب حق ، سنی عالی ایدم . هیچ  
برایشده سکا علم یقین حاصل اولمدقجه حکم ایتمه برایشده  
مشکلات کورور ایسه ک بیئلردن سؤال و استشاره ایت .  
صوکره کندی رأی واجتهادینه مراجعت ایت زیر اصدق .

و استقامتی التزام ایلمک ایسه الله تعالی سنی موفق بیورور .  
 بر مصلحتده انتقالجہ ذہنکده تردد و اشتباه حادث اولورسه  
 ذہنک ثابت اولنجہ یه دکیں طور . افکار یکی جمع ایت .  
 یکا یاز . هوادن حذر ایله زیرا هوا ، اشقیای جہنمه  
 کتورور . هیچ بر مصلحتده غضب ایتمه . رفق و  
 ملایمت اختیار ایت .

بیوردیلر . براز صوکره سؤال ایتدیلر :

— « یامعاذ ! سکا برایش عرض اولندیغی وقت ناصل

حکم ایدہ جکسک ؟ »

معاذ جواب ویردی :

— « اللہک کتابیلہ »

— « اللہک کتابینده بوله مدکسه »

— « رسول اللہک سنتیلہ »

— « سنت رسول اللہده بوله مدکسه »

— « کندی اجتہادملہ »

معاذک بویلہ احکام شناسانه جواب ویرسی اوزرینه

حضرت پیغمبر : [اللہم حمدا ولسونکارسوانک رسولنی رسول

اللہک مرضیسنه موافق معاملہ یه موفق ایلمدی ] دیدی

و او آنده وداع ايديلهرك حضرت معاذ يمينه عزيمت  
ورسول اکرم دخی اصحاب کراميله مدينه طيبه لرينه  
عودت ايلدی.

معاذ، يمينه مواصلتنده منبره چيقوپ بر خطبه دن  
حوکره حامل اولديني عهد عالی يينغمبري بي رؤوس  
اشهادده او قودی . اشراف بلده :

— « يا معاذ سنک ايچون مخصوص قوناق حاضرله دق  
بيوريکنز »

ديديلر . معاذ :

— « مخصوص قوناغه اينمکه رسول الله بکا اذن  
ويرمدی »

ديهرك مسجدی اقامتگاه اتخاذايلدی .

\*\*\*

۳

### وفود بني عبد القيس

آلتنجي سنه هجريه ويا فتح مکه زمانيه آز قریب  
ايدوکی ده مرویدر . وفود عبد القيس ، عمان سواحلندن  
بحرين موقعنک « جوانی » قریه سندن یکر می یاخود اون



اوج نفر کیمسه لر ایدی رئیس لری « عبدالله بن عوف  
اشج » ایدی [\*] جارود نام قسیس نصرانی بونلرله برلکده  
ایدی .

جاروده شو سفردن مقدم بروقت بلده لرنده سلمه بن  
عیاض الازدی به :

— تمامده دعوائ نبوتله بری بلوردی . کیدوب  
باقعه ارزوک یوقی مناسب بولورسقی اویارز . اویله ظن  
ایدرم که اوزات عیسی بن مریمک تدشیر ایلدیکی پیغمبردر .  
شوقدر که هر بریمزده اوچر مسئله صاقلایلم اکر انلری  
بزه خبر ویره بیلور ایسه وحی ایله مؤید نبی صادقدر ،  
دیه ایکسی سوزلشدیلر ایدی .

[\*] عبدالله بن اشجک بر راهب دوستی وار ایدی راهب  
اکا اولجه ظهورنی آخر الزمانی و اوصاف و شمائل شریفه نبویه دن  
بر مقداری سویا ش اوده تحقیق کیفیت ایچون همشیره زاده سنی  
مکه مکرمه یه توندرمش ایدی . که انک کلسی هجرت سنه سنده  
ایدی ابن اشجک مبعوثی ، رسالتپناه افندی می کوره رک مسلمان  
اولدی . وفاتحه و سورة عاقی اوکرنوب عودت ایتدی . دایسی  
اشجی دینه دعوت ایتسی کندوسنه تنیه بیورلمش اولغله عودتسنده  
مشاهداتی خبر و یروب اشجده مسلمان اولدی فقط اسلانی  
کیزلی طوتدی .

بونلر هنوز مدینه طیبیه وصول لرندن برکون اول  
 رسول اکرم صلی الله تعالی علیه وسلم ؛ احباب  
 کرامنه [سیطاع علیکم من هنا ركب هم خیر اهل المشرق .  
 لم یکر هوا علی الاسلام قد انضو الركائب وافنوا الزاد  
 اللهم اغفر لعبد القیس] بیوردیلر . که اخبار بیوریلان  
 ركب عبد القیس سواریلری ایدی .

بونک اوزرینه حضرت عمر ، او مجلسدن قالقوب  
 ركب مذکورک کله چکی سمتہ طوغری یورودی و بر  
 جماعته راست کلدی . اون اوچ ویا یکر می سوار ی  
 و قرقده آدم ایدی . جناب فاروق جماعته صور دی :  
 — « من القوم ؟ »

— « من بنی عبد القیس »

دیه جواب ویردی . حضرت عمر ، اکلایه رق  
 انلره قارش ی مودتکارانه بر وضع صمیمی ایله :  
 — « اما ان النبی صلی الله علیه وسلم قد ذکرکم  
 آنفاً و قد قال خیراً »

دید ی و کندولرینی برابر آلوب کلدی ، حضور  
 اقدسه کلدکلرنده انلره :

— « هذا صاحبکم الذی تریدون = ارزوایتدیککنز  
 شو ذاتدر »

دیه رسالتپناه افندی میزی کوستر ایکن عبدالقیس  
جماعتی کندیلرینی راحله لرندن باب المسجده طوغری  
یزه آتهرق ثیاب سفرلریله پیشگاه رسالتیه قوشوشدیلر .  
دست و پای اقدسی اویمکه مبادرت ایلدیلر .  
افندی میز :

— « من القوم ؟ »

دیه صوردیله . جماعت عبدالقیس :

— « من ربيعة »

جوانی ویرملری اوزرینه طرف دیشرف نبویدن  
[خیر ربيعة عبدالقیس مرحباً بالقوم غیر خزايا ولاندامی  
انا حجج من ظلم عبدالقیس] لطف و نوازشیله ترحیب  
بیورلدیلر .

رئیسلری اولان عبدالله بن عوف اشج ، نقیل  
دست و پای رسالتیه عائد مبادرت و مسارعتمده ارقداشلرینه  
مخالفت ایدهرک او قدر استعجال نا بجا کوسه ترمدی .  
ابتدا راحله سنی وقار و تانی ایله اناخه و اشیا-نی  
جمع ایلدی . بیاض ایکی لباس چیقاروب کیدکدن صوکره  
یاواش یاواش یورویه رک حضور اقدسه کلدی . ید . مؤبد  
رسول الله تعظیم و محبتله اننه آلدی اویدی . خالبوکه

کندوسی بر رجل دمیم ایدی . یعنی ملیح الوجه دکل ایدی . بر روایتی کوره ایشته او آنده حضرت نبی معظم افندیمز :

— « عبدالله بن عوف اشج هانکیکزدرد ؟ »

دیه صوروب اشج :

— « بن یا رسول الله »

جوانی ویرمکله افندیمز ، ا کا بر از دقتله باقدی . رسول الله صورت نظر هایونلرندن کندی ذمامتنه دقت بیورلمش اولدیغنی ابن اشج ، درک و تفتن ایدم رک : — « یا رسول الله ! انه لا یتقی فی مسوک الرجال و انما یتحتاج الرجل من اصغریه لسانه و قلبه = یا رسول الله ! بنی آدمک پوستندن صو ایچلمز . لازم اولان ایکی عضو اصغری یعنی لسانیه قلبیدر .

دیدیکندن حقنده خاصه بذل التفات ایله رسول الله ، فی یانیه اوطورتدی . و :

— « تبایعون علی انفسکم و قومکم »

بیوردی . عبد القیس جماعتی ، همان بلاتامل جواب وافتت ویریرلرکن عبدالله قومنک شومسارعتنه قارشیده : — « یا رسول الله ! بر آدمی دینه دن دوندیرمک

آز قولای دکلدر، بز قفسمز اوزرینه سکا بیعت ایدرز.  
سن بر آدم کوندروب قومی دعوت ایتدیریرسک.  
انلردن قبول دین ایدنلر، بزدن اولور ایتیمانلری قتل  
ایدرز.

دیه سویلیدی.. ملاحظه کارانه اولان بوسوزک تقدیر  
و تصویبی زمیننده حضرت پیغمبر :

— «ای عبدالله! طوغری سویلدک تحقیقا سنده  
جناب حقک سـودیکی ایکی حال و خصلت وارکه بری  
حلم دیکری اناه و تائیدر»  
بیوردیلر . عبدالله سوينهرك :

— «یا رسول الله! او خصلتلر، بنده جمل  
و خلقیمیدر حادث و عارضیمیدر!»

دیه سوروب [جبلیدر] جواب عالیننی المسیله  
[الحمد لله الذی خلقنی علی خلقین یحبهما] دیه حمد و  
ایلدی جارود دربار درربار نبوی به عرض ایلدی که :  
— «یا محمد! انی کنت علی دین و انی تارک دین  
لدينک فتضمن لی ذنبی»

بوکا قارشى افندیمز :  
— «نعم اناضامن لك ان قد هداك الى ما هو خیرا

دیه بیورمقله جارود و حایفی سلمه بن عیاض سؤال  
ایتدیلر :

— « بسم بئسک ربک یا محمد »

رسول الله صلى الله عليه وسلم :

— « بشهادة ان لا اله الا الله وانى عبد الله ورسوله  
والبراءة من كل ندر — او دين — يعبد من دون الله وبقام  
الصلوة لوقتها و ايتاء الزكاة لحقها و صوم رمضان و حيج  
البيت من استطاع اليه سبيلا بغير الحاد . من عمل صالحاً  
فلنفسه و من اساء فعليها و ما ربك بظلام للعبيد »

جـوابی ویردی . او زمان جارود و رفیق سلمه  
سؤال مضمحلرینی آچهرق :

— « یا محمد ! ان كنت نبياً فاخبرنا عما اضرنا عليه »

دیدیلر . افندیمر همان سنه یعنی او یوقلمه کبی بر حال  
خفقانه معروض اوله رق بر مدت قلیله صوکره او حال  
کچدی وجه شریفی یوقاری قالدیردی تری طـاملایور  
ایدی . دیدی که :

— « اما انت يا جارود ! فانك اضرمت على ان تسألني

عن دماء الجاهلية وعن حلف الجاهلية و عن المنيحة  
الا وان دم الجاهلية موضوع وحلفها مردود ولا حلف

في الاسلام الاوان افضل الصدقة ان تمنح اخاك ظهر  
 دابة اولبن شاة فانها تغدو برفده و تروح بمثله . . واما  
 انت ياسلمة! فانك اضمرت على ان تسئلني عن عبادة  
 الاوثان وعن يوم السباسب و عن عقل الهجين فاما  
 عبادة الاوثان فان الله تعالى يقول انكم وما تعبدون من  
 دون الله حصب جهنم انتم لها وار دون واما يوم السباسب  
 فقد اذاع به الله ليلة خيرا من الف شهر فاطلبوها في  
 العشر الا و اخر من رمضان فانها ليلة بالجة سمحة  
 لاربح فيها تطاع الشمس في صبيحتها لاشعاع لها واما  
 عقل الهجين فان المؤمنين اخوة تتكافأ دماءهم يحير  
 اقصاهم على ادناهم اكر مهم عند الله انقاهم »

شو جواب على جارود ايله سلمه نك مضمرا اولان  
 سؤالرينه موافق و مطابق ايدي . بناء عليه سؤال  
 وانكالري تماما حل ايدلمش اولارق دروني برتسليميتله  
 ايمان و اسلام و شرف صحبت و اطاعت سيد الانام ايله  
 مشرف و مباهى اولمشلردر .

بنی عبدالقيس جماعتی دیدیارکه :

— « يا رسول الله انا نأتيك من شقة بعيدة و انه  
 يحول بيننا وبينك هذا الحى من كثار مخر وانا لانصل

اليك الا في شهر حرام فامرنا باصر فصل نأخذ به  
ونخبره من و راءنا وندخل به الجنة = بز سكا اوزاق  
يردن كليورز . ارامزده كفار بني مضر دن بر جماعت  
حائل اولديغه مبنی انجق اشهر حرمده كله بيله جكر بز  
برشی امر و تعليم ايت كه انی ايشلايكمز تقدیرده جنته  
كیره بيله لم . وقيله من خلقته ده سويليه لم ،

حضرت سيد الانبياء افنديمز ، جنته مدار دخول  
اولق اوزره اسلامك مبنی عليهی بولنان بر اساس مصون  
عن الاندراسی انلره كوستره رك :

— « آمرکم باربع و انها کم عن اربع . الايمان بالله  
و هل تدرون ما الايمان بالله شهادة ان لا اله الا الله و اقام  
الصلاة و ايتاء الزكاة و صوم رمضان و ان تعطوا من  
المغاسم الخمس . و انها کم عن اربع . ما انتبذ في الدباء  
و النقيع و الحنم و المزفت ،

بيورديلر . بونك اوزرينه جماعت ، ألوفی بواند قلري  
هر درلو اسقيه و مشروباندن ممنوع قالمش ديمك ايدي . كه  
كيفيت بر از حيرتي موجب اوله رق : [قيم نشرب يار سول  
الله] ديه نه بي ايجمكه مأذون اوله بيله جكلريني صورديلر .  
افنديمز : « في اسقية الادم [ه] جوابی ويردي . جماعت



جسارته کله رک رخصت استحصانه یول اولق ایچون :  
 [یا رسول الله ان ارضنا کثیرة الجر ذان] ديه استيذانه  
 مسارعت ایتملرینه قارشى [وان اکلهما الجر ذان] بیورلمش  
 و بو کلام عالی، ایکی یا اوج نوبت تکرار ایدلمشدره ابن  
 اشج ارده سوزه باشلايه رق :

— «یا رسول الله بلده مزك هواسی ثقیل و وخیم  
 اولدیغندن دیدکلری مشروباقی ایچمزسه ک قارنلریمز بویوره  
 ایمدی بزه شو آووجم طولوسنی ایچمکه رخصت ویره  
 ديه آوجنی کوستردی . بونک اوزرینه شارع اعظم  
 صلی الله علیه وسلم افندیمز :

— «یا اشج اگر بن سکا او قدرینه رخصت  
 ویریر ایسه م سنده [ایکی اللرینی بریره کتیرهرک  
 و آووجنی آچهرق] شو قدرینی ایچرسک حتی حریف  
 سوق سرمستی ایله قالقارده عموجه سی اوغلنک ساقندن  
 ایاغنی قلنج ایله اورور یاره لر ،

بیوردیلر . مکر عبدالله بن اشجک رفیق لرندن اوراده  
 حاضر جهم بن قثم نامنده برینک ساقی اوزرنده او یله  
 برحالك یاره سی اثری وار ایدی .

جهم دیر ایدی که : بن ، رسول الله صلی الله علیه

و سلمدن او سوزی دیکار کن ساقده کی یاره اترنی  
کور مسون دیه اتکمله کیزلیجه اورتردم. حالبوکه کشف  
بیورمشر ایمش ! .

بونلر مدینه طیهده اون کون مسافر قاله رق اکثر  
آیات قرآنیه یی و بعض احکام شرعشرینی اوکرندیلر.  
صوکره جائزه لرینی الوب بلده لرینه عودت ایتدیلر .  
عبدالله بن اشجک جائزه سی اون ایکی اوقیه و برنش که  
مجموعی بشیوز درهمدر .

ع

## وفات ابراهیم بن النبی

علیهما السلام

نجل نجیب نبوت اولان ابراهیم، شهر ربیع الاولده  
وفات ایتمشدر . روایت کوره هنوز اون سکیز آیلق بر  
صبی ایدی . ابراهیمک حالت فوتده ایدوکنی خبر  
ویردکری زمان رسول الله عبدالرحمن بن عوف رضی  
الله عنک النذن طوتوب برابر عالیده ابوسیف حدادک  
خانه سنه کیتدیلر .

ابراهیم والدہ سی ماریه رضی الله عنہا کو جاغنده

ایدی . حضرت پیغمبر انی قوجاغنه الدی .. و حاله  
نظر شفقتله باقوب : [ انا بك يا ابراهيم لمحزونون .  
تبکی العین و تحزن القلب و لانتقول ما یسخط الرب ]  
دیدى .. مبارك چشم سعادتلرندن یاش آقیور ایدی .

او زمان عبدالرحمن بن عوف :

— « یا رسول الله ! سن ده اغلرمیسک ؟ بزى

میت اوزرینه بکادن نهی ایتمدکمی . »

دیه سوال ایدرکن افندیمز : [ یا ابن عوف انها رحمة ]

جوابی ویردی . حسان بن ثابت رضی الله عنہک زوجه سی  
سیرین ، ماریه حضرت تلرینک همشیره سی ایدی . دیدى که : بن ،  
ابراهیمک باشی اوجنده حاضر ایدم . قرنداشم ماریه ایله  
برابر فریاد ایدر ایدک . رسول الله صلی الله علیه وسلم  
بزى منع ایتمز ایدی . فقط ابراهیمک روحی قبض اولتنبجه  
منع ایلدى .

اسامه بن زیدده بکاء نبوی بی کوره رک فریاده باشلا

مشدی . حضرت پیغمبر ، انی ده منع ایلدى . او زمان

اسامه :

— « یا رسول الله ! سنک اغلادیغکی کورونجه بن ده

اغلادم »

دیدیکندن رسول معظم: [البكاء من الرحمة والصراخ  
من الشيطان] بیوردیلر. ابراهیمی روایتہ کورہ دایہ سی  
دیگر روایتہ فضل بن عباس رضی اللہ عنہما غسل  
ایدوب صوینی عبدالرحمن بن عوف، دوکش ایدی .  
حین غسلہ نبی اکرم حاضر بولنہرق نمازینی قیلمش .  
و بقیہ دفن ایتدیروب قبری اوزرینہ صو دوکدیرمش  
درہ کہ اسلامده ابتدا صو دوکیلان قبر، قبر ابراهیمدر .

\*\*\*

۵

## کسوف شمس

ابراہیمک وفاتی کونی کونش طوتلمش ایدی .  
خاق بوکسوفہ بعض معنی ویرہ رک : [ ابراهیمک فوقی  
سبیلہ طوتولدی ] دیمک ایستدیلر . کیفیت مسموع عالی  
اولغله حضرت پیغمبر منبر سعادتلرینہ چیقوب اللہ تعالیٰ یه  
حمد و ثنادن صو کرہ : [ ان الشمس والقمر لا یتان من  
آیات اللہ لاینکسفان لموت احدٍ ولا حیاته ] بیوردیلر .

\*\*\*

۶

## بعث خالد

شهر ربیع الاولده ایدی . حضرت خالد بن الولید،  
بر مقدار عسکرله نجران حوالیسندده « بنی حارث بن  
کعب » ایله « بنی عبد المدان » طائفه لرینی دعوته بعث  
بیورلمشدر .

محل مأموریتده وصولنده انلری اوج نوبت اسلامه  
دعوت ایدم جک قبول واجابتلری تقدیرده ایچلرنده برمدت  
اقامتله کندولرینه کتاب الله وسنت رسول اللهی اوکرمه جک  
وعکس تقدیرده انلرله مقاتله ایدم جک ایدی . قبيله  
قبول اسلام ایتدیکندن بشقه درلو کلفت التزامنه حاجت  
قالیه رق فرمان نبوی موجبجه برمدت قالدی . قرآن  
کریمی وبعض سنن سنیهی تعلیم ایلدی .

خالد ، کیفیتی مکتوب ایله سده سنیه رسالتیناهییه  
عرض ایتمکله رسول اکرم صلی الله علیه وسلم  
جوابده قومی هم تبشیر وهم تخویف ایتسنی وبرقاجده  
آدملرینی برلکده کتیره سنی امر بیوردیلر .

وفود بنی هارث — خالد دخی انلردن برجامتله مدینه  
منوره یه کلدی ایچلرنده « قیس بن حصین ذوالغصه ،  
یزید بن المحجل ، شداد بن عبدالله ، وار ایدی .  
مجلس عالی رسول الله کلوب سلام ویردیله [نشیدان  
لااله الا الله و انک رسول الله ] دیدیلر .  
حضرت پیغمبر، سؤال ایتشدی که :

— « سزکله حرب ایدن طائفه یه ناصل غالب  
اولوردیکنز »

بونلر :

— « یکو جودکی حرکت ایدرک ایرلمزدک کیمسه یه  
ظلمله بادی اولمزدک »

جوانی ویردیله . افسدیمز ، او جوانی  
بالتصدیق « قیس بن حصین » ی اوزرلرینه امیر  
نصب ایدوب عودت لرینه رخصت ویردی . صوکرده  
« عمر بن حزم » ی انلره امیر کوندردی . انتقال حضرت  
رسالتیناهی زمانه دکن عمر ، اوقومک خدمت امارتنده  
قامشدر .

۷

## سریه علی

یمنده بلاد مذحجه

شهر شریف رمضانده ایدی . حضرت علی بن ابی طالب کرم الله وجهه اوج یوز نفر سواری ایله یمنه اعزام بیورلمشدر .

رسول الله صلی الله علیه و سلم ، یدمؤیده سعادتلر یله جناب علینک باشنه بر صاریق صاردی وبر لواء عقد ایدوب الله ویردی که مذکور عمامه نك ایکی علاقہ سی وار ایدی . بری اوک جانبندن بر ذراعہ قریب ایدی . دیکری ارقہ طرفندن بر قاریش قدر ایدی . یمن خلقی مخالف و مقاتله یه قیام ایتدیکجه حضرت علی مقاتله ایتیه جک ایدی . بیان عجز و یا اظهار تواضع زمیننده اوله رق :

— یا رسول الله ! بنی بندن یا شلی اهل کتاب بر جماعته کوندریورسک حالبوکه بن ، دهامدیت السم امر قضایه بصیرت اوزره اوله مم ،

دیمکله رسید الانام افندیمز ، مبارک الارینی علینک

صدرینه قویوب: [ اللهم ثبت لسانه واهد قلبه ] دعاسنی  
ایتدکن صوکره :

— « یا علی ! ایکی خصم کلوب سنک قارش-یکده  
اوطورورلر ایسه هر برینک افاده سنی تمامیله دیکلمدکجه  
دعوالرینه حکم ایتمه »

دیه امر و تنبیه بیوردیلر . اشبو دعاء نبوینک  
برکتیله حضرت علی ایچون امر حکم و قضاده هیج  
برزمان بر درلو شک و اشکال واقع اولماش و تقدیر  
اصابت حکم و قضای حقنده لسان رسالتدن :  
[ اقضاکم علی ] نعت عالسی شرفصدور بیورلمشدر .  
حضرت علی یمنه توجهنده اصحابی اطرافه طاغیدوب  
مخالفته قیام ایدنلری تنکیل و اموالارینی اغتنام  
ایتمشدر . صوکره جماعت اعراب ایچنه کیره رک جمله سنی  
دینه دعوت ایتدیکی حالده اعراب مرقومه ،  
مخالفته سریه اسلامه اوق آتمغه باشلادیلر . بری طرفدن  
ده بالمقابله مخالفلرک یکر میسی قتل و جمعیتلری پریشان  
ایدلدی . شو قدرکه حضرت علی ، تعقیب ایتدیرمیه رک  
بالواسطه اسلامی تکلیف ایلدی . انلرده حرکات



سابقه لرینک خلاقی اوله رق قبول اسلامه مسارعت و نبی  
ذیشان نامنه عرض بیعت ایتشلردر .

حضرت علی ، محل مأموریتنه وارد یغنده امام  
اوله رق نماز قیلدیردی . نمازدن سو کره معیتنده کی عسکری  
صره طور دیردی . کندوسی اورتیه کیردی . طرف  
اشرف رسالتپناهیدن حامل اولدینی نامه سعادت اوقویوب  
بتون اهل یمنی دینه دعوت ایتدی . اهل همدان دخی  
هپ بر اوغوردن مسلمان اولدیلر . حضرت علی کیفیتی  
عتبه علیای رسالت مکتوب ایله عرض ایتمکله ، اهل  
همدانک قبول اسلامی نزد عالی جناب پیغمبریده زیاده  
محظوظیتی مستلزم اوله رق اقدیمز ، سجده شکر  
ایلمش و سجده دن باشنی قالدیریر ایکن ایکی کره :  
[السلام علی همدان] بیورمشدر .

حضرت علی غنیمتدن حضور اقدسه بر  
مقدار التون کوندرمشدی . رسالتپناه اقدیمز ، انی  
عینه بن حصین ، اقرع بن حابس ، زید الخیر بن ماهمل ،  
علقمه بن علائه درت قسم تقسیم ایتسیله محابدن  
ذوالخویصره نامنده بری اعتراضه تصدی ایدرک :

— « بز » او التونه انلردن دهله زیاده مستحق

ایدک .

دیمشدی . رسول اکرم ، انک اوسوزندن خوشنود  
اولمدی : [الا تأمنونی وانا امین من فی السماء یأتینی خبر  
السماء صباحاً و مساءً] بیوردی .

ذوالخویصره . بو دفعه ایاغه قالدقرق و ازارینی  
کنندینه طویلایه رق اعتراضده بالاصرار :

— « یارسول الله ! اللهم قورق ! »

دیدى علیه الصلوة والسلام افدیمر :

— « ویلک اولست احق اهل الارض ان یتقی الله »

بیورور ایکن ذوالخویصره کیری دوندی ، حضور

پر نور رسالتدن طیشاری چیقدی .

او زمان مجلس پیغمبریده حاضر بولنان اصحاب

کرامدن خالد بن الولید ، دیگر روایتده حضرت عمر

الفاروق رضی الله عنهما :

— « یارسول الله ! بوینی اورهم می ؟ »

دیدى ایسه ده رسالتدناه افدیمر :

— « خیر بلکه اهل صلاتدر »

ذیه آنی رد بیوردیلر ، صحابی مشارالیه :

— نیجه اهل صلوة وارکه قلملرنده اولمیان شیشی

لسانلریله سویلرلر .

دیدیکی حالدہ :

— «بن ناسک قلوبنی دلمک و بطوتنی یارمغه مأمور

اولدم»

جواب عالیسی ویرلمش امراسلامده ظواہر احوال  
خلقه کورہ حکم و معاملہ اولنہرق بو اطن ناسہ دخل  
و تعرض ایدلماک اقتضا ایدہجکی تنبیہ و اخطار  
بیورلمشدر .

بو جواب عالیہلرندن صوکرہ نبی اکرم ، ذو  
الحویصرہ یہ معنیدار بر صورتدہ نظر بیوردیلر . حریف،  
وضع مغضب اوزرہ طیشاری کیدیور ایدی . نظرہایونک  
عقبنده : [ انه يخرج من ضئئى هذا قوم يتلون كتاب  
الله رطباً . لا يجاوز حناجرهم . يمرقون من الدين كما يمرق  
السهم من الرمية . ان ادرکتهم لاقتانهم قتل ثمود = شو  
آدمک صلبندن بر قوم ظہور ایدرکہ قرآنی کوزل  
او قورلر بوغازلرندن ایجری کچمز . اوق یایدن جیقار  
کبی دیندن چیقہ جقلر ! . بن ، اکر انلرہ یتشسہم کافہسنی  
قتل ثمود کبی قتل و هلاک ایدرم ] بیوردیلر ! .

اخبار مغیباتہ دائر اولان معجزاندندرکہ طائفہ  
خوارجک پیشواسی بولنان « حرقوص بن زہیر » ذو

الخو بصره نك اولادندندر. وقعة صفینده امر تحكیمك  
عدم مشروعتی طرفداری اوله رق خوارج ، امامتله  
مرقومه بیعت ایتمشدی!.

حضرت علی ، خمس غنیمتسندن بر جاریه بی آلوب  
استفراش ایلمسندن طولایی بریده بن الحصیب ، استفراش  
واقعی خطایه حمل ایدرهك منفعلا اولمش و حین عودتله رنده  
کیفیتی مرض عتبه علیا ایلمش ایدی. سید الانام علیه  
افضل الصلوة و السلام افندیمز، سؤال بیوردیلر :

— « یا بریده! سن علی به بغض ایدرمیسك؟ »

بریده :

— « اوت ».

دیدى . بو جواب ، مرضی 'عالی' رسالتپناهى به  
موافق کلامش ایدی. مبارك یناقلری قیزاروب :

— « سن علی به بغض و سوء ظن ایتمه که خمدمه

انك اندن زیاده حق و نصیبی واردر.. علی بنسندندر .

بنده علیدنیم . هرکیم که بن ، انك ولیسی یم علی ده

ولیسیدر »

بیوردیلر . بریده دیر ایدی که :

حضرت رسول الله صلى الله تعالى علیه وسلمك

اشبو امر وارشادینك شرف صدورندن صوکره اصحاب

گرام ایچنده علی کرم الله وجهه دن زیاده سو کیلم بر کیسه  
بولندی .

## ۸

## وفود بنی حنیف

یمامه خلقدن اون یدی نفر کیسه لر ایدی .  
مسيلمه بن ثمامه دخی برانکده ایدی انصار کرامدن  
و بنی نجاردن برقادینک خانه سنه مسافر اوله رق اورادن  
حضور اقدس رسالته کلش لر قبول اسلام ایتشلردر .  
مسيلمه ، غایت چیرکین بر صورت وسیرتده ایدی .  
رفیقاری ایله حضور سعادت کیمیه رک منزله تحلف  
و توقف ایلدی . و : محمد [علیه الصلوة والسلام] بنی  
کندوسندن سو کره خلیفه ایدم جک اولورسه اتباع ایدرم ،  
دیددی . که کیفیت ، مسموع عالی اوله رق سید الانام  
افدیمز ، دست هایونلرنده بر خرما دالی بولندیغی حالد  
ثابت بن قیس بن شماس رضی الله عنه ایله برانکده مسيلمه نک  
اولدینی محله کیتدی . مسيلمه ، منزله و ارقداشلری  
آره سنده ایدی باشی اوچنه طوره رق :

— « سن ، بندن بو دالی بیله ایسته مش اولسه ک

ویرم. حقه کی امر و تقدیر الہی بی تجاوزایدہ منرسک.  
اگر حقہ مخالفت ایدرسک اللہ تعالیٰ البت سنی قہر  
و عقر ایدر. سن مطلقا بکا کوسترلش اولان شخص  
اولہ جقسک. بو ثابت، سکا بندن جواب ویریر،  
دیدى. اورادن کیری دوندى.

مسيلمہ یتامہ بہ عودتندہ ارتداد ایتمکله برابر امر  
نبوتدہ رسول اکرمہ شرکتنی ادعا ایدہ رک: [من مسيلمہ  
رسول اللہ الی محمد رسول اللہ اما بعد فانی قد اشركت  
معک فی الامر. وان لنا نصف الامر. ولقریش نصف  
الامر.] عبارہ سیلہ یازدینی مکتوبی عونہ سندن ایکی  
شخص یدیلہ جناب اقدس رسالتپناہی بہ کوندردی.  
حضرت پیغمبر، مکتوبی او قودقدن صوکرہ کلن  
آدملرہ صوردی:

— « سز بنم رسول اللہ اولدیغمہ شہادت  
ایدرمیسکنز؟ »

جواب ویردیلم:

— « اوت ایدرز »

— « مسيلمہ نک رسول اللہ اولدیغمہ شہادت

ایدرمیسکنز؟ »

— « اوت امر نبوتده سنکله اورتا قدر »

صوبك جواب غضب و انفعالى مستلزم اوله رق  
اقدیمز ، تبسم ابتدی . و :

— « اگر سز ایاچی اولمسیدیکز شمدی هر  
ایکیکزک بویونلریکزی اوردیریر ایدم »

بیوردیلر . و مسیلمه یه : [ من محمد رسول الله  
الى مسیلمة الکذاب سلام على من اتبع الهدى اما بعد  
فان الارض لله يورثها من يشاء من عباده والعاقبة  
للمتقين ] جوابنامه عالینى یازوب کوندردی .

مسیلمه ، نامه عالی نبوی بی صاقلایه رق کویا  
نبوتده مسیلمه نك تصدیق و قبول شرکته دائر ساخته  
بر مکتوب تصنیع و ترتیب ایله اعلان ایتمش وقومنى او  
مکتوب مصنوع ایله اغفال و اضلال ایلمشدر .

حبيب خدا اقدیمز ، بر زمان رؤیا لرنده کور مشلردی که :  
اللرنده التوندن ایکی بیله زیك وار ! اندن مهموم  
ایکن او بیله زکاره اوفورمسی ینه او آنده الهام اولنه رق  
اوفورمسیله بیله زیکار الندن در حال غائب و نابید  
اولمش ؟ . .

بو رؤیایى کندوسندن صوبکره ظهور ایدمک

ایکی کذاب ایله تاویل و تعبیر بیوردهش ایدی که بری صاحب یمامه مسیلمه ، دیکری ده صاحب صنعا اسود عنسیدر .

مسیلمه کندوسنه وحی کترین شخصک «رحمان» اسمنده اولدیغنی سویلمسی سبیلله یمامه ده کی عونهمی بدینده «رحمان یمامه» لقبیله اشتهار اتمشیدی مسیلمه او حالنده ثابت و مصر اوله رق کافراً کتمشدر . بر طاقم کلمات مسیلمه و مزخرفه یی ترکیب و تألیف ایدوب وحی منزل دیه خلغه اعلان ایدردی که بونکله اعظم المعجزات سید سکنه کائنات اولان قرآن عظیم الشانک کویا نظیری کندوسنه ده انزال ایدلمکده ایدوکنی عونهمه سویلردی ،

\* \*

۹

### وفود ازد شنویه

بنی ازد، صرد بن عبدالله ایله برابر کلش مسلمان ازلملردی .

حضرت صرد ، طرف اشرف نبویدن کندی قبیله سنه امیر نصب بیورلمقله برابر یمن حوالیسنده کی



مشرکین ایلہ حرب و قتالہ مأمور دخی بیورلمشدی .  
 سرد معیتیلہ غزایہ چیقدی «جرش» نام محله کی  
 قبائلی محاصرہ ایتدی بر ای قدر دوام ایلدیکی حالہ  
 فتح و موفقیت یوز کوسترمدیکندن محاصرہ فراتلہ  
 مملکتہ مراجعت و شکر نام محله موصلت ایتدی .  
 محصورین ایسہ سردک فراغت، انہزام صورتیلہ ایدوکی  
 ظہر اوزہاب باطلندہ بولہرق تعقیبہ باشلادیلر . سردجہ  
 مطلوب اولانده اوایدی درحال جرش قبائلنہ کیریشدی .  
 یک چوقلرینی قیردی .

سردک شو مقاتلہ سی اقشامی جرشلیلردن ایکی  
 آدم، مدینہ طیبہ ده حضور سیدالانامیدہ ایدی . افندیمز :  
 — «شکر هانکی بلده ده در؟»

بیوردیلر . او ایکی آدم :

— «بزدہ کشر دیرلر بر طاغ واردر ،

دیہ جواب ویریرلرکن :

— «او کشر دکل شکر در ،

بیورلمسیلہ نیچون سورولدیغنی استفسار ایتدیلر .

حضرت نبی اکرم :

— «اللہک قربانلقلری اورادہ شمدی بوغازلا .

تعمدہ در .

جوابی ویردی. بو سوزدن مقصود عالی به انجق حضرت ابی بکر الصدیق ایله عثمان رضی الله عنهما مطاع اوله رق: [ ذکر اولنان محله قوم کزک بو ساعتده قتل ایلمکده اولدقلرینی سزه خبر ویره یور. سویلیکیز حقلرنده دعا ایتسون ] دیدیلر ایکی جرشلی قوملرینک علیهنده کی مصیبتک رفعی ایچون دعا التماس ایتدیلر. رسول الله صلی الله علیه وسلم افندیمز دخی: [ اللهم ارفع عنهم ] دیه دعا بیوردیلر. بلده لرینه کلدکلری زمان اکلا دیلرکه لسانی شریف رسالتدن خبر آلدقلری اقشام عین ساعتده صردک عسکرندن قوم، مقتول و مصاب اولمش!

ماجرایی انلر، قبیله لرینه خبر ویردیلر. جرش اها. ایلسندن برخیلی کیمسه لر بوسبیله صدق رسالت احمدیه ایمان ایدرک آندن صوکره مدینه طاهره یه کلوب مسلمان اولمشلردر.

\*\*\*

۶۰

## وفود نصارای نجران

نجران، مکه مکرمه نك يمن جهته یه یدی مرحله

مسافده بر بلده در نصرانی اولان اها ایستک طرف جلیل  
واجب التبجیل نبویدن مکتوب تسطیریه دینه دعوت  
اولنمی اوزرینه بر جماعتی، اون درت و دیگر روایتیه  
کوره التمش نقر سواری اولدقلری حاله مدینه سعادتیه  
کادیلر.

رئیسلری بنی کنده دن «عاقب عبدالمسیح» ایدی  
بنی ربیمه دن «ابو الحارث بن علقمه» و برادری «کرز»  
و حارثک اوغللری «سید ایهم» ایله «اوس» و «زید بن  
قیس» و «شیه» «خویدل» خالد، عمرو، عبدالله نام کیمسه  
لر اعیان وفود نجراندن ایدیلر.

بونلردن «عاقب عبدالمسیح» قونک امیری و صاحب  
رأی و تدبیری ایدی «سید ایهم» امیر ثانیسی و سرعسکری  
«ابو الحارث بن علقمه» رئیس العلماسی ایدی.

مدینه طیبیه کلدکلر نده سفر انوابلرینی چیقاروب  
حریردن حله لر کیدیلر. اتونندن یوزوکلرینی طاقینوب  
مسجد رسول الله اوله کیتدیلر سلام و یردیلر. مسجد  
شریفده قبل المشرقه توجهمله نماز قیلدغه باشلادیلر. اصحاب  
کرامده بونلری منع ایده جک اولدیلر. رسول مکرم  
صلی الله تعالی علیه و سلم افندیمر:

— «براغیکز»

دیدی نمازدن صوکره حضور عالی به کلدیله . فقط  
 الفاته نائل اوله مدیله . حتی سوزلرینه جواب بیله ویرلمدی .  
 صوکره حضور عالیدن طیشاری چیقدیله . حضرت  
 عثمان بن عفان و عبدالرحمن بن عوف رضی الله عنهما  
 ایله . عازقه لری اولدیغنه مبنی انلره واریدیله : [مکتوب  
 و دعوتیله کلدک . سلامیزی بیله آلمدی . کیده لم می  
 طور دلم می] دیمک ایستدیله . حضرت علی کرم الله وجهه ،  
 او آنده حاضر ایدی . عثمان ایله عبدالرحمن ، جناب علیدن  
 استفسار رأی ایتدیله . حضرت علی . وفودنجرانک زی  
 رهبانده اولدقلری خالده حضور رسالته کیرمه لرینی توصیه  
 ایتدی .

ابرته سی کونی فاخر ابا ساریله التون یوزوکلرینی ترک  
 ایدوب زهبان قیافتنده حضور اقدسه کلدیله . سلام ویر  
 دیله . افندیمز بو دفعه سلاملرینی الدی . و حققرنده :  
 [بونلرک یانمه اولکی کلیشلرنده شیطان ، برابرلرنده ایدی]  
 بیوردی و بر از . کالمه دن صوکره دینه دعوت ایتدی .  
 ابا و امتناع کوستردیله . و سوزی چوغالتدیله :

— « عیسی [علیه السلام] حقنده نه دیرسک ،

دیدیلر . حضرت سید الانام :

— «بو کون بر شی دیه م توقف ایدیکز جواب  
آلیرسککز»

جوابی ویردی. او ائناده [ان مثل عیسی عندالله  
کمثل آدم خلقه من تراب ثم قال له کن فیکون] آیت  
کریمه سی نازل اوله رق ایرته سی کون معرض جوابده  
آیت جلیله بی انلره تلاوت بیوردی. قبول ایتمدیلر.  
کندی ادعا و اعتقاد سهیفلرنده مصر اولدیلر.

حضرت پیغمبر:

— «مادم که اینا نمزسککز کلیمکز سزکله مباهاله ایدم.  
دیه بیوردی. نجرانیلر، ایرته سی کونه قدر مهلت  
ایستدیلر»

منزلارنده ایتدکلری مشاوره و مذاکره ده عاقبک  
رأینه مراجعت ایتدیلر.. عاقب، بونلری مباهاله دن منع  
و تحذیر ایتدی. دیدی که:

— «سز تحقیقا بیلورسککز که محمد [علیه السلام]  
نیدر. صاحبکزی عیسی حقنده بر دلیل ظاهر دخی کتیر.  
مشدر. انکله مباهاله جائز اولمز. هیچ برنبی ایله مباهاله  
ایدوب صاغ قالمش قوم یوقدر. اکر مباهاله ایدرسه کز  
حقق هلاک اولورسککز. کندی دینکزده ثابت اولماق

دیلسه کز مصالحه دن ایو یول یوقدر. او حالده جزیه یی قبول ایدیکز .

نجرانیلر، آرتق مباہله دن واز کچمشدی. ایرتسی صباح مسجد شریف رسالت پناهی به متوجهاً کلیورلر کن کوردیلرکه: حیدب کبر یا حجره سعادتلرندن چیقمش.. نور چشم بتول حسین بن علی یی قوجاغنه المش.. حسنک النی طوتمش! فاطمة الزهراء وعلی المرتضیٰ دخی اردنجه کلیورلر. انلره: [ بن دعا ایدرم سز آمین دییکز ] بیورمش!

نجرانیلر، اهل بیت نبوتک اوپله بر حالده کلدکلری کورملری و دعا و آمین سوزی.. ایشتمش اولملری، نظرلرنده دهشت و خشیتی موجب اوله رق رئیس العلماسی بولنان ابو الحارث، رفیققرینه:

— «بن، بونلرده بر یوز کوردم که اگر بونلر، برجیلی یرندن قالدیرمسنی ایستلرسه جناب حق، هر حالده قالدیریر.. زنهار مباہله ایتیکز که عقینده هلاککنر مقرردر یر یوزنده بر نصرانی قالمز»

دیمکله انلر، حضور عالیده:

— «یا ابا القاسم! مباہله ایتیه جکز»

دیمکه مجبور اولدیلر . رسول الله صلی الله علیه

و سلم :

— « مباحله ائتمیه چکسه کز مسلمان اولیکز که نفع

و ضرردن مسلمانلره هر نه دوشرسه سزده حصه دار

اولورسکیز »

دیدى . انلر بونی ده قبول ایتدکلرندن محاربه یه

حاضر اولملاری امر و تنبیه بیورلدیفی حالده [ عسبلرله

محاربه یه قدرتمز یوقدر و لیکن مصالحه ایدلم ] جوابی

ویرملری اوزرینه مصالحه تقرر ایتدی .

بدل صلح ، سنوی ایکی بیک حله ایدی . هر حله نك

قرق درهم کموش قیمتده اولسوی شرط ایدی . بیکی

شهر رجبدده . بیکی ده ماه صفرده تسلیم ایدیله چک ایدی .

یعن اسلاملی علمنده ماحوظ اولان وقایع فوق العاده

ایچون حین حاجتده اوتوز عدد درع اوتوز عدد رمح .

اوتوز رأس دوه ، اوتوز رأس ده آت اعاره ایتملری دخی

شرط قلندی .

شرائط بسوطه اوزرینه نجران و حوالیسی خلقنك نفس

و دینلری اموال و اراضی و بیع و شراء و هر درلو تجارتلری

جوار و تعهدده آلدی . هیچ براسقف سقیفاسندن ، راهب

رهبانیتندن واقف و قفایتندن تغیر ایدنیه جکی بسط و بیان  
ایله کیفیته ابوسفیان ، اقرع بن حابس ، مغیره بن شعبه  
کبی بعض ذوات اشهاد ایدلدی . و اولبایدہ تسطیر اولنان  
صلحنامه نجرانیلرک الله ویرلدی .

\*\*\*

۱۱

### بعث ابی عبیده

نصارای نجران ، نجرانه عودت ایده جکلری صروده  
برایکده کیدوب طرفنه تسلیم ایده جکلری اموالی المق  
اوزره امین بر آدم ایسته مشلردی . رسول اکرم صلی  
الله تعالی علیه وسلم افندیمز :

— « لا یمن معکم رجلاً امیناً حق امین »

دیه وقت ظهردن صوکره مراجعت ایتلرینی امر  
و توصیه بیوردیلر . بو ستایش عالییه نائل اوله جق ذات  
اصحاب کراجه معلوم دکل ایدی . هر کسده نائلیت ارزوسی  
ظهور ایدمک کمال مرتبهده اولان بودرجه امینیتله شرف  
مبعوثیتی اصحاب کرام ترقب و تأمل ایتدیلر . حتی عمر  
الفاروق رضی الله تعالی عنه حضرتلری دیر ایدی که :



بنی بعث ایتک امید و ارزوسیله او کون وقت ظهر دن  
اول مسجد شریفه کیتدم رسول الله ظهر نمازندن فارغ  
اوله رق صاغنه صولنه باقدی. اصحابی معاینه ایتدی بن..  
او زمان خلقک ارمسندن کندیمی ایلری سوروب نظر  
هایونلرینه صوقولدیم !.

هر کس ، منتظر و مترقب خطاب و توجیه ایکن  
افندیمز: [ قم یا اباعبیده ] بیوروب ابو عبیده دخی قیام  
ایتدی.. او زمان جناب پیغمبر :

— « هذا امین هذه الامة »

ستایش کرانقدر کزینله صحابی مشارالیهک قدر  
ومنزلتی برقات دها اعلا بیورومشلدردر .

ابو عبیده عامر بن الجراح رضی الله تعالی عنه  
حضر تلی ، برلکده نجرانه کیتدی . چوق زمان کچمدن  
سید ایلله عاقب ، مدینه طیبیه کله رک مسلمان اولدیلر..  
فقط صلحنامه نك احکامی ینه باقی ایدی . حتی زمان  
خلافت صدیقیه ده تماماً و حرفیاً معمول و معتبر طوتیلوب  
انجق فاروق زماننده ایجاب حال و مصلحتله بعض احکامی  
تغییر ایدلمشدر .

۱۶۲

## وفود بنی خولان

اون نفر ایدی :

— « یا رسول الله ! بز. خدایک وحدایتی وسنک  
صدق نبوت و رسالتکی تصدیق ایدرک اوپله کلدک .  
انجق سنی زیارت عزم و قصدیلله قوملو و طاشلو بونجه  
مسافاتی قطع ایندک . دربار سهادتکه کلدک . له الحمد  
موفقده اولدق »

دیدیلر . سیدالانام علیه افضل الصلوة والسلام افندیمر :

— « بو سفرده هر برخطوه که دوهرلیکنز طاشلی  
وقوملی یرلرده آتمشدر مقابلنده سزه بر حسنه ویریلوز .  
وبی زیارت ایندیکنز . بیلمش اولیکنزه هر کیم که مدینه یه  
زیارتمه کایر قیامت کوننده بنم جوارمده اولسه کرکدر »  
جوابی اعطا ایله برابر عهده وفا ، امانتی ادا و  
قومشو حقنه رعایت خصوصلرینی بالتنبیه ظلمدن نهی و  
تحدیر اوله رق [ ان الظلم ظلمات یوم القيمة ] بیوردیلر .  
خولانده کی صنمک حالی صورلدینی زمان بنی خولان  
جماعتی ، صنم مرقومک دین اسلامه تبدل ایلدیکی جوابی

ویردیله. نور اسلام . ضعیف ظلمت وجود و احوالی  
 محو ایدره که اسکی اعتباری بر اقدیغنی و یاننده یالکیز  
 بر قاری بر قوجه دن بشقه کیمسه قالدیغنی خبر  
 ویردیله. وعودت لرنده هانهدم و تحریب ایدم جکلیغنی ده  
 علاوه ایتدیله.

بونلر مدینه طیبه ده بولندقلری ایامده دین مبین  
 اسلامک بعض فرائض و احکامنی اوکرندیله. صکره جائزه لرینی  
 الوب بلده لرینه عودت ایلدیله.

• •

۱۳

### وفود بنی مدلج

بنی مدلجن رهاوین جماعتی، اون بش قدر سواری  
 ایدیلر. رمله بنت الحارثک خانه سنه ایندی رملشله. جناب رسول  
 الله، اصحاب کرامندن بر جماعتله برلکده انلرک استفسار  
 خاطر لرینه واردی. بر مدت مصاحبت و محادثت ایلدی.  
 بنی مدلج، نزدلرنده بولنان ازواد و ارزاقدن بر مقدار  
 حقیقه اروب رسم ضیافتله حضرت پیغمبرک حضور  
 سعادت لرینه تقدیم ایتدیله. و:

— « یار۔۔۔ رسول الله ! مبارك دست هایونلریکزی

ایصال ایدوب طعامدن تناول بیوریکز »

دیدیلر . حضرت بنی اکرم :

— « بن صائم »

دیه اصحاب کرامنه امرایلدی . اصحاب کرام ، طعامدن

دیدیلر .

بنی مدلج ، بعض هدایا ایله کلمشلردی . جمله هدایانک

بری مرواح اسمنده برآت ایدی . امر جلیل پیغمبری

ایلله بری بینوب کیفیت جری و رفتاری تجربه ومعاینه

اولندی . رسول اکرم :

— « بن ظن ایدردم که بوآت ، واسع الجربدر »

دیدی . مسافربندن بری :

— « اوت یار رسول الله ! بوآت بحردر یعنی واسع

الجربدر و لکن اوزاق یردن کلوب یورولدی . برازده

خسته لندی »

دیمکله حضرت رسول الله ، تیمارینی تربیه واصلاحی

امر بیوردی . بنی مدلج مسافرلری دخی اوآت

ایولشنجهیه دکن مدینهده قالدیلر . رسول اکرم ، مسابقه

امر بیورمشلردی . . انی هدیه کتیرمش اولان ذات :

— « یا رسول الله! اذن ویریگزده بن ینوب

کندیم قوشدیریم »

دیدى . مساعده سنیه ارزان بیورلغله او ذات

ینوب حیوان ، مستبقده برنجی کلدی ! . رسول الله

صلی الله علیه وسلم افدیمز بکندی . و : [ ما اراه الا

بحراً ] دهرک عوضی اولق اوزره صاحبه انعام

و غیرلرینه جائزله احسان بیوردی .

•••

۱۴

### وفود بنی غسان

اوج نفر ایدی . مسلمان اولدیلر . و حضرت

پیغمبردن جائزله لرینی آلهرق عودت ایتدیلر قوملرینک

اتباعلرنده شک و شبهه ایلدکارندن ناشی بلدملرنده فقط

اظهار اسلام ایدمیدیلر .

•••

۱۵

### وفود بنی غامد

یمنده قبیلهٔ ازدک بر بنی بولان غامد وفودی اون

نقر اولدقلری حالدہ کلوب « بقیع الغرقہ » قوندیلر .  
 منزله لرنده الك كوچكلريني اشيا بکلمکه براغهرق حفصور  
 برنور رسالتپناهی به کلدیلر سلام ویردی لر . مسلمان  
 اولدی لر . بناءً علیه احکام شرع و اسلامی حاوی برنامه  
 یازیلوب اللرینه ویرلمشدی .

رسول الله صلى الله تعالى عليه وسلم اقدیمز ،  
 سؤال ابتد :

— « منزله کزده بریکری براقدیکزمی ایدی؟ »  
 — « متاعمزی بکلمک اوزره کوچوک بر غلام  
 قالمشدی »

دیدیلر . اقدیمز :

— « او غلام اویودی . سارق کلدی . بریکزک  
 اتوابی چالدی »

دیہ بیوردی .. حضرت نبی الله بوصوک سوزی  
 سویلرکن نبی غامد مسافرلرندن بری :

— « یا رسول الله ! بندن بشقه کیمسه نک اوراده  
 اتوابی یوقدر »

دیدی .. حضرت پیغمبر ، سوزینه دوام ایله :

— « غلام سنك اثوابكى كبرى آلى »

بیورددی . بونك اوزرینه مسافر لر عجله . نزل لرینه  
كلوب اكلا دیلر كه غلام اویانه رق سارق تعقیب ایتش و  
سارنك برچوقورده کیزلدیكى اثوابی آلوب کبری منزله  
ککش !

کیفیت ماجری ، تصدیق نبوت و رسالت خصوصنده کی  
قوت قابیه لرینه برقات ده امدار اوله رق غلام دخی  
قبول دین مبین اسلام ایلمشدر . مدینه طیبه ده قالدقلى  
مدتجه کندولرینه قرآن کریمى ابی بن کعب حضرتلری  
تعلیم ایدردی .

..

۱۶

### قدوم عدی بن حاتم طائی

عدینك قدومی ، شهر شعبانده ایدی . عدی اسلام  
خصوصنده همشیره سی سفانه ایله مذاکره ایتدی . سفانه  
عدی بی اسلامه و طاعت سیدالانامه دلالت ایتشدی .  
هدایت سبحانیه ایله عدی . مدینه پاک نبوته کلهرک  
بارکاه پیغمبری به دخیل اولدی اوزمان حضرت پیغمبره :

— « سن کیمسک ؟ »

دیه صورتی . عدی . جواب ویردی :

— « عدی بن حاتم »

جناب رسول الله، ممنونیتله قیام ایدرک حجره سعادترینه  
طوغری یورودی . عدی دخی برلکده ایدی ، یولده  
بر قوجه قاری ، راست کله رک حضرت پیغمبری لافه  
طوتدی قوجه قارینک معروضانی ایچون نبی اکرم برخیلی  
زمان یولده توقفله حاجتی روا بیوردی . عدی ، بودرلو  
معامله دن تعجب ایتمکده ایدی . کندی کندینه ملاحظه  
ایدرک [ هیچ بر پادشاه بر قوجه قاری ایچون یولده  
بو قدر توقف ایتمز بو سیرت مطلقاً سیر انبیادندر ] دیور  
ایدی . صوکره حجره سعادته واردیلر . خرما لیفی  
طولدرلمش ، سختیاندن دیکلمش بر یاصدیق چیقاروب  
یره دوشه دی . . اوزرینه اوطورمسنی عدی یه امرایتدی .  
عدی ، تأدباً : [ یا رسول الله ! سن اوطور ] دیدیسه ده  
امر و ابرام بیورلمقه عدی ، یاصدیق اوزرینه حضرت  
پیغمبرده خاکه اوطوردی .

عدی ینه کندی کندینه دوشوندی . بوده ملوک  
عادتی دکل بلنکه انبیاء و رسل صفتیدر دیدی .



سید الانبیا علیہ افضل التحایا افندیمز ، عدی به  
خطاباً :

— « سن فلان مذهبده ایدک . و فلان ایشی  
ایشلر ایدک حالبوکه او ایش سنک مذهبکده جائز دکل  
ایدی . »

بیوردیلر . عدی ، ارتق یقین حاصل ایتمشدی که  
نبی مبعوث بالحقدر . او اراده بر آدم کلهرک حضور  
سعادتمده فقر وفاقه دن بحث و شکایت ایتدی . صوکره  
بردیگری ده کلدی قطع وقطاع طریقدن شکایت ایلدی .  
رسول دیشان :

— « یاعدی ! سنی قبول اسلامدن منع ایدن شی ،  
اگر مسلمانلرده کوردیکک فقر وفاقه ایسه امین و آگاه  
اول .. اسلامده مال او قدر چوغاله جقدرکه حریف ، بر  
آوج التون و کموش ایله چیقوب کزه جکده اله حق  
آدم بوله میه جقدر ! . یاعدی ! شایدکه اعدانک کثرتی و اهل  
اسلامک قلتی ایسه عمرو حیانتک وفا ایدر ایسه مسلمانلرک  
اول مرتبهده چوغالدیغنی و حوزة اسلامک اولقدر  
توسع ایلدیکنی کوره جکسک که بر قادین ناقه سوار اولدینی  
حاله الله قورقوسندن بشقه بر کونه خوف و تحاشیسی

اولمقسن بن یالکز کندی باشنه حیره شهرندن زیارت بیت  
 اللهه کلیور. اکر ملکک کفار النده اولدینی ایسه عمرک  
 اوزار ایسه کنوز کسرانک فتح اولندیغنی ده کوره جکسک  
 بیوردیلر. عدی، ایرانک قوت و مکنتنی ملاحظه  
 ایدرهک استبعاد صورتنده :

— « کسری بن هر مزمی؟ »  
 دیه ورودی: [ کسری بن هر مزم ] جوابی آلدی.

هر درلو حقایق نظرنده ظهور ایتشدی .  
 دیه جک بر شی و بادى اشتباه اوله جق بر جهت  
 قالماشدی . یالکز تسلیمیت کامله ایله عرض اطاعت  
 قالمشدی . عدی ایشته انی یاهرق کنوز کسرانک فتوحاتنده  
 بالذات حاضر بولنمشدر. کندوسنه اوزمان طرف اشرف  
 رسالتپناهیدن خبر ویریلان قادینک ناقه سوار اولدینی  
 ویالکزده بولندیغنی حالد حیره دن زیارت معظمه یه کلدیکنی  
 کوردیکنی بالاخره نقل ایدرکن اوچنجیسینی ده سز  
 کورورسکز دیر ایدی .

\*\*\*

عمر بن اسید بن عبدالرحمن بن زید بن الحظا بدن  
 منقولدرکه : عمر بن عبدالعزیز زماننده فقرایه تصدق

ایدلمک اوزره بعض ذواتک کتیردکاری نقودی آله حق  
آدم بولنه میهرق صاحب مال، مالی آلیر کیری کیدردی!  
عدی نک اوچنجیسی دیدیکی ده بوایدی!

\*\*\*

۱۷

### وفود سلمان

شهر شوالده مدینه طیبه کلدیلر . یدی نشر ایدی  
رسول اللهک بر جنازه کیتیمک اوزره مسجد شریفدن  
چیقه جفی بر زمانده راست کله رک س-لام ویردیلر . و  
سلامندن اولدقلرینی بیعت و اسلام ایچون کلدکلرینی  
سؤال عالییه جواباً عرض ایتدیلر . حضرت پیغمبر ،  
کوله سی ثوبانه امر و اشارتله انلری مسافر خانه یه انزال  
ایتدیردی . افندیمز ، بنی س-لامندن بلده لری احوالی  
سؤال بیوردی . سلمان مبعوثلری ، بلده لرنده قورافلغک  
حکمفرما ایدوکنک عرضیه بر ابر دربار رسالتدن دعاه  
رحمت نیاز ایلدیلر . بونک اوزرینه سیدالانام علیه الصلو  
والسلام افندیمز : [ اللهم اسقهم الغیث فی دارهم ] دیه  
دعا ایتدی .

بنی سلامان :

— « یارسول الله ! ارفع یدیک فانه اطیب وا کثر »  
 دیه رجا ایتملریله افندیمنز ، تبسم ایدهرک قولتوغنک  
 بیاضی کوروننجیه قدر دعاده دست همت هایونلرینی  
 یوقاری قالدیردی . مبعوثین مرقومه ، مدینه طیبه ده اوج  
 کون طوروب بلده لرینه کیتدیلمز . عودتلرنده کوردیلر که  
 دعاء البنی ساعتده بلده لرینه رحمت دوشمش ، فیض  
 وبرکت آناری ظهور ایتمش ! .

\*\*\*

۱۸

### وفود بنی منتفق

بنی منتفق ، بنی عامر بطنندن برقیله اولوب مبعوثلری  
 « لقیط بن عامر ، ایله « نهیک بن عاصم » نامنده ایکی  
 نفر کیمسه دن عبارت ایدی .

بونلرک مدینه سعادتده دخیوللری کیجه شفقه قارشى  
 برزمانده ایدی . رسول الله صلی الله علیه وسلمک  
 صباح نمازندن فارغ اولدیغی صروده حضور سعادتلرینه  
 کیردیلمز . او آنده حضرت سیدالانام ، برخطبه اوقویوب

قیامتک وجنتله جهنمک احوال و احواله دائر و عظم و  
وانصیحت اجر اسيله مشغول ایدی .

لقیط :

— « یا رسول الله ! سکا نه شرطله بیعت ایدیم؟ »  
دیه موردی [ نماز قیلمق . زکات و یرمک واللهم  
هیج بر شئی اشراک ایتماک شرطیله ] جوانی آله رق  
انک اوزرینه بیعت ایلدیلر . و مسلمان اولدقلری حالده  
بلده لرینه عودت ایتدیلر .

\*  
\* \*

۱۹

## ورود اسود عنسی

یمنده عنس قبیله سی شیخی « اسود عنبله بن کعب »  
دخی کلوب حضور پر نور رسالتده مسلمان اولمش ایدی .  
بلده سنه عودتنده بالا رتداد نبوت ادعا ایدرک بیوک بر  
عائله چیقارمش ایسه ده فیروز دیلمی نام ذات الندن مقتول  
وعونه سی ده مهزوم اولمشدر .

۲۰

## حجة الوداع

حج شریف قصیدہ مکہ مکرمہ نیک مقدم رسالت پناہی  
ایہ تشریف بیوریلہ جنی اعلان اولندی کہ استطاعتی اولانلر  
حقنہ حجہ دعوتی متضمن ایدی . ناس دخی برالکده  
حج ایتلری ایچون طویلانیغہ مبادرت ایدرک آاز زمان  
ایچنده مدینہ طیبہ ده یک چوق ذوات . حاضر اولدی .  
برالکده حج شریف نصیب اولیان بیمسہلر، جدری .  
وحصبہ کی بعض مزاحمہ اوغرایه رق کیری قالدقلرندن  
جبر وتسکین خطرلریچون : [ ان عمره فی رمضان تعدل  
حجة ] بیورلدی .

شهر ذی القعدة نیک یکر می بشنچی جمعه ایرتسی کونی  
ایدی قلمرو خطہ رسالت افندیمز ، صلوٰۃ ظہری مدینہ  
سعادتلرنده کی مسجد شریفلرنده درت رکعت اوله رق  
قلدقن صوکره وقت عصر دن اول طریق شجره دیدکلری  
اورته یولدن ذوالحلیفہ . نزلہ متوجہاً مدینہ مبارکده دن  
حرکت بیورمشلردر .

بتون اهل بیت رسالتلریله زوجات طاهرات و

اصحاب کرام ، معیت جہانقیمت سیدالانامیلرندہ ایدیلر .  
 حجاج کرام ، بر روایتہ کورہ قرق بیک ، دیگر روایتلرہ  
 کورہ یوز بیکدن زیادہ ویوز یکر می بیک ایدی .

اوکون ذوالحلیفہ کلدی . ایکندی نمازینی اورادہ  
 قصر ایله یعنی ایکی رکعت اولہ رق قیلدی . او کیجه  
 ذوالحلیفہ قالدی . اقشام ، یاتسو ، صباح نمازلرینی ینہ  
 ذوالحلیفہ قصر ایله قیلدی . و کیجه بتون زوجات  
 طامراتی طواف ایدوب غسل ایلدی احرام ایچون بر  
 دها غسل ایتدی . و « زریرہ » دیدکلری شیلہ قوقولندی .  
 ذوالحلیفہ اسماء بنت عمیس رضی اللہ عنہا « محمد  
 بن ابو بکر » رضی اللہ عنہما ی طوغورمشدی اسماء ،  
 حالت نفاس ایله کیفیت حجنی استفسار واستفتا اتمکله  
 افدیمز . [ اغتسلی واستشفری بثوب و احرمی ] دیه  
 ییقانوب محل عذرینہ یز طوتوندقندن صوکرہ احرامہ  
 کیرمسنی تجویز بیوردی .

ذوالحلیفہ صلات ظہری قیلوب هدی تقلید و  
 اشعار ایتدی . یعنی قربانلق دوه سنی حضور سعادتلرینہ  
 جلب ایتدیرہ رک سنامنک صاغ جابندن بریرینی بیچاق  
 ایله یارلدی نشان ایتدی قانی سیلدی اطرافہ بولاشدیردی  
 بوینه ایکی قلادہ تعلیق ایلدی .

قربانلق دوه لرك سـوقنه « ناجیه بن جندب  
اسلمی » حضرتلری مأمور بیورلمشدی . شاید برینک  
تلفی تقدیرده ایدم جکی معاملهی ناجیه صورتی . هلاکه  
مشرف اولان دوهی ذبح ایله قلاده سنی قاسنه بولاشدیروب  
ئورجکک صاغ یانسه اورمسی واتندن اکل ایدلمامسی  
لزومی امر وتنبیه بیورلدی . ناجیه یوله یوریلور ایسه  
قربانلق دولرندن برینه رکوبه مساعده سینه دخی ارزان  
بیورلمشدی .

حضرت رسول الله، ذوالحلیفه مسجندنه ایکی رکعت  
نمازدن سوکره اهلل ایلدی . یعنی صوت جهیر ایله  
[ اَللّٰهُمَّ لِيْكَ ] دیدی . روایت کوره نیت مطلقه  
ایله یعنی نه حج نه عمره ایدوکنی تعیین ایتمه رک - و دیگر  
روایت نظرأ افراد بالحج ایله نیت ایدوب - قصوا نامنده کی  
ناقه سعادتلرینه بیندی . ناهنک همان حرکت ایدم جکی  
دقیقه ده یته اهلل ایتدی . وجبل بیداء یوقوشنده یته  
اهلل ایلدی . بیداء موقعنک هر طرفی کورم جک مد  
بصر ونظری وار ایدی .. فخر الرسل صلی الله علیه وسلم  
افندیمنک جوانب اربعه سندن کوزک اله بیلدیکی یرلر انسان  
ایله طولو کورونمکده ویوز بیـک بوقدر حاجی حاوی



بر جمعیت ناجیه معظمه نك بر آغز دن كلبانك تهليل  
و تبلیه لری زمیندن آسمانه عكس انداز مهابت اولمده  
ایدی .

صحابه کرام نیتده مطلق بولنیورلر ایدی . ارزوایدن  
حج و عمره به نیتله اهلل ایتمندم مخیر بیورلدی .

نافه سعادتک اوزرنده رسول ا کر مک بیندیکي اسکی  
بر ا کر ایدی . درت درهم کמוש قیمتندم و یا اندن  
دون بر قیمتده ایدی .

هر کس اهلل و نیتده عمره و حج خصوصاً صلیرنده  
مخیر بیورلمش و سیدالانام افندیمر دخی افراد بالحج ایله  
نیتلنمش ایدیسه ده قران امرینی جبریل ، تبلیغ ایتمکه  
وادی العقیقه مواصلت اثناسندم [حجة فی عمره] دیه هم  
عمره ، هم حج اولق اوزره ایکیمنی مقارن ایلمشدر .

ابواء و یاخود ودان منزله واردیلر . اوراده و صعب  
بن جثامه ، اولادینی بر حمار و حشی بی سده سنیه  
رسالتپناهی به هدیه تقدیم ایتدیکي حالده قبول  
بیورلمدیغندن صعب مکدر و متأثر اولدی . افندیمر ،  
صعبک تأثرینی اکلایه رق جبر و تسکین خاطری ایچون  
اکا :

— « انالم نرد عليك الا انا حرم = بزانی سكارد  
ایتمدك ولكن احرامده يز »

دیه بیان معذرت ایتدکدن دوکره معیت سیه  
خیرالانامیلرئده کی ذواته ده:

— « هو حلال فكلوه »

دیه امر بیورمش و برارالق ده :

— « فهل معكم منه شيء = بقیه سندن نزدیکزده  
وارمیدر ؟ »

دیه صورده زق کتیر دکاری پاچه سنی تناول بیورمشدر .  
حرکتدن مقدم حضرت صدیق ، اهل بیت رسالتک  
زادینی بالاستیذان کندی ارزاقی هموله سنه مخصوص دوه سنه  
تحمیل ایدرك غلامنه تسلیم ایلیمشکن یولده منزللردن برنده  
غلام ، دوه بی یاتوروب او یومسیله دوه ضایع اولمش .  
ومو کب سعادتک عرج منزلنه نزولی ائنهاده غلام دخی  
کیریدن کلهرك موکب هایونه یتشمشدی . نقط . زاد  
اهل بیت رسالتک کندی دوه سی اوستنده و کندی خدامی  
النده ضایعی ، صدیق حضرتلرینی منفعل و متأثر ایدرك  
غلامی ضرب و تادیبه مسارعت ایلدی .

اوزمان جناب فخر الرسل افندیمر ، تبسمله برابر

ابوبكر ك حاله اشارت بيورده رق:

— «كور من ميسك كه بو محرم نه ياپار؟»

ديه احرامه منافي حر كته بولنديغني اكا اخطار ايلدي.  
 بني اسلمدن آل نضله، ارزاقى حامل دونهك ضياعنى  
 استخبار ايتلمرى اوزرينه كندى زواده لرندن حضور  
 رسالته بعض ارزاق هديه كوندرملريه سيدالانام عليه  
 الصلوة والسلام واهل بيت سعادتملى و ابوبكر ك عائله سى  
 وديكر انلرله اكل طعامه ماذون اولانلر طويونجه يه قدر  
 يديلر.

صفوان بن مطلق سامى، دوه يي كرده بولوب موكب  
 سعادت هنوز منزله ايكن يتيشدير مشدى. اوزرنده كي  
 اشيا تمام ايدى يال كز صو اچمكه مخصوص بر قدح  
 اكسك ايدى غلام، قدح بنده در. ديمكه حضرت صديق  
 [جناب حق، سنك امانتكي ادا ايلدى] ديمشى.

منزل مذكوره كبار انصار كرامدن «سعد بن عباد»  
 ايله اوغلى «قيس» رضى الله عنهما زواده لرني حامل اولان  
 يوكلو بردوه يي حضور اقدس رسالتپناهى به سوق و تقديم  
 ايدرك:

— «يارسول الله! ايشتمك كه زامله كز ضايع اولمش..»

بوزامله یی اکابدل کتیردک قبولی ایله اوزریمزه وضع منت  
ایدرسکزه .»

دیدیلر جواب اوله رق افندیمز :

— « جناب حق ، بزم زامله مزی بزم ایریشدیردی  
سزکندی زامله کزی کیری کتیریکنز حضرت مولاسزده  
برکت و برسون»

دیدکدن صوکره دوام ایده رک :

— « ای ابوثابت ! مدینه یه هجرتمزدنبرو بزم اولان  
ضیافتلرک یتزمی [\*] »

بیوردیلر . سعد کمال صمیمیتله :

— « یارسول الله ! منت ، الله ورسول الله ایچوندر سنک  
بزدن آلدیغک مال وشی ، نزدمزده قالاندن ده  
صرغومزدر »

دیدی رسول الله اغورنده جان ومانی فدا ایله محظوظ  
و مفتخر اولدقلرینی اکلاتمق ایستدی حضرت پیغمبر .  
انی :

— « طوغری سویلرسک بشارت سکا که فوز و فلاح  
بوله سک . حقا که اخلاق ، جناب حقا ید قدرتمنده در

[\*] ابوثابت سعد بن عبادہ رضی الله عنہک کنیه سیدر

کیمه که احلاقدن برینی ویرمک دیلرسه انی او خاقه موفق  
ایدر. ای سعد! سکا کرم و مروت صفتی ارزان قیلمشدره  
دیه تصدیق و تقدیر ایتمهکه سعد دخی :  
— « حمد ثنا اولسون اول الله که بونعمتی بکا احسان

بیوردی »

دیدی ثابت بن قیس :

— « یارسول الله! سعدک قبیله سی ایام جاهلیتده ده  
بزم رئیساریمزله سخیلریمز زمره سنده ایدیلر  
دیوب سعدی لسان حب و مودتله یادوستایش ایتدی  
ایشته او آنده ایدی رسول الله صلی الله علیه وسلم :  
— « الناس مغادن کعادن الذهب والفضة . خیارهم  
فی الجاهلیة خیارهم فی الاسلام اذا فقهوا »  
بیورمشلردن .

روحاء منزله برخلقه تصادف اولنه رق حاللرندن  
سؤال ایدلمهکه :

— « مسلم انلرز »

جوابی ویردیلر. صوکره :

— « سن کیمسک ؟ »

ديه صورديلر . حضرت رسالتنه صلى الله عليه وسلم :

— « بن اللهك رسولى يم »

ديدى . انلردن برقادين ، برطفل صغيرى محفه سندن

رسول كبريانك جانب عايسنه طوتوب :

— « الهذا حيج ؟ »

ديدى . اجوابنده :

— « نعم ولك اجر »

بيورلدى .

وادىء عسفانه كلدكلرنده حضرت ابى بكر الصديقدن

سئوال بيورلدى :

— « يا ابا بكر ! بوهانكى وايدىر »

ابوبكر الصديق ، وادىء عسفاندر . جوابنى ويردى

« انك اوزرينه نبى معظم افندمز :

— « لقد مر به هود وصالح على بكر بن احمرين .

خطهما الالف وازرهم انبياء وارديتهم النار . يلبون

محجون البيت العتيق »

بيورديلر .

وادى الازرق ديدكلرى دريه وصولارنده دىخى :

— « كائى انظر الى موسى من اثنية واضعف

اصبعیه فی اذنیہ ماراً بهذا الوادی وله جوار الى الله بالتلبية  
بیور دیلر .

سرف نام محله طرف ذیشرف رسالت پناهی دن حجاج کرامہ :  
[ من لم یکن معه ہدی فاحب ان یجعلها عمرۃ فلیفعل ومن  
کان معه ہدی فلا ] امر عالیسی ویرلمشدی کہ قربانلنی  
اولیوب عمرہ بی ارزوایدن ایتسون ہدی اولانلر حجدہ  
ثابت اولسون دیمکدی . حضرت عائشہ رضی اللہ عنہا  
سرفدہ حیض کوردیکندن صاچنی چوزوب طارادقن  
صوکرہ عمرہ بی ترک ایتسی فقط احرامدن چیقمامسی  
وعمرہ اوزرینہ حج ایلہ جمیع اعمال وارکان حجی ایفا  
ایتسی وحیضدن تطہر ایتدکجہ بیت کعبہ معظمہ بی  
طواف ایلمامسی امر وتنبیہ بیورلمشدی .

یمن والیلرندن ابو موسی الاشعری رضی اللہ عنہ دخی  
معیت سندیہ حج و زیارت بیت اللہ مقصدیلہ یمندن  
طوغری مکہ مکرمہ یہ کلوب بطحادہ رسالت پناہ افندیمرہ  
ملاقی اولہرق :

— یا رسول اللہ اہلال واحرامدہ نیتمی سنک نیتکہ

تعیلق ایتدم . اما ہدیم یوقدرہ

دیدیکندن حضرت رسول اللہ اکا :

— « بیت کعبه بی طواف ایت . صفا ایله مرووده سعی

ایدوب احرامدن چیق »

دیو امر ایتشدی ذی الحجه نك دردنچی

یوم الاحد کیجاسی ذی طوی منزله کلایلر .

کیجه آده قلوب صباح نمازینی ینه آده قیلدی . وغسل

ایلدی . صوکره مکه مکرمه یه کدانك ثنیة علیاسندن

کیری . بنی شیبه قپوسنه ایریشدیکی دقیقه ده بیت کعبه

کوروندی . افندمن اكا اشارتله : [ اللهم زد هذا البيت

تعظيماً وتشريفاً وتكريماً ومهابةً وزد من شرفه وعظمه

من حجه واعتمره تعظيماً وتشريفاً وبرا ] ديه دعا ایلدی .

ضحی وقتنده باب مذکوردن یعنی باب عبدمنافدن مسجد

حرامه کیردی . دخولنك عقینده همان استلام حجردن

صوکره ناقه سوار اولدینی حالد صاغ جابندن طوافه

باشلادی . یدی کره طواف ایتدی . اوچ اولکی طوافی

سرعتله درت صوکره کی طوافی آهسته و سکون اوزره

ایدی . هر طوافده حجری استلام ورکن یمانی بی مس

ایدردی . روایت کوره اگری باشلی بر عصا ایله حجره

اشارت و دیگر روایت کوره مبارك لیلرینی وضع ایله بوس

واستلام ایتدی . رکنك حین استلامنده : [ بسم الله

والله اکبر ] و حجره کلدیکنده [ الله اکبر ] دیر ایدی .



حجر الاسود ايله ركن ثانی اره سنده [ربنا آتنا فی الدنيا  
 حسنة وفي الآخرة حسنة وقنا عذاب النار] بیورودی  
 اصحاب کرام آمین دیرلر ایلدی . بعد الطواف مقام  
 ابراهیمه کلدی . ( واتخذوا من مقام ابراهیم مصلى ) آیت  
 کریمه سنی انده اوقودی . ومقامی کندی ايله بیت کعبه  
 اره سنده کتیره رک طوردی . ایکی رکعت نماز قیلدی رکعت  
 اولیده بعد الفاتحه سورة الکافرونی رکعت ثانیه ده  
 سورة الاخلاصی تلاوت ایلدی . نمازک ختامنده دونوب  
 رکنی استلام ایتدی صوکره باب صفادن چیقدی . جبل  
 صفايه عزیمت ایلدی . جبله قریب اولدیغنده [ان الصفا  
 والمروة من شعائر الله فمن حج البيت او اعتمر فلا جناح  
 عليه ان يطوف بهما ومن تطوع خيرا فان الله شاكر عليم]  
 آیت کریمه سنی اوقودی . جبل صفانک اوستنه چیقدی  
 صفانک اوزرندن بیت شریفه طوغری نظر وتوجه ایتدی  
 [لا اله الا الله وحده لا شريك له له الملك وله الحمد يحيي  
 ويميت وهو حي لا يموت بيده الخير وهو على كل شيء قدير  
 لا اله الا الله وحده انجز وعده ونصر عبده وهزم الاحزاب  
 وحده] ديهرك دعادن صكره مروه جانبنه يورودی .  
 واديدن مروه يوقوشنه كنجه يه قدر مروله ايله يورودی

یوقاری به آهسته چیقدی. صفادن مرویه بونوال اوزره  
یدی کره سعی ایلدی. هر دفعه سنده صفا اوزرنده عین دعایی  
عین توجه اوزره ایدردی صفا ایله مرویه نیک بیننده مساعی  
سبعه دن بعض مرآتق افندیمر ، راکباً ایفا ایتشلردی .  
ابوالطفیل ، صفا ایله مرویه نیک اره سنده سعی رسول الله  
صلی الله علیه وسلم افندیمرک راکباً ایفا بیورمش اولسنک  
کیفیت و حکمتی ابن عباس حضرتلرندن صور دینی  
زمان ابن عباس ، رسول الله صلی الله علیه وسلم اوزرینه  
حتی یتشمش قیزلره وارنجیه قدر خلقتک [هذا محمد هذا  
محمد] دیه اوشوشمش اوله رق حاصل ایلدکری مزاحمه دن  
طولانی ماشیاً سعیه مجال قالدیغنه مبنی بالضروره ناقه  
سعاده رکوب ایجاب ایتدیکنی سویلمشدی .

سعی مرویتنک ختامی اوزرینه هدی اولمیانلرک  
احرامدن چیقوب منایه کیدیلیر ایکن حج ایچون احرامه  
کیرملری. وهدی اولانلرک یوم النحره دکن احرامده  
قالملری امر و تنبیهدن صوکره : [ولوانی استقبلت من  
امری ما استدبرت ما هدیت ولولا ان معی الهدی لاحلت  
= اکر بن شمدی بیلدیکنی اولجه بیلمش اولسیدم  
یانمجه هدی کتیرمیوب هدی مکده صاتون الیر ایدم

واحرامی عمریه منصرف قیلر وسنرك احرامدن چیقده  
 یغکز کبی بن دخی چیقار ایدم ولیکن مادام که هدیمی  
 برابر کتیردم نحر ایتدکجه احرامدن چیقده میه جغم [   
 بیورلدی .

سراقه بن مالک :

— « یارسول الله هی لنا ام للابد؟ = حجی فسخ  
 ایدوبده عمریه دوندیرمک و یاخود حج و عمره نی  
 مقارن ایتک جوازی یالکز بوسنه ایچون بزه می مخصوص صدر  
 یوقسه هر سنه یه می ؟ »

دیه سؤال ایتدکله رسول اکرم صلی الله علیه و سلم  
 مبارک یارمقلرینی تشبیک ایدوب :

— « دخلت العمرة فی الحج الی یوم القیمة »

بیوردیلر .

ابوبکر الصدیق، عمر الفاروق، طلحه، زبیر و دیگر  
 بعض اصحاب کرام، هدیلرینی برلکده کتیرمشلردی. امر  
 عالی موجبنه احرامده قالدیلر. فاطمة الزهراء و جمیع  
 امهات مؤمنین حضراتی هدی کتیرمامشلردی . عائشه  
 رضی الله عنهانک غیری احرامدن خالی ایدیلر .

بو آنده ایدی که حضرت علی کرم الله وجهه یمندن

طوخر بجه مکه مکرمه به کلدی وهدی نیتله برقاچ دوه ده  
برلکده کتیردی. حضرت سید الانام علیه الصلوٰۃ والسلام  
سؤال بیوردیلر :

— « بما اعلمت ؟ »

جناب علی. اهلانی اهلل رسول ذو الجلاله  
تعایق ایستدیکنی :

— « بما اهل به رسول الله »

دیه بیلدیر مکله حقنده [اللهم اهلالاً کاهلال نبيک]  
بیوردقدن صوکره :

— « اکر هدیملسیدی حج احرامنی چوزوب  
عمره به نیت ایدردم سن کندی احرامکده قال . هدیده  
شریکم اول »

دیدى. او کونلر، مارتیه مصادف ایدی و کوندوز  
ایله کیجه نك مساوی اولدینی بر زمان اعتدال ایدی.  
رسول الله صلی الله علیه وسلم، بازار و بازار ایرته سی،  
صالی، چهارشنبه کونلریله پنجشنبه کیجه سی مکه مکرمه ده  
قالدی. پنجشنبه کونی که ذو الحجه نك سکنز بچی کونی و یوم  
التروییه ایدی حجاج کرام ایله برلکده چیقوب منایه  
کتیدیلر. منایه کیدجککری زمان هدیسنزلککری سبیلله

با امر عالی احرامدن چیقمش بولنانلر حج ایچون احرامه  
کیردیلر .

مناده او کون اوپله ، ایکندی ، اقشام ، یاتسو نماز -  
لرینی قیلوب انده کیجهلدی و ایرتهسی یوم جمعه و یوم  
عرفه نکه ده صباح نمازینی ینه مناده قیلدی . کونش طو -  
غدقدن صوکره عرفیه حرکت بیوردی .

خیمه سعادتلرینک نمرده قورولسنی امر ایتشدی .  
خیمه مذکورده قیلدن منسوج ایدی عرفانه کلدیکندم  
خیمه سعادتلرینه قوندی . کونشک زواله کله رک حرارتی  
کچنجه قصواء اسمنده کی ناقة سعادتلرینه رحل اورولدی .  
بینوب بطن وادی یه کلدی خلقک اسکاتی یعنی انصاف  
ایتملری لزومنک اعلانی جریر بن عبدالله امر ایلدی .  
ایشته اوراده و ناقة سعادتلرینک اوزرنده خلقه بر  
خطبه بلیغه او قوددی . ازدحام سببیه هر کس بنی اکرمک  
صوت شریفنی ایشیدمه مدیکنه مبنی « ربیعہ بن امیه بن  
خلف » قصوانک صدری الته طوروب تنقی ایلدیکی  
خطبه سعادتی با امر نبوت امته و حضاره تبلیغ ایدردی .  
خطبه رسالته ابتدا الله تعالی جل شانہ ولا اله غیره  
حضر تدرینه حمد و ثنادن صوکره :

— بوبلده ، بو آیده بوکون حرام اولدینی کی  
 سزک قانلریکنز ، مال و عرضلریکنز یکدیگریکنز . حرامدر .  
 بیلمش اولیکنز که جاهلیتک جمیع عادات و احوالی ایامک  
 انتہ قویہرق لغو و ابطال ایتدم . جاهلیتدن قالہ اول  
 قانلرکه اہلی انک انتقامی صدندہ در بالکلیہ باطلدر بو  
 بایدہ ابتدا ابطال ایلدیکم قان . ربیعہ بن الحارث بن  
 عبدالمطلب اوغلنک [۵] قایددر و جاهلیتدن قالہ ربالری  
 دخی ابطال ایتدم . اول ابطال ایتدیکم ربا ، عباس بن  
 عبدالمطلب رباسیدر . زوجہلریکنز حقندہ جناب حقدن  
 قورقیکنز . انلری کلمہ حقہ و حتمک عہدیلہ تحت نکاحکنز .  
 کتیرمشسکنز . سزک انلر اوزرندہ حقلریکنز انلرکدہ  
 سزک اوزرلریکنزدہ حقلری واردر . سزک حقکنز ،  
 فراشکنزہ ایستمدیکنز شخصک ایاغنی باصدیر مامقدر .  
 باصدیر زلرسہ اثر ضرب اعضاالزندہ ظاہر اولنجہ بہ دکن  
 ضرب ایدرسکنز و انلرک قدر معروف نفقہ و کسوملری  
 سزہ عائد حقلریدر . مؤمنلر ، ہپ بری برینک قرنداشیدر  
 برکیمسہ یہ مسلم قرنداشک مالی حلال اولمز مکرکہ حسن

[۵] بنی سعد قبیلہ سندنہ ارضاع اولنورکن ہذیل قبیلہ سی

انی اولدیرمشدی .

رضاسیله و برمش اوله . بن سزه لازم اولان احکامی تنبیغ  
 ایتدم و ایکی شیئی بر اقدم که انلره تمسک ایتدجکه هیچ  
 بروقت ضالانده قالماسکنز . بری کتاب الله دیکری سنت  
 رسول الله در روز قیامتده جناب حق . سزدن سهـؤال  
 ایده جکدرکه محمد [ علیه الصلوة والسلام ] سزکله نه کونه  
 معامله و معاشرت ایتدی . سز او کون نه جواب  
 ویره جکسکنز ؟ »

دیدى اصحاب کرام :

— یا رسول الله ! شهادت ایدرزکه رسالت و امامتی  
 ادا و شرط ارشاد و نصیحتی ایفا ایتدک »

جوابی ویرملریله سیدالانام علیه الصلوة والسلام  
 سیابه پارماغنی جانب آسمانه قالدیروب صوکره انکله اصحابنه  
 اشارتله متوالیا اوج نوبت [ اللهم اشهد ] دیدى و سوزنی  
 کسمیه رک :

— « یا عباد الله ! اوج شی ، سینهلری کینه لردن  
 پاک ایدر : عملده اخلاص ، مسلمانلره خیر خواهلوق ،  
 جماعت مسلمینه ملازمت »

دیدى .

ربیعہ ، کورسلی بر آدم ایدی . افندیمر ، خطبه سنک

هر فصل وفاصله سنده اکا : [یاربیمه ! قل یا ایها الناس  
ان رسول الله يقول کذا = ای ناس ! تحقیقا رسول الله  
بویله سویلیوردیه سویله ] دیر ربیمه دخی تاقی ایلدیکی  
امر عالی موجبینجه صیحه وندا ایدردی .

عبدالله بن عباس رضی الله عنهما نك والده سی دام فضل  
بنت الحارث ، برقدح سود کوندرمش ایدی . رسول  
اکرم ، سودی شواننده ایجدی . اصحاب کرام ، انکله  
اوکون افندیمرک صائم اولمديغنی اکلا دیلر .

خطبه تمام اوله رق اذان او قومسی بلال رضی الله عنه  
امر اولندی . حالبوکه ایکندی وقتی یا قلاشمش و هنوز  
اوله نمازی قیلنماش ایدی . بلال اذان او قودی . اقامت ده  
ایتدی ابتدا ظهر نمازی قیلندی . صوکرهینه امر اولنه رق  
بلال اقامت ایتدی ایکندی نمازی قیلندی . که ظهر وعصر  
نماز لری وقت واحده جمع ایلر اذان ایکی اقامتله ادا ایدلدی  
رسول الله صلی الله علیه وسلم افندیمر . نمازدن صوکره  
دو سنه بینوب موقوفه واردی . وموقوفه قصوانک قارتنی  
صخره یه بالا عطا قبله یه طوغری طوره رق دعایه مشغول  
اولدی . ودعاده الحاح کوستردی .

موقوفه اکثر دعا لری : [ اللهم لك الحمد کالذی



نقول و خيراً مما نقول اللهم لك صلواتي و نسكي و محياي  
و مماتي و اليك مآبى و لك ربي تراني اللهم انى اعوذ بك  
من ما تحبى به الریح [ ايدى .

ديكر روايته كوره عرفه كونه : [ لا اله الا الله  
و حده لا شريك له ] ديدكن صوكره اكثر دعاسى :  
[ اللهم لك الحمد كالذى نقول . اللهم لك صلواتي و نسكى  
و محياي و مماتي و اليك مآبى و عليك يارب ثوابى .  
اللهم انى اعوذ بك من عذاب القبر و من وسوسة الصدر  
و من شتات الامر و من شر كل ذى شر ] ايدى .

ابن عباس حضر تلرينك روايته كوره عرفه دهكى  
ايتديكى دعا لك برى ده بو ايدى : [ اللهم انت تسمع  
كلامى و ترى مكاتى و تعلم سرى و علانيتى لا تخفى عليك  
شىء من امرى انا البائس الفقير المستغيث المستجير الوجل  
المشفق المقر المعترف بذنوبه . اسئلك مسئلة المسكين .  
وابتهل اليك ابتهال المذنب الذليل و ادعوك دعاء الخائف  
الضرير . من خضعت لك رقبتى و فاضت لك عيناه و ذل  
جسده و رغم انفك اللهم لا تجعلنى بدعائك رب شقياً  
و كن رؤفاً رحيماً يا خير المسؤولين و يا خير المعطين ]

بیور مشلر درکه :

— و دعالرك خير ليسى و اجابته اقربى عرفه  
كوننده ايديلان دعار . بنم و بنندن اولكى اندياك  
ديدك رينك افضل [لااله الا الله وحده لا شريك له له الملك  
وله الحمد و هو على كل شىء قدير] كله سيدر .

..

عرفده اهل نچددن يوم عرفه يه يتشمش اولان  
بر طاقم كيমে سر ، حضور سعاده كلوب : [كيف الحج؟]  
ديه سؤال ايتديلر . آلك اوزرينه امر بيوردي منادى يي  
عرفده [من جاء ليلة جمع قبل طلوع الفجر فقد  
ادرك الحج . ايام منى ثلثة . فمن تمجّل في يومين فلا اثم  
عليه و من تأخر فلا اثم عليه] ديه ندا ايتديردى .

حجاجدن بر كيমে سر او كون عرفانده زاحله سندن  
دوشهرك فوت اولمغله امر ايدوب اتى ماء وسدر ايله غسل  
و جامه احراميله تكفين ايتديلر . حنوط و سائر منللو  
قو قولى شى سوردير ميهر ك باشى ، يوزى اچيق اولدينى  
حاله دفن ايتديردى و حقنده : [ان الله يبعث يوم  
القيامة ملياً] ديدى .

عرفانده وقفده ايدى : [وقفت ههنا . وعرفة

كلما موقف = بن بوراده طـوردم عرفانك هر یری  
موقفدر [ بیورملریله برابر هر قومك ایام سابقهده واقف  
اولدقلری محلهده طورملرینی امر ایتدی .

اقشام اوستی هنوز موقفده ایکن : [ الیوم اکملت  
لکم دینکم واتممت علیکم نعمتی و رضیت لکم الاسلام  
دیناً ] آیت کریمهسی نازل اولمشدر . آیت کریمه نزول  
ایدركن قصواء، ثقلت و حیه تحمل ایدمهیهرك بره چو كمشدی !  
معنای لطیفی بوكون سرك دینكزی اكمال و اوزریكزه  
نعمتمی اتمام ایتدم و سرك ایچون دین اولمق اوزره  
اسلامی بکندم دیمك ایدی . تبایغ و ایفاء رسالت کبی  
مأموریتك ختام و تمامی حالنده اووجود معززك ارتق  
دنیاده ایشی قالمیور ایدی :

اذاتم امرد فی نقصه

توقع زوالا اذا قیل تم

مفهومنجه آیت کریمه . رسالتبناه افندیمرك رحلت  
سنیهلرینه اشارت ایدی . حضرت ابوبكر الصديق رضی الله  
عنه . بودقیقهیی اكلایهرق اغلادی ! .

اوكون غروب شمسدن صوكره فخرالانبیاء افندیمرك،  
عرفاندن دوندی قصوایه راكب ایدی . اسامه بن زید

رضی الله عنہی ترکیسنه آلدی کمال عز و وقار ایله مزدلفه یه حرکت ایتدی .

ناقة سعادتلرینک یولاری دست هایونلرنده ایدی .  
اولقدر چکدی که قصوانک باشی رحلتک اوکنه تماس  
ایدرجه سنه کلمشدی . یوله بر یوقوش کلدجه یولاری  
صالیویریر ایدی . خلقک مسارعت و ازدحاملرینی کورو نجه  
مبارک اللریله خلقه اشارت ایدوب : [ یا ایها الناس  
السکینه السکینه ] دیدی . یاواش کیتملرینی امر ایدم یور  
ایدی .

اشبو امر عالی به قارشو خلقک ینه دوملرینی ضرب  
شمانه لرینی ایشیده رک النده کی قامچیسيله اشارت ایتدی .  
و : [ یا ایها الناس ! علیکم بالسکینه . فان البریس بالایضاع ]  
دیدی .

یوله بر طاغ قولتوغنه کلدی که صول جانبی یول  
ایدی آنده ناقة هایونلرندن ایندی و بعد البول خفیف  
بر آبدست آلدی . اسامه :

— « الصلوة یارسول الله ! »

دیرکن ا کا : [ امامک ] دیه نماز محلتک ایلروده  
ایدوکنه اشارتله دوه سنه سوار اولدی . یاتسو وقتنه یاقین

مزدلفه یا کلدی . اقسام ایله یاتسو نماز لری جمع ایده رک بر اذان  
و بر اقامتله برابر قیلدی . او کیچه مزدلفه ده قالدی .  
تهجد قیلمیوب صاغ جانبی اوزرینه یاندی اویودی شفقله  
برابر قالدی . فضل بن عباس رضی الله عنهمایه : [التقط حصی]  
دیه جمره طویلایمسنی امر ایتدی فضلده اوافق بر قاج  
طاش دیوشیروب تقدیم ایتدی . افندیمر :

— « یا مال هؤلاء وایاکم والغلو فی الدین . فانما هلك  
من قبلکم بالغلو فی الدین »

بیوردی که زعم افضلیتله قوجه مان طاشلری شیطان  
نیتنه جمره یه اتمق حائز فضل و مزیت اولیوب بالعمکس  
حدندن زائد و خارج اولمق اعتباریله اودرلو معامله نک  
غلو فی الدین مرتبه سنده بواندیغنه مبنی محذور مذکوره  
محل قالماق اوزره اوافاق طاشلرله جمراتک رمینی و هر  
خصوصده غلودن مجانبتی بونسکله امر و اخطار ایتشدرد .  
مزدلفه دن قصوایه راکباً مشعر الحرامه کلدی . مشعر  
الحرامده قبله یه طوغری طوردی دعایه مشغول اولدی .  
تکبیر و تحمید و تهلیل ایلدی .

عباس بن مرداس اسلمی ، روایت ایدرکه حضرت  
رسول الله صلی الله علیه وسلم یوم عرفه نک آخرنده و یوم

عید کیجہ سندہ امتی ایچون دعا واستغفار ایلدی : جناب حق ، مظالمک غیرنی مغفرت ایتدیکنی ومظلومک حقنی ظالمدن الیورمدکجه ظالمی عفو و مغفرت ایتیمه جکنی بیلدیردی . شفیع الامه افندیمز : [یارب دیلرسه کجنتدن عوض ویر یرده مظلومی راضی قیلوب ظالمی مغفرت ایدرسک] دیه نیاز وتضرع ایتدیکی حالده او کیجه اثر قبول واجابت ظهور ایتامشدی .

مزدلفه ده ویاخود مشعرالحرامده عین دعایی کمال تضرعله تکرار ایدرکن جبریل ، پیغام اجابتله نکدی .. او زمان جناب رسول اکرم ، تبسم بیوردی . ابوبکر ایله عمر رضی الله عنهما سبب تبسمی سؤال ایتملریله امت حقنده کی دعاسنک قبول بیورلمش اولمسندن ناشی شیطان ، کدرندن جزع وفزعله باشنه طوبراق صاچه رق کندینه ویل و ثبور ایله ادعا ایلدیکنی کوروب تبسم ایتدیکنی سویلدی .

طلوع شمسدن اول مشعرالحرامدن حرکت ایتدی بودفعه «قزح» دیدکاری محله ناقة هایونلرینک ترکیسنه عم زاده لری فضل بن عباس رضی الله عنهمایی آلدی . فضل ، برشاپ جمیل ایدی . محفلرله بمض نساء کچرکن فضل انلرک طرفه باقمش وروایت اخرایه کوره ختم قبیله سندن

برقادرین اورادم حضور اقدس رسالہ پناہی یہ کلوب :  
 — « یا رسول اللہ ! حجہ کیتمکہ غیر مقتدر اولان

اختیار بابام ایچون بن حج ایتسم جائز اولورمی ؟ »  
 دیہ سؤال ایدہ رک [ بلی ] جوابی آلیرکن فضل،  
 او قادینه قادینہ ده فضلہ باقش و بونی رسول اللہ  
 کوردیکندن مبارک دست سعادتلر یلہ فضلك باشنی طوتوب  
 یوزینی او بر طرفہ چور مشدی حضرت عباس رضی اللہ  
 عنہ ، فضلك باشنی نیچون دوندیرلیدیکنی سؤال ایتدی .  
 افندیمر :

— « رأیت شاباً وشابة فلم آمن عایهما الشیطان »

جوابی ویردی .

بطن محسره کاندیکی زمان ناقة سعادتك زمامنی براز  
 صالیورمہ رک سرعتجه یوروتمشدی حجرہ کبرایہ کیدن  
 اورته یولدن یورودی . شجرہ قربنده کی حجرہ یه واردی .  
 فضلك طویلایوب ویردیکی طاشلردن یدی دانسنی اکا  
 دوه اوزرنده اولدینی حالده آندی . هر بر طاشرا یچون  
 انارکن تکبیر ایتدی .

رمی جرات ، ضعی وقتی ایدی . حین رمی

تلبیه یی کسدی . بلال ایله اسامه رضی اللہ عنہما ، اوزمان

خدمت شریفه رسالت پناهیده ایدیلر ، بری ناقنک زمام  
ولجامنی طوتار دیکری لباس ایله افندی مزه کولکه ایدردی .  
رمی جبرائده خلق ازدحام ایتشلردی [یا ایها الناس !  
لا یقتل بعضکم بعضاً . واذار میتم الجمرة فارموا بمثل حصی  
الحذف] دیه اومثللوازدحامله اولان رمی جبرائده ملحوظ  
بولنان مخاطره نک اوزرینه هر کسک نظر دقتنی جلب  
ایتدی .

جره نک عقینده واوراده خطابه به باشلا یه رق . یوم  
صرفه ده او قودینی کبی دماء جاهلیه نک واموال واعراضک  
تحریمی ابلغ وجوه اوزره تکرار ایتدی . و :

— « سلطان ، سزی کتاب الله دعوت ایتدکجه  
امرینه اطاعت ایدیکز . و مناسک کزی شمدی بندن  
اوکرنیکز . بیلیم اما بلکه بوسنه دن صوکره برده حاج  
ایتمه جکم . »

دیدی صوکره مسیح الدجالک بیان احوالنه بالتصدی :  
— « انه لم یکن فی الارض منذ ذرا الله ذریة آدم . »  
« علیه السلام اعظم من فتنة الدجال وان الله لم یبعث نبیاً  
الا حذر امته الدجال وانا آخر الانبیاء و انتم آخر الامم . »  
و هو خارج فیکم لاهالة .



بیورورایکن دجالک امت میانده ظهور و خروجی  
لا محاله ایدوکنه دائر اولان بیانات سذیه اوزرینه حاضر  
بولان اصحاب کرامده بعض مرتبه خوف و خشیت علایمی  
معلوم مالی بیوریلهرق :

— غیر الدجال اخوفنی علیکم . ان ینخرج وانا فیکم فانه  
حجیجه دونکم وانا حجیج کل مسلم وان ینخرج من بعدی فکل  
حجیج نفسه والله خلیفتی علی کل مسلم . وانه ینخرج من  
خلة [ای من طریق بین الشام والعراق] فبعث ای یفسده  
یبعث السرایا والجنود یمیناً ویبعث شمالاً وان علی مقدمته  
سبعین الفاً من یهود اصهان علیهم رجل اشعر من فیهم  
فیقول بدو بدو [اسرع اسرع] یا عباد الله ! فابتوا فانی  
ساصفه لکم صفة لم یصفها ایه نبی قبلی وانه یبدأ فیقول  
انا نبی ولانبی بعدی ثم یثنی فیقول انا ربکم ولا تزون ربکم  
حتی تموتوا . وانه اعور وربکم لیس باعور . وانه  
مکتوب بین عینیه کافر یقرؤه کل مؤمن کاتب و غیر کاتب  
وفتنه کثیرة .. منها ان معه جنة و ناراً فمن ابتلی بناره  
فلیستغث بالله ولیقرأ فواتح الکھف فتکون علیه برداً  
وسلاماً کما کانت علی ابراهیم . ومنها ان تطوی الارض  
منهلاً منهلاً طی فروة الکبش . وانه یسیح الارض کلها

في اربعين يوماً وما من بلد الا وسيطؤها الامكة والمدينة،  
 وسرعته في السير كالغيث استدبرته الريح . وان له ثلاث،  
 صيحات يسمعهها اهل المشرق . واهل المغرب . ويتناول الطير،  
 من الجو ويشويه في الشمس شيئاً . وانه يخوض البحر،  
 في اليوم ثلاث خوضات لا يبلغ حقويه واحد يديه اطول،  
 من الاخرى . فيمد الطويلة في البحر فتبلغ قعره فيخرج،  
 من الحيتان ما يريد . وانه يخرج في خفة من الدين وادبار،  
 من العلم فلا يبقى احد يحاجه في اكثر الارض . ويذهل،  
 الناس عن ذكره . وانه يأتي فيقول لاعرابي ارأيت،  
 ان بعث لك امك اتشهد اني ربك فيقول نعم فيتمثل له،  
 شيطان على صورة ابيه وآخر على صورة امه فيقولان،  
 له يا بني اتبعه فانه ربك فيتبعه . وانه يمر بالخربة فيقول،  
 ليها اخرجي كنوزك فتنبه كيغاسيب النحل . وانه يأتي،  
 على النهر فيأمره ان يسيل فيسيل ثم يأمره ان يرجع فيرجع،  
 ثم يأمره ان ييبس فييبس . وانه يأمر الريح ان تثير،  
 سحباً من البحر فتطمر الارض فتفعل . وانه يقول،  
 انا رب العالمين وهذا الشمس تجري باذني افتريدون ان،  
 احبسها فيقولون نعم فيحبس الشمس حتى تجعل اليوم،  
 كالشهر والجمعة كالسنة،

ويقول اريدون ان اسيرها فيقولون نعم فيجعل اليوم  
 كالساعة . وانه يأتى قبل خروجه ثلاث سنوات شدائد  
 يصيب الناس فيها جوع شديد يأمر الله السماء ان تحبس  
 ثلث مطرها ويأمر الارض ان تحبس ثلث نباتها ثم يأمر الله  
 السماء فى السنة الثانية فتحبس ثلث مطرها ويأمر الله الارض  
 فتحبس ثلث نباتها ثم يأمر الله عز وجل السماء فى السنة  
 الثالثة فلا تمطر قطرة ويأمر الارض فلا تنبت خضراء  
 فلا تبقى ذات ظاف الاهلك الا بما شاء الله

دير ايكن اصحاب كرامك خوف وحيرته :

— « يا رسول الله ! فما يعيش الناس اذا كان ذلك »

فيه سؤال اتملرینه جواباً [التسبيح والتكبير يجرى ذلك  
 منهم مجرى الطعام ] بيوردي . ودوام ايتدى :

— « وانه يسلط على نفس واحدة فينشرها حتى يلقبها »

شقين فيمر الدجال بينهما ثم يقول انظروا هذا فاني ابعثه  
 الان ثم يزعم ان له رباً . غيرى ثم يبعثه الله فيقول له الخبيث  
 من ربك ؟ فيقول : ربى ، الله وانت عدو الله الدجال . والله  
 ما كنت قط اشد بصيرة فيك منى الآن ، فيريد ان يقتله  
 ثانياً فلا يسلط عليه وهو الخضر عليه السلام ويكون معه  
 اليسع عليه السلام ينذر الناس يقول : هذا المسيح الكذاب .

فاحذروا لعنة الله . ويعطيه الله . من السرعة ما لا يلاحقه الدجال .  
 ان بين يديه رجلين ينذران اهل القرى . كلما دخلا قرية .  
 انذرا اهلها فاذا خرجا منها دخلها اول اصحاب الدجال .  
 ويدخل القرى كلها غير مكة والمدينة . فيمر بمكة فاذا هو  
 بخلق عظيم فيقول : من انت ؟ فيقول : انا ميكائيل بمعنى  
 الله لا منعك من حرمه ويمر بالمدينة فاذا هو بخلق عظيم  
 فيقول : من انت ؟ فيقول : انا جبريل بمعنى الله لا منعك  
 من حرم رسوله ويصيح فيخرج اليه من مكة منافقوها  
 وترجف المدينة ثلاث رجفات فلا يبقى منافق ولا منافقة  
 الا خرج اليه . فتنتفي المدينة يومئذ خبثها كما ينفي الكبير  
 خبث الحديد . ويدعى ذلك اليوم يوم الخلاص . ويكون آخر  
 من يخرج اليه النساء حتى ان الرجل ليرجع الى امه وبنته  
 واخته وعمته فيوثقها رباطاً مخافة ان تخرج اليه .

بوکا اوچ کره [ يوم الخلاص ] ديه علاوه ايلدى .

صوکره :

— وما يوم الخلاص ؟ يحى الدجال فيصعد احداه

فيطلع فينظر الى المدينة ويقول لاصحابه : الانزونا الى  
 هذا القصر الابيض هذا مسجد احمد .

ديدى . ودوام ابتدى :

— جناب حق زمین و آسمانی خلق ایله یکی کون  
 زمان نه هیئتده ایدیسه شمعی بنه او هیئته رجوع ایتمشدر.  
 سنه اون ایکی آی بونک درت آبی اشهر حرمدر . اشهر  
 حرمک اوچی متوالیاتدرکه ذوالقعدة و ذوالحجة حرمدر.  
 منفرد آی ذخی رجب مضر درکه جمادی الآخره ایله شعبان  
 آره سننده در [\*] سز قریباً ربکزه ملاقی و اعمالکزدن  
 مسئول اوله جقسکیز . ایمدی کر کدرکه بندن صدو کره  
 یکدیگریکیزک بویوتتی اورمغه صایمه سکیز . و بندن ایشند-  
 یککیزی حاضر اولانلر ، غائب اولانلره نقل و تبلیغ  
 ایتسون بلکه سوزلریمی بندن ایشیدوبده آخره تبلیغ  
 ایدنلرک بعضی ، کندوسنه تبلیغ اولنان کیمسه لردن دها  
 کوشک و عاجزدر [الاهل باغت ؟] ، دیدی . اصحاب  
 کرام [نعم] جواب تصدیقی ویرملریله اوچ کره [اللهم  
 اشهد] بیوردی . و خطبه دن صدو کره محل نحره یعنی  
 قربان محله کلدی . مدینه طاهره دن برلکده کتیردیکی  
 هدی ایله حضرت علینک یمندن کتیردیکنک مجموعی یوز

---

[\*] السنة اثنا عشر شهراً منها اربعة حرم ثلاثة متوالیات  
 ذوالقعدة و ذوالحجة و المحرم و رجب مضر الذی بین جمادی و شعبان  
 الحديث

دوه اولمشدى . يوز دوونك التمش اوج رأسى رسالتپناه  
افديمز ، كنىدى مبارك اللريله بوغازلدى كه سنين عمر  
هياونلرينك عددينه موافق ايدى . متباقى اوتوز يديسى  
حضرت على كرم الله وجهه به سپارش ايدى رك او بوغازلدى .  
وآل وزوجات طاهراتى ايجون يالكىز برصيغير ياخود بر  
دوه قربان ايتدى . صوكره منايه كلدى .

سرتراش « معمر بن عبد الله بن فضله بن عوف »  
حاضر ايدى . رأس سعادتلرينك صاغ جانبدن تراش  
ايتمى اللريله اكا [ خذ ] ديه اشارت بيوردى . جانب  
مذكوردن تراش ايتديردىكى موى مطهرى اوراده قريب  
اولان اصحاب و اشخاصه و جانب يسارندن تراش ايتديريكنى ده .  
« ابوطلحه » و ياخود « ام سليم » رضى الله عنهما به و ديكر  
روايته كوره زوجات طاهراتنه ويردى .

خالد بن الوليد استدعاسنه مبنى ناصيه رسالتپناهي به  
مصادف اولان موى مطهردن احسان بيورلمشدى .  
اوده موى سعادتى سرپوشنك جهه و ناصيه جهته تبركا  
تعييه ايتمكله اندن صوكره جميع غزواتنده هر جمله ده .  
منصور و مظفر اوله كلشدر .

يعض اصحاب كرام امتثالا تمام تراش اولديلر .

بعضی ده اکتفا طریقہ صاچلرینک اوچندن برر مقدارینی  
کسیدردیلر . اولویتک باطبع اولکننده ایدوکی اظہر  
اولغله جناب پیغمبر : [ اللهم اغفر للمحلقین ] دیہ دعا  
بیوردی . نقصیر ایدنلر کیری قالمش دیمک ایدی . بناءً علیہ  
اصحاب کرام :

— « یا رسول الله ! وللمقصرین »

دیمشکر . رسول اکرم ینہ اولکی کبی یالکیز محلقینہ  
دعا ایتیش اصحاب ده رجالرینی تکرار ایدہ رک منوال مذکور  
اوزره کیفیت اوچ نوبت تکرر ایلہ شدی .

قربانلرینک هر برندن برر مقدرات کسیدروب بر  
قابده بشیرتدیردی انی علی ایله برابر تناول بیوردی .  
و علی به امر ایدوب قربانلرینک اتلرینی ، دریلرینی و  
سائر شیلرینی تقسیم ایتدیردی قصابہ انلردن ویرمدی .  
اجرتی آیری ویردی .

شو اراده ایدی عرفانک بطن عرنه دن و مزدلفه نک  
بطن محسردن ماعدا هریری موقف ایدوکی و منانک  
هریری ایله مکه زوقاقلرینک منحر اولدیغنی اعلان  
ایتدیردی .

آندن صوکره حضرت عائشه رضی الله عنها . مسکی

حاوی بر طیبله تطیب ایدوب رسول الله صلی الله علیه و سلم احرامدن چیقدی و سوار اوله رق وقت ظهر دن مقدم مکه مکرمه یه کیردی. و سوار اولدینی حالد طواف افاضه یی ادا ایلدی چاه زمزمه کلدی. بنی عبدالمطلب بئر زمزم دن صو چکوب حجاجه ساقیلک ایده یورلردی. [انزعوا بنی عبدالمطلب لولا ان یغلبکم الناس سقاتیکم لنزعت معکم] = ای عبدالمطلب زاده لر! چکیکز اگر خلقتک اوزر لریکزه از دجایی خونی اولمسییدی بنده سزکله برلکده چکردم [بیوردی. بر قوفه ایله زمزم دن صوت قدیم اوله رق ابن عباس روایتنه کوره آباق اوزرنده و عکرمه روایتنه نظراً ناقه سعادت اوزرنده اولدینی حالد ایچدی.

اوکون بعض ناس، مشکلیرنی سؤال ایلدیلر. تراشک ذبح هدی اوزرینه ذبحک رمی جرات، طواف افاضه نکه ده رمی اوزرینه تقدیمی جائز اولوب اولمدیغنی صور دیلر. هپسینه «لا حرج» جوابی و بردی. حضرت عائشه رضی الله عنهانک حیض دن تطهرله بیت کعبه یی طواف ایلدیکی بوکون ایدی.

بعده منایه عودت ایلدی. او کونکی صلوٰة ظهرک



نموده قیلندینی اختلافلیدر طائشه وجابر رضی الله عنهما  
مکده، ابن عمر کبی بعض اصحاب ده بعد الرجوع مناده قیلنش  
اولدینغی روایت ایتشلردر .

ایام اضحیه نك برنجی کونی اولان اشبو جمعه ایرتسی  
کوننك بقیه سنده و بازار کیجه سنده و کوندوزنده بازار  
ایرتسی کونیه صالی کیجه سی و کوننده که بو اوچ کونلره  
ایام التشریق دینیلیر مناده قالدی . ایام مذکورده هر  
کون زوالدن صوکره جهره آتدی و هر دفعه ده یدیشیر  
طاش آتدی هر طاشده بر کره تکیر ایتدی .

ابتدا مسجد خیفك یاننده اولان جهره بی آتار  
ایدی که بوکا جهره اولی دیرلر . دعا ایچون جهره اولیده  
توقف ایتدی . صوکره جهره وسطایی ده بو اسلوب اوزره  
آتدی انده ده دعا ایچون بر مدت توقف ایتدی . جهره  
ثالثه اولان جهره العقبه نك رمی ائنده توقف ایتدی .

ایام عیدك ایکنجیسی و ایام منانك اولکیسی بولنان  
[یوم القر ویوم الرؤس] که بازار کونی ایدی خلقه مناده  
اوکون بر خطبه او قودی . و اوچنجی کونی بولنان [یوم  
الاکارع] ده کذلک مناده بر خطبه ده او قودی . بو خطبه ده  
ذوی الارحامه برو احسان خصوصی امر و توصیه ایتشدی .

\*\*\*

اشبو حج شریف وداعده رسول الله صلى الله عليه وسلم  
 بش دفعه خطبه او قومشدر. برنجی خطبه، ذی الحجه نك  
 یدنجی کونی مکده ایکنجی خطبه، طقوزنجی کونی  
 اولان یوم عرفده اوچنجیسی، یوم النحرده مناده  
 دردنجیسی، یوم ثانی ایام منا اولان یوم القرده کذلک  
 مناده، بشنجیسی یوم رابع ایام عید بولنان یوم الفرده  
 مناده ایدی. صالی کون که عیدک دردنجی کونی اوله رق  
 [یوم النفر] دینیایرانده و محصب = ابطح، نام موقعه کیتدی.  
 تشریف عالیدن برکون اول اسامه رضی الله عنه: [یارین  
 محصبده بنی کنانه خیفنک قربنده نزول ایتسم کرکدر]  
 دیمشدی. فقط بوندن خبردار اولمقسزین آزادلیسی  
 ابورافع، خیمه سمادتی محصبده خیف مذ کورده  
 قورمشدی.

چهارشنبه کیجه سی محصبده قلدی. و کعبه معظمه یی  
 بردها طواف ایتدکجه خلق مکدن طاغلاملری لزومنی  
 اعلان ایتدیردی ایجه نك بر مقدارنده او بودی سحر و  
 شفق قارشى قالقدی مکة مشرفیه کلوب کیجه لین طواف  
 وداعی ایفا ایلدی و مکة نك اشاعی جهتهنده [کدی]  
 دیدکری یولدن چیقدی. . ارتق مدینه طیه لرینه توجه

بیوردی مکة مکر مه دن محل خروج لری، دخول ایلدکاری  
یولک غیری ایدی یوکسک بریولدن کیرمش الحق بریردن  
چیقمش ایدی .

مکده مدت مکث واقامت لری اون کوندر اول مدت  
نماز لری قصرایله قیلدی وقصرایله قیلدیغی نمازک عقیبنده  
[ اتموا صلو تکم یا اهل مکة فانا قوم سفر ] بیورور ایدی  
یولده «غدير خم» نام بر منزلده اويله نمازی قیلدقدن صکره  
اصحاب کرامته دونه رک :

— « بن ، » مؤمنلره کندی نفسلرندن دها زیاده  
اولی دکلیم . بنی عالم بقایه دعوت ایتدیلر . بنده  
اجابت ایتدم . . بيلمش اولیکز ارا کزده ایکی شیئی  
عظیم براقدم که بری برندن عظیمدر . بریسی قرآن ،  
دیگری اهل بیتدر . ایمدی بندن صوکره اوایکی امرده  
نه درلو سلوک ایتسه کز و انلرک حقوقنه نه کونه رعایت  
ایلسه کز کرکدر . اوایکی امر عظیم کنار حوض کونزده  
یکا ملاقی اولنجیه قدر یکدیگرندن جدا اولزلر . تحقیقا  
حق تعالی ، بنم مولامدر . و بن جمع مؤمنینک  
مولاسیم . »

دیدى و علینک الی طوتوب سوزینه دوام  
ایلدی :

— من كنت مولاه فعلي مولاه . اللهم وال من  
والاه . وعاد من عاداه و اخذل من اخذله وانصر من  
من نصره وادرا الحق معه حيث كان ،

بیوردی . عامة اهل ايمانه قارشى رؤوس اشهادده بر  
حق عظيم تولى بخش ايتكم صورتيله على كرم الله وجهه بك  
قدر جليل بلندى بر قاندها بالا تر ايلدى .

ذوالحليفه مواصلى كوندوزك كچ بروقتنه مصادف  
اولغله مدينه سعادته كيجه كيرمامك عز ميله انده قالدى .  
ايرته سى صباح معرس طريقه كيدرك مدينه پاك  
رسالتنا هارينه داخل اولدى .

يولده سواد مدينه ي كوردىكى زمان اوج كره تكبير  
ايدرك [لا اله الا الله وحده لا شريك له . له الملك وله الحمد  
وهو على كل شئ قدير . آئبون تائبون عابدون ساجدون  
لربنا حامدون . صدق الله وحده وانصر عبده وهزم الاحزاب  
وحده ] ديدى :

Medin  
görü  
Okun  
du

— بعث جرير —

جرير بن عبدالله البجلي حضر تلرى ، امراء يمندن

ذوالکلاعہ کوندردی . ذوالکلاعک اسمی اسمیفع [۰]  
ایدی . وکنندوسی تبابعة حمیریہ دن باکوراء بن حبیب  
اوغلی ایدی . زوجہ سی « صریحہ بنت ابرہۃ الصباح »  
ایلہ قبول اسلام ایتشلردر .

جریر ، یمندہ ذوالکلاع ایلہ ینہ امرادن ذو عمر  
نماندہ دیگر برینہ ملاقی اولہرق انلرہ رسالتیناہ افندیمرہ  
عائد بعض امور دن بحث ایتدی . ذو عمر ، اوچ کون اول  
رحلت نبویہ نک وقوع بولدیغنی سویلیوب ذوالکلاع  
ایلہ برلیکدہ جریرہ رفیق اولدیلر . مدینہ طیبہ یہ طوغری  
یمندن یولہ چیقیدیلر . یولہ تصادف ایلدکلری برجماعت  
سواریدن لدی السئوال الدقلری : [ قبض رسول اللہ  
صلی اللہ علیہ وسلم واستخلف ابوبکر رضی اللہ عنہ والناس  
صالحون ] جوابیلہ مسموعات مذکورہ نک صحتی تبین  
وتأید ایتمکلہ ذوالکلاع وذو عمر :

— « اخبر صاحبک انا قد جئنا . واما اسنعود ان شاء اللہ »  
دیہ رک اورادن کیری یمنہ دوندیلر کیتدیلر .

حضرت عمر رضی اللہ عنہک زمان خلافتلرنده بونلر ،  
مدینہ طاہرہ یہ کلشلردی . ذوالکلاعک معیتندہ روايتہ

[۰] الک اکسری ، یم وفانک فتحه لری وسین ویانک سکونلریلہ

کوره اونسکزیبک کولهسی موجود ایدی . درت بیکنی  
در حال آزاد ایلدی . شوقدر وارکه اونسکزیبک افراد  
معیتله مدینهیه کلمسی وصیغمسی عقل وعادت نقطه لرندن  
براز شایان بحث ونظر در .

حضرت عمر :

— « یا ذالکلاع ! کیری قالان کوله لک ثلث اثمانی  
نقداً بوراده ، ثلثی شامده ، ثلث دیگر ی ده یمنده تسویه  
ایدلک اوزره انلری ده آزاد ایت »

دید ی . ذوالکلاع ، اوبابده ملاحظه ایچون مهلت  
ایستیوب منزله کلدکن صوکره کوله لک هپسنی بلابدل  
آزاد ایتمش وایرتهسی کون حضرت عمر ، اکادائر سوال  
ایدرکن ذوالکلاع :

— « جناب حق بکا وانلره خیرلی اولانی اختیار  
ایتدی هپسنی آزاد ایتدم »

دیه جواب ویرمشدر . ذوالکلاع :

— « یا امیر المؤمنین ! بنم بیوک برکناهم وارکه جناب  
حقک انی عفو ومغفرت ایده جکنی امید ایده میورم :  
برکون یوکسک بر محله کیمسه نک کوره میه جکی صورتله  
اوطوریور ایدم بولندیغم کوشکک اوکنده میدانده بنی

رب معبود اتخاذ واعتقاد ایتش اولانلردن یوزبیک قدر  
غلبه‌لک طوبیلا نوب بنی کورمه‌که منتظر ایدیلر . ناکام  
کندی می انلره کوستردم هپسی بر آنده یره قاپانه رق سجده  
ایتدیلر .

دید که حضرت عمر :

— « اخلاص ایله توبه و اقلع ایله انا به دن غفار الذنوبک  
رحمت و غفرانی مر جودر »

دیه جواب و یردی .

ذو عمر ، اوزمان مدینه سعادته کوردیکی محاسن  
اخلاق و اداره یه نظر حیرتله باقه رق اصحاب کرامک هر  
خصوصده تقدیر و تحسین افکار و افعالی صدنده :

— « یا جریرا انک علی کرامة وانی مخبرک خبراً  
انکم معشر العرب لن تزالوا بخیر ما کنتم اذا هلك امیر  
تاصرتم فی آخر فاذا کانت بالسیف کانوا ملوکاً یغضبون  
غضب الملوک و یرضون رضا الملوک »

دیمشدی .

علوان بن داود حکایت ایدر که قبیله سی طرفندن  
بر طاقم هدایا ایله ذوالکلاعک تزدینه بعث و اسرا اولنان  
بر آدم ، بر سنه کامله قصرینک حولنده طولاشدینی حلاله .

ملاقات ایدہ میوب یوزیک کشینک وجہ مسرود اوزرہ  
 سجدہ ایتدکریخی دہ مشاہدہ ایتمش واسلامندن صوکرہ  
 او احتشامی ترک ایله بازاردن آدینی برات پارچہ سنی  
 عوامدن بر فردکی آنک ترکیسنہ آصوب کندی خانہ سنہ  
 کیدرکن اسان تأثرله :

اف للدتیا اذا کانت کذا

انا منها کل یوم فی اذا

ولقد کنت اذا قبل من

اتم الناس معاشاً قبل ذا

ثم بدلت بعیشی شقوة

حبذا هذا شقاء حبذا

سویلدیکنی کورہ رک حکایہ ایمشدر .

..

۲۲

## قدوم فیروز دیلمی

فیروز دیلمی ، یمن والیسی باذانک زوجه سنی  
 مرزبانہ نک عمزاده سیدر . بوکرہ قبول اسلام و زیارت  
 حضرت سید الانام قصدیلہ یمندن مدینہ پاک رسالتہ کلہ رک



مسلمان اولدی . اخیراً اقامه دعوی الکذب نبوتله  
 یمنده مصدق ظهور ایدن اسود عنسی بی بو ذات قتل  
 ایلمشدر .

• •

۶۳

### طلوع جبریل

شو اراق مدینه طاهرده البسه سی بیاض ،  
 صاحبی سیاه ، رایحه سی لطیف ، یوزی دلبر نورانی  
 بر ذات مجلس عالی رسالت پناهیده کور و نمشدر . او وفته قدر  
 مدینهده بویله بر ذات کور و لمدیکی و اوزرنده سفر  
 علامتی ده بولمادینی جهته کیم اولدیغنی اصحاب کرام  
 بیله مدیلر ،

رسول الله صلی الله تعالی علیه وسلم افندیمره یقین  
 واروب : [ السلام عليك یا رسول الله ] دیدی . افندیمر  
 [ و عليك السلام ] کلامیله مقابله ایتدی . صوکره او  
 ذات ، دیزلرینی حضرت رسالت پناهک دیزلرینه اسناد  
 و اللریخیده فخذین نبوییه وضع ایلدکن صوکره  
 ایماندن ، اسلامدن ، احساندن ، قیامتدن سؤال ایتدی .

حضرت نبی اکرم سؤال قیامتک ماعداسنه جواب  
 ویروب : [مسؤول ، سائلدن اعلم دکلدر ] بیوردی .  
 او ذاتده مجلس عالیبدن چیقدی . همان عقینده طلب  
 و تحری امر عالیسی شرفصدور ایدهرک ارادیلر .  
 هنوز مدینهده و بلکه حوالی مسجد شریفده غائب  
 اوله بیله جک قدر بر زمان کچمدیکی حالد . بوله مدیلر .  
 ایشته او زمان افندیمز : [ جبریل ایدی . سزه دینکزی  
 تعلیم ایچون کلدی ] دیه حقیقت حالی بیلدیردی .

## فصل رابع عشر

اوره برنجی منه لهجریه وقایعی

وفود نخع . ظهور متنبئين كذايين . سرية اسامه واستغفار  
و مرض النبي . انتقال و ارتحال نبوی .

۱

## وفود نخع

يَمْنَدَن ايكی يوز كشي ايديلر . معاذ بن جبل  
رضي الله عنه اسلام اوزرينه بيعت ايتمشلردى . حضرت  
رسالتپناه صلى الله عليه وسلم افنديمزه كلان و افدلك اك  
صوكره سى بونلر ايدى . مقر بالاسلام اولدقلىرى حالده  
عخرمده كلهرك دارالضيافهده مسافر ايدلديلر . رئيسلرى  
« زرارہ بن عمرو ، ايدى . كوردىكى غريب رؤبايى  
رسالتپناه افنديمزه عرض و حكايه ايدرك تعبير ايتدير -  
مشدر ، ديدى كه :

— « كريدہ براقديغ ديشى حمارم ، سياهه مائل  
قيزيل بر اوغلاق طوغوردیغنی رؤیاده کوردم »

افندیمز ، صوردی :

— « مملکتده که بر قاری براقدمی؟ »

زراره : [ اوت ] دیدی .

افندیمز :

— « او قاری بر چوجق طوغورمشدرکه سنک

اوغلکدر »

دیه بیوردیلر . زراره سؤال ایتدی :

— « اورنکلر نه ایدی »

حضرت پیغمبر ، بو آنده زراره یی : [ یا زراره

یقین کل ] دیه نزد هایونلرینه چاغیردی زراره یقین

کلوب اوطوردی . اکا افندیمز ، یاواشجه صوردی :

— « یا زراره ! سنده هیچ برص علتی وارمیدرکه

سن انی کیزلردک ؟ »

زراره جواب ویردی :

— « فوالذی بعثک بالحق ما علم به احد ولا اطلع

عليه غيرك »

رسول الله صلى الله عليه وسلم :

— « هو ذاك »

بيوردقن صوكره زرارہ :

— « يا رسول الله ! ورأيت النعمان بن المنذر

و عليه قرطان و دملجان و مسكتان »

ديه سؤال ايتمكله رسول الله :

— « ذلك ملك العرب رجع الى احسن زيه

و بهيجته »

حواخي ويردى . زرارہ دوام ايده رك :

— « يا رسول الله ! ورأيت عجوزاً شمطاء

خرجت من الارض »

ديركن نبى معظم :

— « تلك بقية الدنيا »

ديه بيورملريله زرارہ سؤال ايتدى :

— « ورأيت ناراً خرجت من الارض فحالت بينى

وبين ابن لى يقال له عمرو . وهى تقول : لظى لظى بصير

واعمى . اطعمونى آكلكم واهلكم وملككم »

و :

— « تلك فتنة تكون »

جواب عاليسنى المسيله فتنه ي سؤال ايتدى :

— « يا رسول الله ! وما الفتنة ؟ »

حضرت رسول اکرم :

— « يفتك الناس بامامهم ويشجعرون اشتجار اطباق

الرأس يحسب المسمى فيها انه محسن و يكون دم المؤمن  
عند المؤمن احلى من شرب الماء البارد . و ان مات ابنك  
ادرکتک الفتنة و ان مت انت ادرکها ابنک »

ديه بيوردي . اوزمان زرارہ :

— « يا رسول الله ! ادع الله ان لا ادرکها »

ديه واقع اولان نيازى نزد سامى رسالتپناهيجہ

مسموع بيوريله رق حقنده :

— « اللهم لاتدرکها اياه »

ديه دعا بيورلمشدر .

اشبودعاء رسالتپناهينک فيض وبر کتيله زرارہ ، بالاخرہ

فوت اولوب مرقد سرمديسنده فتته و آسايب دهردن

آسوده و آزاده قالمش اوغلى عمرو ، حضرت عثمان

ذى النورين رضى الله عنہ شہيد ايدن زمرة کنگاران

امت مياننده بولنمشدر .



## ظهور متذنبین کذابین

دعوی نبوت ایدن مسیلمه ، طلیحه ، اسود عذی ،  
 سجاح کبی یا الانجیلر ، همان بر آنده کبی ظهور ایتشلردر .  
 مسیلمه و سجاح — مسیلمه ، بر زمان اول یمامه دن بنی حنیف  
 مبعوثلریله بر لکده مدینه پاک سعادته کله رک تولی امر حقنده  
 سده سنیة رسالتیناهی به بعض تکلیف آنده بولمغه جرئت  
 ایلدیکنه قارشی مساعدده دکل شدتله رد بیورلمش اولمسندن  
 ناشی مغیر واستبداده واستیلای بلادده صوک درجه مستعد  
 و منتهی اولدینی حالدده عودت ایتشدی .

اسود ایله مسیلمه نك ظهور و دعوالرینی حضرت  
 سید الانام علیه الصلوة والسلام عالم منامده دست هایونلرنده  
 کوروب اوزرینه اوفورمکله برابر غائب اولدیغنی کوردیکی  
 التوندن ایکی بیله زیکله ا کلامشاردی ! و حتی مسیلمه بی  
 مدینه طیبه ده کوردیکی انشاده افندیمز ، اودقیقه بی در خاطر  
 ایدم رک ا کا : [ انک اری الذی اریت فیه مارأیت ]  
 بیورمشاردی .

سجاح ، بنی تغلب بطوننك بنی غطفان قبيله سندن  
 برقاری ایدی ا . مسيلمه نك دعواسنی ايش-يده رك تنبی  
 املنه دوشدی . و كندوسنه وحی كلدیكنی قومنه سويلمكله  
 برابر مؤذن ، حاجب ، منبر اتخاذ ایلدی قومی دخی  
 اویدیفندن سجاح ، انلری باشنه طویلايه رق ابتداء مسيلمه نك  
 علیهنه اعلان حرب ایتدی . مسيلمه ايله تقابل و تلاق  
 ایلدیكنده نبوتك هانكيسنده ایدوكنی تعیین ایچون بری  
 برنی امتحانه باشلا دیلر . مع مافیه بوا امتحان ، طرقة  
 العین کبی بر زمان قلیل ایچنده مبدل صاح و مسالمت  
 اوله رق هرايكیسی ده نبوت یكدیكری تصدیق ايله ازدواجه  
 قرار ویردیلر .

مسيلمه ، سجاحك مهر و کاینی اولمق اوزره امتلرندن  
 صباح وعشاء نمازلرینی رفع واسقاط ایتشدی . مسيلمه ،  
 امر نبوته رسول جلیل علیه اکمل النجیة و النبجیل  
 افندیلمزه شريك ایدوكنی و كندوسنه وحی کتیرن  
 شخصك ده [ رحمان ] اسمنده اولدیغنی سويلمكده  
 اولمسی سبیلريله تبعه سی یئتنده « رحمان یمامه » ديه  
 جلیلی اولمشدی . حالبوکه شیطان بی ایمان یمامه ، فتنان  
 سبکمز ان یمامه ایدی .



مسيلمه ، ممجزه اولق اوزره بعض خوارق اراشمه  
 يلتئمکده ایدی.. حتی بو اوغورده یورطه بی اغزی  
 طار شیشه اداخل ومقطوع قوش قنادی ربط وایصال  
 اصوانی ایلک کشف ایدن مسيلمه دیرلر. فقط کوسترمک  
 ایستدیکی بخوارقک همان اکثری ، ادعاسنک خلاقی  
 ظهور ایدرک کندیسنی قطعاً تنکیل وتکنیب ایتشدرا.  
 بر کون بر قاری مسيلمه به کلوب :

— « دعا ایتده صولریمزده خورمالریمزده برکت  
 حاصل اولسون محمد [ علیه الصلوة و السلام ] قومنه  
 دعا ایدیورده صولری زیاده اولیور ،

دیدى . مسيلمه صوردى : [ اما اوناصل یایور؟ ]  
 قاری :

— « بر قوفه صو ایستور . مضضه دن صوکره  
 اغزنده کی صویی قوفیه وقوفده کی صویی قویویه بوشالدرکن  
 صو طاشیور »

دیه تعریف ابتدی . مسيلمه ، بونی دیکلیهرک بر  
 قوفه صو اصهارلدى . وتعریف وجهله یایوب قوفده کی  
 صودن هانکی قویویه دوکدیه صویی غاروغائب اولمشدر  
 خیبرده چشم علی المرتضایک دهان شریف رسالت

بارندن سورولمسیله شقایاب اولدیغنی مسیلمه ایشتدیکنندن  
بوکا معادل بر معجزه ده کندیسی کوسترمک ایچون  
برشخص بصیرک کوزینه توکوردی . شخص مرقومک  
کوزی کور اولدی ! .

تکثیرالبن معجزه سنی کوسترمک عنریله سودلی بر  
قویونک ممسنه الی - سورمکه یچاره حیوانک سودی  
چکدکن فضله ممسی قورودی ! .

بنی حنیف قبیله سی ، برقویو قازوب طاتلی سو  
چیقمشدی . مسیلمه ، اوقویوی تقدیس ایتمک مقصدیله  
کیدوب ایچنه توکوردیکنندن قویونک صوی زهرکی آجی  
اولمش و بردها طاتلیشامشدر ،

حبیب خدانک اولاد اصحابه خیر و برکتله دعا  
ایتدیکنی ایشتدیکنده مسیلمه : [ بنده قومک چوجقلرینی  
مبارکلیه حکم ] دیه الی هانکی چوجغک اغزینه  
طوقاندردیسه لال و ابکم ، کوزینه تماس ایتدردیسه  
کور ، انه تماس ایتدیسه چولاق ، باشنه مسح ایتدیسه  
کل اولمشدر ! .

مسیلمه ، برنوبت یزباغچه ده آبدست آلمشدی .  
صوبنی باغچه یه صاچدیله . باغچه ده بردها اوت یتمدی ! .

قومندن بر حریف ، ایکی چوجغیچون مسیلمه یه  
خیر وبرکتله دعا ایتمیرمشدی منزله عودت ایتمدیکنده  
ایکی چوجغندن بریخی قورتیمش بریخی ده قویویه دوشوب  
غریقاً هلاک اولمش بولدی ! .

..

مسیلمه ، کندوسنه وحی کلدیکی و آیت نزولی ادعاسنده  
ایدی بناءً علیه قرآن عظیم الشانک بعض آیات وسور  
کریمه سنه نظیره طریقيله تنزیل الهی اولق اوزره بعض  
اقوال مسجحه ترتیب وتفهندن خالی اولمامشدر .  
سورة الکوتر ایله سورة البجمه ، سورة الزاریاته شبیه  
تفهواتیدر :

[انا اعطیناک الجواهر . فعل لربک فهاجران مبنضک رجل فاجر]

[والنجم اذا سمی والبحر اذا طمى مازاغ منذرکم وما طغى]

[وما کذب وما غوى فیما نطق وما روى]

[والزارعات زرعاً والحاصدات حصداً والزاریات]

[قمحاً والطابخات طبخاً والحفرات حفراً والحارزات]

[خبزاً فالتارادات ترداً فاللاقات لقماً وآلات کلات اکلاً]

[اهالةً وسمناً لقد فضلتم علی اهل الوبر ماسبقکم اهل المدر]

شو سوزلر دخی انک اولدینی مرویدر :

[ افلح من هيم في صلاته و اطعم المسكين من  
مخلاته . و اخرج الواجب من زكاته ]

[ لقد انعم الله على الحلبى اخرج منها نسمة تسمى  
من بين صفاق وحشا ]

[ الم تركيف فعل ربك بالحلبى اخرج منها نسمة  
تسمى من بين شر اسيف وحشا ]

[ الفيل ما الفيل وما ادريك ما الفيل له ذنب وثيل  
و خرطوم طويل . ان ذلك من خاق ربنا اقليل ]

[ يا ضفدع نقى كم تنقين . النقيق صوت ضفدع .  
فاذا رجع صوته قيل نقنق . اعلاك فى الماء و اسفلك  
فى الطين . لا الماء تكدرين ولا الشارب تمنعين ]

[ يا ضفدع بذت ضفدعين .. لحسن ما تنقنين  
لا الشارب تمنعين ولا الماء تكدرين امكثى فى الارض حتى  
تأتبك الحفاش بالحبر اليقين . لنا نصف الارض ولقريش  
نصفها و لكن قريش قوم لا يعدلون ]



مسيلمه غالا سى، مرض موت رسالتيناى انسانه  
تصادف فرصتياه خيايجه .-ومش و رفع و ازاله سى

ابو بکر الصدیق رضی الله عنه - حضرت تیرینک ایام خلافتہ  
قلمشدی .

صدیق اعظم ؛ خالد بن الولید - منتظم بر اردو  
ایله اکا . مأمور ایدرک بر خیلی شدتلی مصادمه لردن  
صوکره سیف مسلول الهی ، ثابت بن قیس بن شماس ؛  
زید بن الخطاب ، براء بن مالک رضوان الله علیهم اجمعین  
حضراتنک همم شجیعانه لرینله کفاری هزیمته دوشوروب  
مسیلمه ، مهزوما « حدیقه » یه صوقوله رق حدیقه نک  
محافظه سنه محکم بن طفیل قومانداسیله بر بلوک عسکری  
مأمور ایتمشدی . عسکر اسلام ، حدیقه یی احاطه و صوک  
درجه تضیق ایلدیکندن شوراده ده بر خیلی ذوات شهید  
اولمش و عبدالرحمن بن ابی بکر الصدیق رضی الله عنهما  
دخی محکم ~~تلاچ~~ ایله اولدیرمش و مسیلمه اندن صوکره  
حدیقه ده قالمیه جغنی اکلایه رق فراره چاره تصورنده  
ایکن مسلمانلر حدیقه یه کیرمشلردر .

وحشی ، او زمان همان آندیفی حربیه ایله ملعونی  
اولدیردی [۱] انصاردن بز ذات ده رأس منحوسنی  
بدنندن جد ایلدی .

[۱] وحشی ، قاتل حمزه ایدی . اشبو موفیقندن صوکره :

مسيلمه بك تبعه سندن شو وقعه بی برقاری کوره رك:  
[وا امير المؤمنين قد قتلته العبد الاسود] ديه قرياد  
ایتمشدی .

زوجه سی سجاح بنت حارث ، بنی تغاب طرفه  
قاچدی . بنی تغلبدن هذیل بن عمران وعقبه بن هلال ،  
نمرده وسلیل بن قیس وزیاد بن قیس وزیاده بن بلال ده  
الجزیره ده معیتلریله طویلانوب سـجـاحـه تابع اولدیلر .  
هذیل ، نصرانی اولدینی حالده ترك نصرانیتله سـجـاحـه  
النحاق ایتمشدی .

سجاح ، شو عسکرله اسلام علیهنده مدینه منوره یه  
طوغری حرکت ایتمش ايسه ده جرفه تقریبی اثناده عسکرنده  
یوز کوسترن بعض احوالک ویردیکی امیدسنزلك سبيله  
عودت عزمنده بولندینی حالده تصادف ایلدیکی عسکر  
اسلامه مغلوب ده اولدیغندن الجزیره ده بنی تغلب ایچنه  
فرار و انده خیلی زمان اختفادن صوکره - حضرت  
معاویه نك زماننده - مسلمان وحسن الاسلام اولمشدر .

\*\*\*

[حال کفرمده ناسک خیرلیسنی وبعدالاسلام اکا مقابل ناسک شر  
لیسنی اولدیردم] دیر ایدی .

اسود غنى — يمنية عنس لقييله ماغب اولان  
 زيد بن مالكة منسوب قبيله دن « عهله بن كعب » نامنده  
 بر شخص ايدى . اولجه مدينه سعاده كلوب مسلمان  
 اولمش بولندينى حالد عودتنده ارتداد ايله برابر نبوت  
 ادعا ايتمشر .

دائما اورتولى كزمكله معتاد اولسنه مبنى « ذوالحمار ،  
 و كندوسنه كويا وحى كتيرن شخصك راكب الحمار اوله رق  
 ظهورينى ادعا ايتمكده بولمسنه مبنى ده « ذوالحمار » ايله  
 تلقيب ايدلمشدى

سبب اول ضلالتى بر حماردر ! . نقل اولنوركه بر  
 كون قارشوسندن بر حمار كچركن يوزى بوكا طوغرى  
 اولدينى حالد يوزى قويون يره دوشوب اسود : [شاشا]  
 ديه اكا سسلنجه يه قدر قالقمامش ! . حمارك او وضعيته  
 دوشمسنى ذوالحمار ، كنديسى ايچون سجدة التقديس  
 بيله رك و بوندن طولايى كندينى برشى ظن وتوهم ده  
 ايدرك بنده پيغمبرم ديه ميدانه چيقويومشدر ،

اسودك احوال عالمدين خبر كتيره جك « سحيق ،  
 شقيق » اسمنده ايكي شيطاني بولندينى منقولدر ! .

ابتداء خروجى ، يمن واليسى بادانك فوتى انصاده

ایدی . بادانک ملک و حکومتک اقسامه انقسامه منی اسود  
عنسی ، امید موفقیت و تمام قوت قلبه حوالی منی  
استیلايه باشـ لایه رق صنعاده بادانک اوغلی شهرى بالجمله  
اقاربيله قتل و اعدام و زوجه سی بنات فرسدن مرزبانیه یی  
جبراً تزوج ایتشدی .

مصلحتک اهمیتى جهتیله یمنده کی عمال پیغمبریدن  
فروه بن مسیک ، کیفیتی مکتوب ایله علی وفق الاستعجال  
سده سنیه رسالتپناهی به عرض و اعلام ایتدی .

معاذ بن جبل ، مآربه بولنان ابو موسی الاشعری  
حضر تلرینک یاننه قاچوب کیفیتی اکاـ ویلمکله هرا یکسی ده  
برلکده حضر موته قاچدیلر .

فروه نک شو مکتوبی ایسه ذات اقدس رسالتپناهینک  
خسته لکدن مضطرب بولندقلری زمانده واصل اولمشدی .  
افندیمز جوابده مسلمینک قتاله تحریضلریله برابر اسودک  
یا غیلة و یا مصادمة هر نه کونه ممکنسه قتلی وعونه سنک  
تکیلی ایچون یمنده کی عامللرک جمله سنه همان اوامر شریفه  
تسطیر ایتدیردی .

فیروز دیلمی رضی الله عنه بو ایامدن آ ز اول  
مدینه طیه به عزیمتله شرف صحبت نبوتی احراز ایتمش



بر بختیار ایدی . مرزبانہ نک دہ عم زادہ سی ایدی .  
 اولیابادہ کی اوامر شریفہ نک ورودی اوزرینہ رجال  
 فرسدن دادویہ نامندہ بریلہ رفیق اولہ رق مرزبانہ نک  
 اسودہ درجہ مناسبت و مربوطیتی اکلامق ایچون  
 کندوسیلہ بالمخبرہ شدت بغضی واسود علیہندہ مردلو  
 حرکتہ مہیا ایدوکنی و ازالہ وجودینہ میل عظیمی  
 تحقیق ابتدیلر .

مرقومک ساکن اولدینی قسمرک اطرافی محافظلرلہ  
 محاط و مجهز اولدینی اجلدن اتصالندہ کی بر بشقہ دیوارک  
 نقب و نقیلہ اورادن کیجہ درون قصرہ کیرمہ بی قرار  
 لشدیردیلر . او کیجہ مرزبانہ اسودہ ممتاز و تحملندن  
 زیادہ و اعتناء مخصوص ایلہ شراب و یروب حریفی مست  
 و بیہوش اویقویہ یاتیردی . فیروز حضرنلری ، دخی  
 داودیہ ایلہ دیوار مذکور ی دلوب ایچری کیردیلر .

اسود قوش تویندن طولدیرلمش بر فراش نرمین  
 اوزرنده اویومقدہ ایدی . فیروز ، ابتدا قیلنچ ضریلہ  
 قتلنی دوشوندیسہدہ فراشدہ کی وضعیتنہ نظراً ضربہ  
 واحدهدہ مطلوبک حاصل اولہ مامسی احتمالی درخاطر  
 ایدہ رک دیزلری کوکی اوزرینہ کلک شرطیلہ اوستہ

چو کدی . اللریله باشنی قبض ایدوب سر منحوسنی تمام  
 قوت و دهشتیله اویله بر بوکوش بوکدی که یوزی ارقه .  
 سنه کادی . داودیہ دخی او آندہ قیلنجی ایله بوینی کسوب  
 باشنی بدنندن جدا ایلدی . هرایکیسی برلکده سر مقطوعی  
 آله رق کیردکاری رخنه دیواردن کیری چیقیدیلر .  
 اسود ، باشی بوکیلور ایکن اوکوز کی بر صیحه  
 مکروهه ایله باغیرمشدی . محافظلردن بری اوصیحه  
 ایشیده رک سینی اکلامق اوزره اوطیه طوغری کلیور  
 ایدی . مرزبانہ نک کلکده اولدیغنی کورمکله : «اوسس  
 نه ایدی» دیه اندن صورددی . مرزبانہ ده : «پیغمبریکنزه وحی  
 کلیور صوص ، جوانی ویردیکندن حریف چکیلوب  
 نقطه سنه کیتدی .

\*\*\*

اهل اسلام ، شعارلری وجهله ندادن صوکره صباح  
 اذاتی [ اشهدان محمداً رسول الله وان عہلہ کذاب ] دیه  
 اوقویور ایدی .! اذان واعلان مذکور ، اسودیلرجه  
 هیجان وتلاشی موجب اوله رق کوستردکاری ازدحام  
 اوزرینه کذاب مرقومک سر مقطوعی قارشولرنده خاک  
 مذلتہ القا اولمشدر .

ایشته ارتاق مسئله حل ایدلمش ایش ده تمام یتمشدی .  
بناء علیه اسودیلر طاغلمشله . و طرف اشرف رسالتیناهیدن  
منصوب اولان عامللر ، یرلرینه کلشدر .

اسودك خبر قتلنه دائر وقعه نك كيجه سی وحی الهی  
وارد و نازل اولمشدی . . افدیمز صباحین [بوکیجه اسود  
قتل اولندی وانی اهل بیت مبارکدن بر مبارک ذات قتل  
ایندی] دیه اصحابنه سویلدی . او مبارک ذاتك اسمنی  
اصحاب کرام صورملریله : [فیروز . فاز فیروز] دیه اسمنی  
تصریح بیوردی .



طیحه به مؤید — بنی اسد قبیله سی رئیس ایدی .  
شجاعتندن بین العرب بیک آتلیه معادل عد اولنور  
ایدی .

رسول الله صلی الله علیه وسلمك حیاتلرنده دعوای  
نبوت ایتمش اولانلرك صوکی طلبچه در . مقدما وفود  
بنی اسدله مدینه طیبه ده مسلمان اولدینی حالده مؤخرأ  
اودعوایه سبب جرمتی شویله منقولدرکه : قومیهله بر  
سفرده ایکن صوسزلقدن مضطر قالمسی اوزرینه سوق  
ضرورت و مأیوسیتله : [ارکبوا اعلالاً و اضربوا

امیالاً تجدوا بلالاً [ دیمش بمض رفقاسی ده اولوجهله  
 آتیه یتوب بر مقدار کیت مشا رسویه تصادف ده ایت مشا...  
 شو تصادف طلیحه نك نظر نده بر باشقه در لو کور و نه رك  
 کندی پیغمبر ظن ایتدیر مش ایدی. حالبوکه صویك محل  
 وموقعی بیلهر رك طلیحه، اوسوزی سویلمش دکل ایدی.  
 زیر اطلیحه، اوزمان محقق که ارض حجازك داخلنده  
 بولنیور ایدی. ایدی خطه حجازیه نك هر هانکی بر نقطه  
 سندن بده ایلهر هانکی بر جهته طوغری امیال عیدده مسافه  
 کیدلدیکی حالده بلکه برنجی میل مسافه داخلنده بر صویه  
 تصادف محتمل اولدینی کی برنجی میلده تصادف ایدلمزسه  
 ایکنجی واو چنجیده وانلرده ده بوللمزسه دها صوکره کی  
 امیال مسافات داخلنده صولی بریره تصادف البت طبیعیدر.  
 بناء علیه مهمات ومهمات الفاظدن برچشید ساخته  
 وصاچه سوز ایدی. هر فصله بونکله بنی اسدی اغفال  
 واضلاله موفق اوله بیلمشدر.

طلیحه ارتق اندن صوکره نبوت دعوا ایلدی.  
 کندیسنه دخی نازل اولمقده ایدوکنی وکلان وحیده  
 نمازدن سجودك اسقاطی امر اولندیغنی اکلاتدی.  
 کیفیت مسموع عالی جناب پیغمبری اوله رق تنکیله

ضرار بن ازور رضی اللہ عنہ مأمور بیورلدی . ولكن  
بوابده کی موفقیّت حضرت ابی بکر الصدیق رضی اللہ عنہ  
زمانندہ رونما اولمشد .

حضرت ابی بکر الصدیق افندمرك اوائل امر  
خلافتندہ کی بحران اناسندہ تکلیف زکادن عفو  
واستثنایینی استدعا ایتدکاری حالده رد ایدلمرندن ناشی  
ذوالقصده قبائل عاصیه ایلہ برلشوب اسلام علیہندہ مدینہ  
منورہ یہ طوغری تجاوزاتہ تشبث ایلملری اوزرینہ حرباً  
طاغیدلمش اولان غطفان و هوازن ، اوزمان طلیحہ یہ  
التحاق ایتملریلہ تنکیللرینہ طرف خلافتدن خالد بن الواید  
رضی اللہ عنہ مأمور ایدلدی .

خالد ، حرکت ایدوب طی قبیلہ سی دیارینہ یتشدی .  
انصاردن عکاشہ بن محصن ایلہ ثابت بن اقرم رضی اللہ عنہما یی  
طلیحہ اولہرق اورادن سوق ایتدی . طلیحہ ایلہ قرنداشی  
راست کلہرک بونلرک ہر ایکسنی شہید ایتدیلر . صوکرہ خالد ،  
عسکر انصارہ ثابت بن قیس طی قبیلہ سندن موجود  
مسلمینہ عدی بن حاتم رضی اللہ عنہما یی سردار تعیین  
ایتدی و [سلمی . آجا] نام ایکی طاغک ارہ سنی اردوکاہ  
طوتدی . حوالی متجاورہدہ اسلام اوزرینہ ثابت قالانلر

اردوی اسلامه ملحق اوله رق برلکده طلیحه نك علینه حرکت ایدلدی .

طلیحه نك عسکری «عینه بن حصن الفزاری» ایدی . مسلمینك حملات صفدرانه سی ، نظرنده دهشتی موجب اوله رق عینه ، طلیحه نك زردینه کیتدی . حسن نظر و همت پیمیرانه سنه التجا دیمك ایدی . طلیحه ایسه متقناً برکوشه ده اوطورمش کویا وحیک ورود و ظهورینه منتظر ایدی ! . عینه ، شوقتلك عاقبتنه دائر وحی کلوب کلدیکی صوردی . طلیحه ، کلدیکی جوابی ویردی . عینه بردها کلوب صوردی و عین جوابی آلدی .

عینه مقاومتجه تصادف ایلدیکی مضایقه لر اوزرینه طلیحه یه اوچ دفعه بویه مراجعت ایلدیکی حالده انجق اوچنجیسه نده ملك الوحی کله رك : [ انلك زحاً کر حاه و حدیثاً لاتنساه ] اینتی تبلیغ ایتدیکی جوابی آله بیلمشدی که طلیحه ، ایشی بللی ایتمام مقصد و مجبوریتیه واولانجه قوت و شیطنیه بوجواب ناصوابی عندنفسندن صاحجه لیه بیلمشدی .

عینه اوآنده فکرینی دکشدیره رك طلیحه نك پیغمبر دکل کذاب اولدیغنی و بناء علیه هرکسه ده دیارلرینه

کیتمسنی بنی فزاره بلوکنه امر و تنبیه ایتمسنی متعاقب فزاریلر،  
همان کیری مملکتلرینه کیتمش، عسکر دخی طاقم طاقم  
طاغلمغه باشلامشدر!

اوراده طورمغه مساعد آرتق قوت قالمامشدی.  
طلیحه، قصر اغنه پیندی. زوجه سنی ترکیسنه آلوب  
شامه طوغری فرارایله قضاغه قبلهسنه النجا ایلدی.  
حضرت عمر رضی الله عنہک ایام خلافتنده بنی اسد  
و غطفان مسلمان اولور لرکن طلیحه دخی مسلمان اوله رق  
حج شریفی ایفادن صکره مدینه منوره یه عزیمت و خلیفه  
حضرت تریلهده صحبت ایتدی.

طلیحه، اخیراً حوالی شامیه غز الرنده بعض  
خدمتلمرده بولتمش و عاقبت نهاوند محاربه مننده شهید  
اولمشدر.

\*\*\*

۳

### سریه اسامه، استغفار و مرض نبی

سریه اسامه — مسیامه، طایحه، اسود کبی بر طاقم  
عصات طرفلرندن خطه یمانیه اشغال ایدلمسندن دولایی

شام جہتی طریقہ نک تجارت نقطہ سندن اہمیتی آرتمشدی .  
 بناءً علیہ او طرفی تماماً آحق لزومی حاصل اولہرق  
 شہر صفہک یکرمی التتہجی بازار ایرتہسی کونی شام  
 ملحقانندن بلقا وابنی روملری اوزرینہ کوند رملک اوزرہ  
 رسول اللہ صلی اللہ علیہ وسلم ، بر سریہ تجہیزینی  
 امر و فرمان بیوردیلر . سریہ مذکورہ رسالتہناہ افندیمرک  
 الک صولک سریہسی وحضرت ابی بکر الصدیق رضی اللہ عنہک  
 الک اولکی اردوسی اولمشدر .

فرداسی صالی کونی اسامہ بن زید رضی اللہ عنہی  
 نزدہما یونلریتہ جلب ایدوب سریہ نک امر امارتنی اکا  
 بالتوجیہ :

— « یا اسامہ باباکک مقتلنہ کیت ! اورالری آتله  
 چیکنت . سنی عسکرہ امیر تعین ایتدم اہل ابنایہ غزا  
 ایلہ دیارلرینی یاق ، مظفریت حاصل اولدقدن صوکرہ چوق  
 اکلنمدن عودت ایت . برابرکدہ لزومی قدر صوقوفہلرینی  
 بولندیر . یولدہ قویولری و پیکارلری و طلیعہلری قارشوکہ  
 آل ،

امرینی ویردی .

ابنی ، عسقلان ایلہ رملہ ارہ سندنہ بر موضع مدرکہ



اسامه نك باباسی زید بن حارثه رضی اللہ عنہ. مؤتہ حادثہ سندہ  
شہید اولمشدی .

\*\*\*

استغفارالبنی — حجة الوداعده ايام تشریقك ایکنجی  
کونی مناده سورة النصر نازل اوله رق حضرت پیغمبره  
سوره دن حلول اجل وارتحالنه علم حاصل ایلدیکنی جبریل  
علیه السلامه سویلیوب [ وللاخرة خیر لك من الاولى ]  
جوانی آلمشدی .

سورة جلیله نصر، استغفارا یحون رسالتپناه افندیمره  
فرمان محض الهی ایدی . اشبو سوره ایله جناب حق،  
حبیب ذیشاننه صرف توبه واستغفاری امر وتوصیه  
ایتمشدی . بناء علیه رسول الله صلی الله علیه وسلم ده اندن  
صوکره هر آن ومکانده: [سبحانک اللهم وبحمدک اغفر لی  
انک انت التواب الرحیم] ديه دعا واستغفار ایتمهک باشلامش  
هر سنه اعتکافی اون کون ایدر اولدینی حالده شو صوک  
سنه ده یکر می کون اعتکاف ایتمشدی .

امر عبادت واستغفاردہ سوابقندن زیاده اولان جد  
واعتناسی اصحاب کرامک نظردقتلرینی جلب ایدرک:  
— « یارسول الله ! سبب ندركه بوکلماتی چوق چوق  
سویلیورسک ؟ »

دیه کند و سندن سؤال ایدلدی. اقدیمز اوزمان :  
 — «یلمش اولیگز که بنی آخرته ارتق دعوت ایتدیلر»  
 دیمکه برابر آغلامغه باشلادی. اصحاب کرام شو  
 خبردن بالطبع صوک درجه ده مکدر و ماثرا اولدقلری حالده:  
 — «یا رسول الله! سن اولومدن آغلارمیسک که  
 حق تعالی سنک ماتقدم و ماتاخر اولان جمیع ذنوبکی  
 علی التحقیق عفو و مغفرت ایتمشدر»  
 دیدیلر. حضرت رسول اکرم انلرک اوسوزینه :  
 [فاین مول المطاع و این ضیق القبر و ظلمة اللحد و این القيمة  
 و الاھوال] جوابیلہ مقابله ایتدی .



عبدالله بن عباس رضی الله عنهما نقل ایدوب دیرکه:  
 ارتحال نبویدن بر آی اول رسول الله صلی الله علیه  
 وسلم، خواص اھانی حضرت عایشه نك حجره سنہ بر  
 کون چاغیر مشدی. وقتاکه حضور سعادت لرینه واردق.  
 بزى کورد کده آغلامغه باشلادی.

و: [مرحباً بکم و حیاکم الله باسلام جمعکم الله رحمکم الله  
 حفظکم الله. جبرکم الله. نصرکم الله. رفعکم الله. وفقکم الله

وقبلکم الله . هداکم الله . آواکم الله . وقاکم الله سلمکم الله  
رزقکم الله [ دیدکن صوکره :

— « سزه الله تعالادن قورقمه یی توصیه ایدرم .  
و سزی اکا اضمارلرم . و انی سزه بندن خلیفه ایدرم  
و سزی انک عقابندن تخویف ایدرم . حقا که بن انک  
نذیر مبینی یم . کر کدرکه انک بلاد و عبادی ایچنده علو  
و تکبر ایتیه سکز . زیرا بکا وسزه [ تلك الدار الآخرة  
نجعلها للذين لا يريدون علواً في الارض ولا فساداً والعاقبة  
للمتقين ] و [ اليس في جهنم مثوى للمتكبرين ] دینلمشدر .  
بیوردي . بو اراده بن دیدم که :

— « یارسول الله ! سنک اجلک نه زمان تمام

اوله جقدر »

جواب ویردی :

— « فراق و قی و جناب حقه و سدره المنتهایه ،

جنة المأوايه ، رفيق اعلايه رجوع زمانى قریب اولدی »

اصحاب دیدیلر :

— « یارسول الله سنی کیم غسل ایدر ؟ »

— « رجال اهل یتمدن بکا اقرب اولان کیمسه »

— « یارسول الله ! سکا نه درلو جامه دن کفن

ایدرز »

— « ایسترسه کز بوکیدیکم انوابمی، ایسترسه کز  
مصری جامه لریمی یاخود حله یعنی یاخود بیاض انوابمی  
کفن ایدرسکز »

— « یارسول الله! نمازیکی کیم قیلر؟ »

بوسؤال ایله برابر کندیمزی ضبط و امساکه قادر  
اوله میهرق همان اغلامغه باشلادق . اوده بزمله برابر  
اغلادی . صوکره بزى جزعدن منع ایدوب :

— « حق تعالی ، سزه رحمت و کناهلریکیزی  
مغفرت ایتسون و سزه پیغمبریکزك قبلندن جزاء خیر  
ویر-ون . بنی غسل و تکفیندن صوکره بو حجرة ده بر  
زمان تنها براغیکز . ابتدا بنم اوززیمه اول ساعتده ربم  
رحمت خاص انزال بیورور . صوکره اولان نمازیمی قیلان  
دوستم جبرائیل اولسه کرکدر . صوکره میکائیل .  
صوکره اسرافیل ، صوکره عزرائیل علیهم السلام  
ملائکدن بر گروه عظیم ایله قیلر . بونلردن صوکره  
مزرده کلیکز قیلیکز . بنی تزکیه و فریاد و نوحه لرله  
متأذی ایتیمکز . نمازیمی اهل بیتك ارککلری بعده  
خاتونلری ، صوکره سار اصحاب قیلر . سلامی بندن  
غائب اولان اصحاب جماعته و دینه اقتدا و قیامته دکن

سنتمه متابعت ایدنلره تبلیغ و ایصال ایدیکز »

او زمان اصحاب گرام صور دیلر :

— « جسد شریفکی قبره کیم ایندیریر ؟ »

— « ملائکه دن بر جمع کثیرایله اهل یتیم ایندیریرلر .

ملائکه سزی کورورلر سز انلری کورمزسکز »

..

شهر صفرك او اخرنده ایدی بر کیجه یاریسی

رسول الله صلى الله عليه وسلم حجره صدیقیه ده فراشندن

قالقوب بقیع قبرستانه واردی . اوراده اهل قبوره سلام

و حققرنده : [ السلام علیکم دار قوم المؤمنین . اتم لنا فرط

و انا بکم لاحقون . اللهم لاتحرمنا اجرهم ولا تفتنا

بعدهم . اللهم اغفر لا اهل بقیع الفرقه ] ديه دعا

و استغفار ایلدی و او کیجه متعاقباً اوج کره حجره

سعادتلرندن بقیعه وارهرق اهل قبوره دعا استدی هربر

نوبته و یا نوبت اولیده و یا خودصوک نوبته آزادلیلرندن

ابو مویبه رضی الله عنہی معیتلرینه آلمشدی .

ابو مویبه ، اهل قبور حقنده کی استغفار نجی بی

دیکیلرک قبرستانده کی اموات مسلمینه غبطه ایلدیکنی :

mezzam  
göl  
Reşid  
E. J. A.  
V. eskin  
oluvore

— « تولیدی بن ده بونلر کبی قبرده اولوب ده  
شو استغفاردن حصه مند اولیدم دیدم »

دیه حکایه ایتشدیر . دعادن صوکره اهل قبوره  
بر خطاب حزین ایله خطاب ایدرک :

— « مبارک اولسون سزه که نعیتمده سکز و خلقک  
مبتلا اولدینی فتنه لردن آسوده سکز.. حق تعالی ، سزه  
شول فتنه لردن خلاص و نجات و یرمشدرکه عن قریب  
خلقه ایریشه جکدر اول صورتده که لیل مظلم کبی آخری  
اولنه متصلدر »

دیدي . و ابو مویهبیه توجهله :

— « یا ابا مویهبیه ! خزائن دنیایی بکا عرض  
ایتدیلر دنیاده باقی قالوب جنته دنیادن کیتمک ایله ربمه  
ملاقی اولوب جنته کیتمک بیننده بنی مخیر ایتدیلر »  
دیرکن ابو مویهبیه :

— « یا رسول الله ! انام بابام سکا فدا اولسون  
خزائن دنیایی و دنیاده بقادن صوکره جنته کیتمکی  
اختیار ایت »

دیه عرض مطالعه ایتدی . حضرت پیغمبر ذیشان  
افندیمنز :

— « یوق بن ، ربمه ملاقی اولوب اندن جنته  
کیرمکی اختیار ایتدم »

دیدى . و حجره سعادتلرینه طوفری کلدی .  
ایرتسی کون احده عزیمتله اندکی شهیدایه ده دعادن صوکره  
احیایه وداع ایدر کبی وداع ایدرک مدینه سعادته کلدی .

\* \*

مرضه نبوی — احدثن ایشته شو و عودت اناسنده  
ایدی امهات ، مؤمنیندن میموننه رضی الله عنہانک حجره سنده  
چهارشنبه کونی رسالتپناه افندیمزه حمی ایله قاریشیق بر  
باش آغریسی عارض اولدی که صداع مذکور ، مرض  
موت نبویک مقدمه سی ایدی . او حالیه عائشه رضی الله  
عنہانک حجره سنه کلدیکی زمان حضرت عائشه دخی  
باشنک آغریسندن « وارأساء » دیه اظهار اضطراب  
ایتمکده ایدی .

رسول الله صلى الله عليه وسلم افندیمز ، اکا قارشى  
لطيفه طریقیله :

— « ذاك لو كان و انا حى فا تغفرلك و ادعوك  
= بن حیاته ایکن او ، اويله اولسه بیله نه باس و ارکه  
سنک ایچون دعا و استغفار ایدرم »

بیورور ایکن حضرت عائشه حس غیرتله :  
 — وائکلیاه والله انی لاظنک تمحب موتی . ولوکان  
 ذلك لظلمت آخر يومك معرساً ببعض ازواجك = والله  
 سن بنم موتی ارزو ایده یورسک ظن ایدرم اکر او یله  
 برشی اولسیدی مطلقا اواقشام حجره مده دیگر زوجاتکله  
 زفاف و خلوت ایدردک »

دیدى . شو سوز . رسول الله صلى الله عليه  
 وسلمك بلا اختيار موجب تبسمی اوله رق :  
 — بل انا وارأساه يا عائشة! سنك صداعك كجر  
 اما بنم صداعم صعب و مشكلدر »

دیه بیوردی واغریسندن طولابی باشنی برعصابه  
 ایله باغلادی . و منبر سعادتلرینه چیقوب بعض وصایا  
 اجراسی صد دنده : [ انی بین ایدیکم فرط و علیکم  
 شهید . و ان موعدم الحوض و انی لانظر الیه و انانی  
 مقامي هذا . و انی قد اعطیت مفاتیح خزائن الارض .  
 و انی لست اخشی علیکم ان تشرکوا و لکنی اخشی  
 علیکم الدنيا ان تنافسوا فیها فنقتلوا فتهلكوا کما هلك  
 من کان قبلکم ] بیوردی .



\* \*

نچشنبه کونی کندی ید سعادتلریله بر لوا عقد  
ایله اسامه یه و یروب: [اغز بسم الله وفي سبیل الله فقاتل  
من کفر بالله] دیدی . اسامه دخی لواء شریفی الهرق  
طیشاری چیقدی . بریده بن الحصیب رضی الله عنه  
ویردی . وجرف دیدکلری موقعی معسکر اتخاذ ایتدی .  
اشبو سریده بولمغه بتون مهاجرین اولین وانصار  
کرام راضی اولشلردی که ابوبکر الصدیق ، عمر الفاروق  
عثمان ذی النورین ، سعد بن ابی وقاص ، ابو عبیده  
حاصر بن الحراح ، سعید بن زید ، قتاده بن النعمان ،  
سلمه بن اسلم رضوان الله علیهم اجمعین حضراتی اوزمره  
فاضله دن ایدیلر .

فقط اسامه نك آزادلی کوله وهنوز اون یدی ایله  
اون طقوز ارمه سنده بریاشده حدیث السن بولمسی سر  
رشته سیله برطائفه نك لسان طعنی اوزاده رق : [اسامه ،  
بونجه اجله صحابه ناصل امیر اوله بیلور؟] دیملری  
غضب و انفعال نبوی بی مستلزم اوله رق افندیز  
باشلرینی بر عصابه ایله باغلا یوب اوزرنده بر قطفه اولدینی  
خالده منبر سعاده چیقدی . وجناب حقه حمد و ثنادن

صوكره : [ يا ايها الناس ! اسامه بن امير تعينم من طولاي  
بعضكرك او كلات وتفوهاتى نه ايدى ؟ اسامه به طعن  
ايتديكز ايسه باباسنك امارت و ماموريتنه دخى مقدا طعن  
ايتمشديكز . خدا حقيچونكه زيد ، امارته لايق بر آدم  
ايدى . كندوسندن صوكره اوغلى دخى اكا لايقدر . زيد  
بكا خلقك سو كيلىسى ايدى اوغلى اسامه دخى خلق ايجنده  
سودكلىمك بريسيدر . ايكيسينده مظنه جميع خيرات  
وحسانندر . ايمدى انك حقنده وصيتى قبول وايولاك  
مراسمنى ايفا ايديكز . او ، خيرليلريكزدندر ] ديوب  
ايندى ، حجره مطهره سنه كلدى .

\* \*

بوخطبه نك يوم قرائتى شهر ربيع الاولك اونجى سبت  
كونى ايدى .

اسامه ايله برلكده متهى عزيمت و حركت اولان مجاهدين  
گرام ، جرفدهكى عسكركه كيتمك اوزره ارتق و داع ايجون  
سعادتخانه رسالتپناهى به كلديلر

رسول الله صلى الله عليه وسلم افنديمك مرضى او  
دقيقه ده مزداد ومشتد اولمقده ايدى . ابتداء مرضندن  
اشتداد مرضى اواننه قدر زوجات طاهراتنك نوبتلىرینه

رعايت بيوردي . نوبتله الك صوكره ميمونه رضى الله  
عنه انك حجره سنده ايكن : [ اين اناغدا ] ديدى . وارالق  
ارالق بونى اوچ دفعه تكرار دخى ايلدى .

مقصد هايونلرى ، حضرت عايشه نك حجره سنده  
بولمسنه اولان ميل وارزوسنى زوجات طاهرانه اكلاتمق  
ايدى .

بر روايته بوماده ي بالذات كندوسى بويله ضمناً ديكر  
روايتده كريمه مكرم لرى فاطمة الزهراء رضى الله عنها ، صراحة  
زوجات طاهرانه تكليف ايلدى . امهات مؤمنين حضرتانى  
دخى ، بالاتفاق راضى اولدقلرى كې جمله سى ده برلكده  
حجره مطهره عائشه يه كلوب اكل خدمت ايدى جكلرينى عرض  
ايتديلر .

بناء عليه ميمونه رضى الله عنه انك حجره سندن قالقدى  
مبارك براتى عباسك ياخود فضل بن عباسك ديكرالتى ده  
حضرت على كرم الله وجهه نك او موزينه قويوب او حالده  
حضرت عايشه نك حجره سنده كلدى كه اوكون يوم الاثنين  
ايدى . ارتحال حضرت پيغمبرى . ايرتسى يوم الاثنينده  
واقع اولمشدر .

حجره عائشه ده بيتوتى تقرر ايلدكدن صوكره ايام

مرضنده جميع امور وخدماتك يالكز كندوسنه حصر  
وتفويضني حضرت ابى بكر الصديق رضى الله عنه رجا و  
استدعايتم شدى. فقط رسول الله صلى الله عليه وسلم:

— «يا ابا بكر! خدمتى بنات و زوجاتك غيرينه  
سپارش ايتسه انلر ملول و مصيبتلرى مزداد اوله جقدر.  
بويا بده سنك اجر ك الله تعالى نك اوزرينه دركه بالخاصه نيتكله  
ما جور اولورسك»  
جوابى ويردى.

•••

رسول اكرم، شدت مرضلرندن بك چوق مضطرب  
ايديلر. حتى اضطرار بندن ناشى راحت ياته ميوب برياندن  
اوبريانه صيق صيق دوزر ايدى. حضرت عائشه بووسيله  
ايله:

— «يا رسول الله! اكر بزه سنك كى بويله اضطرار  
وانقلاب كوسترسه ايدك سن بزه محقق غضب ايدردك»  
ديديكنده اقديمز:

— «يا عائشه! بنم مرضم صعب و شديددر.  
جناب حق، صالحلرله مؤمنلره بلايى اصعب  
واشد اوله رق كوندرير. هيچ بر مؤمنه بر بلا واذا

ایریشمنز الا انک سبیلله حق تعالی ، او مؤمنک مرتبه سنی  
ترفع و کناهی حط و محوایدر . ولو که اول بلا ، آیاغنه  
دیکن باتمق قدر اهمیتسنز برشی اولور سده »

بیوردیلر عبدالله بن مسعود رضی الله عنه دیر که :  
حضور رسالتپناهی به وارمشم . رسول الله صلی الله  
علیه وسلمی حمی طوتار ایدی . الیمی مبارک وجه شریفنه  
قویدم . اولقدر صیجاق ایدی که حرارتنه الم تحمل  
ایتمدی . حیرتله دیدم که :

— « یارسول الله ! نه عجیب حرارتلی حاکمزوار ؟ »

جوابده بیوردیلر :

— « شدتلیدر . بنم ستمه مک شدتی سزدن ایکی کشینک  
ستمه سنده کی شدت قدر وارد ،  
بن دیدم :

— « یارسول الله ! او حالده سکا ایکی اجر و ثواب

حاصل اولور »

جواب ویردی :

— « اوت او یله در . اول الله حقیچون که نفسم انک  
یدقدر تنده در روی زمینده هیچ بر مسلمان کیمسه یوق که  
ا کا مرضدن و غیرندن بر اذیت و مشقت ایریشسونده

کناهلرینی خزانده ایاچلر یاپراقلرینی دوکدکلی کبی  
دوکسون :

ابوسعید الخدری حضرتلرندن دخی عین مالده بر  
حدیث دیکر منقولدر. بشر بن براء بن معرورک والدہ سی  
دیرکه :

حضرت پیغمبرک ایام مرض موتنده یاننه کیتمشدم  
صوک درجده حرارتلی ستمه سی وار ایدی . دیدم که :  
— « یارسول الله ! بن سنک شوستمه کبی آخر بر  
کیمسده شدتلی ستمه کورمدم »

جوابده :

— « انکچون بزم اجرلریمز دیکرلرک اجرلرندن  
ایکی قاندر. ای ام بشر! مرضم حقنده خلق نه سویلیولر؟ »  
بیورملریله بن :

— « نبی اللهک ذاقه الجنبی وار دیورلر »

دیدم ، اقدمز ، بوکا اعتراض ایدرهرک :

— « حق تعالی نک لطف و کرمنه سزاوار دکلدرکه

ذاقه الجنبی پیغمبرینه مسلط ایتسون. سنک دیدیکک همزات  
شیطانندر . شیطانک بنم اوزریمه استیلا سی یوقدر . بنم  
مرضم اولحم مسموم اثریدرکه خیبرده سنک اوغلك ایله

برابر اكل ايتشدك . نيجه زمانلر انك تاثيريني وجودمده  
حس ايدردم اماشمديكي وقت ، انقطاع اهرمك زمانيدره  
ديه بيوردي .



بركون ايكي قولتوغنده حضرت على وفضل بن عباس  
رضي الله عنهم حضراتي بولندقلري حالده حجره عائشه دن  
مسجد شريفه عزيمتله منبره . چيقوب ابتدا جناب حقه  
حمدوننا وشهداء احده دعادن صكره خلقه نصايح لازمه  
ايفاسيله برابر مبارك ايكي كوزلرندن ياش آققده اولديني  
حالده : [ ان عبداً خير الله بين ان يؤتية زهرة الدنيا ماشاء  
و بين ما عنده فاختر ما عنده ] بيورديلر . عبد تعبيرى  
كندى ذاتندن كنياه ايدى . برعبدك زهرة الدنيا ايله  
ما عند الله ييننده تحخير اولنوبده ما عند الله اختيار  
ايلديكي حقنده كي نطق عالي نبوت ارتحالنه اشارت  
ايدى ! .

حضرت ابى بكر الصديق . مقصده مطلع اولديغندن  
تحمل ايدمه يهرك او آنده : [ يا رسول الله فدينك باياننا  
وامهاتنا ] ديدى آغلادى .

ديكر اصحاب كرام . انك شو حال وقالندن تعجبله :

— «رسول الله بر قولنی جناب حق بخیر ایتدی  
 دیه خبر و بریور بو اختیارده فدیناک بابائنا و امهاتنا  
 دیوب آغلاپور»

دیرلردی . حضرت صدیقک جزع و اضطرابی ،  
 تقرب حلوانی فهم ایتدیکی فراق پیغمبریدن ناشی ایدی  
 تسکین و تسلیه سی ایچون اقدیمز، فضل و مزینتی تعداد  
 و تقدیره تصدی ایدوب اومیانده مسجد شریفه اچیلان  
 قیو و بنجره لر ایچنده انک کریمه سی عائشه رضی الله عنها  
 و عن ایها انک قیو و بنجره سندن بشقه سنک قیامه سی ده  
 امر ایتدی که بوده بین الاصحاب صدیق اعظمه مخصوص  
 بیوک بر امتیاز ایدی .



یوم الخمیس ایدی مرض سنک بر بحران شدید  
 ائناسنده اصحابنه :

— «اثنونی اکتب لکم کتاباً ان تضلوا بعده ابدأ  
 = کتیریکز سزه بروصیت یازیم که انکله عامل اولوب  
 بندن صوکره ضلالت دوشمیه سکز»

دیه امر پیوردیلر . بو بایده اصحاب کرام، اختلافه  
 دوشه رک کیمی امر عالی موجینجه دویت و محیفه نک



احضاری طرفندہ کی کمی دہ اولیہ بر بحران مرضی اثنادہ  
 اقدیمزی دوات و قلملہ مشغول و بحضور ایتک ناصواب  
 اولدینی طرفندہ بولندی . یعنی امر واقع شدت حمانک  
 سوقیلہ محمولک سـ و یلدکری بمض کلات کبی اولق  
 احتمالہ مبنی تحقیق کیفیت ایچون رأی رسالتپناهی بہ  
 مراجعت ایتدیلمز . اقدیمز بو دفعہ :

— « بنی حالہ براغیکز ! بنم مشغول اولدیغم شیء  
 سزک بی دعوت ایتدیگکز شیدن خیرلیدر »

دیمکله حضرت عمر الفاروق رضی اللہ عنہک فصل  
 و فرق نزاع قیل و قال ایچون : [ حسبنا کتاب اللہ ]  
 دیمسنہ قارشى طرف دیگر دخی کندی رأیلرینی بسط  
 و اتیانده اصرار ایتمسیلہ اورته لقدہ لغو و لفظ یتہ  
 یوکسلمش بولنورکن اقدیمز :

— « قالیکز یانمدن ! پیغمبر حضورندہ منازعه  
 لایق دکلدر »

دیه امر ایدہرک حضار دخی طیشاری جیقدیلمز .  
 او زمان اوج شییء وصیت ایلمشدی کہ : برنجیسی  
 مشرک لارک جزیرة العربدن طرد و اخراجی ایکنجیسی  
 جماعات عربدن مسلمان اولق ایچون مدینة طیبہ

کله جکله دأب قدیم سعادتلری وجهله جائزه ویراسی  
ایلی . راوی حدیث ، اوچنجیسینده مع التأسف  
توقف ایتشدیر .

حضرت صدیق ایله عباس رضی الله عنهما ، بعض  
انصارک برمحله آغلاشمقده اولدقلرینی کوروب کیفیتی  
عرض ایتشلردی . بونک اوزرینه وجود شریفنده کی  
حرارتی تخفیف ایله امتنه نصیحت ایتک اوزره یدی  
قویودن یدی قره صو جلب ایتدی . صوکره باقردن ویا  
طاشدن معمول بیوک برقاب اوزرینه قعود ایله اوصوی  
یتردیه مبارک اللریله اشارت ایدنجهیه قدر اوستنه  
دوکیدردی . صویک برودتیه وجود هایونلرنده حرارت  
بالنسبه مبدل خفت اوله رق مسجد شریفه چیقدی .  
خلقه نماز قیلدیردی . وخطبه او قودی . خطبه ده ابتدا  
جناب حقه حمد و ثنا و شهداء احده دعا ایلدی .

صوکره مهاجرینه خطاباً : [اوصیکم بالانصار فانهم کرشی  
وعیبتی وقد قضاوا الذی علیهم وبقی الذی لهم . فاقبلوا من  
محسنهم وتجاوزوا من مسیئهم] = سزه انصاری توصیه ایدرم  
که انلر بنم خاصه جامه دانم و محل سرمدر کنیدی  
اوزرلرینه دوشان وظیفه مواسات وجوانمردی بی ایضا

ایتدیلر. سزک اوزرلریکنزه هاند اولان حققری باقی قالدی.  
 یعنی نوبت اکرام سزیه کلدی. ایمدی سزه، انلرک محسنلرینه  
 اکرام ایدیکنز مسیئلرینک سیاتندن کچیکنزه [دیه بیوردی.  
 شدت مرضدن طولای ایه صره و بلکی صیقجه  
 نوبت یایه رق افندیمنز باغین بر حالدیه بیهوش قالمقده و بوده  
 اهل بیت و اصحاب کرام ایچون صوک درجهده موجب  
 تلاش اولمقده ایدی. شو صورتله بحران مرضی  
 حاصل اولدینی برکون انصار کرام تلاشلرندن خانه لرنده  
 صبر و آرام اینده، یوب دها زیاده قرب و جوار سیدالانام  
 اولمق مناسبتیه اطراف مسجد شریف رسالتپناهی بی  
 طولاشمقده ایدوکلرینی اولاً عباس رضی الله عنه، اندن  
 صوکره اوغلی فضل و انک عقیبندهده حضرت علی  
 کرم الله وجهه عرض ایلدی. اوزمان رسول الله صلی  
 الله علیه و سلم، مبارک قوانی قالدیروب :

— « هاه »

دیددی. که بنی قالدیریکنز دیمک ایدی. مبارک النی  
 قولنی طوتدیلر قالدیردیلر. افندیمنز اوطوردی. و :  
 — « انصار، نه دیورلر ؟ »

دیه سؤال ایلدی. حضرت علی کرم الله وجهه :

— « قورقرزكه رسول الله اخرته انتقال ايدر ولىكن  
 اوحالده بزم حاملز نه اولور ديورلر ،  
 جوابنى ويردى . بو جواب اوزرينه افنديمز ،  
 برقولنى عليكنك ديكر قولنى فضلك اوموزينه قويدى .  
 عباس ده او كده اولدينى حالده اياقلىرى درمانسزلقدن  
 يرده سورويهرك مسجد شريفه كلدى . منبرك اشاغى  
 قدمه سنه اوطوردى . مبارك باشلى ينه بر عصابه ايله  
 باغلى ايدى حمدوشنا ايله باشلايه رق :

— « يا ايها الناس ! ايشتم كه سز ، بنم موتمدن خوف  
 ايدييورسكز و بنم موتمى انكار ايدييورسكز . سز به بن  
 كندى موتمدن و كندى موتكزدن خبر ويرمش اولديغم  
 حالده ناصل انكار ايدم بيلورسكز . هيچ بر قومك پيغمبرى  
 ايجلرنده مخلص قالمشمى كه بن ده سزك ايجكزده اويله قاليم  
 بن حضرت حقه لاحق اوله جغم . بنم لقاء به استحقاق جمله دن  
 زياده در . بيلمش اوليكز كه بنم وسزك مرجع و مصير من  
 جناب حقدور . مهاجرين اولينه ابولك ايتمكزى وانلره  
 دخی يكديكريله حسن معامله و اكر امدم بولنلرني توصيه  
 ايدرم . والعصر ان الانسان لفي خسره [ نهايته قدر  
 او قودى ] امورك جريانى اللهم امر واذنيله اولديغندن

مؤجل اولان امورك تعجیلنده فائده یوقدر. جناب حق مخلوقاتندن هیچ برینک عجله سی ایچون امور قضایی تعجیل ایتمز. قضاء الهی به غلبه سودا سنده بولنان آدمک مغلوب ومقدرات الهیه یی حیل و خدعه ایله تحویل زعمنده اولانک عاقبت مخدوع ومنکوب اوله جنی شبهه سزدر. فهل عسیتم [آیت کریمه سنی ده او قودی] ای مهاجرین سزه وصیت ایدرم که انصار حقنده حسن معامله ومجاهله ده. قصور اتمیه جکسکمز. انلر او یله برکیمسه لر در که مسکن ومأوالرینی سزه حاضر ایتشلر وسزک هجرت لریکزدن اول ایمانه کلوب باغچه لرنده میوه لرینک نصفی سزه ویرمشلر وکندی لری محتاج اولدقلری حالد سزی نفسلری اوزرینه ترجیحاً خانه لرنده اسکان وایوا ایلمشلر در. ایمدی سزدن هرکیم که انلر حاکم اولور اکا کر کدر که محسنلرینی حسن قبول و مسیئلرینک سیئاتندن عفو وصفح ایله تجاوز ایدمه. واوزلرینه کیمسه یی اختیار ایلمیه بن سزه رؤوف ومشفقم. سزینه بکا ملحق اوله جقسکمز. موعد ملاقاتمز، کنار حوض کوثر در. کنار حوضه بکا ملاقی اولسنی ارزو ایدن النی ودیلنی مالایغیدن کف ایلملیدر. ای انصارا بندن صوکره اوزرلریکزه بر جماعتی اینار ایدمه جکار،

فطوق وخطبة سعادت بوسره به کلدیکی انده انصار  
کرام ، بوضع حزین اوزره :

— « یارسول الله بز، اوزمان نه درلو حرکت ایدم لم؟ »  
دیه استفسار ایتملریله انلره حضرت رسول اکرم  
صلی الله علیه وسلم :

— « کنار حوض کوثرده بکاملاتی اولنجیه قدر او حاله  
صبر ایدیکنز »

جوابی ویریرکن عباس رضی الله عنه ده :

— « یارسول الله ! قریش حقنده خلقه وصیت ایت  
دیدیی که ارزوسی امر خلافتده حجت قاطعة النزاع اوله جق  
درجه ده صراحتی ویا اشارتی حاوی بروصیتک علی رؤوس  
الاشهاد شرف صدور ایتمی ایدی حضرت سید المرسلین  
افندیمنز ، معرض جوابده دوام ایدم رک :

— « بن ، بوامری قریشه وصیت ایدرم . خلق ،  
قریشک پیرو لیدرم . خلقک صالحلری قریشک صالحلرینه  
فاجرلری ده فاجرلرینه تابعدر . ای قریش ! خلق حقنده  
ایولک ایتمه که وصیتمی قبول ایدیکنز . ای خلق ! تحقیقا  
کناه ، ومعصیت ، تغیر نعمه سبیدر . خلقک صلاحی ،  
صلاح حکام و امرایه و فساد دخی انلرک فسادلرینی بادی

اولور. وكذلك نولى بعض الظالمين [آيت كريمه سنى نهايته  
قدر اوقودى] بنم حياتم سوزه خيرلى اولدينى كى ممام ده  
خيرليدر .

ديوب سوزه نهايت ويردى .

..

فضل بن عباس رضى الله عنهمادن منقولدركه: حضرت  
سيد المرسلين افنديمى ، ايام مرضنده اليمى طوتوب خانه  
سعادتلرندن مسجد شريفه كلدى . منبره چيقدى . مبارك  
باشلرينه برعصابه باغلامشدى . بلالى چاغيره رق اكا :  
[خلقه ندا ايت كه كلسونلر . وصيت ايده جكم وبيلدركه  
آخرو صيتمدر] ديدى . بلال ، چارشو وپازارده همان  
فرمان رسالتپناهى بي اعلان ايتديكندن خلق خانه  
ودكانلرينك قبولرني قاپايوب مسجد شريفه كلديلر . حتى  
باكر قيزلر دخی آخر وصيت نبويه بي ديكلمك مقصديله  
حول مسجد شريفه حاضر اولمشلردى . جماعت  
حاضره نك مسجده صيغشم دقلرينى افنديمى ، كوره رك :  
[اوسعوا لمن وراكم = كرده بولنا نلريكزه يروييكز]  
ديه بيوردى . صوكره حمد و ثنايله خطبه يه باشلايوب :  
— د تحقيقدركه بنم سرك اراكزدن فراقم زمانى

یا قلاشمشدر . ایمدی سزدن بریکزی اورمش ایسم  
 قالقسون بنی قصاص ایلسون . اگر مانی آماش ایسم  
 مالمدن حقنی السون و دیمنسون که اگر قصاص ایدرسسم  
 قورقرم که رسول الله ، بغض و عداوت ایدر . بیلمش  
 اولیکز که بغض و عداوت بنم طبیعتمدن دکلدر . طبیعتم  
 اویله شیلردن بعیددر . بکا خالقک سوکیلیسی او  
 آدمدر که بنده حق و ارایسه حقنی آله یاخود حلال ایده  
 ناکه طیب النفس اولدیغم حالده ربمه . ملاقی اولیم . ظن  
 ایدرم که بوسوزی سزه برکره سویلمک کفایت ایتمز .  
 بن بونی سزه دفعات ایله سویلیه حکم که بنده حق بولنان  
 آدم کلوب حقنی آلسون .

دیدى . فضل حضرتلری ، دیرکه : بوراده منبر  
 سعادتدن اینهرك وقت ظهري ادا ایلدی . صوکره تکرار  
 منبره چیقدی . ورد مظالم و اعاده حقوق بحثنی تکرار  
 بیوردی . او آنده حضار کرامدن بری قیام ایله :

— یا رسول الله ! بنم سنده اوج درهم آله جق حقم

وارددر .

دیدى . رسول الله صلی الله علیه وسلم ، قطعاً غنف



— «بو خصوصه هیچ کیسه بی تکذیب و تحلیف  
ایتمیه حکم ولیکن بو اوچ درهمک بنم اوزریمه نه وجهه له  
کچدی؟»

دیه سؤال بیوردی . درهم صاحبی:

— «یارسول الله ! برکون سکا بر فقیر کلدی . امر

عالیکزله اوفقیره اوچ درهم ویرمشدم»

جوابی ویرمکه دراهم مذکورنک تأدیه سنی افندیمز،

فضل رضی الله عنه حضرت تلمینه امر بیوردقدن صوکره

تکرار اوبخنده بسط وصایایه دوام ابتدی:

— «یاایها الناس ! اوزرنده حق اولانلر ، حق ادا

ایتمسون خلقه قارشى حجاب وفضیحت دنیادن حذر

ایتمسون.. خبردار اولیکز که فضیحت دنیا، فضیحت

آخرتدن ایسر واسهلدر»

خطبه سعادت بورایه کلمشکن بر دیگر آدم قالدی.و:

— «یارسول الله ! مال غنیمتدن اوچ درهم خیانت

ایتمشدم حالا اوزرمده در»

دیدى. افندیمز ، سبب خیانت وارتکابی اندن سؤال

بیوزدیله . اوده :

— «محتاج ایدم»

جوابی ویردی . انک اوزرینه دراهم مذکورہ نك  
استردادی ده جناب فضل رضی اللہ عنہ امر و حوالہ  
بیورلدی .

افندیمز ، او آندہ ایدی :

— « سومدیکی بر حال و خصلمنی بولسان ایاغہ  
قالقسون . . . دعا ایدیم »

بیوردی . بری ایاغہ قالقدی . وحالی :

— « یارسول اللہ ! بن کذابم . وفحش سویلایجیم .  
و چوق اویقو اویورم »

دیه عرض ایلدی . افندیمز ، انک حقندہ : [یارب  
اکا صدق میسر ایت و اویانق اولمہی دیلدیکی زمان  
اویقوی اندن ازالہ ایت ] دیہ دعا ایتدی .  
بر دیگرکی دخی قالقہرق :

— « یارسول اللہ ! بن کذاب و منافقم و هیچ  
برقالق یوق کہ او بندہ بولنسون »

دیرکن حضرت عمر الفاروق ، انک بللی ایتدیکی  
نفاقندن غلیانہ کلہرک :

— « یارجل کندیکی رسوای ایتدک »

دیمکله کيفت ، تبسم عالی بی مستلزم اولدی . بوکا

جواب و اکا دعا اولق اوزره : [ دنیانک رسوایانی  
آخرتک رسوایانندن اهنودر . یارب ! شو آدمه صدق  
و استقامت و ایمان نصیب ایت و انک قلبی فنالقدن  
بعید ایدوب خیره مائل ایت ] دیه بیوروب جناب فاروقه  
توجهله :

— « عمر بنله در بن عمرله یم . عمر هر نروده ایسه  
حق انکله در » .  
تقدیر کزینی ابدال و فرق فاروقی عال المال  
ایلدی .

وقت صلاتی بلال ، عرض و اعلام ایدردی .  
افندیز دخی مرضی و اضطراییله برابر مسجد شریفه  
کلوب امتنه نماز قیلدیریر ایدی . انجق مرضنک آخر  
ایامنده اوچ کون نمازه چیقهدی . یعنی آخر ایامنده  
اون یدی وقت نمازی جماعتله قیلهدی .

مرویدرکه بر یاتسو نمازی حضرت بلال ، حجره  
سعادتک قپوسنه کلوب [ الصلوة یا رسول الله ] دیه وقت  
صلوتی اعلام ایلدی . افندیز ایسه شدت مرضدن ناشی  
اوساعتده مسجد شریفه کله بیله جک برحالد . دکل ایدی .  
[ نمازی ابو بکر قیلدیرسون ] امرینی ویردی . حضرت  
عائشه رضی الله عنها :

— « یا رسول الله ! ابو بکر ، رقیق القلب و بکاء  
بر آدمدر . نمازده قرائته قادر اوله من عمره امرایدیکز »  
دیدى . بو سوزى بر کره دها سويلدى . افندیمز  
امر سابقى تا کید ایلدیکی حالدہ عائشه رضی الله عنها ،  
حضرت حفصه رضی الله عنہا یی توسیط ایدہ رک عرض  
سابقى بالمناسبه تکرار ایتدیر مکله طرف اشرف جناب  
رسالتیناهیدن معرض تویخده : [ مه انکن لانتن صواحب  
یوسف . مروا ابا بکر ان یصلی بالناس ] امر مؤکدی  
شرف صدور ایدہ رک بلال ، تبلیغ کیفیت ایلدی .

حضرت صدیق ، نماز قیلدیر مق اوزره جانب  
محرابه کلدیکی کبی محرابی وجود مسعود رسالتدن خالی  
کوروب تأثرندن کنندینی ضبط و امساکه درمانسز  
قالدی . دوشدی باییلدی . جماعت حاضرده بر فریاد  
قویدى . فریادک سینی رسول الله صلی الله علیه وسلم  
افندیمز ، حضرت فاطمه دن سؤال ایدہ رک اکلامغله علی  
و عباس رضی الله عنہما یی چاغیرتدی . مبارک قوللارینی  
انلرک اوموزلرینه قویمقدہ اولدینی حالدہ مسجد شریفه  
کلدی . و نماز قیلدیردقدن صوکره : [ ای مسلمانلر !  
سز ، جناب حقتک حفظ و پناهنده سکز . حق تعالی

سرك اوزريكزه بنم خليفه مدر . ايمدى كركدر كه تقوايه ملازمت و حقتك امرينى ايفايه مداومت ايده سكر . تحقيقا بن دنيا دن مفارقت ايده جكم [ ديدى .

بر ياتسو [۱] وقتى مسجد شريفده جماعت اصحاب كرام ، نماز ايجون ذات رسالت پناهى به منتظر ايديلر . افديمز ايسه شدت مرضندن صوك درجه ده مضطرب ايدى . نماز قيانوب قيانمديغنى صوردى . حضرت عائشه رضى الله عنها ، اصحاب كرامك مسجد شريفده انتظار . لرينى سويلدى . رسول اكرم صو امر ايتدى . اول صو ايله حاضر لوب نمازه قالمق ايستدى شدتن طولايى قالممدي . و يرنده كندينى غيب ايتدى . بر زمان صو كره اويانه رق نمازى صوردى . حضرت عائشه عين جوابى ويرمكله افديمز ، صو ايستدى و او صو ايله تكرار حاضر لندى . نماز ايجون مسجد شريفه كيتمك

[۱] ارتحال نبوينك بازار ايرته سى كوفى قبل الظهر وقوعه و ارتحال دن اول اون يدى وقت صلاته افديمز ، چيجه ميه رق ابو بكر ك امامت ايتديكنه كوره اوقات مذكوره نك اولكي سى اولق اوزره بو ياتسونك حسابه جمعه كيجه سى ياتسو نمازى اولسى لازم كليور .

اوزره یرندن قالقمغه تشبث ایتدی. فقط ینه قالقه میهرق  
 بیهوش اولدی و بو حال بو صورت اوزره اوج نوبت  
 اولدقدن صوکره ارتق نمازک ابو بکر الصدیق طرفندن  
 قیلدیرلمسنی امر بیوردی. کیفیت ابو بکره اعلام ایدلیدی  
 زمان حضرت ابو بکر رضی الله عنه، کندی حال رفته  
 باقهرق امامتی عمر الفاروقه تکلیف ایتدیسده عمر، انک  
 کندوسندن احق والیق اولدینی بیانیه قبول کیفیت  
 ایتدیکندن حضرت صدیق جماعته نمازی قیلدیردی.

ایرتهسی کون آز بر خفت حاصل اولمشدی.  
 جناب صدیق، صلات ظهیری دخی قیلدیرمق اوزره  
 ایکن افدیمز، ایکی قوللرینی ایکی عباسیلرک اوموزینه  
 قویمش اولدینی حالد مسجده شریفه کادی. صدیق  
 اعظم، مقدم هایون رسالتپناهی بی حس ایدرک محرابدن  
 کری چکلمه بی ایسه مدی. رسول الله صلی الله علیه  
 وسلم، اشارتله مقامنده ثابت اولهرق نمازی اتمام ایتسنی  
 امر بیوردی. و امر و ارزوسی موجبجه کندوسی  
 ابو بکرک یاننه اوطورتدیلر. بر روایت کوره ابو بکرک  
 جانب یسارنده دیکر روایتله نظراً خلف ظهرنده  
 اوطوروب سورده واردینی آیتدن تلاوته باشلادی..

نمازی قیلیدردی. شایان تأملدرکه سورمه وار دینی آیتدن  
تلاوته باشلادینی روایتی، او وقتک وقت ظهر اولدینی  
قول و روایتی اشکال ایدمور. محرابده بر امامک  
تلاوتندن ذهنه جهراً تلاوت متبادر اولدیغنه کوره  
وقت مذکور، جهری نمازلردن ایدی الله اعلم.

صدیق، قائماً حضرت رسول الله و جماعت اصحاب  
کرامده كذلك ابو بکره اقتدا ایلدیلر. تکبیر ابو بکر  
واسطه سیله رسالته اب انقیدمیزک نمازده کی افعال وانتقالاته  
واقف اولدیلر. [۱]

دیگر بر روایت کوره مؤذن، وقت صلاتی اعلام  
ایتدیکی زمان نزد عالیده عبدالله بن زمعه رضی الله عنه  
وارایدی. نمازک قیلنمسنی رسالته اب انقیدمیز امر ایتدی.

[۱] مع مافیه بویخنده کی اقوال مضطرب و متعارضدر.  
نبی اکرمک صدیقی امته نماز قیلدیرمق اوزره مأمور ایلدکدن  
صوکره حجره سعادندن مسجد شریفه کلوب صدیقک هم جنب  
ایسرنده هم خلف ظهرنده قاعداً نماز قیلدقلزینه دائر حضرت  
عائشه رضی الله عنهادن منقول حدیثلرده نوعاً محسوس اولان  
تعارضه نظراً بو حالک ایکی وقت نمازده وقوعه کلدرک جنب  
ایسرده اوطوردقلری دفعهده امام، خلف ظهرده بولندقلری  
مرهده مأموم اولدیغنه علما، قائل اولملردر.

عبدالله طیشاری چیقوب ابتدا عمر الفاروقه راست  
کلدیکندن: [ نمازی قیلدیر ] دیدی فاروق دخی محرابه  
کچدی . سیدالانام افندیمر ، حجره علیه لرندن محرابده  
فاروقك تلاوتی صداسنی ایشیدهرك :

— « بو سس عمرك آوازی دکلیدر ؟ »

دیه سوردی . اوت دیدیلر . او زمان همان بروضع  
انکار ایله : [ یاأبی الله ذلك و المؤمنون ] دیدی . حجره  
سعادتك پنجره سندن مسجد شریفه طوغری کوزوکهرك:  
— « یوق نمازی ابو بکر قیلدیرسون »

دیه امر ایتدی . بونك اوزرینه حضرت عمر ،  
محرابدن کری چکلدی . و عبدالله بن زمعه رضی  
الله عنه :

افندیمرك امام اولدینی یوم السبتك صلوٰة ظهرنده و مأموم  
اولدینی ده یوم الوفاتی بولنان اننن کونی صلوٰة صبحنده ایدوکنه  
مبنی حدیث عائشه ده تعارض بولمیدیئك بیرق طرفندن بیان  
ایدلیدیکنی عینی تصریح ایتمشه ده اننن کونی صباح نمازینه چیقه .  
میوب انجق باب الحجره دن جماعت و صفوف مسلمینی مطالعه  
وملاحظه ایله ارحاءالستر ایلدیکنی انس رضی الله عنه ابلغ وجه  
اوزره صراحة بیان ایتدیکنه کوره بوکا قارشى قول بهیقینك  
مراجوحیتی درکاردر .



— « رسول الله صلى الله عليه وسلم سکا نمازی عمر  
قیلیرسون دیمدی ؟ »

دیه صوردی . عبدالله :

— « کیمسه یی تعیین ایتدی و لکن ابو بکری  
اصحاب اره سنده کورمدم حضار ایچنده سندن اولی  
کیمسه یی کوره مدیکمدن سکا سویلدم »

جوانی ویردی . حضرت فاروق :

— بن بویه اولدیغی بیلمدم بیلسیدم امام اولمز

ایدم »

دیدی .

\*  
\*\*

برکون حضرت علی کرم الله وجهه ، نزد سعادتدن  
چیقدی . اصحاب کرام ، رسالتناه افندیملک حالنی سؤال  
ایتدیلر . حضرت علی ، بره و خفت اوزره اولدیغی  
سویلدی او زمان حضرت عباس رضی الله عنه ، انک  
النی طوتوب کیزلیجه :

— « یا علی ! قورقرم که حضرت سیدالانام ،

بو مرضنده قریباً انتقال ایده جکدر . سنده صوکره بر  
آخر آدمک امرینه مأمور اوله جقسک . زیرا بن ،

وجوه بنی عبدالمطلبک موت اثناسنده کی احوال مخصوصه -  
 صه سنی طائیرم . کل سنکله نزد هایونه واروب صورده لم ،  
 کندیسندن صوکره امر معلوم کیمده در . اگر بزده  
 اوله جق ایسه بیللم . غیر مزده اوله جق ایسه بزى اکا  
 توصیه ایتمسنى رجا ایدلم ،

دیدى . حضرت علی :

— « یا ابا الفضل ! واللّه بز ، اگر او مسئله یی  
 صوروبده اوده بزى اندن منع ایدرسه ناس اندن  
 صوکره انى بز ادا ویرمز لر بناء علیه صورمیه جغم »  
 جوابی ویردی .

..

ام سلمه و أم حبیبه رضی الله عنهما ، افندیمرک  
 باشی اوچنده اوطور یوزلردی دیدیلرکه :

— « یا رسول الله ! بز ، حبشه ده ماریه اسمنده  
 کوزل برکلیسا کوردک . دیوارلرنده صورتلر منقوش  
 ایدی . »

رسول خدا افندیمر ، بو سوزه قارشى :

— « او جماعت ، بر قومدرکه کندیلرندن بر صالح  
 کیمسه فوت اولورسه قبری اوزرینه مسجد یاپوب

دیوارینه اوپله صورتلری نقش ایدرلر . انلر ، نظر  
الهیده خلقك فنالیدر ،

بیوردی . حق عالیلرندہ امتك اطراسندن متحاشی  
ایدی . قرون سالفہ خلقك نیلری حقندہ کی اطرالری  
کبی بر حال وقوعندن امتی تحذیر ایچون بهض وصایاده  
بولندی . حتی وفاتلرندن بش کون اول یتاقده یوزینه  
بر اورتی اورتوب یاتیور ایدی . بونالدقجه یوزینی کاه  
آچار صوکره اورتردی . ایشته اوپله بر حالده ایکن  
اورتوبی کیده رةك : [ لعنة الله على اليهود و النصارى  
اتخذوا قبور انبيائهم مساجد ] دیه بیورمشدر .



جمعه ایرته سی کونی جناب حق جل وعلادن جبرائیل  
علیه السلام ، استفسار خاطرہ کلدی . فرداسی بازار  
کونی ینہ استفسار حال و خاطر ایچون کلدی . یمندہ  
اسود عنسینك خبر قتانی ده کتیردی . افندیمزده اصحاب  
گرامنه تبلیغ بیوردی .

بازار کونی اسامہ دخی جرفدن حضور اقدس  
رسالتپناهی یه کلدی . افندیمز ، بایغین بر حالده ایدی .  
شدت مرضدن تکام بیورمه مدیلر . اسامہ باشنی اکہرک

رأس و ید سعادتى اوبدى . افندیمز ، ینه سوز سويله .  
 به میهرک یالکز مبارک الارینی سمایه قالدیروب اسامه نکه  
 اوزرینه وضع ایتدی که حقنده دعا ایتدکری اکلاشیلور  
 ایدی . اسامه اندن صوکره معسکره عودت ایتدی او  
 کیجه جرفده قالدی .

نزد هایونلرنده قالمش اولان التی دیناری تصدق  
 ایچون حضرت عائشه یه تسلیم ایتدیکنک عقیبنده کندیلرینه  
 استغراق حالی کلمشدی . بر مدت مستغرق قالدقن  
 صوکره اویاندی ، و سؤال ایتدی . حالبوکه حضرت  
 عائشه ، وجود مسعود نبوی ایله مشغول بولمسنه مبنی  
 هنوز یرندن قالقه مامش ایدی . دینارلرک کندوسنده  
 اولدیغنی سويلدی . افندیمز ، تصدق امر ایدوب ینه  
 کندندن کچدی . اویاندیغنی زمان بردها صوروب جواب  
 اولی النجه دینارلری آلدی . کف سعادتلرنده صایدی  
 [ماظن محمد بر به لواقی الله و عنده هذه] دیه حق تعالی یه  
 قارشى او قدر دیناری استکثار ایتدی . حضرت علی  
 کرم الله وجهه یه کوندروب انک یديله فقرايه تقسیم  
 ایتدیردکن صوکره : [ایشته شمدی مستریح اولدم]  
 دیه بیوردی .

شدت مرضدن بیهوش قالدینی بر صروده قم سعا -  
 دتترینہ امہات مؤمنین بر علاج آقیدیلر ! حضرت نبی  
 اکرم، اکراہلرندن ناشی مذکور دوانک آقیدلماسنی  
 مبارک اللریلہ اشارت ایدہ یور ایدی . او درلو اشارتلی  
 خستکانک دوا دن اکراہلرینہ حمل ایلہ دوا یی آقتمده  
 اصرار ایلدیلر . استغراق حالی کچدکن صوکرہ سؤال  
 و استجوابہ شویله باشلادی :

— « آغزیمہ اقتدیغکز دوا نه ایدی ؟ »

جواب ویردیلر :

— « عود ہندی ، بر مقدار ورس ، بر قاج قزارده  
 زیت یاغی »

— « سزہ بو دوا یی کیم توصیه ایتدی ؟ »

— « اسماء بنت عمیس »

— « بو بر طبرکہ انی اسماء حبشہده او کړندی

بو علاجی سزہ هانکی مرضدن قورقوبده یاپدیکز ؟ »

— « ذاة الجنبدن »

بو جواب اوزرینہ رسول اللہ :

— « ذاة الجنب شیطانندرن . حق تعالی ، انی بنم

اوزریمہ مسلط ایتمز . ایمدی بو خانہده عباسدن بشقه

بوانا نلرك جمله سنك اغزينه او علا جدن آقيديكزا .  
 ديه امر بيوردي . بناء عليه حاضر اولانلرك جمله .  
 سنك اغزينه آقيدلدي . حتى ميمونه رضى الله عنها ، او  
 كون اوروجلى اولدينى حالدہ مجرد فرمان رسالتپناهي  
 امثال مقصديله انك دخي اغزينه آقتمشاردي .



ع

## انتقال و ارتحال نبوی

ایام حیات رسالتپناهی لربنك يوم واپسين اثني که  
 او کون ارتحال وقوع بولمشدر صباح نمازنده حضرت  
 ابی بکر الصديق ، جماعت اصحاب کرامہ مسجد شریفده  
 نماز قیلدیرمقدہ ایکن سید الانام علیه الصلوة والسلام  
 افندیمز ، ایکی عباسیلره متکئاً حجرۃ سعادتک مسجده  
 اولان قیوسنه کلدی . پرده بی قالدیرتوب جماعت اهل  
 صلاتی و صفوف مسلمینی ملاحظه ایله فرخناک اوله رق  
 تبسم بیوردي .

حضرت صديق ، شو طلوع ناکهانی بی افندیمزک

نماز ایچون مسجده کلدیکنه حمل ایدره رک محرابدن کری  
چکلمکه و جماعت مسلمین دنخی فرخلرندن هیجانه  
باشلادی. رسول الله، انلره اتمام صلاتی مبارک اللریله  
امر و اشارت بیورروب ایجری چکلدی. و پرده یی  
ایندیردی. که مسجد شریفه صوکه خروج و نظرلری ده  
همان بو اولمشدر.

وقت زوال شمعدن آز اول جبرائیل ایله عزرائیل  
علیهما السلام برلکده باب سعاده کلدیلر. جبریل، ایجری  
کیره رک عزرائیلک قپوده بکلدیکنی و ایجری یه کیرمک  
ایچون اذن ورخصت ایستدیکنی خبر ویردی. صوکره  
افندیمنزک اذنیله عزرائیلده ایجری کیردی. سلام ویردی.  
و امرینه مأمور من الله اولدیغنی سویلدی. یعنی ارزو  
بیوریلور ایسه قبض روح ایدم جکنی والا کیری کیده.  
جکنی بیلدیردی. اوزمان رسول معظم افندیمنز جبرائیلک  
یوزینه باقدی. بوکا نه جواب ویریم دیمکدی. جبریل:  
— «یا احمد! تحقیقا جناب حق، سکا مشتاقدر»  
دیمکله افندیمنز، عزرائیله:

— «مأمور اولدیغک وظیفه یی ایفا ایت»

جوانی و یروب عزرائیل دخی قبض روحه مبا-  
درت ایلدی. انک قبض روحه تشبیهی افندیمرک حالنده  
کلی و ناکهانی بر تغیر حاصل ایتدی .

اسامه بو صباحده جرفدن حضور سعادته کلمشدی.  
اولکی صباحه نسبتله رسول اکرم بر درجهیه قدر افاقت  
حالنده بولنه رق : [ اغز علی برکة الله ] دیه بیوردی .  
اسامه دخی معسکرینه عودتله حرکت امرینی ویرمسنی  
متعاقب رکوب ایده چکی صروده والدهسی ام ایمن رضی  
الله عنہادن آدم کلوب سید الانام علیه الصلوة والسلام  
حضر تلیزینک حالت تزعه اولدینی خبر برکدرینی  
ویردی. اسامه و دیگر اصحاب کرام، کیری مدینه طیبیه  
طوغری عودت و حرکت ایتدیلر .

حضرت علی، قولتوغنه کیروب افندیمری فراشنده  
اوطور تمشدی. مبارک باشنی عاینک قولی اوزرینه قویه رق:  
[ یا علی! سریة اسامه نك تجهیزی ایچون فلان یهودیدن  
اقچه استقراض ایتشدم. انی ذمتدن ادا ایت. یا علی!  
سن کنار حوض کوثرده امتمدن اک اول بکا ملاقی



و بندن سوکره دنیاده بر خیلی مکروه لرله مصاب اوله-  
 جقسک اما صبر و آخرتی اختیار ایت [ دیدی. او آراق  
 اوکنه بر قدح صو براقدیروب دست شریفلرینی صویه  
 قویر انکله یوزینی مسح ایدردی. و [ اللهم اغنی علی  
 سکره الموت ] دیر ایدی، اک سوکره [ الصلوة و ماملکت  
 ایمانکم ] بیوردی. فقط بو سوزی سوبلرکن ارتق سوز  
 سوبایه جک حالی قالمش ایدی. لسان شریفنی دخی  
 اداره ایدمه یه رک صدرندن ترصرغ طریقله سوبلدی .  
 ودهان شریفلرینک باری عاینک اوستنه آفدی. زوجات  
 طامرات، وراء حجابدن فریاده باشلادیلر. حضرت علی،  
 تحمل ایدمه دیکنندن « یا عباس ! بکا یاردم ایت ، دیه  
 عباس ایله برلکده افندیمری، یاتیردیلر که سکره الموت  
 حالی ایدی. شدندن ناشی کاه قیزاریر کاه صاراریر کاه  
 صاغ النی کاه صول الی کری چکردی وروی ورخسار  
 برانوارندن تر دوکردی. صوک نفسنده حضرت عائشه نك  
 سحری ایله نحری ارمهنده ایدی. سقف یتنه طوغری  
 باقهرق النی یوقاری قالدیردی. و [ الرفیق الاعلی ] دیدی.  
 او آنده الی ینه اشاغی دوشوب عالم فانیدن کچدی ..  
 بو وقعه هائله، کوندوز وقت زوالده وقوعه کلشیدی .  
 اللهم صل علیه وسلم دائماً ابداً .

\*\*\*

وقعة هائله نك عقيب حدوثه رجال اهل بيت  
 نبوت حجره سعادته كيروب نساء النبي اوزرينه حجاب  
 آصديلر. اوزمان حجره نك بر كوشه سندن آواز مجهول  
 ايله : [ السلام عليكم اهل البيت ورحمة الله و برکاته  
 كل نفس ذائقة الموت و انما توفون اجوركم يوم القيمة ]  
 تعزیه سنی ایشیدیلر. کیمک آوازی اولدیغنی فرق ایدم -  
 مدیلر !

اصحاب کرام، مسجد شریفده ایدیلر. اهل بیت  
 نبوتک فریادلرینی ایشیده رک عموم اصحاب ، آراسنه درد  
 فرقتک فغان و اضطرابی دوشدی . شدت تأثر دن ماشی  
 مؤمنین سرسم و حیران اولدیلر. هر کسده بر درلو حال  
 یوز کوستردی .

بعض اصحاب کرامک دیللری طوتلدی . نطقه مجا -  
 للری قالدی . حضرت عثمان رضی الله عنه بو زمره  
 صامته دن ایدی ! . بعضلر ، جماء کبی غیر متحرک قالدی .  
 حضرت علی بو صنف ساکتدن ایدی ! . بعضلر خسته

اولدی . عبد الله بن انیس خستکان زمره سندن ایدی  
 حتی بومرض تأثرله وفات ایامشدر! . بمض ذوات دخی  
 بی عقل و شعور اولدیلر . حضرت عمر ، انلردن ایدی .  
 عبدالله بن زید الانصاری حضرتلری ، باغچه سنده  
 مشغول ایکن اوغلی ، واروب کندوسنه ارتحال انبی خبر  
 مدهشی ویزمسيله عبدالله کمال تأثر و تأسفندن ناشی او  
 آندہ : [ اللهم اذهب بصری حتی لا اری بعد حبیبی محمد  
 احدآ ] ديه دعا ایتیش و درحال نور بصردن محروم  
 اولمشدر ! .

حضرت ابی بکر الصدیق ، مأذوناً سنجده کی خانه  
 سنه کیتمشدی . حضرت عمر ، مسجد شریف قبوسنده  
 قیلنجی آلوب : [ والله مامات رسول الله ] ديه یمین  
 ایتمکده و رسول الله موتنه قائل اولانلری قیلنج ایله  
 اولدیره جکنی علناً وعلی التوالی سویلمکده ایدی .

حضرت عمرک شویمین وادعاسی ، موت نبی بحشده  
 خالقک بعض کونه شکوک و اشتباهنه سبب اوله رق اسماء  
 بنت عمیس ، ظاهر شریف رسول الله کی مهر نبوتی  
 ایله یوقلادی او زمان خاتم نبوت ، یرنده قالمامشدی .

اسماء: [تحقیقا رسول الله، وفات ایتدی. زیرا مهر نبوت یرنده یوقدر] دیدی.

حضرت ابی بکر، هنوز سنجده ایکن کیفیتہ مطلع اوله رق را کباً و با کباً مسجد شریفه کلدی. کیمسه یه قونوشمقسزین مسجودن حجره سعاده کلدی. جسده اطیب رسالتیناهی برده ایله مستور طور یور ایدی. وجه انورندن ردایی قالدیروب مبارک التی اوچ کره اوپدی. و: [وانبیاء و اصفیاء و اخلیاء] دیدی آغلادی [بابی انت و امی لا یجمع الله علیک موتین اما الموتة التی کتبت علیک فقد متها] دیدی طیشاری چیقوب حضرت عمره تصادف ایتدی. او، حالا اصرار ایتمکده ایدی. اکا تنییه و اخطار ضمننده: [ایها الخالف علی رسلک = ای یمین ایدیجی آغیر اول] دیدی.

بو سوز، حضرت عمر الفاروقک حال خروشانی تسکین ایتشدی!. حضرت ابی بکر، موت النبی بمحنده امتک تشنت افکارینی فنا کوره رک منبر رسول الله چیقدی. خلق، عمر الفاروقی براغوب ابوبکره توجه ایتدیلر. حضرت صدیق بر خطبه او قودی. خطبه ده ابتدا جناب حقه حمد و ثنا و روح محمد المصطفایه صلوة

وسلام اهدا ايدوب صوكره : [ من كان يعبد محمداً فان  
محمداً قد مات ومن كان يعبد الله فان الله حي لا يموت ]  
ديدى . و [ ما محمد الا رسول قد خلت من قبله الرسل  
افان مات او قتل انقلبتم على اعقابكم . . . ] و [ انك ميت  
وانهم ميتون ] آيت كريمه لرئى تلاوته تأييد كيفيت ايلدى .  
حضرت صديقك شو بياناتى خاق اوزرنده عظيم  
تأثير حاصل ايتمشدى . عمره عدم موت رسول الله  
حقنده كى افاده سيله امتده حس اولنان شكوك بردنبه  
زائل اوله رق هر كسك عقلى باشنه كلدى . فاروق دخی  
سكوت ايتدى و حيرتله يره اوطوردی ..

ارتق حقيقت حال ، اكلاشيلدى . خلق ، حبيب  
خدانك موت و وفاته اينانديلر : [ انالله وانا اليه راجعون ]  
ديديلر .

ايشته اوراده اسامه و معيتى جرفدن درون شهره  
بيردى . بريده دخی لواء شريفى باب حجره سعادتك اوكنه  
ديكدى . بو ايسه بر مرتبه دها تأثر و دهشتى موجب  
اولدى .

سيد الانام عليه الصلوة والسلام افنديمز ، هجرتلرى  
زماننده افق ام القرادن طالع ايله مدينه طيبه ي شمس

الهدى اولدقلرى حالدۀ تشریف و تنویر ایتمشدی . بو  
کرم وقوع توارسیله اورتهانی ظلمات و حزن و کدورت  
قابلا دی .

خلق، شو ظلمت حزن و کدر ایچنده حزن الیملرینک  
حاصل ایلدیکی یأس و حیرتله شاشقین شاشقین بولنیور -  
لردی . ایچلرنده اک زیاده متانت حضرت صدیقده کورو -  
لمکده ایدی .

ابو بکر الصدیق، اهل بیتۀ مراسم تعزیت و تساییت  
ایفا و غسل و تجهیز و تکفین نبینک انلره . فوض ایدوکنی  
اعلام و انبا ایلدی . —

جسد اطیب نبوینک ثیاب طاهره می اوزرنده اولدینی  
حالدۀ می یوقسه اموات سائرۀ کبی تجرید ایدوبده می  
غسل اولنه جنی حقنۀ اختلاف ایتشلردی . طرف  
حقدن اوزرلرینه اویقو سر سملکی کبی بر حال ویریلرک  
حاضرونک ذقنلری سینهلری اوزرینه کلدی . اوارهده  
[ غسل ایتیکز زیر طاهر در ] دیه برصدا ایشیدلدی .  
اهل بیت بورایی قبول ایتدیله . عباس رضی الله عنه  
ماهیتنی بیمدیکی او یله برصدا ایچون سنت پیغمبری ترک  
ایده میه چکی بیانیه اورانی رد ایدرکن عین حال برایکنجی

دفعه دها عارض اوله رق [آنوایی اوزرنده اولدینی حالدہ  
غسل ایدیکنز اولکی ابلیس ایدی بن خضرم] دیه برصدا  
دھا کلدیکندن اکا قرار ویرلدی .

عباس رضی الله عنه جسد شریف اوستنه داخل  
بیت سعادتک برکوشه سنه ثیاب یمانیه دن پرده چکوب  
حضرت علی بی پرده دن ایچری یه قویدی . جسد اسعد  
نبوی ، شو حجاب ایله جدار ارسننده ایدی . خارج  
مغسلده اصحاب کرامدن برخیلی ذوات حاضر و مجتمع  
ایدی پرده نك طیشاریسی ایله قارشی دیوار ارسننده  
عباسک اذنیله رجال بنی هاشم اوطوردیلر .

دیگر روایتلره کوره فضل بن عباس ایله ابوسفیان  
بن الحرث بن عبدالمطلبی دخی حضرت علی ایله برالکده  
داخل و درون حجابہ براقشدی انحق علینک ایله غسل  
ایدلیدی مشهور و صحیحدر .

شو خدمت شرفندن محروم ایدلاملری ایچون  
ایچلرندن برینک اثناء غسل و تکفینده داخل بیتده  
بولندیرلمسی حقنده بعض انصار کرامک و یاخود کندوسنک  
وقوع بولان رجا و استدعای اوزرینه اصحاب بدردن

اوس بن خولی رضی الله عنه حضرتلری علینک اذن  
و اجازتیه ایجری قبول اولندی. فقط امر غسله اشتراك  
ایدمدی.

فضل و قثم واسامه و شقران صود و کدیلمر. یاخود  
پرده دن ایجری حضرت علی به صو و یردیلمر. رسول الله  
صلی الله عایه وسلمک [لایری احد عورتی الاطمست عیناه  
غیرک] دیه واقع اولان وصیتی اقتضاسی اوله رق حضرت  
علینک و رفیقلمرینک کوزلری باغلی ایدی. . اولکی غسل  
سعد بن خیشمه نك قباده مالی بولنان بئرغر سدن الدقلری  
ماء خالص ایله غسل ثانی ماء و سدر ایله غسل ثالث ماء  
و کافور ایله اولق اوزره اوج نوبت غسل ایدلدی. غسل  
ایدیلور ایکن اوزرنده قیص شریف ایله مجول [قیصه  
انتاری] بولمنش و بعد الغسل صیقیله رق صولری چیقارلمشدر.  
صوکره ذراع و کف شریفلمرینی ییقادیلر. بیاض اوج  
ثوب سحوولی ایله بالتکفین سریره وضع و عود ایله  
تجمیر ایدلدی. و وصیتی موجب عالیه سنجه حجره شریفده  
تک و تنها براغیلدی. صالی کیجه سی حجرده طوردی.  
صالی کونی اولنجه ابتدا اهل بیت رسالتدن حضرت  
علی صوکره عباس، صوکره نسوانی، صوکره مهاجرین



وانصار وصبيان دن حجره سعادتك الهيلديكي قدرا صاحب  
 كرام صره طوروب امامسز اولدقلى حالدۀ نمازىنى قىلر  
 وصوكره بردىكر جماعت كىر ايدى .

—

غسلندۀ اولدينى كى محل دفندۀۀ اختلاف اوله رق  
 كىمى بقيه، كىمى مكۀ مكرمه يه، كىمى قبر ابراهيم خليل الله  
 كتورلمسى رأيندۀ بولنور ايكن حضرت صديق رضى الله  
 عنه رسول الله صلى الله عليه وسلمك [ ما قبض الله نبياً  
 قط الا دفن حيث قبض روحه ] ديركن ايشتيديكى امته  
 تبليغ ايدوب اكا قرار ويرلمشدر .

كذلك قبر انورينك صورت طرح وتنظيمندۀۀ  
 اختلاف يوز كوستردى . كىمى شق وكىمى لحد اوله رق  
 قازلمسى رأيندۀ بولندى . مدينۀ سعادته او زمان ايكى  
 ذات وار ايدى كه برى شق ، ديكرى لحد ياپار ايدى .  
 لحدى ابو طلحه زيد بن سهل ياپار ايدى ابو عبيدۀ عامر  
 بن عبدالله الجراح حضرتلى ده شق اوله رق حفر و  
 تنظيم وقبر ايدردى . عمر ايله عباس رضى الله عنهماك  
 برى شو ايكى ذاندن هر برينه خبر كوندرمكله برابر  
 [ يارب خير ليسنى رسولكۀ اختيار ايت ] ديه دعا دى .

ایتمش واول کلانک قبول قبری تقرر ایلمشدر .  
 ابوطلحه اول یتشمسنه مبنی فراش سعادتن لحد  
 طریقله قبر پر نور بنی حفر و تمیشه ایدلدی بازار ایتسی کوننک  
 بقیه سی ایله صالی کیجه سی و کوندوزی کچوب چهارشنبه  
 کیجه سی سحر وقتنده نعلش پاک سعادت انجق شفیر  
 مقبره رسالیناهی به قونیه بیلمشدی شو تاخر مدید ،  
 حضرت صدیقك انتخای صد دنده تحدث ایدن مناقشه نك  
 آز زمان ایچنده فیصلپذیر اوله مامسندن ایلری کلشدی .  
 درون وزمین قبر انوره ذات اقدس لولا کیلرینك  
 قطیفه حمراسی فرش اولندی . مذکور قطیفه خیر غنیمتندن  
 حصه سنه دوشمش ایدی . شقران [ والله لایلبسها احد  
 بعدك ] دیه قطیفه نی دوشه دی جسد اطبی قبله جانبندن  
 ودیگر روایت کوره ایاق طرفندن قبره ایندیر دیلر .  
 علی و فضل و قثم ابنا عباس و شقران قبره ایندیر دیلر . دیگر  
 روایت کوره عبدالرحمن بن عوف دخی اینمشدی . قبردن  
 اك صوکره چیقان روایت صحیحیه کوره قثم ایدی . .  
 دیگر روایت کوره حضرت علی ایدی .

مغیره بن شعبه دخی اصحاب کرام ایچنده رسول  
 الله صلی الله علیه و سلمه اك زیاده حدیث العهد اولمق

شرفه اختصاص امید و ارزوسيله عن قصد قبر سعادت  
دوش-وردیکی خاتمی چیقارمق بهانه سیه گیره رک قدم  
سعادت مسیح ایدوب چیقمشدر. بر روایتده حضرت  
علی او زمان مغیره یی قبره گیره که بر اقامه شد.

قبر منوری بر قوله کوره مسطح و مستوی قول  
آخره کوره مسنم و محذب و یردن بر قاریش مرتفع  
یایدیلر. بلائ حبشی رضی الله عنه بر قبره صوکتوروب  
قبر مسعودک باش طرفندن ایاغنه دکن جنب یمننه دوکدی  
جنب یساری دیواره متصل اولمق سبیلله او جانبه  
کجه میه رک صوبی جداره دوکدی. بو رش الماء عقیبنده  
ایدی حضرت فاطمة الزهراء رضی الله عنها حجره سعادت  
کیردی. تراب قبر عالیدن بر قبضه آلوب کوزلرینه  
سوردی و اغلامقده اولدینی حاله :

هاذا علی من شم تربة احمد      ان لا یشم مدی الزمان غوایا  
صبت علی مصائب لوانها      صبت علی الایام صرن لیا لیا

دیدی. اندن صوکره ارتحاله دکن کولدیکی کورولمدی.  
ینه همان او آنده ایدی بر اعرابی دخی حب  
شدیدی ایه برابر تصادف ایلدیکی مصیبت افتراقدن

ناشی کند و سینه یأس و حیرت الویرمش اولدینی حالدہ  
 عاشقانه و حزین بر وضع ایله :

هلا دفتم رسول الله في سفت من الالوة احوى ملبسا ذهباً  
 اوفى سحيق من المسك الذكي ولم ترضوا لجنب رسول الله مترباً  
 خير البرية اتقاها و اكرمها عند الاله اذا ما ينسبون ايله

ديه خطاب ايتدی . جناب ابی بکر اکا : [ شو دیدیگک  
 سوز ایله اللهک سنی عفو ایتمش اولدینی مأمول  
 ایدرم و لکن نه چاره که بوده بزم ستمزدر ] ديه  
 سويلدی .

حضرت عائشه رضی الله عنها بر زمان رؤیاسنده  
 خانه سینه کوکدن اوچ قمر ایندیگنی کوروب پدرینه  
 سویلرکن نه درلو تعبیر و تاویل ایتدیگنی پدری سـؤال  
 ایتمش عائشه دخی رسول الله صلی الله علیه و سلمدن اوچ  
 اوغلی اوله جنی ایله تاویل ایتدیگی جوابخی ویرمشدی .  
 حضرت صدیق ختام دفن نیدن صوکره عائشه  
 رضی الله عنها یه : [ هذا احد اقمارك وهو خيرها ] دیدی .  
 رؤیای مذکور و جهله اقمار ثلثه نك غروبگاه پرفروغی

حجره مطهره صديقيه اولمش وانجق مراقد مسعوده نك  
ترتيب وضعيتي اختلافه اوغرايه رقيدي درلو كوسترلمشدر.  
بر روايته كوره شويله كوستريليور:

قبر النبي صلى الله عليه وسلم

قبر ابى بكر الصديق رضى الله عنه

قبر عمر الفاروق رضى الله عنه

ديكر روايته شو ترتيبده در :

قبر عمر الفاروق رضى الله عنه

قبر النبي صلى الله عليه وسلم

قبر ابى بكر الصديق رضى الله عنه

روايت اخرايه نظرآده وضعيت آتیه اوزره در :

قبر عمر الفاروق رضى الله عنه

قبر النبي صلى الله عليه وسلم

قبر ابى بكر الصديق رضى الله عنه

مدینه منورہ اول و آخر بویلہ بر مصیبت دہا  
 حادث اولامشدی . ہرکس درد و کدرندن سراسمہ  
 اولدی . بعض اصحاب کرام مصیبت فرقتی تعدیلہ باشقہ چارہ  
 بولہ میہرق ہجر دارہ مجبور اولدی . بلال حبشی رضی اللہ  
 عنہ اوزمرہدن ایدی شامہ کیتدی . حضرت صدیقانی  
 ینہ مسجد رسول اللہہ مؤذن بولندیرمق ایستدیسہدہ  
 بروجہ مسرود درد فراق نبوی یتحمل ایدہ مامکدہ اولاسنہ  
 مبنی شامہ کیتمکہ مجبور ایدوکنی سویلمککہ صدیق دہ  
 ایلشک ایدہ مامشدر . بلال الی ماہدن فضلہ برمدت  
 شامدہ طوردی صوکرہ روضہ نبویہ نک زیارتی ترک و  
 اہمال ایتمش اولدیغنه دائر حبیبی طرفندن رؤیاسندہ تعریض  
 آمیز بر اشارت علیہ ظہور ایدہ رک همان زیارت روضہ  
 رسالت ایچون مدینہ پاک سعادتہ عزیمتہ مسارعت ایتمش  
 ایدی . اوندن اوایلہ ہر سنے شامدن بر نوبت مدینہ  
 منورہ یتہ کلوب زیارت روضۃ النبی ایلہ تعدیل درد اشتیاق  
 ایدردی .

دیگر بعض اصحاب کرام دخی بالعکس مدینہ  
 منورہدن بر درلو انفکاک ایدہ میہرک دائما جوار روضہ  
 مطہرہدہ بولنور لر و زیارت و حسن مجاورت قبر پیغمبر ایلہ

متسلي اولورلردى كدرلرينى صدر وسينه آشنا كلرنده  
ضبط وامساك ايده مدكلرتدن مرثيه سويلرلردى . حضرت  
عائشه رضى الله عنها اغلر كن :

قد كنت لى جبلاً الودى بركنه امشى البراح وانت كنت جناحى  
واليوم اخضع للضعيف واتقى منه وادفع ظالمى بالراح  
وادا دعت قرية شـجـنـالها يوماً على فتن بكيت صياحى  
مرثيه سنى سويلمشدرد . عمه مكرمه رسالتينا هيلرى  
صفيه رضى الله عنها دخى :

الا يا رسول الله كنت رجاءنا وكنت بنا رؤفاً رحيماً نبينا  
وكنت بنا رؤفاً رحيماً نبينا لعمرك ما ابكى النبي لموته  
كان على قلبى لذكرى محمد افاطم صلى الله رب محمد  
ارى حسناً ايمته وتركته قدى لرسول الله امى وخالتى  
صبرت وبلغت الرسالة صادقاً فلوان رب العرش ابقاك بيننا  
عليك من الله السلام تحية وكنتم بنا برأ ولم تك جافياً  
ليبك عليك اليوم من كان باكياً ولكن لهرج كان بعدك آتياً  
وما خفت من بعد النبي المكاويا على جدث امسى بيثرب ثاويلا  
يبكى ويدعو جده اليوم نائياً وعمى ونفسى قصرة ثم خالياً  
وقومت صلب الدين ابلج صافيا سعدنا ولكن امره كان ماضيا  
وادخلت جنات من العدن راضياً

مرثيه سنى سويلدى . عم زاده عايلرى ( ابوسفيان بن  
الحارث بن عبدالمطلب ) دخى :

ارقت وبات ليلى لايزول  
 واسعدني البكاء وذاك فيما  
 فقد عظمت مصيبتنا وجلت  
 فظل الناس منقطعين فيها  
 كأن الناس اذ فقدوه عمى  
 وحق لتلك مرزية علينا  
 واخذت ارضنا مما عراها  
 فقدنا الوحي والتزل فينا  
 وذاك احق ما سالت عليه  
 اصبنا بالي وقد رزنا  
 بي كان يحالو الشك عنا  
 ويهدينا فلا نخشى ضلالاً  
 ويخبرنا بظهر الغيب عما  
 فلم نر مثله في الناس حياً  
 افاطم ان جزعت فذاك عذر  
 فعموذي بالعزاء فأتني فيه  
 فقول في ابيك ولا تملي  
 فقبر ابيك سيد كل قبر  
 صلاة الله من رب رحيم

وليل اخي المصيبة فيه طول  
 اصيب المسلمون به قليل  
 عشية قيل قد قبض الرسول  
 كأن الناس ليس لهم حويل  
 اضر بلب حازهم عليل  
 وحق لها تطير لها العقول  
 تكاد بنا جوانبها تميل  
 يروح به ويفدو جبرئيل  
 نفوس الناس اوكرت تسيل  
 مصيبتنا فحملها ثقيل  
 بما يوحى اليه وما يقول  
 علينا والرسول لنا دليل  
 يكون فلا يخون ولا يحول  
 وليس له من الموق عديل  
 وان لم تجزعي فهو السبيل  
 ثواب الله والفضل الجزيل  
 وهل يجزي بفعل ابيك قيل  
 وفيه سيد الناس الرسول  
 عليه ولا تحول ولا تزول

حسان بن ثابت رضي الله عنه دخی :

ما بال عينك لا تنام كأنها  
 جزعاً على المهدي اصبح ثاوياً  
 كحلت ما قيها بكحل الارمد  
 ياخير من وطى الحصى لا تبعمد



يا ويح انصار النبي و نسلهم  
 جنبي يقيك الترب لهفي ليتنى  
 اقيم بعدك في المدينة بينهم  
 بابي و اى من شهدت وفاته  
 وظللت بعد وفاته متبلاً  
 اوحل امر الله فينا عاجلاً  
 فتقوم ساعتنا فمناقي طيباً  
 يا بكر آمنة المبارك بكرها  
 نوراً اضاء على البرية كلها  
 يارب فاجعنا معاً و نينا  
 في جنة الفردوس فاكتبها لنا  
 والله اسمع ما بقيت بميت  
 فالله اهداه لنا و هدى به  
 صلى الاله و من يحف بعرضه  
 به اظهار حزن و تأثر يتمشدر .

بعد المغيب في سواء المسجد  
 غيبت قبلك في بقيق الفرقد  
 يالهف نفسى ليتنى لم اولد  
 في يوم الاثنين النبي المهتد  
 ياليتنى صبحت سم الاسود  
 من يومنا في راحة اوفى غد  
 محضاً ضريبتك كريم المحتد  
 ولدته محضنة بسعد الاسعد  
 من يهد للنور المبارك يهدت  
 في جنة تنبي عيون الحسد  
 يا ذا الجلال و ذا العلاء السؤدد  
 الا بكيت على النبي محمد  
 انصاره في كل ساعة مشهد  
 و الصالحون على المبارك احمد

حضرت ابوبكر الصديق رضى الله عنه دخی بعض  
 مراثنى سويلمشدر :

يا عين بكى ولا تسأى  
 على ذى الفضائل و المكرمات  
 على خير خندف عند البلا  
 فصلى المليك ولى العباد  
 و حق البكاء على السيد  
 و محض الضريبة و المحتد  
 امسى يغيب فى الملحد  
 و رب البلاد على احمد

فكيف الإقامة بعدال      حبيب زين المحافل و المشهد  
فليت الممات لنا كانا      و كنا جميعا مع المهتدى

لما رأيت نبينا متجندلاً      ضاقت على بعرضهن الدور  
فارتاع قاي عند ذاك لهلكه      والعظم منى ماحيت كسير  
اعتيق ويحك ان حبيبك قد ثوى      فالصبر عنك لما نعت يسير  
ياليتنى من قبل يهلك صاحبي      غيبت فى جدث على صخور  
فلتحدث بدائع من بعده      يعنى بهن جوايح و صدور

ودعنا الوحى اذ وليت عنا      فودعنا من الله الكلام  
سوى ما قد تركت لنا هيناً      تضمنه القراطيس الكرام

ابو ذؤيب الهذلى نقل ايدركه مرض نبوى بي  
ايشديكمز زمان قبيله من خلقى خوف وكدره دوشديلى  
بن ده راحتسر لقله كيجه لدم. انجق سحره قارشى اويودم  
ايدى . حال بين النوم واليقظه لسان الغيب هاتقدن :

خطب اجل اناخ بالاسلام      بين النخيل و مقعد الآطام  
قبض النبي محمد فعيوننا      تدرى الدموع عليه بالتسبحام

كلماتى ايشيدهرك يرمدن صجرادم قالقدم . سمايه باقدم  
سعدالذاحدن باشقه برشى كوره مينجه انى عربده قريب  
الوقوع برزح ايله تاويل ايتدم و رسول الله صلى الله عليه

و-سلمك موتی ویا موت صرہ-سندہ ایدوکنی اکلادم  
 مدینہ سعادته کلام . اهل مدینہ-نک بانک و آہنک بکاء  
 واضطرابلرینی ایشیدہ-رک سینی صوردم [قبض رسول الله  
 صلی الله علیہ وسلم = رسول اللهک روح برقتوحی جنت  
 اعلاہ الندی] دیدیلر .

معاذ بن جبل رضی الله عنه دخی یمندہ ایدی . شو  
 ہنکامدہ برکیجہ یتاغندہ ایکن قولاغنه ہاتفدن: [یا معاذ  
 سن معیشتکی ناصل مبارک کورہ یورسک کہ حضرت احمد  
 سکراۃ الموتہ در] صداسنی ایشیدوب قیامت قویدی  
 ظنیلہ خشیت و دہشتلہ یرندن صچرادی . ہنوز سما  
 آچیق ونجومک یرلرنده ثابت وبرقرار اولدیغنی کورمکہ  
 [اعوذ بالله من الشیطان الرجیم] دیہ سویلدی .

بوندن برویا ایکی کیجہ صوکرہ ینہ ہاتفدن: [یا معاذ  
 سن معیشتکی ناصل مبارک کور یورسک کہ حضرت احمد  
 طوبراق التندہ در] صداسنی ایشتمکہ برابر همان یرندن  
 صچرایوب [واحمداء واحمداء] دیہ فریادہ باش-لادی  
 جوارندہ بولنان ارکک قادین چولوق چوجق یانہ کلدیلر  
 تسلیت واستفسار کیفیتہ چالشدیلر . معاذ ایسہ سسی چیقہ

بیلدیکی قدر و امحمداه دیه اغلامقدن باشقه برشی سویلما-  
مکده ایدی صباحه قدر فریاد ایتدی. صباحلین بر مقدار  
سویق ایلہ بر صوقابی آلہرق راحلہ سنہ بیلندی. مدینہ  
سعادتہ متوجہاً حرکت ایتدی. مدینہ یه اوچ قوناق مسافہ  
قالنجہ یه دکن صلات و قضاء حاجتدن باشقه برشی ایچون  
حيوانندن اینمکسزین مشی و حرکتده مسارعت ایلدی .  
اوچ قوناق مسافہ بریرده کیجه قراناغنده کلیر ایکن یولک  
صول طرفندن [ و امحمداه ] دیه بر فریاد حزین کلدی .  
تلاشندن کیمک صوت و صداسی اولدیغنی فرق ایدمدی.  
معاذ سسک کلدیکی جانبہ طوغری [ ایہا الهاتف یرحمک  
الله . کیمسک و بویله قرانلق کیجهده نرہ یه کیدیورسک ]  
دیہ سسلندی . [ عمار بن یاسرم ] جوابی کلمسیله معاذ یاننه  
واروب عمار اولدیغنی کوردکدن صوکره :

— « نه ایستیورسک یرحمک الله »

دیہ صوردی . عمار رضی الله عنه :

— « حضرت پیغمبرک موت و مفارقتنی حاوی

ابوبکر الصدیقندن سکا مکتوب کتوریور ایدم »

دیہ جواب ویردی. صوکره قونوشدیلر :

معاذ — « رسول الله وفات یدنبجه اصحابنك حالى  
ناصل اولدی »

عمار — « چوبانسز قویون سورسی کبی »

معاذ — « مدینه بی نه حالده براقده »

عمار — « اها ایسنی حلقه خاتمدن ده اطار بر  
خالده براقدم »

حضرت معاذ اغلیه اورادن مدینه پاک سعادت

کلدی .



## فصل خامس عشر

شمائل شریفہ نبویہ . بعض احوال و اخلاق سنیہ سی .  
 اولاد کرامی . اعمام و عمت فخامی . زوجات و سراری طاهراتی .  
 خدمہ و موالی و مولیات مکرمہ سی . کتاب و امراء و سفراء  
 عظامی . امناء و قضات و مؤذنلری . شعراء و حراس مسعودہ سی .  
 دواب و مراکب مبارکہ سی اسلحہ سعادتلری . ثیاب و اشیاء  
 فاخرہ سی . مراتب و طبقات اصحاب فخامی .

•  
•

۱

## -- شمائل شریفہ --

رسول الله صلى الله عليه وسلم افنديمى بروجود  
 ذى كمال برصنع بدیع صاحب الجمال ایدی . اورته بویلی  
 ایدی . قد لطیفلری اورته دن براز طولہ قریب کبی  
 کورینور ایدی . رنگلری قیرمزی یه مائل اسمر ایدی .  
 سر سعادتلری بیوک، دهان شریفلری واسعجه، وجه صیدیح  
 پاکلری آز چکمه وتابناک ایدی . کوزلرینک سیاهی پک

سیاه بیاضی پک بیاض ایدی . بیاضنده نوعما قیزیلاق ده  
 وارا ایدی که اوده کهنه واحبار ورهبانینجه معلوم اولان  
 علامت نبوتلرندن بری ایدی . ایکی قاشنک اراسی آچیق  
 ولحیه شریفه لری صیق و سیاه . اوموزلرینک اره سی واسع  
 ایدی . مبارک الاری و ایاقلری قالینجه ، صاچلری دوز  
 ، کردن شریفلری بللور کبی صاف و دیشلری سیرک  
 و اینجو کبی بیاض ایدی . تبسملری حالتده دیشلری  
 اره سیندن نور لمعان ایدردی . ایکی کتف سعادتلری  
 اره سننده برازده حذاء قلبده ککو کرچین یمورطه سی  
 جسامتنده برقرار جق . برلم پاره سی وار ایدی . او دخی  
 علامت مذکورده دن معدود و (خاتم نبوت) اسمیه مشهور  
 ایدی . وجود شریفنک مستور اولان قسمی علی الخصوص  
 بطن سعادتلری بم بیاض ایدی . قولتوغنک الی دخی  
 دیگر اعضاء شریفه سی کبی بیاض ایدی . قدم رسالتلرینک  
 بارماقلری ایچنده سیابه [۱] اک اوزون ایدی . دنیادن  
 مفارقتلری انشاده التمش اوج یاشنده ایدی . حالبوکه لحیه

[۱] اخراج الطبرانی والیهی عن میمونه بنت کردم قالت

رأیت رسول الله صلی الله علیه وسلم فما نسیت طول اصبع قدمه  
 السبابة علی سائر اصابعه .

سعادتلرنده آغارمش یکر می قیل یا وار ایدی یاخود  
او قدرده یوق ایدی شکل و تمثالده اصحاب کرامندن :

لحمسة شبه المختار من مضر  
یا حسن ماخولوا من شبهه الحسن  
بجعفر و ابن عم المصطفی قثم  
و سائب و ابی سفیان و الحسن

قطعه سنک جمع ایلدیکی (جعفر بن ابی طالب و قثم بن  
عباس و سائب بن عبید و ابی سفیان بن الحرث بن عبدالمطلب  
و حسن بن علی) رضوان الله علیهم حضراتی کندیلرینه  
بر درجهیه قدر بکزلردی . کذلک (مسلم بن عتب)  
ایله بنی سامه بن لؤبدن بصره ده (انس بن ربیعہ بن مالک  
البیاضی) دخی بکنزیانلردن ایدیلر . حتی انس بن مالک  
رضی الله عنه حضرتلری مذکور انس بن ربیعہ یی  
کور دیکی زمان همان بوینندن صاریله رق اغلامش و (رسول  
الله باقمق ایستیان بوذانه باقسون) دیمشدی .

جناب انس بن مالک رضی الله عنک شو معامله سنی  
معاویه رضی الله عنه استخبار ایدهرک شیهه مشار الیهی  
تزدینه جلب ایلیمشدی . حضورینه کتیر دکری دقیقه ده



ایاغہ قالقدی و بویئنه صاریلہرق ایکی کوزینک ارہسنی  
 اویدی . و تطیب خاطر ایچون کندوسنه برخیلی اموال  
 اعطا و بر مقدار اراضی بی اقطاع ایلدی . ابن ربیعہ  
 حضرتلری اموالی رد و اراضی بی قبول ایتشدی .

۲

## بعض احوال و اخلاق سنیه سی

رسول الله صلى الله عليه وسلم افندمن بنیه و مزاج  
 خصوصاً نده فوق العاده قوتلی ایدی . او قوتله متناسب  
 اولق اوزره عقلاً جمیع مخلوقانک ارجیح و اکلی رأياً  
 کافه عموم و خصوصک افضل ایدی . قلباً و لساناً ذکر  
 الله ایلہ دائماً مشغول و مشغولیتی اکثرندنده معلوم  
 ایدی . لغویات و مالا یعنیدن متجانب ایدی . حلیم و رؤوف  
 و هر کسله معاملہ سی ملایم ایدی . انسانلره قارشى دائماً  
 بشوش کورینور ایدی . هر کیم کدورات دنیو یه دن برینه  
 تصادف ایتسه مبارک دیدار نوارینی کوردیکی انده غموم و هموم  
 واقعه در حال زائل اولور ایدی . امثالمنز و اشباهمنز

صورتده ورع و زهد صاحبی ایدم. ناسک رب العالمینه  
 اعبدی و موطن ریب و شبهاتدن ابعدی ایدی . مبارک  
 الاری محرمی اولیا قادین الله اصلا و قطعاً طوقانما مشدر.  
 امت مرحومه یه صوک مرتبه ده شفق تلی ایدی . حتی  
 [ اللهم لاترنی فی امتی سوءاً = یارب امتمه فـالـق  
 کورمیهیم ] دیه نیـاز ایتـمش و حیاتـنده او یله برشی  
 کورما مشدر. زینت دنیا یه قارشی کوزی یوموق ایدی.  
 مد نظر و التفات ایتدیکی یوق ایدی. خائنة الاعین دخی  
 دکل ایدی چپلاق اولمزدی . غسلنده ده الله عزوجلدن  
 حیا سنه مبنی مستور بولنور ایدی .

قضاء حاجت زماننده انسانلردن اوزاق یرلره  
 قدر کیدر دیوار و یا اغاج کبی برحائلک وراسنه کچردی.  
 فضلاتنی ارض درحال بلغ ایدردی .

—

احقاق حقیقه نزد رسالت پناهیلرنده قریب و بعید  
 حاضر و غائب ضعیف و قوی شریف و وضع و سائل  
 مساوی ایدی . مسکینلری و فقیرلری سور و تلطیفلرینی  
 التزام بیورور ایدی .

فقيرى فقرى ايجون تحقير و بيوكه بيوكلكى ايجون  
تعظيم و اكرام ايتمزدى. اهل شرف ايله اصحاب كرامى  
اره سنده مباينت ظهورينه ميدان و برميهره دالما تاليفلرينه  
دقت بيورور ايدى. تبشير و تيسيره دلالت ايدن سوزى  
سور تنفير و تعسيره متعلق كلماندن خوشلاشمزدى.

امر تلبسده تكلف اختيار ايلمزدى. نه بولور ايسه  
اننى كير ايدى. اصحاب كرام دخى او طريقه يى مسلك  
ايدينوب على الاكثر پنبه دن و بمضاده يوكدن و كتماندن  
البسه كيرلردى. قماشلردن بردحيره ديزلان بر ديمانى  
مخطط نزد كراميلارنده مرغوب ايدى. بر آخر طرفندن  
كنديلرينه تقديم اولنان ائوابى اولدنى كى كير و استعمال  
ايدردى. شكل و هيئتى توسيع و يا تضيق ايتمزدى.  
پرىسى قوللرى طاربرجه و يرمشدى قوللرني كنشتمدى  
توضؤ زمانلرنده اننى اتكى التندن چيقاروب بيقار ايدى.  
اصناف لباسدن كوملكى سور ايدى. الواندن بياضى  
اختيار ايدردى. بياض جامه كييكزكه اطيب و اطهر در  
و ميتلريكزى ده بياض جامه ايله تكفين ايديكز ديه بيورور  
ايدى. خالص قيرمى و يا خالص سارى ائوابدن

ارککلی نهی ایدردی . قیرمزی آلاجهلی و یا یشیل  
آلاجهلی و یا سیاه آلاجهلی بردی کیر ایدی .

اکثر اوقانده بی لباسنی جمعه کونی کیر ایدی .  
و جامه سنی ابتدا صاغ طرفه کیر و صول طرفدن  
جیقاریر ایدی . یکی لباسنی کیدکده اسکیسنی بر مسکینه  
ویریر ایدی . مبارک باشنه بیاض عمامه و بعضاً سیاه  
صارار ایدی . بعضاً ایکی اوموزلری ارسندن بر علاقه  
صارقدیر ایدی . او علاقه بی بعضاً چکه بی التنه الیر ایدی  
عمامه بی بعضاً علاقه سر صارینور ایدی . بعضاً طاقیه سر  
عمامه صارار ایدی . بعضاً ده بونک عکسی عمامه سر  
طاقیه ایله اکتفا ایدردی . و بیاض و اوزون بویلی  
طاقیه شامی کیر ایدی .

روایت کوره هر کون صارندقلری عمامه نك طولی  
یدی و جمعه و عیدین کونلرنده کی عمامه نك اون ایکی  
ارشون ایدی . حرارتلی کونلرده مبارک باشنه طیلسان  
قویدینی اولمش و حضور شریفنده طیلسان وصف اولنور  
ایکن : [ هذا ثوب لایؤدی شکره ] دیه بیورمشدر .  
کوملک و جامه سنک کملری بیلمکسه و بعضاً ده یارمقلرینک  
اوجنه دکین اوزون ایدی . و کنشایکه مائل ایدی .

کوملك و جامه و ازارينك انكى نصف ساقنه دكين  
 ايدى . بعضاً طوپوقلرينه قدر ايدى . رداء سعادتلرينك  
 درت ارشون طولى وارايدى . ديكر روايتده ايكي ذراع  
 و يا ايكي ذراع بر قاريش ايدى . ديكر اقواله كوره  
 طولى آلتى عرضى اوج ذراع بر قاريش ايدى . ازارينك  
 طولى درت ذراع بر قاريش عرضى ايكي ارشون بر  
 بر قاريش ايدى . بعضاً دوكمه لى كوملك كيوب دوكمه سنى  
 ايليك كردي . بعضاً حله كيمه يي اختيار ايلردى . سفرلرده  
 يكلو جامه كير ايدى . عيد كونلرنده و اياچي كلديكي  
 كونلرده بعضاً قيمتلى و فاخر لباس كيديكي اولور ايدى .  
 اكابر اهل يمتدن (ذى زن) ك اوتوز اوج دوميه  
 صاتون آلهرق هديه كونلردىكي حله يي كيمشدى . بر  
 زمانده يكرمى طقوز دوميه ديكر روايتده نظراً يكرمى  
 يدى قيه نقره يه كنديسى بر حله آلمشدى . كندى ذات  
 فخرا لانا ميلرى همچون جامه نسج و اعمال ايتدردكلرى  
 و نزد عامله كيدوبده نسج و اعمالنك تعجيانى امر  
 بيوردكلرى ده اولمشدر .

عظماء رومدن برى مصنع بر كورك اهدا ايتمشدى . انى  
 بر كره كيوب صوكره جعفر بن ابى طالبه بخش ايلدى

جعفر او کورکی کی۔ دیکھی خالدہ حضور سے عادتہ کلنچہ  
افندمن [یا جعفر بونی کیسون دیہ سکا ویرمدم قرنداشک  
نچاشی بہ ہدیہ کوندرسون دیہ ویردم] دیہ بیوردی .

یشیل برجامہ سی وار ایدی . صرب ایلاچیلرینک  
کلدیکی کونلردہ بایرام و جمعہ کونلرنده کیر ایدی .  
کندیلرندن صوکرہ او جامہ خضرآء زیادہ کهنه لشمش  
اولدینی خالدہ خلفاء کرام ایام مذکورده تبرکا اوزرلرینہ  
آلوراورتنورلردی . جامہ خضرآءن باشقہ ایام مرقومہ ده  
بعضاً صاری و قیرمزی آلاجه لی حله کیر ایدی . سیاه  
برکسائی وار ایدی . صاچاقلی بر بردی ده وار ایدی  
اوطورور ایکن انکله احتبا ایدردی . صاغ النک سرچه  
پارماغنده قاشی آووجی ایچنه کلک اوزره خاتمی طاقنور  
ایدی . برخاتمی وار ایدی کہ قاشی عقیق ایدی حبشدن  
کتیرلمش ایدی . نعلین ده کیر ایدی . نعلینی مدبوغ  
صیغیر دریسندن معمول ایدی نعلیننک ایکی قاشی وار  
ایدی . بعضاً یالین آباق یورور ایدی .

اطعمه ده ده تکلف اختیار ایلمزدی . طیبیات  
اطعمه یی التزام ایتمزدی . حاضر بولدیغندن دائماً بسمله ایلہ

باشلار و اوچ پارمغيله ير ايدى. طعام ير كن مئكى و متربع اولمزدى. يا ايكي ديزى اوستى اوطورور و يا خود صول اياغنى الته آلور صاغ اياغنى ديكر طعامى اويله بر حال و هيئتده ير ايدى. فقرا و مسكينلر ايله و كندى خادملىله برليكه ير ايدى سفرده رقيقسز ياللكز يمسندن حظ ايتزدى. سفرده يمك همچون كنديسنه مخصوص قاب اولمازدى. كندى يديكى قابدن ديكر لرى ده ير لردى. كوله و جاريه و خادملىنه قارشى يمهده كيمه ده اوطورمه ده ترفع و تعظيم كوسترمزدى. همان برابر اولور ايدى. كندوسندن اول طعامه كيمسه ال اوزاتمزدى. طعامدن اول و صوكره اللرىنى بيقار ايدى و طعامدن فراغتندن صوكره پارمقلىرىنى يالار ايدى يالامدقجه منديله سيلنمزدى. منديلي باطن قدمى ايدى. اصحاب كرامنه دخى پارمق يالاملىرىنى و كاسه صيرملىرىنى امر ايدردى. ات ايله اكمك يديكى زمان اللرىنى تميز بيقار ايدى. و ارتان صو ايله وجه شريفنى مسح ايدردى. مرفع سفردهن طعام ايتزدى. كنارى قيريق كاسه دن يمزدى. صوغان و صرمساغى دخى يمزدى. قوقولرندن اكرام ايدردى. سوت ايله بالق اتى و سوت ايله حامض

شیلری اکلده جمع ایتزدی . صوغوق ایکی طعامی  
ولزوجتلی ایکی یمکی ده جمع ایتزدی . قاوورلمش لحم ایله  
پیشیرلمش لحمی وقورو لحم ایله نازه لحمی ده جمع ایتزدی  
سوت ایله یمورطینی و سوت ایله لحمی جمع ایتزدی .  
قابض ایکی ماده بی کذلک بریرده یمزدی . پک صیجاق  
یمکی دخی صوغوتمدقجه برکتسز دیه یمزدی مباح هیچ  
برطعامی تعیب ایتزدی . ایستکی وار ایسه یر یوق ایسه  
برشی یمزدی . بکنامک حالنی کوسترمزدی . بعدالعام  
او یومیکز زیرا قلبریکز قاتی اولور بیورمشدر آریه  
اوننی الکنن کچیرمز لردی . بین الاطعمه سودیکی لحم ایدی  
[لحم سمی زیاده ایدر دنیا و آخرتده سید الطعامدر]  
دیر ایدی ذراع و ظهره ده کی اتلری بکنور و :  
[اطیب اللحم لحم الظهر] دیه بیورور ایدی . شو قدر  
وار که اکل لحمه حریص و مداوم اولمازدی . لحمی برکن  
دیشیله قویاریر ایدی . ممکن اولدقجه بیچاق ایله کسمزدی  
ا کثر طعامی خورما ایدی کونده ایکی نوبت طعام ایسه  
بر نوبتی هر حالده خورما طعامی اولور ایدی . حلوانی  
بالی تره یاغنی سور ایدی . خورمایی سوت ایله قارشدیروب



یر و (اطیبان) دیه تسمیه ایدردی . قباغی سور ایدی  
 دماغه نافع اولدیغنی و عقلی زیاده ایدمه جگنی سویلردی .  
 حتی: [ اذا طبخت دباء فاکثری من مرقها فانه یشد  
 القلب الحزین ] دیه حضرت عائشه رضی الله عنہا به  
 بیوردقلری اولور ایدی . طعامدن تجره دیی طرفنی  
 التزام ایدردی . بعضاً یاغی اتمکله برابر یر ایدی .  
 غزوه تبوکده اوکنه قورو پینر کتیردیلر و یحیاق ایله  
 کسوب یدی . تازه خورما ایله خیاری و بطیخی یر ایدی .  
 بطیخی بعضاً اتمکله بعضاً ده شکر ایله یر ایدی . نزدنده  
 تازه میه و ملرک اطیبی بطیخ ایله نازه اوزوم ایدی . بر  
 صالحم اوزومی مبارک اغزینه آلوب و اوزوملرینی دیشلریله  
 صیروب یدکن صکره صابنی آغزندن آتدیغنی اولمش  
 و خیاری توز ایله یمشدر . سوده رغبتی وار ایدی . .  
 صوبی اوج نفسمده ایچردی . علی الاکثر اوطوروب  
 ایچردی . ایاق اوزرنده ایچدیکی ده اولدی . بر مجلسده  
 حاضر اولانلره برشی ایچیره جک اولسه بعضاً اک صوکره  
 کندوسی ایچردی بعضاً ده انک عکسنی یاپار ایدی قربه نک  
 آغزندن و قدح دلیکندن صو ایچمکی نهی ایدردی .  
 صووق و طاتلی صوبی سور ایدی . مدینه منوره به

ایکی منزل مسافده (سقیاء) منزلندن کندوسنه طاتلی  
صو کتیر دکری اولمشد.

سفر پنجشنبه، بعضاً بازار ایرتسی و پک نادر  
چهارشنبه کی چیقار ایدی کیجه سفرینی توصیه ایدردی.  
و کیجه یوربان بولجیلره ارض طی اولور دیه بیتورور  
ایدی. شو قدر وار که رفیقسنز کیجه سفرندن صوک  
درجده تحذیر ایدردی.

دیزلرینی دیکوب مبارک اللرینی دیزلرینک اوزرندن  
کمر کی بند بدهرک اوطوردینی اولور ایدی. بعضاً بر  
شیننه طایانیر بویه اوطورور ایدی. بعضاً ارقهسی اوستی  
یانار بر ایغیر دیکر ایغی اوزرینه قویر ایدی.

تکلمه سوزلری غایت حساب و تأنی اوزره  
ایدی. سوزنی دانه دانه سویلردی. حتی سوز سویلر  
کن کلمات و حرفاتی صایمق قابل اولور ایدی. صمت  
وسکوتی غایب ایدی. ثوابی قصد ایتدیکی برشیده سوز

سویلمزدی . سوزی احتیاجه کوره سویلردی . ا کشار  
 و اطنابدن و اخلال واملالدن احتراز ایدردی . صره سنه  
 کوره یعنی حاجت مس ایدرسه بر سوزی اوج کره  
 سویلردی . سوز سویلرکن مبارک الیله اشارت دخی  
 ایدردی . صاغ الک آیه سنی صول الک ایهامنک بطنی  
 اوزرینه وضع ایدردی . بر شیدن تعجب ایدرسه مبارک  
 الک آیه سنی منقاب ایدر . و دوداغنی ایصیریر کبی یاپار  
 و فیخذ شریفنی ضرب ایدردی . غصبی حائنده اعراض  
 کوستیر ایدی آثار غضب و انفعال مبارک بشره سنده  
 ظاهر و نمایان اولور ایدی و حال غضبنده لحظه سعادتلرینی  
 چوقجه الار ایدی .

سوز سویلرکن مجلس شریفنده بولنانلر کمال ادبله  
 سکوت و راسلرینی اطراق ایدرلردی .  
 اصحاب کرامک دنیا و اخرته متعلق بحث  
 ایتدکاری شیدن بحث ایدر تعجب ایتدکلرندن تعجب  
 ایدردی اصحاب کرام ایام جاهلیته عائد حکایات ایله  
 ضحک ایدرلرسه یا خاموش اولور یا خود تبسم بیورو  
 ایدی . بشوش اولقله برابر چوق کولمزدی فقط اکثر

احوالنده تبسمی غالب و دائم ایدی . و حیک نزول  
ایتمدیکی و یوم قیامت دوشونمدیکی و خطبه ده بولمادیکی  
ساعتلرده همان دائماً متبسم کورینور ایدی ضحکی علی  
الا کثر تبسمدن عبارت ایدی . . . نواجذی  
کورونه چک قدر کولدیکی نادرآ وقوع بولور و کوزینک  
یاشی حیة سعادتلرینه آقهرق آغلادیکی پک چوق اولور  
ایدی . فقط حین بکاده صیحه و نوحه ایلدیکی واقع  
دکلدر .

غریبک سؤال و کلامندن اولان اذیتنه صبر و تحمل  
ایدردی . کیمسه نك لاقر دیسنی کسمزدی . کیمسه یه  
سوز و یا غیری برشی ایله جفا ایتمزدی . اعتذار ایدنلرک  
عذرلری یالانده اولسه ینه نزد عالیلرنده قبول بیوریلور  
ایدی . و ( کیم که برمسلم برادری کندوسنه جرمندن  
معتذر و متصل اوله رق کایر اعتذاری یالان اولسون  
کرچک اولسون قبول ایدلمی یوقسه او عذری قبول  
ایتمیان بکا حوضده وارد و ملاقی اوله من ) دیری ایدی .  
اصراب کندوسنه کلام جافی ایله رفع صوت ایتسه لرده تحمل  
ایدردی . سیئه یه سیئه ایله مقابله دکل عفو و صفح ایله معامله  
ایدردی . اهل فضل و شرفه لایقنبجه و هر قومک کرام

و کریمہ اکرام ایدروانی حائز اولدینی شرف و کرمنہ  
 مبنی قومنہ والی تعیین بیورور ایدی . کندی ذوی الارحامنہ  
 دخی اکرام ایدردی . فقط انلری افضل اولانلرینک  
 اوزرلرینہ اینار ایتزدی . . اصحاب کرامنک خانہ لرینہ  
 واریر ایدی ، مجلس شریفندن منقطع اولانلری سئوال  
 و تفقد ایدر کوردیکنی زیارت ایلر خستہ بولنانی عیادہ  
 کیدر ایدی . بر مجلسہ واریر ایسہ بولدینی یردہ همان  
 اوطوریویریر ایدی . کندیسنہ موقع مخصوص تحری  
 ایتزدی . بریسی کندوسیلہ اوطورسہ یاخود بر حاجت  
 قونوشسہ او قالقوب کیدنجه قدر کندوسی بکلر صبر  
 ایدردی .

یہانجی براعربی اصحاب کرام ارہ سندہ ذات عالی  
 رسالت پناہیلرینی صور مدقجہ فرق ایدہ مزدی . اجلہ  
 اصحاب کرام ، ذات نبویہ بر صفت ممیزہ اولق اوزرہ  
 مسجد شریفہ بریری طوپراق ایلہ یوکسہ لتوب اوزرینہ  
 حصیر سردیلرکہ مسجد شریفہ بولند قجہ بونک اوزرندہ  
 اوطورور ایدی . اوطوروشلری علی الاکثر قبلہ یہ  
 قارشی ایدی و بوکا (سید المجالس) دیر ایدی . کیجہ

و کوندوز هیچ بر وقتنی یا الله تعالی به طاعت و عبادت  
و یا خود منافع عامه مسلمینه متعلق همتک غیری شایه  
کچیرمزدی . اوطون کسر و کسیدی اوطونی بیت  
سعادتنه قدر کتیر ایدی .

هیچ بر قالدینه و خادمه و دوهیه لمن و ضرب  
ایتماشدر بر کره خادمی چاغیردی . خادم جواب  
ویرمدی [ اکر قیامتده قصاص خوف اولسیدی سنی  
بن شو مسواک ایله ضرباً اجیدیر ایدم ] دیه بیوردیلر  
ایدی . هیچ بریتاغی و مندری تعیب ایتمزدی . نهی  
سرلرسه اوطورور ایدی سرملرسه یره اوطورور  
و یره یاتار ایدی .

جمیع احوالده هین ولین ایدی . فظ و غایظ دکل  
ایدی . سواققلرده شوراده بوراده کوراتی باتیردی ایتدیکی  
اولمدی . لعب مباحی کورور انکار ایتمزدی . یانسه کلن  
ضیف و مسافره اکراماً یا صدیغنی ویر ایدی . کلن  
ذات تأدباً ابا ایدرسه عزم و اصرار دخی کوستیر ایدی .  
کمدوسیه قرابت و سابقه معرفتی بولنمیان ذواته اوطورمق  
ایچون رداء سعادتنی آتدینی اولمشدر . ضیوفدن هیچ  
برطعامنی دریغ ایتمیوب بولدیغنی چیقاریر و بوله مزسه

ضیفه قارشى صمیمیتله اعتذار ایدردی . . ایکی حفید  
سعیدی حسن وحسین رضی الله عنهما ایله مداعبه انلری  
ظهر سعادتلرینه بیندیروب [نعم الجمل جملکما ونعم العدلان  
انما] دیدیکی اولمشدر .

—

مزاح و لطیفه ایلدیکی اولورایدی . بعض صبیان  
ایله و محرمی بولنان نسوان ایله ممازحه ایتدیکی واقع  
اولدی . انس بن مالک رضی الله عنه [یاذا الاذنین] دیه  
بیورمشدی . بر سفردہ حضرت عائشہ رضی الله عنها  
معیتمده ایدی . یولده اصحابی کرامی ایلری کوندروب  
کندوسی عائشہ ایله برابر کریلدی صوکره ایکیسی یولده  
مسابقه قوشدیلر . حضرت عائشہ هنوز ملحم اولمادیغدن  
مسابقه یی قزانهرق رسول اللهی قوشوده کچدی . باشقه  
بر سفردہ عین وجهله بر مسابقه دها یایدیلر . بوکره  
حضرت عائشہ کری قالمغله اقدمز [هذه بتلك] = بو  
اولمکنه بدلدر [دیہ بیوردی .

بر زمان نزد هایونلرینه بر قادین کله رک :

— «یا رسول الله زوجم سنی دعوت ایدر»

دیمکله اقدمز حدقه بصرده کی بیاضی مراد

ایده رک [سنگ زوچک کیمدر عجبا کوزنده آق اولان  
آدمیدر] دیه بیورمشدی .

نعیمان بن عمرو الانصاری رضی الله عنه ، صوک  
درجه ده لطیفه کار بر مرء معروف ایدی . بر کون بادیه دن  
رسول الله بر اصرابی نلیدی . دوه سی فناء مسجد شریفه  
باغلا یوب ایچری کیردی . بعض اصحاب نعیمانه :

— « شو دوه یی کسوب بزم یدیرم بیلورمیسک  
که بدائی صاحبنه رسول ویرسون »

دیدیلر . نعیمان همان او انده دوه یی کسیدی .  
اصرابی دوه سنگ حالتی کورورکن [واعقراء یا محمد] دیه  
حایقیردی . افندمز چیقوب سئوال ایتدی . (نعیمان) دیدیلر  
نعیمان ایسه قاچوب ضباعه بنت الزبیر بن عبدالمطلب خانہ سی  
جوارنده برخند قدہ صاقلانمشدی افندمز تعقیبه مسارعت  
ایلدی . اوراده بر آدم پارمغیلله خندقه اشارتله برابر  
[کورمدم یا رسول الله] دیه سسلندیکندن افندمز نعیمانی  
طوتوب خندقدن چیقاردی . و [نیچون یاپدک] دیه واردی .  
نعیمان : [بنی سکا کوسترنلر یاپدیردی یا رسول الله] دیدی  
رسول الله صلی الله علیه وسلم نعیمانک یوزندن طوبراغی  
سیلر هم کولردی . دوه نک اثمانی دخی تأدیه ایتشدیر .



صفيه بنت عبدالمطلب جنته کيرمک ايچون دما  
رجا ايتدی . رسول الله صلى الله عليه وسلم اکا [قوجه  
قاری جفته کيرميه جکدر] دیدیکنه بدن صفيه آغلدی .  
صوکره افندمن [عجائز دنیا او حالریله جنته کيرميه جکدر  
بلکه (انا انشاء ناهن انشاء فجمعلنا هن ابکاراً) آیت  
کيرمه سنک منطوقنجه تیز وکنج اولدقلری حالد  
کيره جکدر] ديه ايضاح ماده بيوردیلر .

خوات بن جبیر رضی الله عنه ايله بر سفرد  
مرالظهرانده نزول ایتشدی . خوات او محله بر طاقم  
قادینلری کوره رک طوغری یا نلرینه کیتدی او طوردی .  
انلرله مصاحبت به باشلادی .

او صرده خیمه سعادتلرندن چیه رق خواتی  
اولدینی موقعده کورمکله معرض انکارده :

— « یا ابا عبدالله اوراده نه یا بیورسک »

ديه سسلندی . خوات بر آز قورقه رق :

— « یا رسول الله سرکش بر دوم وار باغلامق

ايچون بونلره اورغان یاپدیرمق ایسترم »

دیرکن قالقدی . کندوسی بوکا باشقه برشی دیمدن

کچدی . خوات ده کلوب عقیب و اثر عالیده کیتدیکندن

رداء سعادتلرینی خوات طرفه کیری آتدی . قضاء حاجت ایچون ایلرولدی . عودتنده غایت معیندار بر وضع اوزره خواته باقهرق :

— « سرکش دوه بی نه یاپدک »

دیه بیوردنی . او منزله تصادف ایتدکجه خواته آزعین دوه سنک حالندن صورار ایدی .

مدینه یه عودتلرندن صوکره دخی هر راست کلدیکی محله سلام ویریر صوکر سرکش دوه سنک حال وخطارینی سؤال ایدردی . خوات ایسه توالی ایدن استفساره قارشى حجابندن ارتق نزدینه کله مامکه باشلدی بر مدت ده بویله کچدی . صوکره تنها بر زمان فرصتی بوله رق خوات مسجد شریفه کیردی . نمازه مشغول اولدی . اوراده افندمزده حجره سعادتن مسجده چیقوب ایکی رکعت نماز قیلدی خواته قریب اوطوردی قالقوب کیتیمی امید و ارزوسیه خوات نمازی اوزاتدی کندولری خواتک اومقصودینی درک و تفرس ایدم رک :

— « یا ابا عبدالله نقدر اوزادیر ایسه ک اوزات

سن بیتیرمدکجه بن ده کیتیمیه جکم »

دیه بیوردی . خوات تسکین خاطر عالی یه مدار

اوله بيله جك برعذر بولمغه قرار و یرمش اولدینی حالده  
سلام و یردی . او زمان :

— « السلام عليك يا ابا عبدالله او سرکش دوه یی  
نه یایدک »

دیه بیورلمقله خوات صوک درجه صمیمی برچهره  
و لسان ایله :

— « یا رسول الله اول الله حقیچون که سنی صدق  
ایله کوندردی مسلمان اولدیغم کوندنبرو او سر کشلک  
حال و عادتیی براقشدر »

جوانیی و یردیکنندن اکا [ رحمک الله ] دیه دما  
ایلدی .

مبارک صاچنی و صقالنی طارار و صاچنه یاغ  
سورر ایدی . فقط هرکون طارامن ایدی صاغ الی  
وضوء و طعامه مخصوص ایدی . صول الی دفع اذاء  
و استنجاده استعمال ایدردی . و یره جکنی و آله جغنی  
صاغ الیه و یریر و الیر ایدی . کیجه لری دیده پرنور  
سعادتلرینه اوچ کره کحل اصفهانی چکردی . بعضا صاغ  
کوزینه اوچ صول کوزینه ایکی کره چکردی سفره

کیتسه آینه طاراق مکحله و مسک قوطوسی مقراض  
 روغندان هپ برلکده کتوریلور ایدی خانه سنده هانکی  
 زوجه سنک حجره ونوبتنده ایسه اشیاء مذکوره او حجره یه  
 نقل اولنوب نزد هاپونلرنده بولندیریلور ایدی . تدویر  
 وجهدن و یوزده کی قیللری یولمقدن و باشند و صقالدن  
 اق قیللری قوبارمقدن نهی ایدردی .

—

بر کیمسه نک خانه سنه واریر ایسه قپو حذا سنه  
 طوغری طور مزدی . صاغ ویا صول طرفنده طور ورق  
 [ السلام علیکم السلام علیکم ] دیه استیزان ایدردی .  
 بر جماعت صبیانک و بر جماعت نسوانک یانندن کچوب  
 هر ایکی جماعته آری آری سلام و یردیکی اولدی .  
 مسلم و مشرک برلکده بولنان بر مجلسه دخی سلام و یریر  
 ایدی . هر یرده سلامه اول کندوسی باشلار ایدی .  
 کندوسنه سلام و یرلسه مثلله ویا دها افضلیله رد سلام  
 ایدردی . وقطماً تأخیره ایتزدی . سلامی و یرن آدمده  
 ایشیدیر ایدی . اشارنله اکتفا ایلدزدی . و سلامه جوابی  
 و او ایله [ وعلیک السلام ] ایدی . کیجه حجره سعادتنه  
 کیررکن اویانق اولانلر ایشیدمکک او یقوده اولانلری

اویاندر میه جق صورت و مرتبه ده سلام ویریر ایدی .  
 مجلسه کلیر ایکن و مجلسدن کیدرکن سلام ویریر ایدی .  
 مصافحه دخی عادت سینه لرندن ایدی . دیار آخردن  
 کلان ایله معانقه ایدردی . زید بن حارثه مکهدن و جعفر  
 بن ابی طالب ارض حبشه دن مدینه منوره یه کلدکاری  
 زمان انلرله و ابوذر الغفاری ایله معانقه ایتشدی .  
 عطشنده آوازینی آهسته ایدر و وجه صبیحنی  
 مبارک کیله اورتردی . و دست شریفلرینی قاشلری اوسته  
 قویر ایدی . حق تعالی عطشی سور اسنه کی مکروه  
 طوتر دیر ایدی .

مشى و سیرنده معتدل ایدی . سرعتله بطاوت  
 ارمه سنده وقار اوزره ایدی . بطاعتدن زیاده سرعته قریب  
 بر حالد . یوروشی وار ایدی . یورور ایکن ویا ایاقده  
 قائم ایکن بر طرفنه نظر و التفات ایده جک اولور لر سه  
 وجود شریفلرینک جمله سی ایله دوتر ایدی . یورور  
 ایکن یوکسکدن اشاغی بر محله اینر کی ایاغنی باصار ایدی .  
 اصحابیله بر لکده یورور ایکن [ دعوا ظهري للملائكة ]  
 دیه کندوسنی اک ارقیه بر اقدینی اولور ایدی .

سفر و حضردہ چپلاق واکرلی آتہ دومہ قاطرہ  
 حمارہ بیندیکي اولدی. غالب احوالده یالکیز پینر ایدی.  
 ترکیسنه حسن و حسینی و اولاد جعفردن یاخود کوله.  
 لرندن واصحابندن برینی الدینی ده اولور ایدی. هم اوکنه  
 هم ترکیسنه اطفالدن بر ذات الوب کندوسنک اورتده  
 خالیدینی اولدی. زوجات طاهره اتندن بعضی ترکیه  
 آلمشدی. چپلاق ایاق ایله رداسز و قلنسوه سز اقصای  
 مدینه یه قدر عیادت مرصا ایچون یورودیکي واقع اولمشدر.

مسکن خصوصنده اهتمامی یوق ایدی. صیجاق  
 و صووقی دفع ایدم جک و دواب و بهایم گرمیه جک و  
 خلقک کوزی کورمیه جک قدر بنا ایله اکتفا ایدردی.  
 کیجه یاته جفی زمان کوندوزه مخصوص البسه مبارکه لرینی  
 چیقاروب فراش سعادت نه ایسه اوستنه اوطورور  
 و مبارک ایکی اللرینک آیه سنی بریره کتوره رک اوفورور  
 و سوره اخلاص و معوذتینی اوقور و آیه سنی اعضاسنک  
 اوزرینه سورر کزديرير ایدی. صوکره صاغ جانبنه  
 یاتوب صاغ النک آیه سنی یوزینک صاغ جانبی التنه قویر  
 ایدی. کاه یتاقده کاه کلیم و یا حصیر اوزرنده کاه عبا

و بالاس اوزره بعضاده قوری یرده یاتار ایدی . برقات  
 بوکولاش عبادن عبارت اولان فراش سعادت قی برکیجه  
 حضرت عائشه رضی الله عنها برقات دها بوکوب درت  
 قات ایتیش اولدینی حالد افندمن یاتوب او یودی صوکره  
 بوزولدیغنی کوره رک ( نه اولدی یتاغمه بوکیجه اولکی  
 کبی دکل ) دیه بیوردیلر . حضرت عائشه درت قات ایتدیکنی  
 سویلرکن حال اولنه اعاده سنی افندمن امر ایتمشدی .  
 او یقو وقتده مبارک باشی النمه قویدینی ایچی خورمالینی  
 ایله طولو سختیاندن بر یاصدیق ایدی .

بیع و شرا ایلدیکی اولور ایدی ولکن بیعدن زیاده  
 شراسی چوق ایدی . برخیلی قویونی وار ایدی .  
 قویونلرینک یوزدن زیاده اولسنی ارزو ایتدیکندن  
 یوزدن آرتانی ذبح ایدردی ایام قبل النبوءه نفسنی  
 رعی اغنام خدمتی ایچون آخره ایجار ایتدیکی اولمشدر .  
 رهن ایله ورهنسز استدانه واستعاره ایلدیکی و ضامن  
 اولدینی وقوع بولدیغنی کبی براراضیسنی وقف ده ایلمشدی .  
 مجرد اتی ایچون توسعه مقصدیله سکساندن فضله مواضعده  
 یمین ایتدیکنی کوسترمشدر . محافل مسا کینده انلرله

اولان مصاحبتی اتساده اوزرینه کلان قلاتی نیاب  
شریفه سندن مبارک الاريله طوپلار ایدی .

انس بن مالک رضی الله عنه سفر وحضرده اون سنه  
متمادیا خدمت سنیه سیله مباحی و شرفیاب اولمشدی . شو  
اون سنه ظرفنده یاپدینی ویا یامدینی برشیدن طولایی  
یونی نهیه یاپدک یاخود نهیه یامدک دیه سویلمامشدر .  
ایشلری دائما اصحابیله مشاوره ایدردی . کندوسنی  
هرکیم اولور ایسه اولسون برشی ایچون چاغیریر ایسه  
همان کیدردی مدینه منوره نك الك اوزاق محلنه قدر خسته  
عیادتنه کیدردی . بیلدیکی و بیلمدیکی جنازه لره حاضر  
اولور ایدی . کمال ادب و حیاسندن اصحابی ارسنده  
اوطورور ایکن ایاغنی اوزاتدینی کورولما مشدر . نماز  
قیلرکن بری حضور هایونلرینه کیرسه نمازی تخفیف ایله  
بیتروب حاجتی صورار ایدی .

## ۳

## اولاد کرامی

ابراهیمدن باشقه جمیع اولاد ذکور و انانی خدیجه



رضی الله عنہا دن طوغمشلردر. دزت اولاد انانی بولندی  
متفق ومقطوع ایسده قاج اوغلی اولدینی اختلافیدر.  
بعض قوله کوره اوج دیگر اقواله کوره بش اولاد  
ذکوری وارد:

۱ قاسم — اول اولادیدر. قبل البعثة خدیجہ دن  
تولد ایدم رک عادة العرب اوزره افندیمن ابو القاسم کنیه سیله  
مکنی اولمشدر. قاسم اول اولادی اولدینی کنی اولادی  
ارم سنده اک اول وفات ایدن ده بودر. وفات سده صبی  
ایدی . . بریحق، ایکی یاشنه، آتہ بینہ جک سنہ کلدیکی  
حالدہ وفاتی مرویاتندز.

۲ عبد الله — بعد البعثة خدیجہ دن تولد ایدم رک  
کچوک ایکن وفات ایلمشدر. روایتلره کوره صدر  
اسلامده تولدی سببیلہ بدرعالیکهر لری اکا (طیب وطامر)  
اسمعی ویرمشدی. شو حالدہ او چنجی اوغلی ابراهیم اولمق  
لازم کلیور.

۳ طیب { قبل البعثة ایکنز اوله رق طوغمش برر

۴ طاهر { مخدوملری ایدوکی روایتک احتمال صحتی

جهتیه بویه قید ایدیورز.

۵ ابراهيم — جاريه سی ماریه قطیه رضی الله عنہا دن  
عالیہ [۰] محلہ سنده طوغمشدی صبی ایکن وفات ابتد بونک  
تولدی مستلزم سرور نبوی اوله رق یدنجی کونی صاحبی  
کسیدردی . آغیر لغنجه کموش صدقه ویردی وایکی قوج  
عقیقه ایلدی .

۶ زینب — رضی الله عنها قول صحیحہ کوره بیوک  
کریمه لریدر . وقعه فیلک اوتوزنجی سنه سنده وافیدمزک  
اوتوزنجی یاشلرنده تولد ایتمش و (ابوالعاص بن الربیع  
بن عبدالعزی) یه نکاح ایدلمشدر . وقعه بدرده ارالرینی  
افندیمز برکره تفریق ایتمشکن ابوالعاصک بالاخره قبول  
اسلامی اوزرینه نکاح اول ایله دیگر روایتہ کوره تجدید  
نکاح ایله زینبی یه اکا ویرمشدر .

۷ رقم — رضی الله عنها وقعه فیلک اوتوز اوچنجی  
سنه سنده قبل البعثه طوغمشدر . ابولهک بیوک اوغلی  
عتبه یه ، نکاح ایدلمش ایکن عتبه ، بوشایوب عثمان بن عفان  
رضی الله عنه تزویج اولمشدر . رقیه حضرت عثمان ایله  
برلکده ایکی کره حبشستانه هجرت ایتمشدی اولکی

[۰] العوالی ، موضع قریب من المدينه وكأنه جمع عالیه .

هجرتند حامله ایدی انشاء هجرتده یولده سقط جنین وقوعه  
کلوب صوکره عبدالله نامنده براوغلی اولمشدر .

عبدالله برروایتہ کوره ایکی دیگر، روایتہ کوره النی یاشنده  
ایکن برخروس غاغاسیلہ کوزنی اورمقلہ متأثراً وفات ایلدی . .  
رقیه رضی الله عنها رسول الله صلی الله علیه وسلمک بدر  
سفری ائنادہ ارتحال ایتمشدر [ بعدالہجرہ سنہ ۱۹ ]

۸ ام کلثوم — رضی الله عنہا ک اسمی آمنہ در .  
عتیبہ بن ابی لہب آلمشدی . . عتیبه دخی عتبہ کی  
قبل الدخول بوشایوب رقیہ نک ارتحالندن صوکره  
اوچنجی سنہ ہجریہده حضرت عثمان بن عفان رضی الله  
عنہ تزویج بیورلدی . فقط عمری وفاء ایتیمہ رک طقوزنجی  
سنہ ہجریہده وفات ایلمشدر .

۹ فاطمہ — الزہراء رضی الله عنہا کرائم مکرمہ  
سعادتلری ایچنده اک کوچوک واک سوکیایسی ایدی .  
بعدالنبوه خدیجہ رضی الله عنہا دن طوغمشدر . ام محمد  
کنیہ سیلہ مکنیہ ایدی .

سنہ ثالثہ ہجریہ نک رمضانده حضرت علی کرم  
الله وجهہ یہ تزویج بیوریلہ رق ذی الحجہده دیگر قوله

کوره رجب و یا صفرده زفاف اولمشد. حین زفافده  
اون بش و یا اون سکز یاشنده ایدی. اوج اوغلی  
اوجده قیزی طوغمشدی. ارتحال نبیدن آتی آی صکره  
وقات ایلدی. کتب متداولده مرویاتی اون سکز حدیث  
شریف اولوب بری. متفق علیه دیگرلری کتب احادیثده  
مرویدر.

ع

## — اعمام و عمتات فخامی —

اون ایکی عم مکرمی وار ایدی :

- ۱ هارث — اک بیوکلی ایدی. انکیچوندرکه  
عبدالمطلب ابو الحارث کنیه سبله  
مکنی ایدی.
- ۲ قثم — کوچوک ایکن وفات ایدی.

براندندر

- ۳ ابوطالب — اسمی عبد منافدر  
 ۴ زبیر — کنیه سی ابوالخارثدر  
 ۵ عبدالمکعب —  
 بونلروالدالنبی عبد الله  
 ايله برانانددر

- ۶ حمزه — رضی الله عنه  
 ۷ مقوم —  
 ۸ مهمل — مغیرهده دینیلیر ایدی  
 برانانددر

- ۹ عباسی — رضی الله عنه  
 ۱۰ ضرار —  
 بر بطندن ایدی قتمكده  
 بونلرله بطن واحدهدن  
 اولدیغنه دائر روایت وارددر

۱۱ ابولرب — اسمی عبدالعزی ایدی .

۱۲ غمیراق — مصعب دخی دینیلیر ایدی .

ایچلرندن عباس ايله حمزه رضی الله عنهما نك غیرى  
 شرف اسلام سببيله حائر نصاب فوز و فلاح اولان  
 یوقدر. التي نفردہ عمه سی وار ایدی :

۱ عانده — اسلامی اخلافلیدر .  
 بدرده هزیمت و فلاکت  
 قریشی رؤیاده کورن بو  
 ایدی .

۲ ام مکیم — البیضاء

۳ بره — ابورهم بن عبدالعزاک  
 زوجہ سی ایدی صوکره  
 عبدالاسد بن هلال  
 مخزومی به واروب اندن  
 ابوسلمه بی طوغوره شد  
 که ام المؤمنین ام سلمه  
 رضی الله عنها حضرتلری  
 بونک حباله نکاحنده ایدی

۴ امیه — جحش بن ربابک زوجہ سی  
 ایدی . اندن عبدالله عبید  
 الله ابو احمد زینب . ام  
 حبیبه وحنه بی طوغوردی .

عبدالله والدالنبی صلی  
 الله علیه وسلم ایله بونلر  
 براندن ایدیلر .

۵ ارری — اولای عمیر بن وهبه واروب اندن طلیبی

طوغورمش صوکره کلاه بن عبدمنافه وارمشدر . بر  
روایت کوره بوده عبدالله والدابی صلی الله علیه و سلم  
ایله دیکر روایت نظرأ حارث بن عبدالمطلب ایله بر  
انادن ایدی .

۶ صفیه — رضی الله عنها زمان جاهلیتده حارث بن  
حرب بن امیهك زوجہ سی ایدی . انك فوتندن صکره  
خریجه رضی الله عنهاك برادری (عوام بن خویلد) .  
واروب زبیر رضی الله عنه ایله سائب و عبد الکعبه یی  
تولید ایتمشدر . صفیه حمزه رضی الله عنه ایله بر والده دن  
ایدی عمت نبی ایچنده بوندن باشقه سنك مسلمان اولدیفی  
معروف دکلدر خیر غزوه سنده بولانه رق بر یهودی بی  
قتل ایتمش اولمسنه . بنی غنیمتدن کندوسنه حصه  
ویرلمشدی . یتش اوج یاشنده و حضرت عمر الفاروق  
رضی الله عنہك زمان خلافتده ارتحال ایدهرك بقیعه  
دفن اولمشدر .

۵

## زوجات و سراری طاهراتی

على اختلاف الروایات اوتوز و یا یکر می اوج امرئ

یا کیزمک خطبة النکاحی واقع اوله رق بونلردن بمضنک  
عقدی اولمش زفافی اولمامش بمضنک حقنده یالکز طلب  
ازدواج و فوج بولوب عقد حصـوله کلامش اون برینه  
دخول و شو اون برک بینی جمع [۱] بیورلمش در :

۱ ضمیمه — الکبری رضی الله عنها اک اول الدینی  
بودر . مقدما (عتیق بن عائد) المخزومینک زوجہ سی  
ایدی . بندن بر اوغلی برتیزی طوغدی . صوکره (ابو  
هاله بن النبشاش بن زرارة التیمی) به وارہ رق اندندہ  
ایکی اوغلی اولدی . ابو هاله دن طول قالمی اوزرینہ  
رسول الله صلی الله علیه وسلم بشیوز درہم صدق ایله  
نکاح ایتدی . کہ او زمان خدیجہ قرق کندی ذات اقدس  
ہما بونلری یکر می بش یاشندہ ایدی . ابراہیمدن بانقہ  
جمع اولاد کرامی بوندن اولمش و بونک حیاتندہ  
خوشنودلغندن ناشی اوزرینہ دیکرینی المامشدر . تاریخ  
نبونک اونجی سنہ سندنہ وفات ایدہ رک زوج کریمنی مکدر  
و محزون ایتمشدر .

[۱] ابن اثیر تاریخندہ زوجات مدخول بہانک اون اوچ  
اولدینی یازمش ایسہدہ جہور اہل سیر اون برندہ اتفاق  
ایدرلر .



۲ سوره — بنت زمعه رضى الله عنها مكده سكران  
 بن عمروك زوجہ سى ايدى. سكران دن عبدالرحمن اسمندہ  
 بر اوغلى وار ايدى . سوده زوجى سكران ايله حبشه  
 هجرت ايدنلر ميانندہ ايدى . حبشه دن معاودت لرندن  
 صوكره سكران فوت اولمغله تاريخ نبوتك اونجى سنہ سنده  
 درتيوز درهم مهر اوزرينه تزوج بيوريلوب بر سبیدن  
 طولايى تطلق و ياخود تطلقى تصور اوانديغندن نوبتى  
 حبيبة رسول اولان عائشه رضى الله عنها باغشلامق  
 اوزره محضاً زوجات طاهرات ميانندہ حشر اولمق  
 ارزوسيله سوده ك وقوع بولان نيازينه بناء طلاقدن  
 فراغت و ياخود رجعت بيورلدى مروياتى بش حديثدره  
 بريسى بخاريده متباقيسى سنن اربعه ده در. وفاتى حضرت  
 عمر الفاروق رضى الله عنه ك اواخر ايام خلافتندہ ايدى .  
 اوزون بويلو و بك جسامتلو اولمق مناسبتيله جنازه سى  
 امر عالى خلافتله كيجه وقتى قالديريلوب دفن ايدلدى .

۳ عائشه — [ ام عبدالله ] ( ۱ ) رضى الله عنها  
 خديجة الكبرى رضى الله عنها ك وفاتى سنہ سنك شوالندہ

[ ۱ ] اكننت بابن اختها عبدالله بن الزبير بأذن رسول الله لها

فى ذلك .

مکده التي ياشنده تزوج بيـوريلوب هجرتدن سکزنجي  
 آيد. وينه شوال ايچنده مدينه طيبه ده دخول و زفاني  
 اجرا اولمشدر. حين زفافده طقوز و ارتحال نبوي  
 زماننده اون سکز ياشنده ايدى . حضرت عائشه رضى الله  
 عنها فقها و فصحاء كرامدن ايدى. شعر و انسابه و قوف  
 كامل و علم و عرفانده غيرينه نصيب اولميان فضل العظيم  
 امتيازي وار ايدى . حقلرنده كي : [ خذوا ثلثي دينكم  
 عن هذه الحميراء ] فرمان نبويى فضل و كماله برهان  
 ايدى . هجرتك اللى سکزنجي سنه سى رمضانك اون  
 يدنجي صالى كيجه سى التمش التي ياشنده وفات ايتدى .  
 همان اوكيجه جنازه سى بقيعه دفن اولمشدر. اكثر اهالى  
 مدينه منوره جنازه سنه حاضر ايدى . نمازنى ابوهريره  
 رضى الله عنه قيلد يردى ، كندوسنى قبره برادر زاده لرى  
 (قاسم بن محمد بن ابى بكر) و (عبدالله بن عبدالرحمن  
 بن ابى بكر) اينديرديلر . مروياتى ( ۲۲۱۰ ) حديث  
 اولوب ۱۷۴ حديثى متفق عليهدر . بخارينك منفرد  
 اولدينى ۵۴ و مسلمك ۶۸ حديثدر .

ع مفسر — بنت عمر الفاروق رضى الله عنهما خنيس  
 بن حذافه رضى الله عنك زوجة سى ايدى ، خنيسك

بدرده الدینی یارم دن متأراً وقوع وفاتیلہ قلہرق صوکرہ  
 اوچی سنہ ہجریہ شعبانندہ امہات مؤمنین عدادینہ  
 داخل اولدی . حصہ . عبداللہ بن عمر رضی اللہ عنہما  
 ایلہ بروالدہن ایدی . بنیان کعبہ سنہ سنہ . بنی ناریخ  
 قبل النبوءتک بشنچی سنہ سنہ طوغمشدی بر . مسئلہدن  
 طولای طرف اشرف رسالتپناھیدن بر کرہ تطلق  
 اولمشدی فقط صوامہ وقوامہ اولمسی ایلہ برابر جنتدہ  
 زوجات طاهرانیدن بری بولمسی کبی اسبابہ منی امر  
 الہی ایلہ مراجعت بیورلدی . قرق بش سنہ ہجریہ سنہ  
 ۶۳ یاشندہ اولدینی خالدہ مدینہ وفات ایدہ رک اوزمان  
 معاویہ رضی اللہ عنہ جانبندن امیر المدینہ بولنان مروان  
 بن الحکم نمازینی قیلدیرمش و سریر نعلیندہ کیرمش  
 ودفندن فراغہ دکن کنار قبرندہ مکث و توقف ایلہ مشدرہ  
 مروایاتی کتب متداولہ ۶۰ حدیث اولوب دردی متفق  
 علیہدر . مسلم اتی حدیثدہ منفرد متباقیسی کتب سائرہ  
 مرویدر .

۵ زینب — بنت خزیمہ رضی اللہ عنہا مقدما طفیل  
 بن الحارث بن عبدالمطلبک زوجہ سی ایدی . وفیلک  
 تطایقندن صوکرہ برادر (عبیدہ بن الحارث) . واردی .

عبیده رضی اللہ عنہک دہ بدرده ایاغندن اوریلہ رق وقوع  
 شہادتی اوزرینہ طرف اشرف پیغمبریدن تزوج بیورلدی .  
 ازدواجدن سکز آی دیگر روایتلره کوره ایکی یا اوج  
 آی صوکره عازم دارنعم اولدی که زمان حیات هایونلرنده  
 بونکله خدیجه رضی اللہ عنہانک غیری زوجه سی وفات  
 ایتمامشدر . فقرا و مساکینه اولان بر واحسانندن ناشی  
 [ ام المساکین ] کنیه سیله مکئی ایدی .

۶ ام سلمه — هند رضی اللہ عنها ابو سلمه عبداللہ  
 بن عبدالاسدک زوجه سی ایدی . حبشہ یه هجرت ایدنلرک دہ  
 بری ایدی . ابو سلمه حضرت تلرینک احده الدینی  
 جریحه نیک تأثیریلہ وفاتندن صوکره ابوبکر وعمر رضی اللہ  
 عنہما طالب ازدواج اولدقلری حالده ام سلمه قبول  
 ایتمامشدی . رسول اللہ صلی اللہ علیہ وسلم دخی طلب  
 ایدرکن بو، مسنه و شديدة الغیره وام الایتام اولمسی کبی  
 اسبابی درمیان ایله برکره اعتذار ایتمش ایدی . اخیراً  
 موافقت کوستره رک نکاح اولمش و ام المساکین زینب  
 رضی اللہ عنہانک ترک ایلدیکی حجره ده زفافلری وقوع  
 بولمشدر . [ بعدالہجره فی شوال سنه ۴ ]

کربلاده حضرت حسین رضی اللہ عنہک وقوع

شهادتی خبر پر کدرینی الدینی زمان اهل عراقه لغت  
ایتمشدی . جمیع امهات مؤمنینک اک صوک وفات ایدنی  
بودر . هجرتک (۶۰) ویا (۵۹) سنه سنده (۸۴) یاشنده  
اولدینی حالده مدینه طاهرده وفات ایدوب بقعده دفن  
اولمشدر . کتب متداولده مرویاتی (۳۷۸) حدیثراون  
اوچ حدیثی متفق علیهدر . بخارینک منفرد اولدینی اوچ  
ومسلمک اون اوچ حدیثدر . باقیسی دیگر کتب حدیثدر  
مستور و مرویدر .

۷ زینب — بنت جحش رضی الله عنہا عمت نبویه دن

امیمه بنت عبدالمطلب قیزی ایدی . ابتدا کوله سی زید  
بن حارثه رضی الله عنه آلهرق زیدک تطلیقی اوزرینه  
انقضاء عدتدن صوکره رسول الله صلی الله علیه وسلم  
آلمش و آیت حجاب بونک بو ولیمه سی زماننده نازل  
اولمشدر . که هجرتک دردنجی سنه سی هلال ذی القعدہ سنده  
ایدی . زینب اوتوز بش یاشنده و قیصه جه بویلو برقادین  
ایدی . ارنحال نبویدن صوکره زوجات طاهرات ایچنده  
ذات اشرف رسالت پناهیلرینه اول لاحق اولان بودر .  
اوتہ دنبرو معلوم اولان اکثر بروحسناتی سببیلہ [ اطولکن  
یداً اسر عکن لحوقاً بی ] تبشیر کزینتک کندی حقنده

ایدوکی تظاهر ایلدی . هجرتک یکر منجی سنه سنده مدینه  
طاهرده ارتحال ایدوب بقیعه دفن ایدلشد . روایت  
کوره وفاتنده الی اوج یاشنده ایدی . مرویاتی کتب  
متداولهده اون بر حدیثدر . ایکی حدیثی متفق علیهدر  
متباقیسی دیگر کتابلرده مرویدر .

۷ جویریہ — رضی الله عنها بنی مصطلق رئیس  
حارث بن ابی ضرارک قزیدر .

اولجه عم زاده سی مسافع ذوالشفرین بن صفوانک  
زوجه سی ایدی . مرسیع غزاسنده زوجه سی مقتول  
اولمش وکندوسی اسیرآ ثابت بن قیس رضی الله عنہک  
حصه سنه دوشمش ایدی . جناب ثابت بونی بدل کتابته  
ربط ایلدیکندن جویریہ بنی مصطلق دیارنده معسکر  
اسلام اولان بردره کنارنده پیشگاه عالییه بالمراجعه  
تسویه و ایفاء دینه یاردم استمداد ایدرکن کندوسنک  
فوق العاده درجه سنده بولسان حسن و جمال و ملاحی  
نظر رغبت رسالتپناهی بی جلب ایدرک افندیز بدل کتابتی  
نابته تماماً ادا و تسایمدن صوکره جویریہ بی اعتاق وبعده  
تزوج ایلمشدره . که سنه خامسه هجریه شهرشعبانی ایچنده  
ایدی روایت کوره هجرتک الی التنبی سنه سنده التمش

بش یاشنده وفات ایدرك . معاویه رضی الله عنہك جانبدن  
 اوزمان امیرالمدينه بولسان مروان بن الحکم ، نمازینی  
 قیلدیروب بقیعه دفن ایدلمشدر مرویاتی یدی حدیثدر  
 دردی صحیحینده در ایکیسندده بخازی دیگر ایکیسندده  
 مستم منفرددر .

۹ ام حبیبه — رمله رضی الله عنها ابو سفيان  
 رضی الله عنہك کریمه سیدر . اولجه عیدالله بن جحشك  
 زوجہ سی ایدی . زوجی عیدالله ابتداء ظهور اسلام  
 ائناده مسلمان اوله رق ام حبیبه ایله برلکده حبشه یه  
 هجرت ایدنلر میاننده بولنش ایسه ده حبشه ده تنصر  
 ایدرك کافراً فوت اولمسیله ام حبیبه بلده سندن دور  
 وخصم وخویشانندن مهجور قالدیغندن اولبابده کی امر  
 واشعار عالی نبوی اوزرینه نجاشی حبشانی رسول الله  
 صلی الله علیه وسلمه تزویج ایلمشدر . عقد نکاح زماننده  
 (خالد بن سعید) ام حبیبه نك وکیلی ایدی . نجاشی مهر  
 اولق اوزره برروایتده دوت یوز زرسرخ دیگر روایت  
 کوره دوت بیک درهم نقره ویرمش خالد دخی بالوکاله  
 آلوب صاحبنه تسلیم ایتمشدر . نجاشی ام حبیبه رضی الله عنہایی  
 معیتنده رجاعات اصحاب کرام بولندیخی حالده شرحیل بن حسنه  
 رضی الله عنه واسطه سیله دربار نبوی یه اعاده ایلدیکی زمان برمکتوب

یازمش و بر کوه ملک بر طون برداء ، سیاه بر چفت چیزمه  
بر لکده هدیه افند مزه کوند رمشدر . شو ازدواج  
و قتده ام حبیه بر روایة کوره اوتوز یاشنده دیگر  
روایتہ نظراً دها فضله برسندہ ایدی . هجرتک قرق  
ایکنجی ویا قرق دردنجی سنه سنده مدینه طیبہ ده و قول  
آخره کوره شامده ارتحال ایدوب مروان بن الحکم  
نمازینی قیلدیر مشدر . مرویاتی ۶۵ حدیثدر ایکی حدیثی  
متفق علیه و بر حدیثده مسلم منفرددر .

۱۰ صفیه — رضی الله عنها یهود بنی نضیر اشرافدن  
حبیب بن اخطبک قیزیدر . انبیاء بنی اسرائیلدن هارون  
علیه السلامک نسلندن ایدی . اک اول سلام بن مشکمک  
زوجہ سی ایدی . سلامدن آیرلقدن صوکره کنانه بن  
الربیع بن ابی الحقیقه وارمش هنوز نازه کلین ایکن  
کنانه غزوہ خیبرده مقتول و صفیه اسیر اولمش ایدی .  
زیاده ملاحق نظر رغبت سنیه بی جلب ایشمش بولندی  
حاله اعتناق و بلده سی خلقنه الحاقیه بعدالاسلام ازدواج  
ارہ سنده مخیر برا غلمقله صفیه شق اخیری ترجیحاً قبول  
اسلام ایتدیکنندن افند منانی اعتناق و آزاد و عتاقی



مهر و گایینی یرینه اعداد ایدوب تزوج ایلدی. حیضندن  
 تطهردن سوکره اثناء عودت لرنده خیبره الی میل مسافه ده  
 (بتار) اسمنده کی منزله ارزو بیوریلان دخول وزفافه  
 صفیه امتناع ایتمش و اندن سوکره عین طریقک (صهبا)  
 منزله دخول بیورلمشدر. صفیه او زمان اون یدی  
 یاشنده ایدی. تاریخ وفاتنده اوج قول مختلف وارد  
 مرویاتی اون حدیث اولوب بری متفق علیهدر.

۱۱ ميمونه — بنت الحارث الهلالیه رضی الله عنها  
 عم النبي عباس رضی الله عنک ام الفضل بن بالیزی و اولجه  
 (مسعود بن عمرو بن عمیر الثقفی) نک زوجہ سی ایدی.  
 مسعود دن سوکره ابورهم بن عبدالعزی طرفدن تزوج  
 اولتمش ایدی. عمره القضا دن مدینه طاهره عودتی  
 اثناء افندیمز میمونہ بی آلہرق احرامدن چیقمش  
 اولدنی حالده یولک سرف نام منزله داخل قبة الزفاف  
 اولدی. تاریخ وفاتنده اقوال عیدہ وارد. تصادفات  
 غریبه دندرکه سرفده قبة زفافک موضعنده دفن ایدلمشدر.  
 مرویاتی ۷۶ حدیث اولوب ۷ حدیثی متفق علیہ و برنده  
 بخاری یاشنده مسلم منفرددر.

[ اشبو اون بر نساء مکرما تک شرف دخول عالی

ایله شرفیاب اولدقلرنده اختلاف یوقدر برقاج نسوان  
دها وارکه نکاحلری عقد واجرا اولنوب دخول واقع  
اولمامشدر : [

۱۲ فاطمه — بنت ضحاک الکلابیه درکه قبل الزفاف  
آیت تجویر نازل اوله رق اوده دنیایی اختیار ایتمه  
افندمن اندن مفارقت بیوردی . اوبد بنت بیچاره  
اخیراً اوילה بر حاله کلمشدی که فقر وفاقه و ضرورتندن  
اسواقده کوبره طویلر و : [ بنم حاملدن عبرت الیکز که  
دنیایی رسول خدای کبریا اوزرینه ترجیح ایدم رک بو  
فلا کته دوچار اولدم ] دیر ایدی .

۱۳ اسماء — بنت صلت بن حبیب یاخود  
( سنی = سناء ) بنت اسماء سلیمیدر که شرف نکاحه  
نائلتی خبرینی استبشار ایتدیکی آنده مسروریت فوق العاده  
سندن ناشی قبل الدخول ارتحال بیورمشدر .

۱۴ ام شریک — سلیمیدر که باباشی بونک جمال  
و ملاحظت فوق التصورینه مبنی عالمده یالکیز ذات اقدس  
رسالتپناهی به لایق اولدیغنی عرض ایدم رک طرف عالیدن  
دخی قبول بیورلمش ایکن : [ شایان تذکار بر وصف

کزینی دها وار که مدت عمر نده خسته اولما مشدر [سوزینی  
علاوه ایلدی . افدمز ام شریکک او حالندن خوشلا-  
نمیه رق : [لاخیر فی مال لایزراً منه وجسد لاینال منه]  
دیه انی رد و نکاحنی فسخ ایلما مشدر .

۱۵ مہیکہ — بنت کعب و یاخود بنت داود لیثیہ درکہ  
حین خلوتدہ فمخندہ کوردیکی بیاض شیدن طولایی  
نفرت و استکراہ ایدہ رک انی اہلی جانبہ اعادہ ایتما مشدر .  
۱۶ اسماء — بنت نعمان بن ابی الجون یاخود بنت  
النعمان بن الاسود بن شراحیل البکندیدرکہ باباسی نعمان  
پیشکام نبویدہ مسلمان اولقلہ برابر قیزینک حسن و جمالنی  
و شرف فراش عالی ایله تشرافی ارزوسندہ بولندیغنی  
سویلنسی اوزرینہ افدمز اون ایکی بحق قیہ مهر  
تسمیہ سیلہ نکاحنی طلب ایلدی . نعمان مہرک تزییدی  
استدعا ایتدی . افدمز او مقداردن فضلہ ایله کندوسی  
قیز ویرمدیکنی درمیان بی-وردی . بو مقدار مہری  
بکنمیورسہک ویرمہ کبی ایدی نعمان دہ قبول ایتدی .  
صوکرہ ( ابو اسید بن اسد الساعدی ) رضی اللہ عنہ  
برلکدہ کیدوب اسمایی کتیردی . حین زفاف و خلوتدہ  
رسول اللہ صلی اللہ علیہ وسلمہ قارشی اسمانک [اعوذ]

بالله منك [ دیمسی مستلزم نفرت اوله رق : ] لقد عذت  
بمعاذ = ایویره صیغندك [ دیه همان اورادن چیقوبانی  
اهلی نزدینه اعاده ایتمشدر .

۱۷ لیلی — بنت الخطیم در . افندمن برکون ظهر  
شریفی کونشده قاشی بر محله او طورور ایکن لیلی  
یاواشجه صوقیلوب ظهر سعادتق الیه شدتلی صورتده  
مس وضرب ایتدی . انك شو تعرض ناکهانینسندن ناشی  
افندمن بردنبره اورکه رك : [ کیمدر او قورت ییه سی ]  
دیویردی . بوده : [ لیلی بنت خطیم ] دیدی . و کندوسنك  
و باباسنك بعض مدایحنی سویلدکن صوکره ازدواج  
ایچون عرض نفس اتمکه کلدبکنی علاوه ایلدی . طرف  
ذیشرف پیغمبریدن قبول و تزوج بیورلدی . فقط  
قبیله سی طرفه عودتله ماجرای اکلادیر ایکن کندوسنك  
ازواج طاهرات ارسنده سوق غیرتله نبی اکرمه قارشی  
یایمسی احتمالی بولنان مناسبتسز لکك انكسار قلب عالی به  
سبب و بناء علیه فسخ نکاحك اولی و انسب اوله جنی  
بعض طرفدن درمیان ایدلمکله لیلی کیری کلدی . و فرقتی  
استدعا ایلدی . او استدعای دخی بالاسعاف نکاحی فسخ  
ایدلدی .

صوکره برینه واروب اندن اوغللری ده اولمشدی .  
 وقیله لسان شریف رسالتدن صدور ایتمش بولنان  
 دعانددرکه برکون مدینه بستانلرندن برنده اغتسال ایدرکن  
 اوستنه بر قورت هجوم ایدرک لیلابی تلف ایتمشدر .

۱۸ غزیه — ام شریک العامریه یاخود صریبه بنت  
 جابر الکلابیه درکه کندوسی طالب ازدواج اوله رق قبول  
 بیورلمدیغندن ارتحال نبوییه دکن اخره وارمامشدر .

۱۹ ام شریک — الانصاریه

۲۰ ام شریک — الشنباء بیت عمرو الغفاریدرکه قبل  
 الدخول ابراهیم بن النبی علیه الصلوة والسلامک وفاتی  
 وقوع بولوب (نبی اولسیدی اوغلی وفات ایتزدی)  
 دیدیکندن تطلیق اولنمشدر .

۲۱ قتیله — بنت قیسدر . مشهور اشعث بن قیس  
 الکندبنک همشیره سی ایدی . قتیله حضر موتده اولدینی  
 حالده برادری اشعث اتی ذات سمامی نبوییه تزویج  
 ایتمشدی . حضر موتدن مدینه پاک سعادته وصولندن اول  
 ارتحال عالی وقوع بولمشدر . انک وصولنده حجاب التنه  
 النوبامهات مؤمنین عدادنده قالمسی ایله مفارقت ایدوب

ارزو ایتدیکنه واره بيلمسی بیننده بالتخیر ترجیح  
و اختیارینه کوره معاملہ ایقاسی وصیت سنیہ اقتضای  
عالیسندن ایدی . قتیلہ ایسه سوق سیمبختی ایله شق  
ثانی اختیار ایدمرك حضرت و تده عکرمه بن ابی الجہل  
رضی اللہ عنہ و ارمشدر . ابو بکر الصدیق رضی اللہ  
عنہ انک شو ازدواج اخیرینی ایشتدیکی دقیقه شدت  
انکار و اکراهندن: [عقلمه کلدی که خانه سنی اوزرنده  
همان یاقدیر یوریمیم] دیه بیورمش حضرت عمر الفاروق  
رضی اللہ عنہ دخی قتیلہ نك دیوان امهاته داخل اولمديغنی  
علناً سويلمشدر .

۲۲ موره — بنت الحکم یاخود بنت الہزیل بن ہیرہ  
السلمیدر که روایتہ کوره نفسی هبه ایدن بودر مع مافیه  
عقد نکاح شرفه نائل اوله مامشدر .

۲۳ فاضہ — ام هانی بنت ابی طالبدر . ہیرہ بن ابی  
وہبک زوجہ سی ایدی . ہیرہ فتح مکہ کونی مہدر الدم  
اولدینی خالدہ قاچوب نجرانده دار آخرتہ کیتمش  
دیگر روایتہ کوره ام هانی قبول اسلام ایتمکله ہیرہ دن  
جدا دوشمش ایدی . صوکرہ افندیز طالب ازدواج  
اولدی . اوزمان ام هانی رسول اللہ صلی اللہ علیہ وسلمہ

قارشی عظیم و قدیم بر محبت صاحبی اولدیغنی غایت صمیمی  
لسان ایلہ اعتراف ایلہ برابر یاننده بولنان صیبانی سببیلہ لایقی  
مرتبه ده خدمت و رعایت ایدہ میہ جکندن قورقمقده ایدوکنی  
عرض ایدوب کیفیت: [خیر نساء رکبن الابل [۱] نساء  
اقریش احناء علی ولده و ارعاء علی زوج فی ذات یدہ ]  
دیہ تصدیق و تحسین بیـورلدی . بو یالکز بر طلبدن  
عبارت قاله رق نکاحی عقد ایدلامشدر .

۲۴ صمره — بنت حارث غطفانیدر . بونی باباسندن  
ایسترن باباسی احتمال که ویرمامک ایچون قیزینک مرضی  
اولدیغنی بهانه ایتشدی . حارث خانه سنه عودتنده قیزی  
دیدیکی کی مرض برص ایلہ معلول و مبتلا بولدی .  
۲۵ ضباعه — بنت عامردر که بنی قشیردن ایدی . عقد  
وزفافی اولمامشدر .

۲۶ صغیه — بشامة در الاعور العفرینک همشیره سی  
ایدی بونک دخی عقدی اولمامشدر .  
ام هبیه — بنت العباس رضی الله عنہ مادر که بوده  
عقدی اولمایانلر زمره سندندر .

درد ده جاریه مستفرشه سی وار ایدی:

۱ ماریه قبطیه در که مصر و اسکندریه حکمداری  
مقوقس کوندرمشدی. فرزند نجیبی ابراهیمک والدہ سیدر  
مقوقس بونی و بونک همشیره سی سیرینی بیـک مثقال  
التون یکرمی پاره طوب قماش و دلدل و بیاض بر حمار  
و بنها اسمنده کی محاک عمل مشهورندن بر مقدار ایله  
برابر اهدا ایتمشدی. بنهانک باله بر کتله دعا بیورلدی.  
ماریه بیاض تنلو بر جاریه جمیله ایدی. افندمنزانی سور  
وملک یمین ایله و تسری طریقله و طء و تصرف ایدردی.  
هجرتک اون الی سنه سنده وفات ایلدی بقیه عده دفن  
ایدلدی.

۲ ریحانه بنت زید بن عمرو در . بنی نضیر و یا بنی  
قریضه اسیرلندن ایدی . لدی التخییر دین اسلامی  
اختیار و قبول ایتدی. بوکا دخی ملک یمین ایله و طء و  
تصرف ایدردی . سنه حجة الوداعده وفات ایدرک بقیعه  
دفن اولندی .

۳ زلیخه القرظیه در که سبایان حصه سنه دوشمش  
ایدی .

۴ ام المؤمنین زینب بنت جحش رضی الله عنها بخش  
ایلمشدی .



— خدمه و موالی و مولیات مکرمه لری —

اول و آخر کندوسنه خدمت ایتمش اولانلرک  
رجالدن یکرمی یدی نسادن اون بر ذات ایدوکی  
مروی ایسه ده متفق علیه بر مسئله دکلدر. بز رجالدن  
یکرمی طقوز نسواندن اون بر ذاتک اسملرینی کوستره  
بیله جکزر.

۱ انس — بن مالک رضی الله عنه سفر و حضرده  
خدمت مستوجب المفخرة رسالتیناهی به اون سنه ملازمت  
ایدوب مال و اولادینک کثرتی و کندوسنک دخول جنتی  
حقنده: [ اللهم اکثر ماله و ولده و ادخله الجنة ] دیه  
دعا بیورلمشدر. ابو حمزه کنیه سیله مکنی ایدی. و نماز  
قیلشی ایله رسول الله صلی الله علیه و سلمه بکزرردی.  
(۶۳) تاریخنده یوز یاشندن متجاوز اولدینی حالده وفات  
ایتمشدر. احادیث شریفه دن مرویاتی چوقدر.

۲ ربیع — بن کعب رضی الله عنه رسول الله صلی  
الله علیه و سلمک آبدست صوینی و یریر و آبدستنه  
خدمت ایدردی. (۶۳) تاریخنده وفات ایلدی.

۳ عبد الله — بن مسعود رضى الله وساده ومسواك  
و نعلين و عصاء سعادتي خدمتي ايفا ايدردى اك زياده  
سواك و نعلين سعادته منسوبتي سبيله (صاحب السواك)  
ديه معروفدر كندوسى اجله اصحاب كرامدن و سابقين  
اوليندندر. بدر كبرى و مشاهد سائرمده حاضر بولمشدرد.  
ذات اقدس رسالتنا هينك بر طرفي تشریف ايدجى  
زمان نعلين سعادتي پيشگاه عاليده احضار ايدركيديرير  
وارقه لرى صره كيدوب افندمن اوطوردقلى اندم  
نعلين مباركى يردن قالديرمق ايكي قولى اوزرنده طوتار  
ايدى . (۳۲) تاريخنده مدينه منورده ديكر قوله كورمه  
كوفده وفات ايتشدرد .

۴ ايمه — بن ام ايمن رضى الله عنهما سفرلرده مطهره  
مباركه ي طاشير ايدى . يوم حنينده شهيد اولمشدرد .

۵ عقبه — بن عامر رضى الله عنه سفرده بغله  
سعادتي يذر كتورور ايدى كتاب الله و فرائضه عالم و  
فصيح شاعر ايدى . غزوه احده وجودى طقوز  
برندن يارلمش ايدى . معاويه جانبندن مصره والى  
اولدنى حاده (۵۸) تاريخنده مصرده وفات ايتشدرد .

۶ اسقع — بن شريك رضى الله عنه ناچه و راحله

سعادته خدمت ایدردی آیت تیمم بر قوله کوره بونک  
حقنده نازل اولمشدی . [°]

۸ بهول — بن رباح الحبشی رضی الله عنه مؤذن و  
نفقاته مأمور وکیل خرج ایدی .

۹ معد — رضی الله عنه ابوبکر الصدیقك آزادلوسی  
ایدی .

۱۰ معقیب — بن ابی فاطمه رضی الله عنه مهر دار  
ایدی .

۱۱ ابورافع — رضی الله عنه قبطنی الاصل یعنی  
مصری الاصل ایدی . و اولجه عباس رضی الله عنهمک  
کوله سی ایدی . حضرت عباس انی ذات سامی رسا -  
لتبناهی به هبه ایتمش ایدی . عباسك قبرل اسلامنی ابو  
رافع تبشیر ایدوب شوتبشیره مقابل کندوسی آزاد بیور -  
لمشدی . احوال واثقال سفرك محافظه سنه خدمت ایدردی .

۱۲ ذومحرم — رضی الله عنه نجاشی حبشك همشیره  
زاده سی ایدی .

[°] بعضلرك تدقیقاتنه کوره: اسامع بن شریک بن  
عوف در و آیت تیمم بونک حقنده اولدینی غیر مشهوردر .

۱۳ سفینه — رضی الله عنه ام المؤمنین ام سلمه رضی  
الله عنہا نک کولہ سی ایدی . یاشادینی مدتجہ سده سنیہ  
خدمت ایتمی شرطیلہ اعتاق اولنہرق کندوسی ده  
خدمتدن منفک اولمامشدر .

۱۴ مزاجر — رضی الله عنه دخی ام مشارالیهانک  
آزادایسی ایدی .

۱۵ ابوالحمراء — هلال بن حارث رضی الله عنه  
رسول الله صلی الله علیه وسلمک کندی آزادلیرنندن  
ایدی . حمصده وفات ایتمشدر .

۱۶ ابوزر — الغفاری رضی الله عنه سابقین اولیندن  
و شدت زهد و ورع اصحابیندن ایدی حقنده لسان  
رسالت ( ماظلت الحضراء ولا اقلت الغبراء من ذی  
لهجة اصدق من ابی ذر ) تقدیر کزینی شرفصا دار  
اولمشدر . (۳۲) تاریخنده ربذمه وفات ایدرک نمازینی  
صاحب النعل والسواک المودود عبدالله بن مسعود رضی  
الله عنه مؤمنیندن بر عصابه الیه برلکده قیلدی .

۱۷ بکر — بن شداخ اللیثی رضی الله عنه زمان صبا  
وتندبرو خدمت ایتمشدر . صباوتی حسیلہ حرم هایون .

رسالة دخی خدمت ضمتده کیرر چیقار ایدی . ایلاک  
دفعه اوله رق احتلام اولدیغنی کوردیکی انده کیدوب :  
[ یارسول الله چوجغم دیه حرم هایونه کیرر ایدم و لکن  
شمدی مبالغ الرجاله بالغ اولدم ] دیه عرض حال و حقیقت  
ایتمکله بکرك شو حرکت صداقتکارانه سی مستلزم سرور  
عالی اوله رق حقنده : [ اللهم صدق قوله و لقه الظفر ]  
دیه دعا بیورلمشدی . . حضرت فاروق زماننده فاعلی  
مجهول بر قتل وقوع بوله رق جناب امیر المؤمنین ،  
حادثه نك خلاف مرضیلمری ایدوکنی اعلام صدندده  
کیفیتی اعظماً منبره چیقدی و : [ انی مالوانی الله  
و استخلفنی بقتل الرجال اذکر الله رجلاً کان عنده علم  
الاعلمنی ] دیه بویابده برکونه معلوماتی بولنا نلرک بیلدکیرینی  
سویلملری لازم کله جکینی اخطار ایدرکن بکر ایاغه قالدقدی  
و معرض اعترافده : [ انابه ] دیدی . جناب امیر بوندن  
دها زیاده متحیر اولدیغنی حالده : [ الله اکبر بوٹ بدیه  
فها ت المخرج ] دیه سببنی سؤال ایتدی . او زمان بکر:  
[ اوت فلان غازی بنی اهلنه وکیل ایدوب کیتمشدی  
منزلنه واردم ایچریده او یهودی نی :

و اشعث غره الاسلام حتی خلوت بعمره لیل التمام

ایست علی تراشها و میسی علی قودالاعنة والحزام  
 کأن مجامع الربلات منها قیام یسمعون الی قیام ■  
 شعرینی سویلمکده اولدینی حالدہ بولدم] دیه سویلینجه  
 حضرت امیر بکری تصدیق ودعاءنبوی برکتیله اوزرندن  
 یهودی مقتولک دمنی ابطال ایتمشیر .  
 ۱۸ رباع — رضی الله عنه قبولره خدمت ایدر عبد  
 سیاه ایدی .

۱۹ اشخ بن شریک رضی الله عنه

۲۰ ابوالسمح ایاد رضی الله عنه

۲۱ نعیم بن ابی ربیعة الاسلمی رضی الله عنه

۲۲ ثعلبه بن عبد الرحمن الانصاری رضی الله عنه

۲۳ جزء بن مالک رضی الله عنه

۲۴ قیس بن سعد رضی الله عنه

۲۵ سالم رضی الله عنه

۲۶ سابق رضی الله عنه

۲۷ سلمی رضی الله عنه

۲۸ ابوسلام بن سالم رضی الله عنه

۲۹ هند  
 ۳۰ اسماء  
 حارثه نك اوغلاری ایدی

نسواندن خدمتجیلری :

۱ ام ایمن — برکه رضی الله عنها والد النبي عبد الله بن عبد المطلب  
میراث قلوب طرف ذیشرف نبویدن آزاد بی-ورلمش  
و حضرت عثمان رضی الله عنہک زمان خلافتنده ارتحال  
ایلمشدر .

۲ ماریه — رضی الله عنها متی بن صالحك جده سی  
ایدی .

۳ فوله — رضی الله عنها حفصك جده سی ایدی .

۴ سلمی — رضی الله عنها ابورافعك زوجه سی ایدی .

۵ ام عیاسمه — رضی الله عنها حضرت رقیه بنت  
النبي صلی الله علیه وسلمك آزادلیسی ایدی .

۶ امة الله بنت رزینه رضی الله عنها

۷ خضره رضی الله عنها

۸ رزینه ام علیه رضی الله عنها

۹ ماریه ام الرباب رضی الله عنها

۱۰ صفیه رضی الله عنها

۱۱ میمونہ بنت سعد رضی الله عنها

ذکوردن آزاد لیلری الی طقوز واثندن یالکنز  
طقوز ذات ایدوکی مزویدر موالی کرامی شونلردر :

۱ زید — بن حارثه رضی الله عنه جاهلیتده اسیر  
اولوب حکیم بن حزام عمه سی بولنان خدیجة الکبری  
رضی الله عنهایه الیویرمش خدیجه دخی انی رسول الله  
صلی الله علیه وسلمه ویردیکندن جناب رسول خدا زیدی  
آزاد اینمکله برابر ام ایمن رضی الله عنهایه اکا تزویج  
بیورمشدی . موته غزوه سنده شهید اولمشدر .

۲ اسامه — بن زید رضی الله عنهما زید بن حارثه نك  
اوغلیدر رسول الله صلی الله علیه وسلم بونی کندی اولادی  
کی سور ایدی . مدینه ده وفات ایلمشدر .

۳ ابورافع — اسلم رضی الله عنه

۴ مقراه — رضی الله عنک اسمی صالح ایدی .  
عبدالرحمن بن عوف باغشلامشدی .

۵ ثوبانه — رسول الله صلی الله علیه وسلمک حیاتنده  
معیتمدن منفک اولدی . ارتحالندن سوکره شام دیارینه  
کیدوب (۵۴) تاریخنده حمصده وفات ایلدی .

۶ ابوسع — انیسه رضی الله عنه بدرده بولنش و بدره



حرکت هایون اثناده بو و حمزه و زید بن حارثه و ابو کبشه  
بر دوهیه مناوبه رکوب ایتمشلردی .

۷ سیم — بن تلزین رضی الله عنه

۸ انجش — حدیده سفرندن عودتنده بونی اشترا  
ایتمشدی . امهات مؤمنین حضراسک سفرلرده بینهکلری  
را حله لری حداء و تغنیه سیله اسراع ایدردی . بوندن  
طولای ( انجشة الحادی ) نامیله معروفدر .

۹ رباع — رضی الله عنه بر عبد سیاه ایدی .

۱۰ یسار — رضی الله عنه صاغیلیر دوه لیرنی غابه ده  
کودر ایدی . عربیون طرفندن قتل ایدلمشدر .

۱۱ ابو موبهیم — رضی الله عنه

۱۲ ابو کبشه — رضی الله عنه مکده طوغمش  
بدر غزاسنه ابوسرح و دیگر نوبت رفیق لری ایله برلکده  
کیتمش و حاضر بولمشدر .

۱۳ سفیه — رضی الله عنه خدمه کرام میاننده ذکر  
کچمش اولان سفینه در یشاریفی مدتجه ذات رسالت پناهی به  
خدمت ایتسی شرطیله مقیداً ام سلمه رضی الله عنها  
طرفندن آزاد ایدلدیکنی اهل سیر یازیورلر . صوکره

برده موالی نبویه نك تعدادی صرہ سنده انلردن ایدوكنی  
 دخی تصریح ایدیورلر . سفینه شرط مسرود موجبینجه  
 خدمته ملازمت ایتدیکندن ناشی خدمه کرام نبویه دن  
 عد اولنه بیلیور ایسه ده نه وجه وکیفیتله موالیسی عدادینه  
 ادخال ایدلدیکنی بیله مدم . [\*]

۱۴ سلماره — فارسی رضی الله عنه قول مشهوره کوره  
 اصفهانیدر . مقربیندن و اهل بیت سعادتن معدود  
 ایدی :

لقدرق سلمان بعدرقه منزله شاحه البیان  
 وکیف لاوالمصطفی قدعه من اهل بیته العظیم الشان  
 بك چوق یاشلی اولدینی حاله هجر نك (۳۴) نجی  
 سنه سنده وفات ایلمشدر .

۱۵ مابور — مقوقس طرفندن هدیة کوندرلمشدی .  
 جوارى سعادتلرندن ریحانه رضی الله عنها نك حجره سی  
 قپوسنه مأمور ایدی . شو مأموریتنده کی اهمیتی ملاحظه  
 ایدمرك بالاخره هیچ برکونه تهمته محل قالماق فکری  
 ايله آلت تناسلی و جمیع متفرعاتی کندی ايله تماماً  
 کسمش ایدی .

[\*] قال بعضهم كان رسول الله اشتراه فاعنته وقال آخرون  
 اشترته له ام سلمة واعنته بشرط خدمته للنبي عليه السلام ما عاش

۱۶ مرعم — رضى الله عنه رفاعه اسمندہ بری  
ویرمشدی وادی القراہہ قتل اولنمشدر .

۱۷ ابو بکرہ — نفع رضى الله عنه طائف محاصرہ۔  
سندہ فرار ایدن کولہ لڑک آزاد ایدیلہ جکی اعلان اولنمسی  
اوزرینہ پیشکاه نبوی بہ قاجش اولانلردن بریدر . قلعه  
دیوارندن مقررہ ایلہ کندینی صارقیدوب اشاغی اینمش  
اولسی مناسبتیلہ طرف رسالندن ( ابو بکرہ ) کنیہ سی  
ایلہ تلطف بیورلمشدی .

۲۹ زید بن مولا	۱۸ فضالہ
۳۰ سعید بن زید	۱۹ رافع
۳۱ سعد	۲۰ رفاعہ بن زید الجزامی
۳۲ سندر	۲۱ کرکرہ
۳۳ عبداللہ بن اسلم	۲۲ ضمیرہ بن ضمیرہ
۳۴ غیلان	۲۳ ابو السمح
۳۵ نفیر	۲۴ ابو عید سعید
۳۶ کریب	۲۵ حنین
۳۷ محمد بن عبدالرحمن	۲۶ بدر
۳۸ محمد ناهیہ	۲۷ حاتم
۳۹ ابو مکحول	۲۸ عبید بن عبدالغمار

۴۰ نافع بن السائب	۵۱ افاح
۴۱ نهيك	۵۲ سابق
۴۲ ابواليسر	۵۳ سالم
۴۳ ابو قبيله	۵۴ عبيدالله بن اسلم
۴۴ ابو لبابه	۵۵ نيل
۴۵ ميمون	۵۶ وردان
۴۶ ابوكيسان هرمز	۵۷ كيسان
۴۷ ابو صفيه	۵۸ ابوايله
۴۸ ابو سامي	۵۹ ابو عسيب اسمي احمر
۴۹ شمعون بن زبد	و ياخود مره ايدى
۵۰ ايمن بن ام ايمن	

بولنرك بعضى شراء بعضى هبة الشمس بعضى ده  
 - بيادان حصه سنه دوشمش بولندينى حالده جمله سنى آزاد  
 بيور. شدى . آناندن اولان آزادليلى :

( ام رافع . ام ايمن . اميمه . خضره . رضوى .  
 ويحانه . ماريه . قيصر اخت ماريه . ميمونه بنت سعد .  
 ميمونه بنت ابى عسيب . ام عياش . ربحه . سائبه .  
 ام ضميره ) نام ذواتدر .



## کتاب و امراء و سفراء عظامی

کتاب کرامی بر روایتش کوره یکرمی الی قول  
آخره کوره قرق ایکی ذات ایدی . آثار سیرده بزم  
بولدیغمز اوتوز طقوز ذاندر :

ابو بکر و عمر — رضی الله عنهما

عثمان و علی — رضی الله عنهما کاتب وحی الہی

ایدیلر . . . . .

۵ عبداللہ — بن ابی السرح مکده کاتب وحی

ایدی . قریشدن ابتدا خدمت کتابتی بویفا ایتمشدر .  
فقط اخیراً قید و تسطیر آیات قرآنیہده بعض تصدیقی  
اوزرینه خوفندن ارتداد ایلمشدی . فتح مکدهن صوکره  
حضرت عثمان ذی النورین رضی الله عنہک توسط و شفاعتنه  
مبنی جرمی عفو اولنه رق عمر و حیاتنک صلات ایله  
ختم بولسی حقنده دعا ایتمشدی . . . صباح نمازینک  
سجده سنده ویا تسلیمه اولی ویا ثانیہ سنده تسلیم روح  
ایلمشدر .

۶ ابی — بن کعب رضی الله عنه سابقین انصار دندره

زمان حیات پیغمبریده حفظ قرآن ایدن اتی ذانک بری  
ایدی . اهل مدینه دن رسول الله اولاً کتابت ایدن  
بودر . اغلب احوالده وحی الهی کتابتی ایفا ایدردی .  
(۱۷) تاریخ هجریسند مدینه منورده وفات ایددی .  
عثمان ایله علی رضی الله عنهما نك حاضر بولندقلری یرده  
باشقه لری یازمهزلردی . انلرک غیابنده جناب ابی ایله زید  
بن ثابت کتابت وحی ایفا ایدرلردی . انلرده یوقسه کتبه  
وحیک هانکیسی بولنور ایسه او ، یازار ایدی .

رضی الله عنهما پیشگاه رسا-  
 ۷ معاریه — به ابی-فیانہ { لتپناهیده اک زیاده کتابت  
 ۸ نید — به ثابت { وحیه ، لازم ایدیلر . باشقه  
 وظیفه و خدمت لری یوق ایدی .

۹ طلحه — بن عبیدالله رضی الله عنه عشره مبشره-  
 دندر یوم احده یتش یردن زیاده محلندن قلیج وسونکو  
 واولق کبی مختلف آلا نك یاره سنی آلمش وصول النك  
 سبابه ویا بنصری کسیلهرک او الی چولاق قالمشدی .  
 یوم الجملده شهید اولمشدر .

۱۰ سعد — بن ابی وقاص رضی الله عنه دخی عشره دندر .

۱۱ عبیدالله — بن الارقم رضی الله عنه ملوکه و

سائر ایجاب ایدن محللره اولان مکتوبلری یازارایدی .

۱۲ ثابت — بن قیس رضی الله عنه یمامه غنہ اسنده  
شہید اولمشدرم . یلمہ عسکرندن بری قلیج ایله بونک  
ایاغنی دوشورمش بودہ مقطوع ایاغنی یردن قابہرق  
انکله قانلنی اوروب اولدیرمشدی .

۱۳ منظر — بن الربیع رضی الله عنه

۱۴ زبیر — بن لعوام } رضی الله عنہما دن زبیر عشرہ  
مبشرہ دندر بونلرک کتابتلری  
۱۵ مہرم — بن الصلت } اموال صدقاک . وردومصرفی  
یازمغه مخصوص ایدی .

۱۶ منیفہ — بن الیمان رضی الله عنه صاحب اسرار

رسول الله ایدی . خورما بستانلرینی یازار ایدی .

۱۷ مراد — رضی الله عنہما سعید بن العاصک

۱۸ ابانہ — اوغللریدر .

۱۹ ابوسفیان بن حرب رضی الله عنه

۲۰ یزید بن ابی سفیان بن حرب رضی الله عنه

۲۱ شر حیل بن حسنہ رضی الله عنه

۲۲ علاء الحضرمی رضی الله عنه

۲۳ خالد بن الولید رضی الله عنه

- ۲۴ جهم بن سعد      رضى الله عنه  
 ۲۵ علاء بن عتبة      رضى الله عنه  
 ۲۶ بريد بن الحبيب      رضى الله عنه  
 ۲۷ محمد بن مسلمه      رضى الله عنه  
 ۲۸ عمرو بن العاص      رضى الله عنه  
 ۲۹ عبدالله بن عبدالله بن ابي سلول      رضى الله عنه  
 ۳۰ مغيرة بن شعبه      رضى الله عنه  
 ۳۱ عبدالله بن رواحه      رضى الله عنه  
 ۳۲ معيقب رومي      رضى الله عنه  
 ۳۳ خويط بن عبدالعزيز      رضى الله عنه  
 ۳۴ عبدالله بن زيد بن عبد ربه      رضى الله عنه  
 ۳۵ خالد ابي ايوب بن زيد الانصاري      رضى الله عنه  
 ۳۶ حصين بن نمير      رضى الله عنه  
 ۳۷ ابوسلمه بن عبدالاسد      رضى الله عنه  
 عامر بن فهيره      رضى الله عنه  
 ۳۹ حاطب بن عمرو بن خنظله      رضى الله عنه  
 سفراء — روايته كوره اون ايكي ذات اولوب  
 ايجلرندن التيسى سنة سادسة هجرية ده و بر كونده ملوك  
 جانبليينه محررات سنه ايله اعزام اولتمشلردى :



( عمرو بن امیه الضمری رضی الله عنه ) نجاشی  
 حبشه ( دحیه بن خلیفه رضی الله عنه ) روم حکمداری  
 هراکلیوسه ( عبدالله بن حذافه السهمی رضی الله عنه ) کسرای  
 عجمه ( حاطب بن ابی بلتعنه اللخمی رضی الله عنه )  
 مصر حکمداری مقوقسه ( شجاع بن وهب ) رضی الله  
 عنه بلقا ملکی حارث بن ابی شمر الغسانی به ( سلیط  
 بن عمرو ) رضی الله عنه هوذه ایله ثمامه بن اثاله مأمور  
 اولدقلری حالده برکونده مدینه منوره دن حرکت ایتمشلردر.  
 عمرو بن امیه، نجاشی سفارتدن صوکره قیصر امراسندن  
 فروه بن عمروه دخی کوندرلمشدی .

مختلف زمانلرده کوندریلان سفراء سائره بونلردر:  
 عمرو بن العاص — رضی الله عنه ازد قبیله سندن  
 عمان حکمدارلری جانند اوغللری [ عیاذ یاخود عبد  
 ایله ] جیفره کوندرلمشدی .

علاء الحصرمی — رضی الله عنه بحرین امیری منذر  
 بن ساوی به اعزام اولنمشدی .

عروه بن مسعود — الثقفی رضی الله عنه طائفدن  
 ثقیفه سفیر ومبعوث ایدی .

جریر بن عبدالله البجلی — رضی الله عنه یممه

ذوالکلاع و ذوعمرک و عمر بن امیة الضمری ده . سیلمة الکذابک  
 دعوتلرینه مأمور ایدی . ابو موسی الاشعری و معاذ  
 بن جبل رضی الله عنهما و عقیبلرنده حضرت علی کرم الله  
 وجهه نك یمنه عزیمتلی مناسبته انلری و ( و بر یحس  
 بن محسن ) و ( حبیب بن زید بن عاصم ) رضی الله عنهما یی  
 سفرا دن عدایدنلر بولندیغنه کوره مجموعتک اون بش  
 اولسی لازم کلیمکده در .

صدقات عامللری — سنه تاسعه هجریه نك محرمنده  
 جمع و تحصیل صدقات ایچون بعض نواحی به کوندریلان  
 عامللری دخی بر نوع سفرا عدایله او میاندده یازان  
 بولمشددر .

عینه بن حصن الفزاری بنی تمیم صدقانه مأمور  
 ایدی . ( کعب بن مالک ) رضی الله عنه اسلم و غفار  
 قبیله لرینه ( عباد بن بشر ) رضی الله عنه سلیم و مزینیه  
 ( رافع بن مکیت ) رضی الله عنه جهینه یه ( عمرو بن  
 العاص ) رضی الله عنه بنی فزاریه ( عبد الرحمن بن  
 عوف ) رضی الله عنه بنی کلبه ( عدی بن حاتم ) طی  
 واسد قبیله لرینه ( ایاس بن قیس ) رضی الله عنه بنی سریه  
 ( مسعود بن رجیل اشجعی ) رضی الله عنه بنی اشجعله

بنی عبسه (عجم بن سفیان) رضی الله عنه عذرہ و سلامان  
 و بلی و جھینه و ابنا قبیله لرینه (عباس بن مرداس اسلمی)  
 رضی الله عنه بنی سلیم قبیله سنه (ولید بن الحاجب)  
 رضی الله عنه بنی دارمه (عاسر بن مالک) رضی الله عنه  
 بنی عامردن صمصعه قبیله سنه (سعد بن مالک و عوف بن  
 مالک و ضحاک بن سفیان) رضوان الله علیهم ده بنی کلابه  
 (بشر بن سفیان) رضی الله عنه بنی کعبه (عبدالله بن  
 اللتیبه) رضی الله عنه بنی ذبیانه و سعد بن هذیم قبیله سنه  
 بری ده قومنه مأمور ایدی .

امراء — بادان بن سامان امراء ایراندن یمنه والی  
 ایکن مسلمان اولسنه مبنی رسول الله صلی الله علیه و سلم  
 انی و لایتنده ابقا بیورمشدی . عجمدن ایلك اول مسلمان  
 اولان و اسلامدن ابتدا یمنه والی تعیین بیوریلان امیر ،  
 یوزاندر .

خالد — بن سعید رضی الله عنه صنعایه امیر تعیین  
 ایداشدی .

زیار — بن ابید رضی الله عنه حضر موت بلده سنه  
 امیر ایدی .

ابو موسی — الاشعری رضی الله عنه زبید و عدن  
بلده لری امیری ایدی.

معاز — بن جبل رضی الله عنه چند ولایتی و الیسی ایدی.  
ابو فیاہ — بن حرب رضی الله عنه نجران دیارینہ  
والی ایدی.

زیم — بن ابی سفیان رضی الله عنه تیم قبیلہ سی  
اوزرینہ حاکم ایدی.

عتاب — بن اسید رضی الله عنه عقیب فتحدم  
مکہ مکرمہ یہ ایلاک تعیین اولیان والی ایدی.

علی — بن ابی طالب کرم الله وجهہ یمن قضاسنہ  
امیر و قاضی ایدی.

عمرو — بن العاص رضی الله عنه عمان دیارینہ  
امیر ایدی.

ابی بکر — الصدیق رضی الله عنه امیر الحج ایدی.

\*\*\*

ۛ

### امناء و قضات و مؤذنلری

جملهٔ امناسندن بری (عبدالرحمن بن عوف و ابو  
اسید الساعدی) رضی الله عنہما درکہ ہر ایکیمی نساء

مکرماتی اوزرینه امین ایدیلر جناب عبدالرحمن احده  
یکرمی یرندن یاره آلمشدی. ابواسید الساعدی حضر تلی  
بدرده ملائیکه کی کورده رک بالاخره مکفوف البصر اوله  
نلردن بولندیفی کبی بدریون کرامک اک صوکره وفات  
ایدنی ایدی [ لوکنت معکم ببدر الان و می بصری  
لاخبرتکم بالشعب الذی خرجت منه الملائکه لاشک ولا  
اتماری ] دیه سویلدیکی اصحاب حدیث تخریج و روایت  
ایتملدر .

(بلال) رضی الله عنه نفقاتک و (معقیب) رضی الله  
عنه خاتم شریفک امینی ایدیلر .

قاضیلری — علی بن ابی طالب و مہاذ بن جبل  
وابو موسی الاشعری رضوان الله علیہم اجمعین حضراتی  
ایدی . هربری یمنده حکم و قضایه مأمور ایدی .  
مؤذنلری درت ذاند :

۱. بلال — رضی الله عنه ابتدا مؤذنک شرفی احراز  
ایلمشدر . انتقال نبویدن صوکره کیمسیه مؤذنک  
ایمبوب یالکز حضرت فاروق ک قدس شریفی فتح  
ایلدیکی کون برکره اذان او قوش و او قور ایکن ایشیدن  
مجاهدین کرام زمان مسعود رسول اللهی یاد و تذکرله

على العموم اغلامشردر .

۲ عمرو — بن ام مكتوم رضى الله عنهدركه حضرت  
بيعمبردن اول مدينه منوره به هجرتله رسول الله صلى الله  
عليه وسلمك مهاجراً قبايى تشريف بيوردقلى اتاده  
اذان او قومشدر .

۳ سعد — بن عائد رضى الله عنهدركه بودخى اذانى  
او زمان قباده او قومشدر .

۴ ابو محذور — اوس الجمحى المكيديركه فتح مكه  
عقبنده طرف پر شرف نبويدن جلب وتلطيف اولنه رق  
مكه به مؤذن تعيين بيورلمشدى . ابو محذور اذانى ترجيع  
و اقامتى نثنيه ايدردى . بلال اذانى ترجيع و اقامتى  
تفريد ايتديكندن امام شافعى بالاك اقامه سنى و اهل مكه  
ابو محذور مك اذانى و بالاك اقامتى امام اعظم حضرتلى  
ايلاه اهل عراق بالاك اذانى ابو محذور مك اقامه سنى  
اهل مدينه ايلاه امام احمد بن حنبل حضرتلى بالاك  
اذان و اقامتى اخذ ايلمشردر . امام مالك اعاده تكبير  
ونثنيه لفظ اقامتمده انلره مخالفت ايتمشدر .

## شعراء و حراس مسعوده سی

شعرا سی رجالدن یوز التمش طقوز نسادن اون  
ایکی ذات ایدوکی مروی اولوب (کعب بن مالک و عبدالله  
بن رواحه و حسان بن ثابت) رضوان الله علیهم حضراتی  
سر آمدانندن ایدیلر .

حارسلری اون ذاندیر :

۱ ابو بکر — الصدیق رضی الله عنه یوم بدرده  
خورما دالارندن معمول و مرتب اولان عریش التند  
قیلنجی النده بولندیفی حالد حراست ایلمشدر .

۲ سعد — بن معاذ رضی الله عنه انصار کرامدن  
واوس قبیله سنک رئیس و سیدی ایدی . بدر غزوہ سنده  
رسول الله صلی الله علیه وسلم اویقویه یاتدقجه عریش  
سعادتنک حول و اطرافنده بکلردی . احد و خندق  
غزالرنده ده بولنه رق خندق غزاسنده دیزندن الدینی  
اوق یاره سندن متأثراً و برآی صوکره شهیداً ارتحال  
ایتمشدر .

- ۳ محمد — بن مسلمه { رضی الله عنهما يوم  
 ۴ زکوانه — بن عبدالله بن قيس { احده بکله مشلدر.  
 ۵ زبير — بن العوام { رضوان الله عليهم  
 ۶ سعد — بن ابی وقاص { حضراتی غزوۀ احزابده  
 ۷ عمار — بن بشر { بکله مشلدر .

۸ مغیره — بن شعبه رضی الله عنه حدييه ده حراست  
 ايلمشدر .

۹ فاله — بن ابی ايوب الانصاري رضی الله عنه  
 وقعة خير دن عودت ائاده صهبا . نزلنده (صفية) رضی  
 الله عنهانك قبة الزفافی كيجه بکله مشدر .

۱۰ بول — رضی الله عنه دخی وادی القراده  
 حفظ و حراسته قائم اولمشدر . امر حراست نظراصحاب  
 کرامده معتابر وظيفه ایدی . فقط محفوظيت وجود  
 و حیات پيمبريسنك تکفل صمدانی تحتده ايدوکی اخيراً  
 [ والله يعصمك من الناس ] برات سبجانیسی ايله بيلديرلمسی  
 اوزرينه خدمت حراستی ترك ايتديرمشدر .



## دواب و مراکب مبارکه سی

اشیاء دنیا میاننده نسادن صوکره اک زیاده سودیکی  
شی آت ایدی . آک حقهده : [ الخیل معقود فی  
نواصیها الخیر الی یوم القیامة و اهلها معاون علیها . فخذوا  
بنواصیها و ادعوا بالبركة ] بهیور مشدر . امر جهاد و غزا  
ایچون بسنور برقاج آتلی بولور ایدی . مدت عمر  
ها و نلرنده آلدقیری آتلیك عدد و مقداری بکرمی درت  
اولدینی مروی ایسهده قاضی بدرالدین بن جماء نك :

والخیل سكب لحیف سبحة طرب

لزاز مرتجز ورد لها اسرار

بیتنده جمع ایلدیکی یدی رأس متفق علیهدر :

اسكب — اک اول آلدینی اک اول مالک اولدینی

و جهاد ایچون ایلک اول بیلدیکی آت سكب ایدی .

بونی بنی فزاره لی براهره ایدن اون اوقیه به ساتون آلمشدی .

صاحب اولنده ایکن سكبك خویسز افنه مبنی آدی (ضرس)

ایدی . تغییر ایله سكب تسمیه بیوردیلر .

کمیت یعنی قوله و محجل و طاق الیمین ایدی . آلی

بیاض آفته . لی ایدی . بر زمان بونکله بر مسابقه بی

قزاندیغندن محظوظ اولمشدی .

۲ حیف — ربیعہ بن ابی البراء طرفندن اهدا  
اولنہرق مقابلندہ افندمزدہ اکا بر قاج دوه احسان  
بیورمشدی . فروہ بن عمرو طرفندن کوندریلان آنک  
بوایدوکی دہ مرویدر .

۳ سم — و (بحر) بر آنک ایکی اسمی دیورلر . یمندن  
گلش بر جماعت ناجرلردن اشترا ایلمشدی . بونکله بر قاج  
نوبت مسابقہ یی قزانہرق مبارک الیلہ انک الذی صیغایوب  
(مانت الابحر) دہ بیوردی .

۴ طرب — فا الیلہ (طرب) وظاء معجمہ وباء موحدہ  
ایلہ (ظرب) دخی کوسترلشددر . بلقا امیری فروہ بن  
عمرو الجذامی ہدیہ کوندرمشدی .

۵ لزاز — مقوقسک ہدایاسندن ایدی اندیمز  
لزازی سودیکندن اکثر اسفاردہ اکا سوار اولور  
ایدی .

۶ مرتجز — قبر ایدی . کیشمنسی کوزل اولوق  
ناسبتیلہ مرتجز دینلدی . اعراب بنی مرہدن ویاخود بنی  
تمیمدن برندن صاتون آلمشدی . اصحاب کر آمدن خزیمہ

رضی الله عنک [ذوالشهادتین] اولمی بو آنک اشتراعی  
یوزندن ایدی : بازارلقدن صوکره اثمانی تدارک و تسویه  
ایتمک اوزره افندمن حجره مطهره لرینه طوغری سرعتله  
یورودی . صاحبی ده تعقیب ایده یورایدی . بعض اصحاب  
راست کلوب بازارلقدن خبرلری اولمقسزین فضلہ فیات  
ویره جک اولدیلر . بودفعه بایع فرس نقده طمعاً حیوانی  
انلره ویرمک نیتیله بیعی بالانکار افندمنک وقوع  
بولان ادعاسنه قارشى بینه طلب ایلدی . ایشته اوزمان  
خزیمه حصول بیع و اشترایه شهادت ایدمک رسول الله  
صلی الله علیه وسلم دخی حیوانک طرفنه تسلیمی لزومی  
امر و تنبیه ایتمش اولقله برابر انی [ لا بارک الله لك فیها ]  
دیه صاحبنه رد و اعاده ایتمشدر . بازارلقدن حاضر  
پولندینی حالده نه کیفیتله شهادت ایده بیلدیکنی صحابی  
مشارالهدن صوردی . خزیمه : [ یارسـوالله سـکا  
ایناندیغمدن ] جوابی ویردی . یالکز شهادتی ایکی رجلك  
شهادتی قوت و مشابه سنده حکمه کافی عد ایدمک اوزره اوزمان  
کندوسنه [ انت ذوالشهادتین ] دیه بر عنوان عالی شایان  
بیورلدقدن صوکره : [ من شهده خزیمه او شهد علیه  
فهو حسیبه ] دیه تنصیص کیفیت دخی ایلمشدی .

۷ ورد — کمیت ایلہ اشقرارہ سنده برطونده ایدی .  
 تمیم الداری اهدا ایدہ زک افندیمر عمر الفاروق  
 رضی اللہ عنہم بخش بیوردی اودہ اوزرنده فی سبیل اللہ  
 غنما اولتمق نیتیلہ غازیلردن برینہ تبرع ایتدی . غازی  
 او حیوانی زیاده جه زبون ایدوب اوجوز فیاتہ صاندی .  
 اوزمان حضرت عمرانی صانون المقایسترکن رسول اللہ  
 صلی اللہ علیہ وسلم منع ایتشدی .  
 دیگر آتترینکده [ اباق . ذوالعقال . ذواللہ .  
 مرتجل . مرواح . سرخان . یمسوب . نجیب . ادهم .  
 شحا . رسجل . طرف . مندوب ] اسمنده اولدقلرینی  
 روایت ایدرلر .

نافہ سعادتلری که بینک دوه لریدر روایتہ کوره  
 ( قصواء . جدعاء . عضباء ) ناملریله اوج ارلدینی  
 کوسترلمکده در .

قصواء — هجرت اثناده بوکا را کب ایدی . قصوایی  
 ابتدا ابو بکر الصدیق رضی اللہ عنہ بنی حریش دولرندن  
 صانون آلہ رق اثناء هجرتده تقدیم ایتمکله افندیمرانی  
 درتیوز دهم بدل ایلہ اشترا ایلدی . حضروسفرده بیتیکی

ناقه سعادتك قصوا نامنده اولديني كورولمكده  
 و (جدعا . عضبا) دخی قصوانك نام ديكرلری ایدوکی  
 بعض دلائلدن اكلاشلمقدمدر: مثلا آثار سیردن انسان  
 العیون و مماثلې بر اثر معتبری اله آلوب مبحث حجة  
 الوداعده مدینه طاهره لرندن کیفیت حرکتلرینی صره -  
 سیله تدقیق و تعقیب ایلدیکمز زمان کوریورزکه ذو -  
 الحلیفهده بر کیجه قالیور ایرتهسی کونك صلوة ظهري  
 ده انده قیلدقدن صوکره قصوا سوار عزرو وقار اولديني  
 حالده یوله چیقیور . . معیت همایونلرینه قصوادن باشقه  
 یدك ناقه الدقلربنه دائر نقل و روایت یوقدر . بونکله  
 برابر مکه مکرمهیه وصولنده (جدعا) یه را کبأ طواف  
 کعبه ایلدکاری و بطن وادی عرفهده (عضباء) اوستنده  
 خطبه یی او قودقلری و عرفانده هنوز قائم ایکن اقشاملین  
 (اليوم اکملت لکم دینکم) آیت کریمه سنك ثقلت نزوليله  
 عضد عضبانك اندقاقه مشرف اولديني روایتلرینه تصادف  
 ایدیورز. ودها صوکرده اسامه رضی الله عنہی ترکیسنه  
 الهرق عرفاتدن مزدافهیه ینه قصوا سوار اولديني حالده  
 کلدیکنی بولیورز . بناء علیه یدمکده فضله ناقه المدقلری  
 تقدیرینی بر کره قبول ایلدکدن صوکره یوله بویله

مختلف ناقه لره ركوب دخى قابل اولامیوب او صورنده  
هپسنگ بر ناقه یعنی قصوانك اسمی اولمسی لازم كله -  
جكنده اشتباه قالمیور .

—

كذلك مدت عمر لرنده مالك اولدقلى بغال همایونلری  
آلتی ایدی . بری (دلال) نامنده اوله رق مقوقس طر -  
فدن كوندرلمشدى . (فضه) اسمنده بولنان ديكړینی فروه  
بن عمرو الجذامی كوندره رك افنديمز ابوبكر الصديق  
رضی الله عنه بخش بیورمشدى برینی صاحب دومة  
الجدل برینی غزوة تبوك ائنده ايله امیری ابن العلماء  
ديكر ايكسنى نجاشی ايله كسری كوندرمشلردی .

بولردن يالکيز (دلدل) ارتحال نبوی زماننده دواب  
ومرا كب موجوده میاننده بولنه رق حضرت علی کرم  
الله وجهه خوارج ايله اولان محاربه سنده اکا را كب  
اولمشدر . اندن صوكره سبطین مكرمین و محمد حنفيه  
اللرنندن عبدالله بن جعفر الناکچمشدر . دللك كبر سندن  
ناشی اعمی اولمسیله برابر دیشلری دخی دوکولديکندن  
جناب ابن جعفر آریه منی ایزدیر ایدی .

عاقبت يذبح طرفلرنده بنی مدلجك بستاننه كيرديكندن  
بر شخصك آتدینی اوق اصابتيله فوت اولدی .

حميرلى اوج رأسدر: فمفیر مقوقسك يعفور فروه  
بن عمروك هديه سی ایدی. يعفور ياخود فمفیر حجة  
الوداعدن عودت انواده (نغمه) دینیلان مرض ايله فوت  
اولمش اوچنجیسی سعد بن عباده رضی الله عنه جانبندن  
هدیه تقدیم ایدلمشدی .

لقاح یعنی صاغیلیر یکر می رأس دوه سی وار ایدی.  
ایچلرندن طقوز رأسك اسملری: [حناء. سمرا. عریس.  
سعدیه. بغوم. یسیره. رینی. مهریه. برده] دیه مضبو -  
طدر. مهریه اسمنده کی دوه یی سعد بن عباده و برده یی  
ضحاک بن سفیان رضی الله عنهما هدیه تقدیم ایتشلردی  
هدیه سنه. مقابل ضحاکه سودلو ایکی دوه کوندرمشدی.  
لقاح سعادتلری نواحی مدینه طاهره نك (غابه) مرعا -  
سنده اوتلادیلور ایدی و هر اقشام انلردن بیوک ایکی  
قریه طولوسی سوت کلهرك زوجات طاهرانك حجراننه  
تقسیم اولنور ایدی .

صاغیلیر قویونلری ده : [ زمزم . سقیاء . برکه .  
ورشه . اطلال . اطراف . عجره ] اسمنده یدی رأس  
ایدی . یدی رأس ده کجیسی وار ایدی افندیمز کیجه  
هانکی حجره ده بیتوت بیورور ایسه کچیلر دخی اورایه  
کتیریلور ایدی فقط بوقدر موشی زمان ارتحاللرنده کی  
موجودیتی ایدی بوقسه مراکب مبارکسی بی بونلرده  
مدت عمر همایونلرنده بولدقلرینک مجموعیمی ایدی بر  
مسئله در قویونلرینک یوز رأسدن زیاده اولسنی ارزو  
ایتمدیکنه مبنی یوزدن آرتانی ذبح ایده کلدیکی روایتنه  
نظراً ارتحالاری ائنده کی موجودی دیمک یاقیشیور .

\*\*\*

۱۱

### اسلحة سعادتلری

او زمانده مستعمل اولان سلاح هر درلو سندن  
وار ایدی . قلینجاربینک عددی اختلافلی اولوب بعض  
اقواله کوره طقوز دیگر روایتلره نظراً اون عدددر :



ان شئت اسماء اسياف النبي فقد  
جاءت باسمائها السبع اخبار  
قل مخذم ثم جتف ذوالفقار وقل  
عضب رسوب وقای وبتار

قطعه سنده مذکوریدی عددن باشقه اهل سیر ایکی  
قلنج دها اثبات اوچنجیسنده اختلاف ایدرلرکه مجموعی  
علی اختلاف الاقوال اون عدد اولور.

۱ ماثور — پدرندن کندولرینه موروث ایدی .  
مدینه سعاده هجرت ایدرکن برلکده کتیرمشدی ماثورک  
جن معمولاتندن ایدوکی دخی مرویدر . اول مالک  
اولدینی بو اول قوشاندینی باشقندر .

۲ عضب — غزوة بدره حرکتده سعد بن عباده  
رضی الله عنه طرفندن هدیه تقدیم اولنمشدی .

۳ ذوالفقار — منبه بن حجاج سهمینک ایدی . بدر  
کونی اوغلی عاص بن منبه قوشانمش ایدی حضرت علی  
کرم الله وجهه انی قتل و ذوالفقارینی بیشکاه عالییه  
تقدیم ایتمکله اقدیمز کندولریچون اختیار بیورمش  
اولدقلری حالدہ اخیراً حضرت علییه بخش و اعطا

ایتمشدی که شاننده: [لافئی الاعلی لاسیف الا ذوالفقار]  
 دینیلان ذوالفقار بودر. قبضه سی باشی حلقه لری کموشدن  
 ایدی. اورته سنده فقرات ظهر کبی شیر وار ایدی.  
 اصلنك كعبه غندنده مدفون بر دیردن ایدوکی  
 روایتنه تصادف ایدلمشدر. حضرت علی به باغشلاینهجه  
 قدر هر سفرده افندیز بونی قوشانیر ایدی.

۴ صمصامه — عمرو بن معدی کربك مشهور بر

قینچی ایدی. خالد بن سعید بن العاص رضی الله عنہی  
 مأموراً یمنه کوندردیکی زمان افندیز اکا ویرمشدر.

قلعی بادیه ده (برج القلعه) اسمنده بر موضعه  
 منسوبدر. حتف بعض آثارده یاء مثناة  
 تحتانیه ایله حیف کوسترلمشدر هر اوچی ده بنی  
 قینقاعك اغتنام ایدی لان قلنجلرندن ایدی.

۸ رسوب — بلقیسك سلیمان علیه السلامه اهدا ایلدیکی  
 طقوز قلنجك بری ایدی.

۹ مخدوم — بونكله رسوب بنی طيك قایس اسمنده کی  
 صنمارینه معاق ایدی حضرت علی کرم الله وجهه  
 قلیسك بتخانه سنی هدم ایلدیکی زمان بونلری صفی مغنم  
 اوله رق افندمره تقدیم ایتمشدی.

۱۰ قصب — اول قوشان دینی قلنجك بو اولدینی  
روایت ایدلمسنه نظراً وقوشانق تمیرندن دخی غزا یولنده  
قوشانق مقصود دكسه بونك پدرندن موروث بولنان  
مأنور اسمنده کی قلنجك نام دیگرى و انكله بر اولمسی  
قولى ترجیح اولنور.  
یدی درعی وار ایدی :

۱ زاة الفضل — دمیردن ایدی . واوزون ایدی .  
غزوة بدره حرکتمده سعد بن عبادہ رضی الله عنه تقدیم  
ایتمشدر . اوتوز صاع ارپهیه مقابل بر سنه بر یهودیده  
مرهون قالان درع شریف ایدی . زمان ارتحال نبویده  
دخی مرهون ایدی صوکره حضرت صدیق دین مذکورك  
تسویه سیله رهنی تخلیص ایدوب حضرت علی غزو اتنده  
تبرکاً کیمشدر .

۲ زاة الوثام —

۳ زاة الخراسانی —

بوایکیسی بنی قینقاع غنایمندن ایدی . احد کونی ذاة الفضولی فضه ایله وحنین کونی سفیدیه ایله بری بری اوزرنده کیمشدی .	{ ۴ سعیدیه = سفیدیه — ۵ فضه —
--	-------------------------------------

۶ برآء — قصه ایدی

۷ فرنیق — یومشق ایدی

—

بشده قوس سعادتلری وار ایدی :

۱ بیضاء — { شوخط اغاجندن و بنی قینقاع غنیمتندن  
۲ روماء — { ایدیلر

۳ صفراء — نبع اغاجندن ایدی .

۴ زوراء — یوم احده افاندی بوکا کتوم دخی

دیرلردی .

۵ سار —

—

جعبه یعنی تیرکشی یالکز برایدی که جعبه مذ کوره نك  
اسمی ( نصله ) ایدی سخنیانندن بر قوشاخی و او قوشاغك  
کوشدن اوچ حلقه سی وار ایدی .

—

اتراس عایه لری یعنی قبقانلری اوچ ایدی :

۱ — زلوق

۲ — فتق

## ۳ — وفر

بر قلقان هديه كيتير مشلردى. او قلقانده قوچ باشى ويا  
طوشانچل شكل و تمثالنى كوروب شو صورتله اوزرندهكى  
تمثال ازاله ايديلان قلقان اسملىنى ذكر ايتديكمه زاتراس  
ثلثه نك برىميدر ديكريميدر اكللا شيله مدي .

—  
سؤنكولرينك عددى احتلا فليدر :

بنى قينقه اعدن غنيمت اوله رق ايكي يا اوچ رمح  
سعادتى وار ايدى . ديكرى : (مئوى = مئى) اسمنده  
ايدى . بو ايكي اسمك آيرى برر رمحه اسم اولدينى ده  
حرويدر .

—  
ايكى مغفري وار ايدى :

۱ — موشح

۲ — ذوالسبوع

يونلردن باشقه برده بيضه سى وار ايدى .

—  
بش حربيه سى وار ايدى :

۱ — نبعه —

۲ بیضاء —

۳ عنزه — کوچوک ایدی . زییر رضی الله عنه  
نچاشی حبشیدن الهرق بدر واحد و خیبرده استعمال  
ایتمشدر . خیبردن انصرافدن صوکره افندمن عنزه یی  
اندن آلمشدر . بایرام کونلرنده بلال عنزه یی اوکنجه  
کتوروب قبلکاه مصلایه رکز ایدردی . افندمن اکا  
طوغری نماز قیلدیریر ایدی . و بمض سفرلرده عین  
وجهله نمازده استعمال ایدردی .

۱۲

## اشیاء و اثواب طیبه سی

یوم ارتحاللرنده ایکی بردحیره و ایکی جا.ه صحاری  
وبرازار عمانی وبر قمیص سهجولی و برجبه یمنی وبر  
خیصه وبر کساء بیضاء و ورس ایله مصبوغ برماحفه و بر  
قاجده خرده طاقیه سی قالمشدی (ذقن) اسمنده اکری  
باشلی برصوبه سی وار ایدی . ناقه سوار ارلدینی زمان  
انی اوکنه آصار ایدی شوخط اغاجندن (ممشوق) اسمنده  
یرقضیبی و (ریان. مغیث) اسملرنده صواچمه که مخصوص

ایکی قدحی وار ایدی . اغاچدن معمول بر قدحی دها  
 وار ایدی که اوچ یرنده کموشدن زنجیرجکری و دیواره  
 اصمق ایچون آبروجه حلقه سی وار ایدی . سرچهدن  
 بر قدحی وار ایدی که مقوقسدن هدیه کلشدی . طاشدن  
 منحوت (مخضب) دیه بر چناغی (صادره) نامنده رکوه  
 یعنی ابرینی و باقردن بر طاس و (غراء) نامیله درت حلقه لی  
 بر قصعه یعنی تکنه سی وار ایدی تکنه یی درت آدم انجق  
 قالدیره بیلور لردی . کل و یازیت یاغی قویمغه مخصوص  
 اوفق بر ظرفی وار ایدی . آینه سی مقاصی مسواکی صقال  
 طراغی و سورمه دانی بر طبله دروننده ایدی . آینه سنک  
 اسمی (مدله) ایدی . طراغی دکنز بغه سی قابندن ایدی .  
 اوستنه کموش قابلامه لی دمیردن برخاتملری و ایکی اوچجکری  
 وار ایدی که برینه (صاع) دیکرینه (مد) دینیلوب صدقه  
 فطری انلرله اوچر لردی . ایاقلری ساج اغاچندن بر  
 سر بر لری و کموشدن دیکر برخاتملری وار ایدی شوخاتمک  
 قاشنده [ محمد رسول الله ] دیه محکوک ایدی . ایچلری  
 یوک یرینه خورما ایفی طولدیرلمش بر یا صدیق و بر  
 پالاسی وار ایدی . انی ایکی قات ایدوب اوزرینه کیجه  
 یاتار اوپور ایدی . برچفت موزه برال دکرمنی و اوقه

ویای قویتمه مخصوص برده کنانه سی وار ایدی. کنانه نك  
ایچنده بر ایکی اوق قالمشدی . بیاض بر و سیاه ده بر  
عمامه لری وار ایدی .

۱۳

## مراتب و طبقات اصحاب کرامی

کیمک صاحب النبی اوله بیله جکی حقنده آراء  
علماء مختلفدره . بعض علماء [حضرت رسول الله صلی الله  
علیه وسلم ایله برسنه برلکده بولنمیان و غزای ایتیمان  
اصحابدن معدود اوله من] رأینده بولمیدیلر . بعضی ده  
[بعدالبوغ رسول اللهی کوروب قبول اسلام ایدن و بر  
ساعت صحبت ایله شرفیاب اولان صحابه در] دیدیلر .  
دیگر بعض دخی [رسول الله ایله ارالرنده بر کونه  
تخصص حصوله کلمش اولمیان صحابی دکلدر] رأینی درنمیان  
ایلدیلر . اکثریت آرا ایسه مسلمان اولدینی حالد  
رؤیت دیدار بر انوار نبی ایله مسعود و بختیار اولانلرک  
نبوت صحابیتی طرفنده در .



اصحاب کرامک مقدار واعدادی دخی اختلافیدر.  
فتح مکة اثناده اون بیک وحنینده اون ایکی بیک غزوه  
تبوکده اوتوز بیک و حجة الوداعده یوز بیکدن فضله  
و انتقال وارتحال نبوی صروده یوز یکرمی درت بیک  
اصحاب کرامنک موجود ایدوکی مروی ومعلومدر.  
مهاجرین کرام علی الاطلاق انصار کرامدن افضلدر.  
شوقدر وارکه سابقین انصار مهاجریندن اسلامی تأخر  
ایتمش بولانلردن افضل اولوب طبقات نقطه سندن حضرت  
خدیجة الکبری و ابوبکر الصدیق و علی و زید بن حارثه  
و عثمان بن عفان و عبدالرحمن بن عوف و سعد بن ابی  
وقاص و زبیر بن العوام و طلحه بن عبیدالله و بعده  
ارقم و عمار بن یاسر و بلال حبشی و اسلحجه حضرت  
عمر الفاروقک اسلامندن اول انلری ولی ایدنلرله برابر  
اوتوز طقوز ذات برنجی طبقه . حضرت عمرک اسلامندن  
صوکره قبول دین ایله شرفیاب اولانلر ایکنجی . عقبه  
مناده ابتدا بیعت ایدن انصار کرام اوچنجی . عقبه ثانیده  
بیعت ایدن ذوات دردنجی . عقبه ثالثه اصحابی بولنان  
یتمش ایکی ذات بشنجی . رسول الله صلی الله علیه وسلمک  
مدینه سعادتلرینه هجرتلرنده هنوز قباده ایکن نزد

هایونلرینه کلوب واصل اولان اهل مدینه التنجی . بدر  
 غزا سنده حاضر اولان مهاجرین و انصار کرام که اصحاب  
 بدر دینیلیر یدنجی . بدر غزا سیله حدیبیه مصالحه سی  
 ارسنده مدینه سعادت هجرت ایدنلر سکزننجی . حدیبیه ده کی  
 شجره رضوان التنده عقد بیعت ایدنلر طقوزنجی .  
 حدیبیه وقعه سیله فتح مکه ارسنده هجرت ایدنلر اوننجی .  
 فتح مکه کونلرنده مسلمان اولانلر اون برنجی . ایام  
 حیات رسالت پناهی بی ادراک ایدن صبیان اون ایکنجی  
 طبقه عد اولنه جفی سیر نویسان کرام اثرلرنده یازمشر -  
 سهده عقبه طبقه لرینه یکدیگرینه و طبقه سابعه عد  
 اولنان اصحاب بدر ایله طبقه ناسعه اعتبار ایدیلان بیعه  
 الرضوان طبقه سنک طبقات سائر ایله وقوع تداخل لرینه  
 هر فصل سه برشی دیعام مشر در . والحمد لله علی کل الاحوال

۲ رمضان ۱۳۲۱ و ۸ تشرین ثانی ۱۳۱۹



فصل حادی عشر  
سکرتجی سند لکھنوی و قابلی

صفحہ	
۲	اسلام خالد و عمرو و عثمان
۸	غزوہ موتہ
۲۱	سریہ ذاة السلاسل
۲۷	سریہ ابی عیبہ [جہینہ علیہا]
۲۸	سریہ ابن الربی [نجدہ خضرہ]
۲۹	سریہ ابن الربی [بطن اضمہ]
۳۱	فتح مکہ
۱۱۳	بعث خالد
۱۱۵	غزوہ حنین و هوازن
۱۲۸	غزوہ اوطاس
۱۳۵	غزوہ طائف
۱۵۸	بعث عمرو بن العاص
۱۶۴	اسلام عروہ
۱۶۸	اتخاذ منبر
۱۷۰	اسلام جبلة
۱۷۰	اسلام فروہ
۱۷۲	ولادت ابراہیم نجل النبی علیہ السلام
۱۷۳	وفات زینب بنت النبی (صلی اللہ علیہ وسلم)
۱۷۴	توخ

## فصل تانی عشر

صحیفه

طغوزنجی سنهٔ لخمیه و قباہی  
(سنهٔ الوفود)

بعث عینہ	۱۷۵
وفود عذرہ	۱۸۲
بعث ولید بن عقبہ	۱۸۳
بعث عبداللہ بن عوسجہ	۱۸۵
بعث قطبہ	۱۸۶
بعث ضحاک	۱۸۶
بعث علقمہ	۱۸۷
سریہ علی	۱۸۸
اسلام ضمام	۱۸۹
اسلام کعب بن زہیر	۱۹۲
غزوہ تبوک	۱۹۵
وفود واسلام ثقیف	۲۵۷
وفود بنی فزارہ	۲۶۲
مکتوب حمیر	۲۶۶
وفات نجاشی اصحنہ	۲۶۸
وفات ام کلثوم بنت النبی (علیہ السلام)	۲۶۹
فوت منافق ابن سلول	۲۷۰
حج ابی بکر الصدیق	۲۷۳

## صحیفه

وفود بنی طی'	۲۷۷
وفود بنی کنده	۲۷۹
وفود همدان	۲۸۲
وفود بلی	۲۸۳
وفود مزبینه	۲۸۶
وفود بحیله	۲۸۷
وفود بنی تحیب	۲۹۱
وفود بنی اسد	۲۹۴
وفود بنی بهراء	۲۹۶
وفود بنی مره	۲۹۷
وفود بنی محارب	۲۹۹
وفود بنی عبس	۲۹۹
وفود ازد	۳۰۰
وفود بنی البکاء	۳۰۲
وفود بنی هلال بن عامر	۳۰۳
وفود بنی دارم	۳۰۶
فصل ثالث عشر	
ارتجی سنه' هجریه و ذابعی	
وفات باذان	۳۰۸
بعث ابی موسی و معاذ	۳۰۹
وفود بنی عبدالقیس	۳۱۳

وفات ابراهیم بن النبی علیهما السلام	۳۲۳
کسوف شمس	۳۲۵
بعث خالد	۳۲۶
سریه علی « یمنده بلاد مذحجه »	۳۲۸
وفود بنی حنیف	۳۳۴
وفود ازد شنوئه	۳۳۷
وفود نصارای نجران	۳۳۹
بعث ابی عبیده	۳۴۵
وفود بنی خولان	۳۴۷
وفود بنی مدلیج	۳۴۸
وفود بنی غسان	۳۵۰
وفود بنی غامد	۳۵۰
قدوم عدی بن حاتم طائی	۳۵۲
وفود سلامان	۳۵۶
وفود بنی متفق	۳۵۷
ورود اسود عنسی	۳۵۸
حیجة الوداع	۳۵۹
بعث جریر	۳۹۷
قدوم فیروز	۴۰۱
طلوع جبریل	۴۰۲



فصل رابع عشر

اوره برنجی سنه لهجریه و فایه	
وفود نخج	۴۰۴
ظهور متنبین	۴۰۸
سریه اسامه استغفار و مرض النبی	۴۲۴
انتقال و ارتحال نبوی	۴۶۳
فصل خامس عشر	
شمائل شریفه	۴۸۷
بعض احوال و اخلاق سنیہ سی	۴۹۰
اولاد کرامی	۵۱۳
اعمام و عمات فخامی	۵۱۷
زوجات و سراری طاهراتی	۵۲۰
خدمه و موالی و مولیات مکرمه لری	۵۲۸
کتاب و امراء و سفراء عظامی	۵۵۰
امناء و قضات و مؤذنلری	۵۴۷
شعراء و حراس مسعوده سی	۵۶۰
دواب و مراکب مبارکه سی	۵۶۲
اسلحه سعادت لری	۵۶۹
اشیا و انواب طیبہ سی	۵۷۵
مراتب و طبقات اصحاب کرامی	۵۷۷







